






Ex Bibliótheca
majori Coll. Rom.
Societ. Jesu



LES ANNALES DE


P. CORNILE TACITE
CHEVALIER ROMA^N,
des choses aduenues en l'Empire de
Rome, depuis le trespas d'Auguste.

*Les cinq premiers liars, iadis tournez par
M. Piemme de la Planche, Aduo-
cat en Parlement.*

ET
Le reste de nouvelle traduction, avec au-
notatiōs necessaires pour l'intelligēce
des mots plus difficiles, & remarquables.

A PARIS,
Pour Abel l'Angelier, tenant sa boutique
au premier pillier de la grand'
salle du Palais;

M. D. L X X X I.



Auue Privilege.



g-2-k-24



HENRY par la grace de Dieu Roy de France, &
 de Pologne, à nos amez & feaux, & Gillers les gës
 tenans nos Courts de Parlement à Paris, Thoulon-
 se, Bordeaux, Rouen, Dijon, Grenoble, Aix &
 Rennes, Preuost de Paris, Seneschaux de Lyon,
 Thoulonse, Guyenne, Anjou, Baillifs de Rouë,
 Orleans Touraine, & à tous nos autres Baillifs,
 Seneschaux, Preuosts leurs lieutenans & à cha-
 cun d'eux comme il appartiendra, salut & dilection. Nostre cher & bie
 aymé Abell' Angelier, Marchant Libraire demourant à Paris, nous
 a fait remonstrer que puis n'agueres il auoit recouuert vne traduction
 Françoisie des Histoires & Annales de P. Cornile Tacite, Laquelle
 ledit suppliant desirant faire veoir au public, nous auoit supplié luy per-
 mettre l'impression, mais d'autant qu'il doute qu'autre Imprimeur tant
 de nostre royaume qu'autres estrangers, par vne ambition & auarice le
 voulsissent imprimer & vendre, priuant par ce moyen ledit suppliant de
 ses labeurs & impenses. Nous auoit humblement fait supplier & re-
 querir luy pourueoir. Nous à ces causes desirans qu'une telle traductiõ
 sorte en lumiere, & vienne en euidencee par vne impression pour l'utilité
 publique. A iceluy l'Angelier auons permis & octroyé, permettons &
 octroyons que par tel ou tels Libraires, & Imprimeurs que bon luy sem-
 blera, il puisse & luy loyse faire imprimer, & vendre ladiette translatiõ,
 tant ancienne que moderne pour en faire un volume entier. Et ce durant
 le temps & terme de dix ans ensuyuans & consecutifs, à commencer du
 iour & daste que lesdits liures seront acheuez d'imprimer, durant lequel
 temps, ledit l'Angelier pourra faire imprimer, vendre, & faire vendre
 tant de fois & en tel nombre ledit liure que bon luy semblera: en maniere
 qu'il en puisse fournir à tous ceux qui en auront affaire, sans ce que pen-
 dant & durant le temps desdits dix ans, Aucuns autres Marchans Li-
 braires, Imprimeurs, ne autres quelconques, les puissent imprimer ne fai-
 re imprimer, vendre, ne distribuer ledit liure, ny aucune partie d'iceluy, en
 nos royaumes, pays, eccl'es, & seigneuries, sans l'expres cõg & cõsentemẽt
 dudit l'Angelier Si vous mandons & commettons par ces presentes, &
 à chacun de vous endroit soy, & si comme à luy appartiendra. Que de
 noz presens grace, eongé, permissiõ, octroy & vouloir vous fãictes, souf-
 frez, & laissez iour ledit l'Angelier, & ceux qui auront de luy charge,

d'imprimer ladite translation, iouir & user plainement & paisiblement durant ledit temps, ainsi que dessus est dit, en faisant ou faisant faire expresse inhibitions & deffences de par nous, a tous Imprimeurs, Libraires, & autres de quelque estat, condition, pays, ou nation qu'ils soyent, noz subiets ou estrangers: qu'ils n'ayent à imprimer, vendre, iroquer, debiter, tenir, n'auoir, soit en public ou priué, aucunes desdites translations, sur peine d'amende corporelle, arbitraire, & de confiscation desdits liures qui se trouueront ainsi imprimez par autres que par ledit Angelien, ou ayans de luy pouuoir, soyent tenez endieter, declaer, & nommer le personnage & le lieu de qui ils l'auront eu, pour estre contre luy procede par raison. Et à fin que personne n'en puisse pretendre cause d'ignorance, nous voulons qu'au deuant dudit liure, soit inseré vn sommaire & brief desdites presentes. Auquel voulons pareille foy estre adionsee qu'à l'original d'icelles. Et parce aussi que l'on pourra auoir affaire de cesdites presètes en plusieurs & diuers lieux, nous voulons qu'au vidimus d'icelles, fait & collationné par l'un de noz amez & feaux Notaires, & Secretaires, foy soit adionsee, comme à l'original. Auquel en tesmoin de ce nous auons fait mettre nostre scel. Donné à Paris le sixiesme iour de Iuin, l'an mil cinq cens quatre vingts vn: Et de nostre regne le septiesme.

Par le Conseil.

GOHORRY.




LE PREMIER

LIVRE DES ANNALES DE P.

CORNILE TACITE CHEVALIER RO-

main & tresexcellent Historiographe.



A ville de Rome a esté au commencement en la puissance des Roys. Lucius Bru^{Rey.} tus fut premier auteur de la liberté, & du Consulat. Les^{Consulat} Dictateurs estoient données^{Dictatu- res.} à certain temps. L'autorité des Decemvires ne dura^{Decemvires} plus de deux ans: & fut la puissance cōsulaire des Tri-^{Tribuns militaires}

buns militaires en peu de temps abolie. Les dominations tant de Cinna, que de Sylla eurent quasi aussi^{Cinna. Sylla.} tost prins fin, & a esté le pouuoir de Pompee, & de^{Pompee. Crassus.} Crassus en moins de rien transferé en la personne de^{Cesar.} Cesar. Finablement les armes de Lepidus & Antonius^{Lepidus. Antonius} donnerent incontinent lieu à la force d'Auguste: lequel en egalité de Prince vsurpa sous son empire toutes choses, rōpues, & ennuyees des guerres ciuiles.^{Auguste.}

Mais toutes les fortunes tant bonnes que mauuai-

LE I. LIVRE DES ANNALES

ses de l'ancien peuple Romain, ont esté amplement deduites par escriuains tres-excellents. Et n'y a eu faute de bons esprits pour escrire ce qui est aduenue du temps d'Auguste, iusques a ce qu'estant flaterie venue en credit & augmentation, ils ont esté par crainte destournez. Car les choses escriptes de Tibere, de Caius, de Claude, & de Neron (lors qu'ils florissoient) pour la pluspart sont faulses, pour la crainte qu'auoient d'eux les escriuants: & non moins celles qui depuis, & tost apres, ont d'eux mesmes esté mises en lumiere, estant encores fresche la haine & mauuais vouloir que lon portoit à ces Princes. Et pource

Auguste

ay-ie deliberé de parler icy quelque peu d'Auguste principalement de ce qu'il a fait sur la fin de son empire. Consequemment du regne de Tibere & autres, le tout sans ire aucune ou affection, pource ce que trop s'en faut que i'en aye les occasions.

Après doncques, que Brutus, & Cassius deffaits, ne resterent plus aucunes armes publiques. Après qu'estant rompu Pompee en Sicile, Lepidus depouillé de son armee, & Anthonius occis, ceux mesmes qui tenoient le party de Iules, n'eurent plus autre chef, qu'Auguste Cesar, iceluy (laissant le nom de Triumvire, & se disant seulement Consul, & content du droit de Tribun pour la deffence du peuple) après auoir gaigné les gens d'armes par dons le peuple par fournir de viures, & tous generalement par la douceur de repos: commença peu à peu à hausser ses cornes, & transferer en sa personne les charges, & deuoirs tant du Senat, que des loix & magistrats:

pour

pour n'estre lors aucun , qui y donnast empeschement , estants les plus hardiz & entreprenants tuez, ou en la guerre ou par proscription : & la reste des nobles (d'autant que plus ils s'estoient monstrez prompts à la seruitude) esleuez en richesses & dignitez. Lesquels voyants leurs biens augmentez par la nouueauté , & changement des choses, aymoient mieux leur fortune presente, & certaine , que l'anciëne, perilleuse & mal asseuree.

Les prouinces aussi ne trouuoient trop mauuais, que les choses allassent en ce ste sorte, ayans pour suspecte l'authorité tant du Senat que du peuple, pour ce qu'ils voyoient le support des loix, estre inualide, & de peu d'effect , & qu'elles estoient renuersees par force, par ambition, & par argent, à cause des querelles, & debats des plus grands, & de l'auarice des Magistrats.

Or Auguste, pour mieux appuyer sa domination esleua au pontificat & à l'Edilité Curule Claud. Marcellus *cl. Marcellus.* fils de sa sœur, encore qu'il fut fort ieune. D'auantage fait M. Agrippa homme de bas lieu (toutes fois fort experimenté en guerre & compaignô de ses victoires) Consul par deux fois, & le print pour son gendre aussi tost que Marcellus fut mort. Il esleua aussi Tibere Nero, & Claudius Drusus enfans de sa femme, & les fait nômer Empereurs, combien que sa famille fust encor toute entiere. Car il auoit adopté Caius, & Lucius enfans d'Agrippa en la famille des Césars, & n'ayans encores laissé leur pretexte auoit tâché de les faire nômer Princes de ieunesse, & destiner

cl. Marcellus.

M. Agrippa.

Tybere. Drusus.

Caius Lucius.

LE I. LIVRE DES ANNALES

Consulz pour l'annee ensuyuante, iacoit ce qu'il feist
 semblant de ne le vouloir, & de peu s'en soucier.

Peu apres la mort d'Agrippa L. Cesar (ainsi qu'il alloit à l'armee d'Hespaigne,) & Caius Cesar (retournât d'Armenie fort foible pour vne playe qu'il auoit receue) moururent tous deux, ou par leur trop hastiue destinee, ou par la fraude de leur marastre Liuia. Ainsi (estant Drusus long temps au parauant allé de vie à trespas) Tibere Neron estoit seul demouré des enfans de la femme d'Auguste. Au moyen dequoy, toutes choses commencerent à s'adresser vers luy : & fut pris pour collegue de l'empire, pour compaignon du Tribunat, & monstté par toutes les armées : non poinct par les secretes menées de sa mere (comme au parauant) mais par l'enhortement, & ouuerte suasion d'elle. Car elle auoit gaigné Auguste, de sorte qu'il auoit eüoyé son petit filz vnique Agrippa Posthume en exil, en l'isle Planasie. Lequel, bien qu'il fust lourd, & mal propre à beaucoup de bonnes choses, robuste, sot, & cruel, si n'auoit il commis chose qui luy peüst estre imputee à crime.

Agrippa Posthume.
Germanicus. Mais certes Germanicus filz de Drusus, fut faict Capitaine de douze legions es pays d'entour le Rhin. Et combien que Tibere eust vng filz assez ieune en sa maison : Auguste toutesfoys luy commanda d'adopter Germanicus, affin que par plus de monumentz, sa posterité fut confermee.

En ce temps n'estoit aucun bruit de guerre, sinon contre les Allemans : laquelle auoit esté entreprise, non tant pour amplifier l'empire, ou auoir digne re-
 com-

compense, que pour couvrir l'infamie encourue par la perte de Quintilius Varus, & de son armee. A Rome toutes choses estoient paisibles, les noms des magistratz n'estoient aucunement chagez : les plus ieunes auoient esté naiz depuis la guerre Actiaque, & plusieurs des plus anciens du temps des guerres civiles: au moyen de quoy y en auoit bien peu, qui eussent veu la Republicque lors qu'elle florissoit.

Estant doncq' l'estat de la cité entierement renouelée, toutes coustumes anciennes & entieres furent abolies. Vn chacun, toute equalité mise hors, regardoit seulement à executer les commandements du prince: sans que pour lors aucun se souciaist, tant qu'Auguste encor verd d'aage eust pouoir d'entretenir sa maison, & la paix ensemble. Mais quand il commença à deuenir vieil & maladié, & que pour sa fin qui estoit prochaine, plusieurs vindrent à entrer en nouuelles esperances. Aucuns commencerent en vain à parler du bien de liberté, plusieurs à craindre la guerre, & les autres à la souhaitter. La plus grande partie parloit en diuerfes sortes de ceulx qui deuoient en brief estre leurs seigneurs. Disoient qu'Agrippa estoit cruel, & ia irrité de l'ignominie qui luy auoit esté faicte: qu'il n'estoit suffisant à vne telle charge, tant pour sa ieu-
Tybere.
 nesse, que pour son peu d'experience. Quant à Tibere Neron, qu'il estoit d'aage competent, asles expérimenté en guerre: mais entaché de cest ancien orgueil enraciné en la famille des Claudians, Qu'en luy apparoiſſoient plusieurs signes de cruauté iacoit ce qu'ilz fussent dissimulez, Que des ses premiers ans il auoit

LE I. LIVRE DES ANNALES

esté nourry en maison apprise de regner, Qu'estant ieune il auoit plusieurs fois esté consul, plusieurs fois triüphé, & mesmes que du tēps auquel soubz vmbre d'estre enuoyé à l'esbat, il s'en estoit allé en exil à Rhodes: il ne machinoit en sa pensee sinon ires, dissimulations, & paillardises secretes, Oultre tout cecy quil auoit vne mere subiecte aux passions feminines. Au moyē dequoy leur faudroit seruir à vne femme, & à deux ieunes iouuenceaux, lesquels estoiet pour quelque fois opprimer & mettre à neant la republicque.

Sur ces entrefaictes la maladie d'Auguste cōmença à se rengreger, & se suspecōnoient aucuns de la meschanceré de sa femme. Car le bruiet auoit couru, que peu de temps au parauant, s'estant Auguste declairé à quelques vns de ceux ausquels il se fioit le plus, s'estoit faict conduire en l'isle Planasie, pour visiter Agrippa, accōpagné seulement de Fabius Maximus: que la y auoit eu plusieurs larmes iectees rāt d'un costé que d'autre, & y estoient interuenuz autres signes de charité & amour. Au moyen dequoy y auoit quelque esperance, qu'Agrippa peust encor quelque fois estre restitué en la famille de son grand pere. Le bruiet aussi estoit, q̄ Maximus auoit descouuert cecy à sa femme Martia, & elle à Liuia, dequoy Auguste auoit esté aduertty par C. Nauus. Que peu de temps apres, & si tost q̄ Fabius fut mort (l'on doubte si luy mesmes se fait mourir) sa femme Martia, auoit esté ouye durant ses obseques faire ses regrets, l'accuser d'auoir esté cause de la mort de son mary. Quoy que soit Tibere n'estoit à peine entré en Illyrie, quil fut hastiement

*Fabius
Maxi-
mus.*

Martia.

hastiement rappellé par les lettres de sa mere, & ne
 ſçait lon au vray ſi arriué à Nole il trouua Auguſte ia
 trefpaſſé, ou encor quelque peu respirant. Car Liuia
 ayant mis ſeures gardes en la maiſon, & gens par les
 chemins, faiſoit ſemer ioyeuſes nouuelles de la cōua-
 leſcence d'Auguſte: & iuſques à ce qu'ayant pourueu
 aux choſes requiſes pour le temps, vn meſme bruiet
 en vn instant publiâ qu'Auguſte eſtoit decedé, & que
 Tibere auoit la ſouueraineté de toutes choſes.

Le premier chef d'œuue de ceſte nouuelle princi-
 pauté fut le meurdre cōmis en la perſonne d'Agrippa
 Poſthume, lequel pris au deſpourueu & ſans armes,
 fut tué par vn centenier, qui le feit a grand regret en-
 cor qu'il y fut allé expres. Tibere ne mit rien en auant
 de cecy au Senat, faignant de croire q'c'eult eſté faiet
 par le cōmandement de ſon pere, lequel eut enioinct
 à vn Tribun de ſa garde, ne faillir de mettre a mort
 Agrippa, incontinent qu'il le verroit eſtre expiré.

*Agrippa
 poſthume
 occis.*

Il n'y a point de doubte qu'Auguſte ſe plaignant
 au Senat de pluſieurs cruelles, & eſtranges manieres
 de faire de ſon petit ſils Agrippa, auoit tant faiet, que
 par arreſt d'iceluy, il auoit eſté enuoyé en exil.

Mais au reſte il ne ſe trouue point que iamais il ayt
 perſeueré de pourchaſſer la mort d'aucun des ſiens: &
 n'eſt vray ſemblable qu'il ayt fait tuer ſon petit ſils
 propre, pour plus aduantager le ſils de ſa femme. Et
 eſt beaucoup plus croyable, que la mort de ce ieune
 homme ayt eſté auancee par Tibere & Liuia: eſtant
 ſuſpect & enuyé de luy, pource qu'il le craignoit: &
 d'elle, pour la haine qu'ont acouſtumé de porter les

LE I. LIVRE DES ANNALES

marastres aux enfantz de leurs mariz.

*Salustius
Crispus
fils de la
sœur de
saluste.*

Estant donques le centenier retourné pour rapporter nouuelles de ce qu'il auoit fait (ainsi qu'est la coustume de la guerre) Tibere luy fait responce qu'il ne luy auoit rien commandé, & qu'il luy failloit rendre compte de c'est acte au Senat. Ce qu'entendu par Sallustius Crispus, qui estoit participât de ses secretz, & auoit enuoyé les lettres patentes au Tribun : craignoit d'estre mis en ieu. Et voyant que le danger estoit tousiours vn, fust qu'a la verité il dist ce qu'il en pensoit, ou bien tout au rebours de son courage, remonstra à Liuia qu'il n'estoit bon que les secretz de la maison, les conseilz des amys, & exploit des gensdarmes, fussent diuulgues, qu'il n'estoit bon, que Tibere remettant toutes choses au iugement du Senat, affoiblist & debilitast ainsi le pouoir de sa principauté. Telle estre la condition de regner q'iamais les comptes ne se treuuent sinon qu'ils soient rendus à vn seul.

*Sext. Pō-
peius.
Sext. A-
puleius.
Seius
Strabo.
C. Turra-
nius.*

En ce temps à Rome Consuls, Senateurs, Cheualiers se laissoient cheoir en seruitude, Et dautant que plus ils estoient nobles & extraits de hault lieu, plus ils sy monstroient prompts & diligens, dissimulans, faisans bonne mine, & entremessans par flatterie, larmes, ioye, & complainttes ensemble: affin qu'ils ne semblassent ou trop ioyeux de la mort de l'vn, ou trop tristes du commencement de l'autre.

Sextus Pompeius, & Sextus Apuleius Consuls furent les premiers qui feirent le serment à Tybere, & avecques eux Seius Strabo & C. Turranius, l'vn desquels

quels estoit capitaine de la garde, & l'autre commis sur les viures. Incontinēt apres les Senateurs, les gensdarmes, le menu peuple en feirent autant. Car Tibere n'entreprenoit rien que par les Consulz: comme si la republique eust retenu son estar ancien, & y eust eu quelque doubte qu'il regnast. Mesmes il ne voulut que l'edit, par lequel il assembloit les Peres au Senat, eust autre tiltre ou prescription, que de par la puissance du Tribun, laquelle il auoit exercee sous Auguste. C'est edict contenoit peu de paroles, & en sens fort modeste: scauoir qu'il vouloit estre deliberé touchant les honneurs de son pere. Aussi il ne fessoignoit guieres de la compaignie du Senat, ayant entre toutes autres charges publiques, vsuré ceste cy. Mais l'enseigne qu'il auoit, apres le trespas d'Auguste donnee aux gens de la garde comme Empereur, le guet qu'il auoit dressé, les armes & autres telles choses, sentoient leur court. S'il alloit au marché ou lon plaidoit, ou au Senat, tousiours estoit accompagné de gensdarmes: mesmes il enuoya lettres à toutes les armées leur donnant à entendre cōme la principauté luy estoit acquise, ne se montrant tardif en chose que ce fust, sinon quant il parloit au Senat: dont la cause principale estoit la crainte qu'il auoit, que Germanicus se voyant tant de legions & bandes confederées en main, & en telle sorte fauorisé du peuple, n'aymast mieux sur le champ vsurper l'Empire, qu'attendre à l'auoir apres la mort de luy. Faisoit aussi semer paroles & bruietz de ville, afin qu'il semblast auoir plustost esté esleu & appelé à l'é-

LE I. LIVRE DES ANNALES

pire par la republique, que par les pourchats qu'en auoit fait vne femme enuers son mary: ou pour l'adoption que de luy auoit faicte vn vieillard. Depuis l'on a sceu que pour mieux cognoistre la volonté des grands, il les auoit mis en quelque doute: car il retenoit en son cœur leurs propos & contenance, les tournant & interpretant en crime.

Augusta. nous auons cy apres pour ce mot traduit, Imperatrix.

Le premier iour du Senat, il ne voulut estre parlé d'autre chose que des funerailles d'Auguste, par le testamēt duquel (qui fut apporté par les vierges Vestales) Tibere & Liuia estoient instituez heritiers: Liuia estoit appellé en la famille des Iules, & prenoit le nom d'Augusta. Au second degré estoient escripts ses nepueux, & arriere nepueux. Au troisieme les principaux de la ville, nonobstant qu'il en eust aucuns d'eux en haine. Mais il le faisoit pour vne braueté & gloire pour le temps aduenir. Il ne fit aucuns lais qui excédassent la maniere de leguer des citoyens, sinon qu'il laissa au peuple CCC CXXXVI, & à vn chascun des gēd'armes de la garde * mille nummes, & aux cohortes des legionnaires des bourgeois de Rome & trois cens nummes pour teste.

Ceste somme selon Budepeut monter à un million quatre vingt sept mil cinq cens escus couronne à treize cinq sols pour piece. Mil nummes ce sont enuiron 25.

Après cela l'on aduisa del'ordre, & magnificence des funerailles, & fut entre autres choses trouué trefhonorable de faire cōduire le corps par la porte par laquelle entroiēt ceux qui triumphoient. Gallus Asinius fut d'aduis que les tiltres des loix, & ordonnances par luy faictes fussent portez deuant le corps: & L. Arruntius adiousta qu'on y debuoit aussi porter les noms des nations par luy cōquises. Valerius Mes-

fala

fala dit d'auantage qu'il estoit bon de renoueller d'an en an le serment fait à Tibere. Et comme Tibere luy demâdaſt s'il auoit aucune charge de luy, de mettre en auant tels propos: fait reſponſe qu'il les diſoit de ſon propre mouuement & qu'es choſes qui concerneroient la Republique, il n'eſtoit pas delibéré d'uſer d'autre conſeil que du ſien, encor qu'il ſçeut en debuoir encourir quelque malucillance. Comme ſil n'y eut au monde que ceſte maniere de flater. Les Senateurs crioient qu'il falloir que le corps fut porté au feu ſur leurs eſpaules. Ce que Tibere avec vne arrogante modeſtie reſſuſa: & feit vn edit par lequel il admoneſta le peuple, que comme auparavant ils auoient troublé les funerailles de Iules Ceſar, par la trop grâde affection qu'ils luy portoient ils n'en feiſſent maintenant autant à Auguſte, voulants ſon corps pluſtoſt eſtre brulé au marché, qu'au cháp de Mars lieu propre, & dedié à ce faire. Le iour des obſeques y auoit genſdarmes à l'entour du corps commis, comme pour la garde d'iceluy, dequoy pluſieurs ſe mocquoient de ceux qui auoient veu, ou ouy racompter à leurs peres du iour, auquel eſtant la ſeruitude encor crue & recente l'on auoit en vain taſché à remettre ſus la liberté: & que le meurdre commis en la perſonne du dictateur Ceſar, ſembloit aux vns acte meſchant, & aux autres tref-honneſte & vertueux. Parquoy leur ſembloit choſe ridicule, de veoir ce Prince vieillard, apres auoir long-temps dominé, & pourueu ſes heritiers des biens & richesses de la Republique auoir affaire de garde de genſd'ar-

*eſcus couronne.
Troyſ cës
nûmes.
ce ſont en-
uiron 7.
eſcus &
demy cou-
ronne.*

*Grande
flaterie.*

LE I. LIVRE DES ANNALES.

mes à fin d'estre enseuely en paix.

Depuis ce temps furent tenuz plusieurs propos d'Auguste, ayans aucuns en admiration ie ne sçay qu'elles choses vaines. Sçauoir qu'il estoit mort à pareil iour, qu'il s'estoit emparé de l'Empire. Qu'il estoit decedé à Nole en la mesme maison, & en la mesme chambre, ou son pere Octavius auoit rendu l'esprit. Aucuns faisoient grand cas de ses Consulats, lesquels estoient en aussi grand nombre que ceux de Valerius Coruinus, & C. Marius ensemble. Les autres de sa puissance Tribunale qu'il auoit continuee par l'espace de trente sept ans. Pareillement comme par vingt & vne fois, il auoit acquis nom d'Empereur. Aussi parloient d'autres dignitez, lesquelles auoient ou nouuellement esté crees en luy, ou multipliees.

*Propos
pour Au-
guste.*

Quât aux plus sages & aduisez, ils louoiēt diuersement sa vie, ou la reprochoient. Les vns disoient que pour le debuoir duquel il estoit tenu enuers son pere, & pour la necessité qu'en auoit la republique (n'ayants lors les loix aucune autorité) il auoit esté contrainct susciter vne guerre ciuile: & par ce moyen auoit gaigné vn point, lequel par autres voyes meilleures & plus honnestes il luy eut esté impossible d'acquérir. Qu'il auoit souffert lors beaucoup de choses à Antonius, & à Lepidus pour se venger de ceux qui auoient tué son pere. Mais cognoissant depuis l'vn enuieilly en sa bestise & lascheté de cuer, & l'autre perdu en ses paillardises: il n'auoit preueu autre moyen d'accorder la republique de sa patrie discordante,

dante, sinon qu'elle fut gouuernée par vn seul. Laquelle toutesfois il n'auoit establie en royaume ou dictature, mais seulement en nom de Principauté. Que l'Empire estoit clos & enuironné ou de la mer Oceane, ou de fleuues fort loingtains, & estoient les legions, prouinces, armee de mer, & toutes autres choses cōnexees & vnies ensemble. Que la iustice estoit gardee entre les citoyens, les alliez entretenus en route modestie, & la ville en estat magnifique. Qu'en peu de choses l'on auoit vsé de force & voye de fait, à fin que ce qui restoit fut en repos.

Les autres au contraire disoient. Que le debuoir duquel on est tenu enuers le pere, & la calamité des temps, n'auoient seruy que de couuerture à son entreprise. Qu'au surplus meü d'vne conuoirise de dominer, il auoit à force de dons, gaigné les vieilles bādes. Qu'estant encor ieune, & n'ayant aucune charge publique, il auoit leué vne armee, corrompu les legions des Consuls, & fait semblant de tenir le party de Pompee. Qu'incontinēt apres que par ce moyē il eut du Senat obtenu les flambeaux, & l'office de Preteur estans Hircius & Panfa occis (soit qu'ils ayent esté tuez par les ennemis, ou Panfa par le venin espadu en sa playe: & Hircius par ses soldats mesmes, & par Auguste machinateur de ceste trōperie) il s'estoit emparé des armees tant de l'vn que de l'autre. Que malgré le Senat il auoit emporté par force le Consulat, & tourné contre la republique les armes qu'il auoit prises contre Antonius. Que la proscription des citoyens, & departement de leurs terres n'auoient

Contre
Auguste.

LE I. LIVRE DES ANNALES

pas beaucoup pleu à ceux mesmes qui les auoient
 faiçtes. Aussi que veritablement, on ne luy auoit rien
 demandé de la mort de Brutus, & Cassius (luy estant
 cela pardonné pour l'inimitié qu'il leur portoit à cau-
 se de son pere) combien que pour vne publique vti-
 lité, il pouuoit bien oublier vne haine priuee. Qu'il a-
 uoit trompé Pompeius, sous couerture de paix, &
 Lepidus sous vmbre d'amitié. Que depuis Antonius
 se fiât au traité de paix fait à Tarente, & à Brindes,
 & attiré sous esperance d'espouser la sœur d'Augu-
 ste, auoit par sa mort payé la peine de ceste fraudu-
 leuse affinité. Bien estoit vray qu'apres on auoit eu la
 paix, mais pleine de sang. Ce qu'entre autres choses
 tesmoignoïent assez les deffaites des armées de Lollius
 & de Varus, le meurdre commis à Rome, en la per-
 sonne des Varrons, Egnaces, & Iules. Ne s'abstenoiēt
 mesmes de parler des choses par luy faiçtes en priué,
 & disoient, qu'ayant rauy la femme de Neron, il a-
 uoit par maniere de mocquerie fait demander aux
 Pontifes, si le mariage seroit legitime, ceste femme
 ayant conceu, & n'estant l'enfant encor né. Parloient
 aussi des excès & superfluités de Q. Tadius, & Ve-
 dius Pollio. Finablement que Liuius seroit mere in-
 supportable à la Republique, & encor plus griefue
 marastre à la maison des Césars. Que plus ne restoiēt
 aux dieux aucuns plus grands honneurs, puis qu'elle
 se faisoit adorer és temples, & en forme de deesse par
 les Prestres & Flamines. D'auantage que non pour
 vne charité, ou pour soing qu'il eust de la republique
 il auoit destiné Tibere successeur de l'Empire. Mais
 que

Q. Tadius
 Vedius
 Pollio.

que bien aduerty de l'arrogance & cruauté qui estoient en luy, auoit cherché gloire en faisant vne si meschante acquisition. Car cōme quelque temps au parauant Auguste pourchassast l'office de Tribun enuers le Senat, avec Tibere, & cōbien qu'il feist assez honorable mētion de luy, ce neantmoins si auoit il touché quelque chose en la façon de ses habits, & en sa maniere de viure, & les luy auoit reprochees comme par maniere de l'en excuser.

Or pour reuenir à nostre propos, apres qu'Auguste fut inhumé, on luy decerna vn tēple, & ceremonies comme aux dieux. Cela faict chacun se tourna a prier Tibere, lequel (comme estoit sa modestie) disputa de la grandeur de l'Empire, remonstrant que l'esprit d'Auguste auoit seul esté capable d'vne si grosse charge. Qu'ayant par luy esté appellé en partie de ses affaires, il auoit experimenté combien la charge de gouuerner toutes choses estoit difficile & subiecte à la fortune. Et pource qu'ils aduisassent de ne commettre à vn seul le gouuernement d'vne cité, appuyee & soustenue sur tant de nobles & excellents personages, lesquels en viendroient bien plus aisement à bout apres qu'ils auroient amassez tous leurs labeurs ensemble. Certes en ceste harangue il y eut beaucoup plus de dignité, que de foy & creance. Car Tibere, fut ou de nature, ou par vne accoustumāce, vsoit tousiours (mesmes es choses qu'il ne vouloit cacher) de termes obscurs, & ambigus. Et maintenant qu'il taschoit par toutes manieres a dissimuler ce qu'il auoit en penſee, il falloit bien, que ses propos

LE I. LIVRE DES ANNALES

fussent enuolopez en vne plus grande ambiguité, & incertitude. Mais les Senateurs, qui n'auoient autre crainte sinon qu'il s'apperceust, qu'ils entendoient bien cecy, commencerēt à getter larmes, faire plainctes, & tēdre les mains aux dieux, à la statue d'Auguste, & à ses genoux, iusques à ce qu'il eut fait apporter & leu publiquement le liure d'Auguste. En ce liure estoiet contenues toutes les richesses publiques, le nombre des citoyens & confederez portants armes, le nombre des galeres, des royaumes & prouinces subiectes à l'Empire, les tributs, les peages, les choses necessaires, & les largesses: toutes lesquelles choses Auguste auoit escriptes de sa main: d'auantage y auoit adiousté la deliberation qu'il auoit faicte, de restraindre l'Empire dedans ses limites, l'on ne sçait si c'estoit, par crainte, ou de peur d'estre enuyé.

Durant ces choses, & estant le Senat prosterné en si abiectes prieres, Tibere dit par cas d'aduenture que tout ainsi qu'il se sentoit incapable au gouuernement de toute la republique: aussi si on luy donnoit charge de quelque portion d'icelle, qu'il seroit content de la prendre. Quoy oyant Asinius Gallus dit. Ie te demande, Cesar, quelle partie d'icelle voudrois tu t'estre commise? Tibere estonné de telle interrogation faicte à l'impourueu, se teut quelque temps, & apres auoir repris ses esprits, respōdir, qu'il estoit peu conuenable à sa modestie, de faire election, ou refus de quelque portion des choses, desquelles il aymoit beaucoup micux estre du tout excusé. Gallus (pour ce, qu'il cogneut à sa contenāce, qu'il l'auoit offensé):
repliqua

*Asinius
Gallus.*

repliqua qu'il n'auoit fait ceste demande en intention de diuiser les choses qui ne le peuuent estre aucunement, mais à fin que par sa bouche il confessast la republique, n'estre qu'un corps, & partant deuoit estre administree par l'esprit d'un seul. A ces propos adiousta plusieurs louanges d'Auguste, ramenant aussi en memoire à Tibere plusieurs de ses victoires, & autres actes excellens, par luy plusieurs fois acheuez en temps de paix. Cecy toutesfois ne fut suffisant pour appaiser l'ire de Tibere, ayant de long temps conceu haine contre Gallus, comme soupçonnant qu'il n'eust pour autre chose espousé Vipsania fille de M. Agrippa (& autrefois sa femme) sinon pour auoir les occasions d'entreprendre choses plus que ciuiles, & aussi comme fil retint quelque chose de l'orgueil & arrogance d'Asinius Pollio son pere. Apres cecy L. Arruntius tenât quasi les mesmes propos, ne l'offensa pas moins, iacoit ce que Tibere n'eut aucune vieille haine à l'encontre de luy, ains l'honorast pour ses richesses, promptitude en tout art honneste, & pour le bon bruit du peuple qui respondoit à toutes ces choses. Car comme Auguste sur la fin de ses iours, tint propos de ceux qui capables de la principauté la refuseroiēt, de ceux aussi qui la voudroient auoir, encor qu'ils fussent incapables: & conséquemment des autres lesquels en seroient capables & conuoiteux ensemble: Auoit dit que M. Lepidus en estoit capable, & toutesfois qu'il n'en voudroit point: que Gallus Asinius, combien qu'il n'en fut capable, la voudroit: & que L. Arruntius seroit

L. Arruntius.

LE IOLIVRE DES ANNALES

digne de l'aboire, & homme pour se ruer dessus si l'occasion sy addonnoit. Quant est des deux premiers, les auteurs s'en accordent. Mais aucuns mettēt Cn. Piso au lieu d'Arunti^o. Tous ceux icy (excepté Lepidus) furent accusés de diuers crimes par les menées de Tibere.

*Q. Haterius, Mamer-
cus Scaurus.*

Au reste *Q. Haterius* & *Mamercus Scaurus* taxerent son cœur, cōme s'ils s'en fussent deffiez. Car *Haterius* luy dist. Iusques à quād, Cesar, souffres tu la Republique estre sans chef? Et *Scaur^o* qu'il y auoit quelque esperāce que les prieres du Senat ne seroiēt point vaines enuers luy, puis qu'il ne s'estoit opposé cōme *Tribun*, à la relation des *Consuls*. Or sur le champ il fattacha à *Haterius*, ne respondant rien à *Scaurus* auquel il estoit extremement courroucé.

Finablement vaincu des crieries de tous en general, & particulierement de l'importunité d'vn chacun se laissa gaigner peu à peu, non qu'il confessast accepter l'Empire: mais (comme il disoit) pour donner fin à leurs prieres & cesser de leur refuser, ce qu'avec telle instance ils poursuuiuoient. Il est tout certain qu'estāt *Haterius* entré au Palais pour luy demāder pardon, & s'estāt ietté à terre pour luy embrasser les genoux (ainsi qu'il cheminoit), il fut quasi tué par les gēds d'armes: pour ce que *Tibere*, ou par cas d'aduenture, ou empestre des bras d'*Haterius*, s'estoit laissé tomber. Toutesfois son courroux ne fut appaisé pour le danger auquel s'estoit trouué vn tel personnage, iusques à ce que *Haterius* ayant prié l'Imperatrix, fut sauué par les affectionnees prieres d'elle. Enuers laquelle aussi les *Senateurs* vserent de grande flatterie. Car au-
cuns

Tous estoient d'aduis qu'on la deuoit appeller Parente, les autres, Mere de la patrie. Et plusieurs qu'avec le nom de Cesar, on deuoit adiouster fils de Iulia. Mais Tibere saignant remonstrer qu'il falloit les hōneurs des femmes estre mediocres, & qu'en ceux qui seroient offerts à sa personne il vseroit de mesme moderation (toutesfois à la verité passionné d'enuie, & estimant l'exaucement d'une femme estre son desaduancement) ne voulut seulement permettre qu'elle eust vn bedeau, & deffendit de luy dresser vn autel d'adoption, & autres choses semblables.

Toutesfois il demanda vn proconsulat pour Germanicus, & enuoya Ambassadeurs tant pour le luy offrir, que pour le consoler du dueil qu'il faisoit pour le trespas d'Auguste. Et ce qui empescha qu'il n'en demandast autant pour Drusus, fut, qu'il estoit designé Consul pour l'annee ensuiuante, & là present en personne. Aussi il presenta douze cādidsats, ou poursuuans l'office de Preteur, qui estoit le nombre establi par Auguste. Et comme les Senateurs l'enhortassent d'en nommer d'auantage, il feit serment de n'exceder ce nombre. Lors premierement les comices & assemblees furent transportees du champ de Mars au Senat. Car iacōit ce que iusques à ce iour les choses de plus de cōsequence fussent gouuernees à l'appetit du Prince, aucunes toutesfois estoient faictes par les voix & faueurs des Tribuz, & ne se plaingnoit le peuple d'auoir perdu son droit sinon par quelque rumeur vaine & sans effect. Et le Senat corrompu par largesses, & prieres abiectes, auoit volontairement conten-

*Cādidsats
sont qui
briguent
vn mes-
me office.*

*C'est à di-
re la voix
qu'auoit
le peuple,
luy fut o-
stee. Car
le champ
de Mars
estoit le
lieu où le
peuple
s'assembloit
pour les
affaires
publiques*

LE LIVRE DES ANNALES

ty, puis que Tibere en retranchoit le nombre, qu'il ne pourroit presenter plus de quatre Candidats, qui peussent estre designez sans refus, & ambition.

*Ieux Augustaux.
Fastes c'estoit comme un calendrier.*

En ces entrefaictes les Tribuns du peuple requirerent, qu'il leur fut permis de faire celebrer des ieux, à leurs propres couts & despens, lesquels adioustez aux Fastes, fussent appelez Augustaux du nom d'Auguste. Toutesfois on leur donna assignation sur les deniers communs de la ville, & leur fut permis d'vser d'habit triumphal dedans le theatre, moyennant toutesfois qu'ils ne se feissent mener en chariots. Peu de temps apres la celebration de ces ieux fut transferee au Preteur annuel, auquel escherroit la iurisdiction tant sur les citoyens que sur les estrangers.

Sedition des legions de Pannonie.

Voyla l'estat auquel estoient les affaires de la ville. Quand les legions Pannoniennes susciterent vne sedition, sans qu'il y eust autre chose de nouveau, sinon que le changemēt du Prince promettoit vne licence de tout troubler & renuerser, avecq' vne esperance de grand gaing, qui pourroit prouenir des guerres ciuiles.

Iunius Blefus.

Au fort ou se retiroient les gensd'armes en temps d'esté, y auoit trois legions ensemble sous la conduite de Iunius Blefus, lequel ayant entendu la mort d'Auguste, & le commencement de Tibere, laissa son deuoir accoustumé, ou pour cause des variations, ou bien pour la ioye qu'il auoit. Par ce commencement les gensd'armes commencerent à follestrer, esmouuoit debats, & prester l'oreille aux propos des plus meschans. Il y auoit pour lors au camp

vn nommé Percennius, lequel auoit autrefois con-
 duit les ieux au theatre, & depuis estoit deuenu ^{Percen-}
 soldat, homme effronté en paroles, & expert à es- ^{nus.}
 mouuoir vne assemblee, pour l'auoir appris & accou-
 stumé en ses farces, & ieux. Cestuy commença par
 propos nocturnes & tenuz sur le soir, peu à peu à es-
 mouuoir les cueurs des moins aduisez, & douteux.
 quel party l'on feroit aux gensdarmes apres la mort
 d'Auguste. Et se voyant abandonné des plus gens de
 bien, tascha d'en assembler de plus meschans. Fina-
 blement voyant que ia y auoit d'autres ministres de
 ceste sedition aussi prompts & deliberez que luy,
 les interrogeoit, comme par maniere de harangue,
 pourquoy ils souffroient ainsi d'estre subiects com-
 me esclaués à vn petit nombre de Centeniers, & en-
 cores à moins de Tribuns? Quand ils pensoient a-
 uoir meilleure occasion, d'auser demander allege-
 ment & remede, si maintenant ou par prieres, ou par
 armes ils ne s'adressoient au Prince encor nouueau,
 & mal asseuré de sa principauté. Que par leur pares-
 se ils auoient assez failly par le passé, souffrants de
 demourer au camp, sous l'enseigne, par l'espace de
 trente & quarante ans, encor qu'ils fussent tous cas-
 sez de vieillesse, & eussent perdu plusieurs de leurs
 membres par les playes qu'ils auoient receues. Ioinct
 aussi que iaçoit ce qu'ils eussent impetré leur congé,
 leur travail pourtant ne cessoit, pour ce qu'estans re-
 tenuz sous les enseignes ils enduroient les mesmes
 peines sous autre nom. Mesmes aussi que si quel-
 qu'un (eschappé de tant de perils) pouoit cuiter la:

LE I. LIVRE DES ANNALES

*Dix asse-
vallée vn
denier &
vn denier
vaut 3.
sols &
demy.*

*Denier.
Sçauoir
entre ce-
luy qu'ils
auoient au
parauant.*

mort: il estoit enuoyé en pays estrange, ou au lieu de terres & heritages, on luy donnoit pour toute recompense ou quelques marests humides, ou bien quelques lieux de montaignes non cultiuez ny labourez. Que la guerre d'elle-mesme estoit de grand & insupportable traüail, & sans profit, & n'estoient leurs corps & ame estimes que dix asse pour iour. Surquoy encor il falloit qu'ils se fournissent d'habits, d'armes, de tentes: & en feissent part aux Centeniers pour se rachepter de leur cruauté, & estre exempts des charges qu'ils imposoient. Au contraire que les coups, les playes, le froid hyuer, l'esté laborieux, la guerre cruelle, ou la paix sterile & sans profit durroient à tousiours. Et ny auoit autre moyen de pourueoir à cela, que de n'aller point à la guerre sinon sous certaines conditions, sçauoir qu'un chacun d'eux auroit vn denier par iour, & qu'au bout de seize ans ils seroient à la fin de leur soulte, & ne seroient plus tenuz souz l'enseigne, demeurants neantmoins dedans le mesme camp, & receuans les mesmes gaiges qu'aparauant. Quoy (disoit-il) les cohortes du Preteur (qui ont receu deux deniers pour hōme, & apres auoir suiuy le train de la guerre seize ans, se retirent en leurs maisons) se mettent elles en plus de dangers que vous? Toutesfois ie ne veux point blâmer le guet qui se fait en la ville. Mais si est ce pourtant que conuersans entre gens horribles, nous sommes contrains de veoir de noz loges, & cabanes ordinairement noz ennemis deuant noz yeux.

La commune lors commença à faire bruit selon que

que diuerſement ils eſtoient eſmeuz, les vns reprochans leurs batures par l'apparoiffance des marques, les autres leur vieilleſſe, & pluſieurs leurs veſtemens deſchirez, & corps nud. Finablement vindrent en telle furie, que de trois legions ils n'en vouloiet faire qu'une. Mais deſtournez de ceſte entrepriſe par leur emulation (pource qu'un chacun d'eux vouloit que ceſt honneur fut deferé à ſa legion) ils en firent vne autre, & planterent enſemble trois Aigles, avecq' les enſeignes des cohortes, & ayans autour d'icelles amasſé force morttes, & gazons de terre, y edifierent vn haut tribunal, à ſan que ce ſiege fuſt en plus belle veue. Ainſi qu'ils deſpeſchoient cecy en grande haſte, Bleſus va arriuer, qui commença à les blaſmer, & retenir vn chacun d'eux, criant à haute voix que pluſtoſt ils le tuaſſent, & ſouillaſſent leurs mains de ſon ſang. Car (diſoit-il) voſtre forfait ne fera ſi grand, quand vous aurez occis vn Ambaſſadeur, que ſi vous auiez abandonné voſtre chef & capitaine. Et pource, ou ſans danger ie retiendray la foy & loyauté des legions, ou bien par ma mort ie preuiendray le repentir, que i'en pourrois auoir par apres. Ce nonobſtant ils ne laiſſoient à amasſer force morttes de terre, & eſtoit leur amas ia en telle hauteur qu'il pouuoit venir iuſques à la poictrine, quand les genſdarmes vaincus de ſon importunité, laiſſerent là ce qu'ils auoient commencé. Bleſus avecq' ſa Rethorique & belles paroles, leur remōſtra qu'ils auoient moyen de faire entendre leur intétion au Prince, autrement que par troubles, & ſeditions..

LE I. LIVRE DES ANNALES.

Que les soldats du temps passé n'auoient iamais demandé choses si estranges des anciens Empereurs, & non pas eux mesmes à Auguste. Que mal à propos & en temps indeu, ils venoient à augmenter les affaires & sollicitudes du Prince sur son commencement. Et toutesfois si en temps de paix il vouloient s'efforcer d'obtenir ce que les vainqueurs des guerres ciuiles n'auoient oncques osé demander. Pourquoy contre leur obeissance accoustumee, & contre tout droit de discipline militaire, taschoient ils à l'auoir par force? Que pour mieux faire ils deuoient eslire quelques Ambassadeurs & en sa presence leur dōner telle charge que bon leur sembleroit. Sur ce point tous commencerent à crier qu'ils estoient contens que le fils de Blesus, qui estoit Tribun, fist ceste ambassade, & demāda en leur nom, qu'apres auoir par seize ans fuiuy la guerre, ils eussent leur congé & permission d'eux retirer. Au reste qu'apres qu'il leur auroit impetré cela, ils luy donneroient charge de autres choses.

Ce ieune homme party, l'on fut quelque temps en repos. Mais les soldats commencerent à eux orgueillir, pensans que puis que le fils de l'Ambassadeur mesme estoit enuoyé pour orateur de la cause publique, cela monstroir assez que par contraincte & vrgente necessité on leur octroyoit ce que par leur modestie ils n'auoient sceu obtenir.

*Manipule
le selon
Voyez
c'est une
chambre*

Ce pendant les Manipules, (qui au parauant que la sedition commençast auoient esté enuoyez à Naupt, pour donner ordre aux chemins, aux ponts, & autres

autres choses nécessaires) ayans entendu la reuolte de ceux du camp, commencerent à briser leurs enseignes & ayans pillé les bourgs plus prochains, & Nauport mesmes, qui estoit comme vn Municipie de la ville de Rome, disoient grosses iniures, & se moquoient des Centeniers qui les vouloient en garder, & finablement les frapportoient. Mais entre autres ils en vouloient à Aufidienus Rufus Mareschal du camp, lequel ayant tiré bas de son chariot, & chargé de pesants fardeaux le faisoient marcher au premier reng, luy demandants par maniere de mocquerie, si de bon cœur il portoit si pesants faiz, & faisoit si long chemin? Or ce Rufus auoit long temps esté Manipulaire, & depuis Centenier. Finablement venu à estre Mareschal du camp, vouloit ramener l'ancienne, & dure discipline de guerre, estant de son costé prest à besongner; & inuincible au trauail. Par ce moyen il leur estoit beaucoup plus rigoureux pour auoir luy mesme passé par là. Ceux icy arriuez au camp la sedition se va renforcer, & s'escartans ça & là pilloient ce qu'ils trouuoient là entour. Blesus à fin de donner crainte aux autres, en feit prendre quelques vns, principalement de ceux qui furent trouuez chargez, & saisis du butin qu'ils auoient fait, lesquels il feit fouetter, & mettre en prison. Car encor pour lors, les Centeniers, & aucuns des Manipulaires plus gens de bien obeissoient à l'Ambassadeur. Ceux donc que l'on chastioit ainsi, resistoiēt le plus qu'ils pouuoient, & s'attachants aux iambes de ceux qui estoient autour d'eux, appelloient maintenant vn chacun par

de dix hommes de guerre. Municipie c'estoit toute ville qui iouyssoit du mesme priuilege que la ville de Rome.

Auf. Rufus.

Manipulaire c'est capitaine d'une chambree de dix hommes, dixenier.

LE I. LIVRE DES ANNALES

son nom, & tantost toute la Centaine, la cohorte, & la legion, desquelles ils estoient manipulateurs, leur remonstrans qu'il leur en pendoit autant à l'œil, iniurians l'Ambassadeur, & appellans le ciel, & les Dieux en tesmoignage. Brief ils ne laissoient rien derriere qui peust esmouuoir, à haine, à compassion, à crainte, ou à ire. Par ce moyen tous y accoururent, & ayas rompu les prisons, les deslierēt: & avecques eux plusieurs traistres, & autres cōdamnez à mort, lesquels ils meslerent avecques eux. Ainsi ceste force s'enflamma d'auantage, & y eut renfort de conducteurs, & capitaines de ceste sedition.

Vibulenus.

Entre autres vn Vibulenus simple soldat, estant esleué deuant le Tribunal de Blesus sur les espaules de ceux qui estoient autour de luy, & voyant ces gens perturbez, & attendifs pour veoir ce qu'il auoit intention de faire, commença tels propos. Vous (dit il) auez rendu la lumiere, & l'esprit, à ces pauvres innocents & miserables, mais qui est ce qui rend la vie à mon frere? qui est ce qui le rend à moy mesmes? lequel enuoyé par deuers vous par ceux de l'ost qui est en Germanie, pour conferer du bien & vtilité commune, cestuy, la nuit passée, à fait esgorger par ses gladiateurs, & escrimēurs lesquels il entretient, & arme pour ruyner, & sacager les pauvres soldats. Respons moy, Blesus, où as tu ietté son corps? L'on ne voit point que les ennemis nyent à aucun la sepulture. Quand par baisers, quand par larmes, j'auray satisfait à ma douleur, lors fais moy aussi tuer si bon te semble,

pourueu

pourueu que quâd nous aurons esté occis (non pour nostre meffait, mais pour auoir cherché le profit des legions) il soit permis à ceux icy de nous enseuelir. Or d'auantage il enflammoit cecy avec larmes, & pleurs, frappant avec ses mains sa face, & sa poitrine. Tost apres comme ceux qui le soustenoient sur leurs espaules se fussent separez, & l'eussent laissé cheoir à terre: embrassant les pieds d'un chacun, les mit en vn tel espouuement, & esmeut à telle haine & despit, que partie des gens d'armes lierent les escumeurs qui estoient au seruice de Blefus; & l'autre partie le reste de ceux de sa famille. Aucuns s'escarterent pour aller chercher ce corps mort. Et certes si sur le champ l'on n'eust cogneu, qu'il ny auoit aucun corps mort, & que rien n'auoit esté confessé par les seruiteurs qui auoient esté mis en la question, & pareillement que ce rustre n'auoit iamais eu de frere: il n'y a doute que les Ambassadeurs eussent esté en grâd danger de leur vie. Toutesfois ils chasserēt hors les Tribuns, & le Marechal du camp, & pillerent les hardes & fardeaux de ceux qui sen estoient fuis. Pareillement le Centenier Lucilius y fut occis; lequel par ieu les gens d'armes auoient surnommé, *Ca vne autre.* Pource qu'ayant rompu vne branche de vigne sur le dos d'un soldat, en demandoit vne autre à haute voix: laquelle rompue en demâdoit de rechef vne autre. Les autres se sauuerent en quelques cachettes, excepté Clemens Iulius lequel fut retenu. Cestuy pour la promptitude de son esprit sembloit propre à apporter paroles pour les soldats. Qui plus est il a

Ca vne autre. Les Centeniers auoient accoustumé de porter vne branche de vigne en leur main de laquelle ils chassioient les soldats paresseux. Clemens.

LE I. LIVRE DES ANNALES.

huiſtième, & quinzième legions, ſe preparoient pour combattre l'une l'autre (pour autant que la huiſtième cherchoit vn Centenier nommé Syrpicus pour le mettre à mort, & la quinzième le vouloit défendre) ſans vn ſoldat nommé Nonanus, lequel feit tant par prieres, & par menaces contre les reſuſans, qu'il les appaiſa.

Drusus. Cecy entendu par Tibere (encor qu'il fut fort couuert, & tint ſecretes les choſes qui luy ſembloient plus tristes & faſcheuſes) le contraignirent toutefois d'y enuoyer ſon fils Drusus avecq' aucuns des plus apparens de la ville, & deux des cohortes Pretorienes : ne luy donnant aucune charge expreſſe, mais l'aduifant ſeulement d'en ordonner ſelon l'eſtat auquel il trouueroit les choſes. Ces deux cohortes outre l'ordinaire furent renforcees de quelques ſoldats gens d'eſlite. Et d'abondant luy fut donné vne grande partie de la cheualerie du Preteur, avec la force des Allemans qui pour lors eſtoient à la garde de l'Empereur. Pareillement Elius Seianus qui eſtoit grand maiſtre, collegue de Strabo ſon pere, & auoit grãd credit enuers Tibere, fut cõmis pour conduire ce ieune hõme, & pour remonſtrer aux autres, rãt les dangeis ou ils ſe mettoient, que les grans biens qu'ils auoient moyen de receuoir ſ'il ne tenoit à eux.

Quand Drusus commença à ſ'approcher, les legions luy vindrent au deuant comme pour ſ'acquitter de leur deuoir, non point ioyeuſes & deliberees, ny avecq' enſignes deſployees comme en tel cas eſt de couſtume, ains ſouillees, & difformes, & avecq' viſages

visages farouches : lesquels iagoit ce qu'ils semblaient tristes, approchoient toutesfois plustost de felonnie & desdaing. Estant Drusus passé le rempar ils mirent gardes aux portes, & disposerent quelques compagnies de gens d'armes en certains endroicts du camp, leur enchargeans de ne bouger de là. Les autres en grande compagnie s'assemblerent à l'entour du Tribunal.

Drusus se tenoit debout faisant signe de silence avec la main. Mais les soldats toutes & quantesfois qu'ils tournoiēt les yeux vers la multitude, avec leurs voix espouventables, faisoient vn merueilleux bruiēt & si tost qu'ils les retournoiēt vers Drusus sembloiēt tous estonnez. Là on oyoit vn bruiēt confuz, vne rumeur grande, & tout soudain y auoit grand silence. Et selon qu'ils auoient les cueurs diuersement esmeus & agitez maintenant craignoient, & tantost se faisoient craindre. Finalement ce tumulte vn peu appaisé, Drusus vint à lire les lettres de son pere, par lesquelles il mandoit comme le principal soucy qu'il auoit, estoit des plus vertueuses legions, avec lesquelles il festoit trouué en plusieurs guerres. Qu'incontinent que son esprit seroit vn peu appaisé de son dueil, il communiqueroit leur requeste au Senat. Parquoy ce pendant il leur enuoyoit son fils, à fin que sans delay il leur oëtroyast ce que commodément sur le champ il leur pourroit oëtroyer. Et quant aux autres choses il les remettoit au Senat, pour ce qu'il estoit bien conuenable qu'il fust particippant de la grace ou seuerité, dont on vseroit en leur endroit. Toute l'assemblée

LE I. LIVRE DES ANNALES

*Ce sont
sols &
demy.*

respondit lors, que Clemens le Centenier auoit charge de parler pour eux. Au moyen dequoy ce Clemens commença à parler du congé qu'ils demandoiēt apres auoir suiuy la guerre l'espace de seize ans: & du salaire qu'ils vouloient auoir le temps de leur seruice expiré, sçauoir vn denier pour iour: & que les vieux soldats ne fussent plus tenus de demourer souz les enseignes. Drusus voulant icy se courir de l'autorité de son pere & du Senat, & alleguant qu'il ne pouuoit rien faire sans leur aduis, fut tout troublé du cry qu'ils faisoient luy demandans, qu'il estoit donc là venu faire, puis qu'il n'auoit aucune charge d'augmenter leurs gages, de diminuer leurs trauaux, ny de leur faire bien aucun? attendu mesmes qu'il leur estoit bien permis d'eux faire battre & tuer? Que ce n'estoit de maintenant que Tibere auoit accoustumé de frustrer les legions de leurs desirs souz ymbre de les renuoyer à Auguste, & que ia Drusus commençoit à vser de semblables ruses. Quoy? (disoit ils) ne nous enuoyera l'on iamais que des pupilles, & enfans de famille? C'est vne chose fort estrange, que l'Empereur ne remet rien sur l'aduis du Senat, sinon ce qui touche le profit des soldats. Que ne demande il aussi bien conseil au Senat, quand il nous condamne à la mort, ou bien nous assigne iour de nous tenir prests pour combattre? Faut-il doncques que noz salaires soient à l'arbitrage de seigneur, & noz peines sans arbitres? Ainsi finablement ils abandonnerent le Tribunal pour veoir s'ils auroiēt point aucuns des gens d'armes Pretorians, où des amis de

Drusus

Drusus à la reueuë, à fin de les menasser avec les mains, & trouuer occasion de discorde, & quelque commencement de querelle. Entre autres ils en vou-
loient à Lentulus, pource qu'estant le plus estimé, *Lentulus.* tant pour son aage, q̄ pour l'experience des armes, il auoit le bruit de tenir Drusus asseuré, & de faire peu de cō-
te de telles meschancetez des soldats. Parquoy peu après ainsi qu'il sortoit avec Drusus pour se retirer au fort, où les gēd'armes se tenoiēt l'hyuer (ayāt preueu le danger où il pouuoit tōber) ils vindrent à l'enuirō-
ner, & luy demander où il alloit? si il alloit à l'Empe-
reur, ou au Senat, à fin que là aussi il empeschast le profit des legions? Cela disant se ruerent sur luy, & luy getterent force pierres, & ia estoit tout ensanglā-
té, & asseuré de mourir quand il fut sauué par la sur-
uenue de la compagnie, que Drusus auoit amenee.

Ceste nuict laquelle promettoit de grands dan-
gers, & qu'en icelle se feroient de grans outrages, fut appaisée par cas d'aduenture. Car nonobstāt que le ciel fut clair & serain, il sembla que la lune se trou-
blast, & defaillit. Les soldats ne cognoissants la rai-
son de cest accident, le tirerent pour signification des choses presentes: & faisans comparaison de la def-
faillance de cest astre, avec leurs trauaux, estimerent que toute leur entreprise tourneroit à bien, si ceste deesse reprenoit sa clarté, & lueut premiere. Donc avec leurs trompettes, & cors ils cōmencerent à faire vn merueilleux bruit, & eux resiouyr ou contri-
ster, selon qu'ils voyoient la lune deuenir claire ou obscure. Mais apres que les nuees assemblees, elles

LE I. LIVRE DES ANNALES

leur en eurent du tout faict perdre la veuë, & qu'ils se furent persuadez, qu'elle s'estoit allee cacher és tenebres: ils commencerent (tant sont les esprits des hommes vne fois espouuentez, enclins à superstition) à croire que cela signifioit que leurs traualx ne prendroient iamais fin, & à se plaindre que les dieux auoient leurs meschancetez en detestation.

Drusus cognoissant qu'il estoit expediët de s'aider de ceste inclination & changement, & trouuant bon de conuertir en vne prudence ce que la fortune luy offroit, commanda qu'on allast par les tentes. Clemës le Centenier, & autres aggreables au peuple pour sçauoir faire beaucoup de bones choses furent appelez à cest affaire: lesquels sentremeslans avec ceux du guet, des stations, & de la garde des portes, commencerent d'une part à leur faire de belles promesses, & d'autre à les intimider. Iusques à quand (disoient ils) tiendrons nous le fils de nostre Empereur assiegé? Quelle fin doiuent prendre noz debats? Faudra il que nous facions le serment à Percennius, & à Vibulenus? Percennius & Vibulenus souldoyeront ils les gens d'armes? distribueront ils les terres aux vieux soldats qui auront acheué leur temps? Quoy? vsurperont ils l'Empire du peuple Romain au lieu des Nerons, & Drusiens? Que ne sommes nous les premiers à nous repentir de ceste offence, tout ainsi que nous auons esté les derniers à y consentir? L'on se sent à tard d'un bien faict, quand on le demande avec plusieurs. Aduisez donc d'en meriter soudain vn particulier, pour le receuoir incontinent.

Estans

Estans esmeus par ces paroles, & se deffians les vns des autres, ils separent les vieux soldats d'avec les nouveaux, & vne legion d'avec l'autre. Et lors peu à peu leur reuint le vouloir de se rendre obeissans. Parquoy laisserent la garde de leurs portes, & remirent les enseignes en leurs places accoustumees, lesquelles au commencement de la sedition ils auoient toutes assemblees en vn lieu. Le iour venu, & les gensd'armes congregez, Drusus (iaçoit ce qu'il n'eust la parole à commandement, pour faire harangue) toutesfois par vne gentillesse qu'il auoit de nature, commença à les reprendre de ce qu'ils auoient premierement entrepris, & approuuer ce que presentement ils faisoient: leur remonstrant qu'il n'estoit pas homme qui se laissast ainsi vaincre par crainte, ou par menasses.

Toutesfois que s'il les voyoit retourner à modestie, & requerir pardon, il escriroit à son pere afin qu'il appaisast son ire & receust la requeste des legions. Parquoy à leur priere le mesme Blesus de rechef, L. Aponius homme d'armes Romain de la compagnie de Drusus, & Iustus Catonius Centenier du premier ordre, furent enuoyez à Tibere. Eux partis il y eut diuerses opinions. Aucuns disoient qu'il falloit attendre le retour des Ambassadeurs, & ce pendant tascher de gaigner les gensd'armes par douceur. Les autres estoient d'aduis qu'il estoit besoing d'vser de remedes plus violens: disans qu'en vne cômune n'y auoit rien de moyen, & qu'ils tiendroient tout en crainte, si eux mesmes n'y estoient tenus. Au contraire où ils seroient tenus sous la bride, l'on pourroit sans danger

LE I. LIVRE DES ANNALES

faire peu d'estime de leurs entreprises . Que maintenant qu'ils estoient meus de superstition, il falloit outre leur donner crainte du Capitaine , & se despescher des auteurs de la sedition. Drusus estoit vn peu plus enclin à la rigueur, au moyen dequoy ayant faict venir Vibulenus & Percennius, les feit mettre à mort. Aucuns ont escrit qu'ils furent tuez mesmes dedans la tente du Capitaine: les autres, que les corps furēt iettez hors des remparts , à fin d'estre veus d'un chacun. Depuis tous ces seditieux furent cherchez selon que ils s'en estoient meslez plus auant. Les vns trouuez hors du camp errants & vagabonds, furent tuez par les bendes Pretoriennes, & les autres furent liurez par les mains des Manipules mesmes, qui vouloient donner tesmoignage de leur fidelité.

Or ce qui augmentoit le soucy des soldats estoit l'hyuer fort auancé à cause des continuelles pluyes, lesquelles estoient si vehementes qu'à peine osoient ils saillir de leurs tentes, eux assembler, ny garder leurs enseignes, qui estoient transportees çà & là par les tourbillons des vents, & excessiues pluyes. D'auantage ceste crainte de la fureur du ciel estoit encores imprimée en leur cueur, sçauoir, que ny les astres se troubloient sans cause, ny les orages & tempestes estoient en vain enuoyez contre les meschans. Parquoy penserent qu'il n'y auoit autre remede à leurs maux sinon qu'abandonnans ce camp infortuné, & par eux violé, ils se feissent absoudre de ce peché, & se transportassent chacun en ses garnisons. La huietiésme legion se retira la premiere, & apres elle la troisiésme.

me. Or Nonanus auoit crié qu'il falloit attendre les lettres de Tibere, mais se voyant abandonné par le depart des autres, preuint de son gré la mort qu'il se voyoit necessairement prochaine. Ainsi Drusus voyant qu'il auoit donné bon ordre aux choses presentes s'en retourna à Rome, sans attendre le retour des Ambassadeurs.

Quasi en ce mesme temps, & pour les mesmes occasions les legions qui estoient en Germanie se mutinerent & fut ceste esmotion plus grâde d'autant que ils estoient plus grand nombre de gens, & pour ce aussi qu'ils croyoient que Germanicus Cesar iamais ne se voudroit submettre à vn autre. Au moyen dequoy il se donneroit aux legions, & par sa force emporteroit tout avec soy. Il y auoit deux armées campées sur le riuage du Rhin. Celle qu'on appelloit l'armée d'en haut estoit sous la charge de C. Silius Ambassadeur, & l'autre d'embas estoit conduite par A. Cecinna. Germanicus estoit chef principal & souverain de toutes deux, & estoit pour lors empesché, à amasser le reuenu de la Gaule. Ceux qui estoient sous Silius, douteux & mal asseurez de ce qu'ils deuoient faire, contemploient la fortune de ceux qui auoient esmeu l'autre sedition. Mais ceux de l'armée d'embas vindrent à entrer en vne rage & furie, & s'ourdirent le commencement de ceux de la cinquiesme & dixneuuesme legions, apres qu'ils eurent attiré avec eux la premiete, & la vingtiesme. Car ils estoient en vn mesme fort pour l'Esté sur les limites des Vbiens, où ils n'auoient rien, ou bien peu à faire.

*Sedition
des legions
qui estoient
en Alle-
magne.*

LE I. LIVRE DES ANNALES.

Après donc, que la mort d'Auguste fut d'eux entendue, vne multitude de ceux du pays (qui auoient esté choisis à la monstre n'agueres faicte à Rome) gés accoustumez à mal faire, & impatiens de travail, commengèrent à emplir & persuader les lourds entendemens des autres, & leur remonstrer que le temps estoit venu, que les vieux soldats deuoient demander auoir leur mission & congé plustost que de coustume: & les plus ieunes, que leurs gages fussent rehaufsez, & tous generalement quelque relasche de leurs miseres: consequemment auquel on auoit moyen de se venger de la cruauté des Centeniers. Or vn seul ne faisoit ces remonstrances, comme entre les legions Pannoniennes vn Percennius: ny estoient faictes à soldats espouuentez, & ayans crainte d'autres plus puissantes armées: ains auoit ceste sedition plusieurs bouches, & plusieurs voix crians que de leur main dependoit la Republique Romaine, que par leurs victoires elle estoit augmentee, & que d'elles les Empeleurs prenoient leurs surnoms. Et l'Ambassadeur n'osoit s'entremettre d'y donner ordre, pour ce que la folie de ceste multitude hors du sens, luy auoit faict perdre toute constance. Ainsi ces gens tout à coup comme forcenez, & transportez de leur esprit se ruēt avec les espees nuës sur les Cēteniers: lesquels de toute ancienneté ont esté le subiect de la hayne des soldats, & premier motif de leur cruauté. Les ayans dōc iettez par terre les foüetterent & se mirent soixante sur vn, de sorte qu'autant qu'il y auoit de Centeniers, autant faisoient ils de soixantines. Lors les ayans ain-
fi

si rompus, deschirez, & en partie tuez, les ietterent deuant le rempart ou dedans le Rhin. Septimius se-
 stoit sauué au Tribunal, & ietté aux pieds de Cecina-
 na, mais ils ne cesserent de crier, & le demander ius-
 ques à ce qu'il leur fut liuré pour estre mis a mort.
 Cassius Cherea (lequel estant ieune homme, & de
 grand courage, auoit tost apres la mort de C. Cesar
 donné occasion de sa memoire à la posterité) se feit
 voye avec l'espee entre tant de gens armiez, & luy
 donnans empeschement. Le Tribun, ny le Maref-
 chal du camp n'auoit plus aucune autorité. Les
 soldats departoient les quartiers, asseoient le guet
 & faisoient toutes autres choses necessaires pour le
 temps. Or ce qui donna grâde coniecture à ceux qui
 de plus pres consideroient l'intention des soldats,
 que ce tumulte seroit merueilleusemēt grand, & dif-
 ficile à appaiser, fut pourautant qu'ils ne les voioient
 point separer, ny faire aucune chose à l'aduis de peu:
 mais que tous ensemble s'enflammoient, & ensem-
 ble aussi s'appaisoient avec telle constance & equali-
 té, que l'on eust proprement dit, qu'ils auoient quel-
 que chef ou conducteur.

Estant ce pendant (comme nous auons dit) Ger-
 manicus en Gaule pour amasser le reuenu d'icelle, la
 mort d'Auguste luy fut annoncee. Or auoit il espou-
 sé Agrippina sa petite fille, & d'elle auoit eu plusieurs
 enfans. Quant à luy, il estoit fils de Drusus frere de
 Tibere, & petit fils de l'Imperatrix. Mais il estoit en
 grande perplexité, pour la haine couuerte que luy
 portoient tant son oncle que son ayeulle. Les causes

LE I. LIVRE DES ANNALES

de laquelle estoient plus aspres & vehementes, d'autant qu'elles estoient iniques & defraisonnables. Car la memoire de Drusus estoit grande enuers le peuple Romain, & croyoit l'on que s'il fut venu à auoir l'administration de là Republique, qu'il l'eut remise en sa liberté. Pour ceste cause ce peuple portoit grande faueur à Germanicus, n'en esperant pas moins de luy. Car ce ieune homme auoit en soy vne honnesteté, affabilité & courtoisie, qui estoit toute diuerse à la parole & contenance de Tibere, lesquelles estoient obscures & pleines d'arrogance. Ceste inimitié estoit aussi augmentee par les haines & debas qui estoient entre les femmes: car Liuia vsoit enuers Agrippina des picques, dont les marastres ont accoustumé d'vser, & Agrippina estoit vn peu soudaine & aisee a mettre aux champs, sinon que pour sa chasteté & l'amour qu'elle portoit à son mary, elle tournoit son courage à bien, encor qu'en toutes autres choses il fut inuincible.

Mais Germanicus d'autant qu'il se voyoit approcher de l'esperance d'estre Souuerain, d'autant il faisoit plus pour Tibere, & cōtraignit les Bourguignōs de là aupres, avec les villes des Belges à luy faire le serment de fidelité. Consequēment ayant entendu le tumulte des legions, & y estant allé en grande diligence, les eut à la rencontre hors du fort, ayans tous les yeux fichez contre terre comme en repentance de ce qu'ils auoient fait. Ainsi ayant passé le rempart, ouyt quelques plaintes confuses. Aucuns empoignans sa main comme pour la baiser, mettoient
ses

ses doigts dedans leurs bouches, à fin que touchant leurs machoueres, il sentist, qu'ils n'auoient plus aucunes dens. Les autres monstroient leurs membres tous courbez de vieillesse. Au moyen de dequoy voyant ceste assemblée, pource qu'elle luy sembloit confuse & meslée, commanda que chacun se retirast en sa chambree & dizaine, à fin qu'ils peussent mieux entendre sa responce. Voulut aulli qu'ils feissent porter leurs enseignes deuât eux, à fin que pour le moins par cela il peut plus facilement discerner les cohortes. Ce qu'ils feirent assez laschement. Ce fait commençant sa harangue par la reuerence que l'on deuoit à Auguste, vint tomber sur les victoires & triomphes de Tibere, extollant principalement par louanges les actes plus honorables par luy acheuez és Germanies en la compagnie de ces legions. Puis il vint à louer l'Italie paisible & accordante, la loyauté des Gaulois, monstrant qu'il n'y auoit aucun trouble ou dissension entre eux.

Cecy fut escouté en silence, ou s'il y eut du bruit, ce fut bien peu. Mais quand il vint à toucher la sedition, leur demadant, qu'estoit deuenue ceste modestie militaire? ou estoit l'honneur de l'ancienne discipline? & en quel lieu ils auoient chassé les Tribuns & Centeniers? Lors tous commencerent à eux depouiller nuds, reprochans leurs playes par les cicatrices, & leurs batures, par les marques qui estoient demourees: Et tout soudain avec voix indiscrettes & confuses, à se plaindre du peu de salaire qu'ils receuoient, apres qu'ils estoient dispensez de n'aller

LE I. LIVRE DES ANNALES

plus à la guerre: de leurs gages qui estoient trop petits; de l'apreté de leur trauail, nommans particulièrement les tranches & rempars qu'ils auoient faits, & les amas de fourrage, de matiere, mestrion, & autres choses esquelles l'on à de coustume embesoi-gner les soldats, ou pour la necessité du camp, ou bié pour les garder d'estre oyssifs. Ia commençoit à s'eleuer vn grand cry de ceux des vieilles bendes, lesquels remonstrans qu'ils auoient esté trente ans ou plus à la soute, le prioient de donner remede à leurs trauaux, à fin qu'en iceux ils n'acheuassent le reste de leur vie: & pareillement de mettre fin à leur si long exercice de guerre, leur donnant quelque moyen de pouuoir en repos viure aisez & sans pauureté. Mesmes il en y eut aucuns qui redemanderent l'argent qui auoit esté legué par Auguste, & faisans de grâds signes à Germanicus, se monstroient pres a luy fauoriser sil vouloit s'emparer de l'Empire. Mais lors Germanicus comme sil se fut senty souiller de ceste meschanceté,auta du Tribunal en bas: & comme il sen vouloit aller, mirent leurs bastons au deuant pour l'empescher, le menassans, sil ne retournoit. A quoy il commença à crier, qu'il aymoît mieux mourir que fauser sa foy. Et ayant tiré l'espee du costé, estoit prest de sen bailler en la poiêtrine, si ceux qui estoient aupres de luy arrestans sa main ne l'eussent par force empesché. Ceux qui estoient derriere en ceste cōgregation, ioints ensemble, & mesmes (qui est plus difficile à croire) aucuns particuliers s'approchans plus pres, l'enhortoient à se frapper. Entre autres vn
soldat

soldat nommé Calusidius luy presenta son espee ^{Calusi-}
 nue disant, qu'elle auoit la poincte bien mieus affi- ^{dius.}
 lee. Ce qui sembla cruel, & contre toute bonne cou-
 stume, mesmes aux plus forcenez: tellement que les
 amys de Germanicus eurent lors loisir de le trans-
 porter en son tabernacle. Là fut deliberé du remede.
 Car le bruit estoit, que quelques Ambassadeurs s'ap-
 parcilloient pour aller à ceux de l'armee d'enhaut,
 pour les faire ioindre en ceste cause: & que la cité des
 Vbiens estoit vouee au sac, & pillage. Au moyen de- ^{C'est Col-}
 quoy estans les mains de ces soldats garnies de ce- ^{gne.}
 ste proye, ils seroient gens pour se ruer aussi para-
 pres sur les Gaules, & les piller. Et ce qui augmenta
 d'auantage la crainte fut, que les ennemis estoient
 aduertis de la sedition qui estoit au camp des Ro-
 mains: au moyen de quoy y auoit danger qu'ils ne
 les vinssent assaillir si d'auenture ils abandonnoient
 le riuage du Rhin. Au contraire s'ils armoient les cõ-
 federez, & les bendes Auxiliaires contre les legions,
 c'estoit susciter vne guerre ciuile. Parquoy de leur te-
 nir rigueur y auoit grand danger, & leur donner ce
 qu'ils demandoient estoit grande lascheté: tellement
 que fut qu'on refusast les gens d'armes tout à plat de
 ce qu'ils requeroient, ou qu'on leur octroyast, la Ré-
 publique ne laissoit, de tousiours demeurer en brásle.

Donc apres auoir disputé tant d'un costé que d'autre,
 il fut arresté qu'on escriroit vnes lettres au nom
 du Prince, par lesquelles ceux qui auroient esté à la
 soute l'espace de vingt ans auroient leur congé &
 & seroient exempts d'aller à la guerre: & les autres

LE I. LIVRE DES ANNALES

qui auroient demouré seize ans seroient quittez de leurs serments, & toutesfois demoureroient souz les enseignes, sans autre charge que de repousser l'ennemy, où il seroit besoing. Pareillemēt que les legs que ils auoient demandez leur seroient payez au double. Les soldats s'apperceurent que cecy auoit esté fainct, & controuué pour quelque temps & pour ceste cause poursuiuoient que cela fust executé sur le champ. Ce qui fut depesché par les Tribuns quant au congé. Mais on tardoit vn peu beaucoup à leur deliurer argent. Quoy voyant la cinquiesme, & dixneuuesme legions, ne voulurent laisser leur fort de l'Esté, ny se retirer es garnisons de l'Hyuer, que prealablement, & sur le lieu n'eussent touché deniers. Tellement que Germanicus fut contrainct d'y employer l'argent qu'il auoit pour son voyage, avec celuy de ses amis. L'Ambassadeur Cecinna remena en la cité des Vbiens la premiere & vingtiesme legions, infame & deshonorée compaignie: en ce qu'elle faisoit cōduire entre les Aigles, & enseignes, l'argent, & les bougettes lesquelles par force elle auoit ostées à son Prince.

Germanicus estant allé à l'armee d'enhaut, feit sans delay faire le serment à la deuxiesme, treziesme, & seiziesme legions. Et pour ce que ceux de la quatorziesme en faisoient quelque difficulté, on leur offrit argent, avec leur mission, jaçoit ce qu'ils ne se demandassent pas.

Chauciers. Mais au pays des Chauciens, les enseignes des legions sedicieuses qui estoient là en garnison, comencerent vne mutinerie, laquelle fut quelque peu reprise

ance

mee par la punition de deux soldats qui sur le champ furent executez. Cecy fut fait par le commandement de Memmius Marechal du camp, plus pour donner exemple aux autres, que pour ce qu'il eust aucune puissance de ce faire. Et depuis comme la sedition se renforçast, il fut trouué par les soldats comme il fuyoit: & voyant que le celer ne luy seruoit de rien, tascha de se sauuer par audace, leur remonstrant, que ou en quelque sorte ils l'outrageroient, que ce n'estoit à luy à qui l'outrage se faisoit, mais à leur Capitaine Germanicus, & à l'Empereur Tibere. Ayât par ce moyen fait peur à ceux qui luy auoient fait resistâce, se tourna avec vne enseigne, qu'il empoigna vers le riuage du fleuue, criant que ceux qui abandoneroient la compagnie seroient reputez comme trahistres. Ce fait les remena dedans leur fort d'Hyuer tous perturbez, & n'ayans rien osé attenter.

Estans en ces entrefaictes les Ambassadeurs retournez de deuers le Senat, vindrent trouuer Germanicus lequel estoit ja arriué pres l'autel des Vbiens, ou la premiere, & vingtiesme legions, avec les vieux soldats (qui n'aguieres auoient eu leur mission, & estoient retenus sous l'enseigne) passoient leur Hyuer: lesquels estonnez, & troublez en leur conscience eurent peur que ces Ambassadeurs fussent venus de par le Senat, pour casser & annuller ce que par sedition & de force ils auoient impetré. Et (comme la coustume du vulgaire est de tenir vn homme pour attaint, quoy que les moyens de l'accusation soient faux) ils se viennent attacher à Munatius Plancus,

Munatius Plancus.

LE I. LIVRE DES ANNALES.

autresfois Consul, & chef de ceste Ambassade: l'accusans comme fil eut esté auteur de cest arrest du Senat. Et venue l'heure d'environ minuit, accoururent à la porte de Germanicus, & la forcerent demandans l'enseigne qu'il auoit en sa maison. Mesmes tirerent Germanicus du lit, & le menassans de le tuer, le contraignirent, de la mettre entre leurs mains. Ce fait s'escartans par les rues, eurent les Ambassadeurs à la rencontre, lesquels apres auoir entendu l'effroy, alloient droit au logis de Germanicus. A ceux ils dirent plusieurs iniures, & se preparoient pour les mettre à mort, principalement Plancus: lequel retenu de son estat & dignité ne s'en voulut fuyr. Et n'eut autre moyen d'eschapper de ce danger, sinon se ietter dedans le fort de la premiere legion. Là embrassant l'Aigle & autres enseignes taschoit de se mettre en seureté souz faueur de la religion. Et certes si le port'Aigle Calpurnius n'eust repoussé leur extreme force l'Ambassadeur du peuple Romain (chose peu commune entre les ennemis) eut au camp mesme des Romains, de son sang souillé les autels des Dieux. Finalement le cler iour venu, que les Capitaines, les soldats, & tout ce qu'ils auoient fait, fut en apparence, Germanicus entrant dedans le fort commanda qu'on luy amenast Plancus, lequel il feit seoir avecques luy au Tribunal. Lors blasmant leur rage fatale, (8: comme si elle se fut renouuëe non par leur ire ou courroux, mais par celle des Dieux) leur vint à declarer l'occasion pour laquelle les Ambassadeurs estoient arriuez. Consequemment leur monstra le droit

Calpurnius.

droit & feureté qu'auoient tous Ambassadeurs, & avec vne grande facunde & eloquence donnoit à cognoistre la compassion qu'il auoit, tant du danger ou l'estoit trouué Plancus (sans l'auoir en aucune sorte merité) que du deshonneur que par c'est acte la legion auoit encouru. Ainsi estant ceste assemblee estoñee plustost qu'appaisée, il renuoya les Ambassadeurs souz la garde des gēs de cheual des Auxiliaires.

En c'est effroy chacun commença à reprendre Germanicus dont il ne se retiroit vers l'armee d'en haut, ou il trouueroit gens obeissans, & qui luy donneroiet ayde contre ces rebelles: & luy remōstroient qu'il auoit assez fait de fautes. par ses congez, largesses, & autres trop gratieuses deliberations. Que s'il auoit sa vie propre en peu d'estime, il ne deuoit pourtant laisser son petit enfant, avec sa femme enceinte entre gens ainsi forcenez & violateurs de tout droit d'humanité. Que pour le moins il les deuoit rendre à leur ayeul, & à la Republique. Ayant Germanicus longuement songé là dessus: finablement embrassant (les larmes aux yeux) le ventre de sa femme, & leur commun enfant, contraignit de sen aller, combien qu'elle ny voulut entendre & allegast estre descendue d'Auguste, & qu'on ne la verroit point forligner, ou il seroit question de porter vn peril constamment. Lors vous eussiez veu marcher ceste compagnie de femmes, ceste troupe, qui vous eut fait pitié. La femme du chef de l'armee fugitiue, portant son petit fils entre ses bras, & autour les femmes de ses amys qui sen alloient quant & elle, toutes esplo-

LE I. LIVRE DES ANNALES

rées. Et certes ceux qui demouroiēt là, n'estoient par moins faschez ny tristes. Car vous n'eussiez pas dit que cela eut ressemblé a vn Cesar, quand il est en grand honneur & triomphe dedans son camp. Mais plustost estoit la semblance & les pleurs, plainctes, & cris d'une ville prise d'assaut. Tellement que leurs regrets, & lamentations feirēt tourner en cest endroit les aureilles & la face des soldats. Ainsi donc ces femmes sortēt de leurs demourâces accoustumees, quelle piteuse harmonie de leurs cris? quelle chose plus triste? Veoir femmes si nobles & illustres, n'auoir pour leur garde ny Centenier, ny soldat? Veoir la femme du chef de l'armée, abandonnee de sa compagnie & suite accoustumee: se retirer par deuers les Treuiriés, & se commettre à la foy de gens estrangers? Quoy voyans les gens d'armes commencerent à sentir en eux vne honte, & commiseration, leurs venāt au deuant la memoire de son pere Agrippa, d'Auguste son ayeul, & de Drusus son beaupere. Pareillement sa fecondité en multitude d'enfans, avec sa tresrenommee chasteré: & aussi ce ieune enfant lequel auoit esté nourry & eleué dedans le camp, parmy les legions, lequel d'un terme de guerre ils auoient surnommé Caligula: pource que souuent il vsoit de ceste chausseure à fin de conciter le vulgaire à luy porter affection. Mais encor n'y eut il chose qui esmeut plus le cœur des soldats, que l'enuie qu'ils eurent contre les Treuiriens. Parquoy ils viennent à prier, & se mettre au deuant à fin qu'elle retourne, & demeure. Tellement qu'une partie luy allerent à la
rencontre,

Caligula.

rencontré, & les autres retournerent à Germanicus: lequel encor plein de douleur & de courroux & les voyant espars à l'entour de luy, commença à leur dire ainsi.

* NE PENSES point que j'aye ma femme, ou mon enfant en plus de recommandation, que j'ay ou mon pere, ou la Republique. Mais voyant que la maiesté de mon pere estoit suffisante pour le defendre, & que l'Empire Romain auoit assez d'autres armées pour sa garde & deffence, j'ay voulu maintenant esloigner ma femme & mes enfans (lesquels de bon cœur i'exposerois à la mort pour vostre gloire) de la compagnie de gens ainsi forcenez & hors du sens: à fin que si quelque meschanceté ou vilenie doit encor sortir de ceste entreprise, elle soit par le sang de moy seul purgée; & ne soit vostre peché aggraué par le meurdre que vous pourriez commettre, tant en la personne du petit fils d'Auguste, que de la bru de Tibere. Car quelle chose n'avez vous osé ces jours passez? quelle chose est demouree inuiolée? Quel nom puis-je donner à vne telle assemblée? Vous appelleray ie gens d'armes? vous qui avez enclos & assiegé le fils de vostre Empereur d'armes, & de rempars? Vous appelleray ie citoyens ayans si peu d'estime de l'autorité du Senat? Qui plus est, vous avez violé le droit qu'on eut trouué entre les ennemis, le droit sacré des Ambassadeurs, le droit qui se garde en toutes nations. Iules Cesar (aujourd'huy au nombre des dieux) appaisa d'vne seule parole la sedition de l'armée, appellant Quirites, ceux qui faisoient difficulté de luy.

*Harangue
de Germanicus aux
soldats.*

LE I. LIVRE DES ANNALES

faire le serment. Feu Auguste à espouuenté les legiōs Aëtiaques de sa face & seul regard. Et bien que ie ne soye encor egal à eux (toutesfois descendu d'eux) i'ay veu neantmoins, que si vn soldat d'Hespaigne ou de Syrie eut fait peu de conte de moy, on trouuoit cela fort estrange & deshonneſte. Mais venez ça vous premiere & vingtiesme legions (toy premiere ayant receu les enseignes de Tibere, & toy vingtiesme qui l'as accompagné en tant de guerres, & as receu tant de biens de luy) sont ce les grans merciz que vous rendez à vostre Capitaine ? faudra il que ie porte ce message à mon pere, lequel de toutes autres pars reçoit ioyeuses nouuelles ? Sçauoir que ny ses nouueaux, ny vieux soldats ont peu estre saoullez de congez, ou d'argent ? qu'icy l'on ne fait autre chose que tuer Centeniers, chasser Tribuns enclorre & assieger Ambassadeurs. Que le camp & les riuieres sont toutes tainctes de sang, & qu'à peine ay-ie peu prolonger ma vie souz la mercy de gens courroucez. Mais pourquoy à force m'ostastes vous des mains le glaiue lequel ie voulois le premier iour de l'assemblée me ficher en la poiſtrine ? O amys mal aduisez ? Celuy faisoit bien mieux, & plus en amy, lequel m'offroit son espee pour me tuer. Je fusse mort certes auant qu'estre aduertty de tant de meschancetez de ceux de mon armee, & eussiez esleu vn Capitaine, lequel (bien qu'il eut laissé ma mort impunie) eut toutesfois pris vengeance de la mort de Varus, & des trois legions. Et ia dieu ne plaist que les Belges (encor qu'ils s'y offrent) ayent cest honneur & le

& le bruit, d'auoir donné secours au nom Romain, & reprimé le peuple de Germanie. O sacré Auguste, que ton esprit ia receu au ciel: & ton image (ô mon pere Drusus) avec la memoire que tu as d'auoir autrefois esté en la compagnie de ces mesmes soldats (lesquels honte & gloire commencent ia à saisir) effacét ceste vilaine tache, & cōuertissent leurs inimitiez ciuiles en la ruine des ennemis. Et vous aussi (desquels ie voy les faces, & les courages changez) si de bon cueur vous rendez au Senat ses Ambassadeurs, l'obeissance à vostre Empereur, & à moy, ma femme & mon fils, cessez de vous tenir pres des seditieux, & les separez d'avec vous: cecy m'assurera de vostre repentance, & sera ferme lien de vostre loyauté.

Ces choses dictes ils se prosternent tous à genoux deuant luy, & confessans que tout ce qu'il leur auoit reproché estoit vray, le supplierent de punir les malfaiçteurs, de pardonner à ceux qui auoient peché par ignorance, & les mener contre les ennemis. Aussi le prierent de faire retourner sa femme avec
il entend Caligula.
 * l'enfant nourry entre les legions, à fin qu'il ne fut donné en ostage aux Gaulois. Germanicus s'excusa du retour d'Agrippina tant pource qu'elle estoit presté d'accoucher que pour l'hyuer qui estoit prochain, les assurant neantmoins de celuy de son fils: & remettant au surplus le demeurant à leur discretion.
*C. Cætroni-
nius.*

Estans par ce moyen leurs courages changez, courent ça & là, & ayans pris & lié les plus seditieux les menerent deuant C. Centronius Ambassadeur de la premiere legion, qui leur feit leur proces & les pu-

LE I. LIVRE. DES ANNALES

nit en la maniere qui s'ensuit. Les legions estoient deuant le lieu de l'assemblee les espees nues. L'accusé esleué sus vn eschaffaut estoit montré par le Tribun: Lors, s'ils crioient que tel estoit coupable, soudain il estoit ietté en bas, & mis en pieces: & se resiouysoient les soldats en ceste tuerie, comme si par icelle ils eussent esté rendus incouppables. Mesmes Germanicus n'y donnoit aucun empeschement, parce que n'estant cecy fait par son commandement, tout le blasme & mauuaise reputation de ceste cruauté en demouroit sur eux.

Les vieilles bendes en ayans fait autant furēt tost apres enuoyees au pays de Rhetie, souz vmbre d'aller deffendre ceste prouince, que les Souaues estoient prests d'enuahir: mais à la verité c'estoit pour en despescher le camp, car ils estoient encor pleins de cruauté, tant pour la rigueur du remede, que pour le souuenir de leur meschante entreprise. Apres cela Germanicus feit reucue sur les Centeniers, ou falloit que celui qui estoit appellé par le chef de l'armee, dit son nom, sa qualité, son pays, depuis quel temps il auoit suyuy les armes, quels beaux faits il auoit acheuez, & quels presens & ioyaux il auoit acquis à la guerre. Lors tel estoit retenu en son estat, si les Tribuns & la legion approuuoient son industrie & innocence. Mais si tous d'un accord le taxoient d'auarice ou de cruauté, il estoit cassé.

Les choses presentes, ainsi appaisees, ny restoit encor moins de besongne à cause de l'audace & orgueil de la cinquiesme & dixneuuesme legions, qui passoient
soient

soient leur Hyuer à soixante mil de là, en vn lieu nommé *Vetere*. Car c'estoient ceux qui auoient encom-
mencee la seditiō, & de leurs mains perpetré les plus
grandes meschancetez, retenans leurs ires, & leur
cœur, sans s'espouuenter pour la punition de leurs
compagnons, ny pour leur repentance se conuertir.
Germanicus donc delibera de faire conduire ses ar-
mes, ses vaisseaux & les confederez par le Rhin, bien
deliberé de les combattre, ou ils seroient refusans de
luy obeyr.

Or à Rome n'estant encor sceu qu'elle yssue auoit
en la seditiō d'Illyrie, & les nouuelles venues de l'autre
mutinerie des legions Germaniques, toute la cité
craintifue & estonnee commença à blasmer Tibere:
pource q̄ pendant qu'il amusoit le peuple & le Senat
(gēs inutiles aux armes) cōtre faisant le lōg, & difficile
à accepter l'empire, les soldats se mutinoiēt, & ne pou-
uoient estre reprimez par l'autorité encor trop neuf-
ue, de deux ieunes iouuēceaux. Et pource qu'il deuoit
y aller en personne, & leur mettre en barbe la maiesté
Imperiale, estât certain qu'ils se desisteroient de leur
entreprise apres qu'ils auroiēt veu deuant eux vn Prin-
ce de si lōgue experiēce, de si grande seuerité, & si ex-
cellēt, & en biens-faits. Est il possible (disoient-ils)
qu'estant Auguste vieil & cassé, ayt tant de fois peu
passer és Germanies, & que Tibere en fleur de son a-
ge demeure assis au Senat, blasonnant les propos des
Senateurs? Il à donné assez bon ordre, que la cité de-
meure en seruitude: il faut maintenant qu'il don-
ne quelque fomentation au cueur des gens d'armes,

LE I. LIVRE DES ANNALES

à fin qu'ils puissent demourer en paix.

Or nonobstant toutes ces paroles Tibere conclud den'abandonner le chef de toutes choses ny mettre luy ou la Republique en hazard. Car plusieurs choses toutes diuerſes le rendoient perplex. D'un coſté il voyoit l'armee de Germanic qui eſtoit la plus puiſſante, & d'autre part celle de Pānonie plus prochaine de l'Italie: l'une ſouſtenue de la puiſſance des Gaulois. Et l'autre preſte de ruer ſur l'Italie, quād bon luy ſemblera. A laquelle donc de ces deux ſe fut il premierement retiré, quel autre n'eut eſtimé iniure luy eſtre faiſte? Au contraire voyoit que par le moyen de ſes fils il pouuoit les aborder toutes d'eux enſemble, ſa maieſté ſauue, laquelle d'autant plus on a en eſtime & reuerence que plus on en eſt eſloigné: ioint que ces ieunes hommes ſeroient excuſables, ſils rémettoient aucunes choſes à la diſcretion de leur pere. Que ſi d'aduenture l'on faiſoit quelque reſiſtance à Germanicus ou à Drufus, il ſeroit par apres en luy de les appaiſer, ou de les deffaire. Mais ſi de prime face ils venoient à faire peu de conte de l'Empereur, quel autre remede y auoit il?

Au ſurplus comme ſil eut eſté preſt à partir, il choiſiſt ceux qu'il vouloit mener avec ſoy, feit aſſembler ſon bagage, & equipper ſes vaiſſeaux, puis tout ſoudain ſ'excusant ou ſur l'hyuer qui eſtoit prochain ou diuerſement ſur ſes autres affaires, deceut au commencement les plus fins & aduiſez, & puis le peuple & les prouinces encor plus.

*Ruſe de
Germanicus.*

Mais Germanicus ſaſſoit ce qu'il eut aſſemblé ſon
armee,

armée, & eust la vengeance toute preste contre ceux qui s'estoient reuoltez, si estima-il bon de differer encores vn petit, pour veoir si par ceste exemple recent, ils pouroient point mieux aduiser à eux mesmes. Et pource il escriuit premierement à Cecinna, luy faisant entendre comme il venoit avec vne puissante armée, & que s'ils ne preuenoient à punir ceux qui auoient delinqué, il se deliberoit de les saccager tous indifferemment. Cecinna monstra ces lettres à ceux qui portoient les Aigles & autres enseignes: & secrettement, Cecinna ce que pour lors au camp estoit le plus grand signe de sincerité & bonne foy, les admonnestant de purger le camp de ceste infamie, & de sauuer leurs personnes de mort. Car (disoit-il) en temps de paix l'on regarde les occasions, & merites d'un chacun: mais en temps de guerre l'on tuë sans aucun esgard, aussi bien les innocens, que les coupables. Ayās dōcques ces enseignes tenté, & fait preuue de ceux qu'ils pensoient propres à leur entreprise, & voyans la pluspart des legions retournees à leur deuoir, par l'aduis de l'Ambassadeur, ils ordonnent le temps, pour saccager & mettre à l'espee les plus meschans & prompts à sedition. Et s'estans entredōné le signe, ils se iettent dedans les manipules, & chambrees & tuent ceux qui de rien ne se doutoient, sans qu'aucun sceust comme ceste tuerie auoit commécé, ny quelle fin elle deuoit prendre, sinon ceux qui estoient du conseil. Vous eussiez veu vne forme de guerre, toute diuerse à celles qui oncques furent. Car ce n'estoit point vne bataille, ce n'estoit point vne armée contre vne autre:

LE I. LIVRE DES ANNALES.

mais ceux q̄ couchoiēt en vn mesme lit, ceux q̄ le mesme iour, on auoit veu mager, & la nuit mesmes reposer ensemble, se badoient les vns cōtre les autres & s'entre-tuoiēt. Par tout l'ō n'oyoit q̄ cris, l'ō ne voyoit q̄ playes, & sang respādu, sans q̄ l'ocasiō en fut cogneue. Le reste estoit cōduit par la fortune, tellemēt qu'il y eut aucuns des plus gēs de biē, occis. Mais auāt qu'ō eut entēdu qui estoient ceux, cōtre lesquel on vsoit de ceste cruauté, les pl^r meschās auoiēt ia pris les armes, & n'y eut Ambassadeur ny Tribū q̄ se trouuaist pour y dōner ordre. Le vulgaire eut toute puissance, & luy fut la vėgeance permise pour en vser iusques à satieté. Lors Germanicus entrāt dedās le cāp, & avec plusieurs larmes criāt q̄ cecy estoit vne vraye destructiō, plustost q̄ medecine : fait brusler les corps de ceux q̄ auoiēt esté tuez. N'estās encor ces courages appaisez de leur cruauté & felonnie, il leur va prēdre vne enuie d'aller cōtre les ennemis, pour faire sacrifice & satisfactiō de leur fureur, estimās q̄ les ames de leurs cōpagnons par eux mis à mort, ne seroient iamais appeisees, qu'ils n'eussēt receu playes honorables, dedās leurs impies, & cruelles poiētrines. Quoy voyāt Germanicus delibera s'ayder de leur ardeur, & ayāt fait dresser vn pōt, fait passer outre douze mil des légionnaires, vīgt & six bēdes des cōfederez, & huit Ailles de gēs de cheual, la modestie desquels n'auoit aucunemēt esté violée en ceste seditiō. Les Allemās qui n'estoiēt fort loing de la estoient fort aises, dequoy nous auīōs premieremēt esté arrestez par les vacatiōs à cause de la mort d'Auguste, & d'abondāt par les discordes des nostres. Mais les Romāis hastās leur train trauerserēt incōtinēt la forest

Cesie,

*Cour se en
Allema-
gne.*

Cesle, avec la frôtiere cōmencee par Tibere: & plâterēt <sup>Cesle frô-
tiere.</sup> le cāp en ceste frôtiere, le fortifiās par le deuāt, & par le derriere de rēpars, & trāchees: & par les flās à force d'arbres qu'ils auoiēt coupez & abbatuz. Ce fait trauerse-
rēt parmy ces forests obscures: & deliberēt, sçauoir leq̄l des deux chemīs ils debuoiēt prédre: le pl^o court & plus accoustumé, ou biē celuy q̄ estoit le plus malaisé, & nō encor batu, & duq̄l pour ceste cause iamais les ennemis ne se fussēt doutez. Et ayāns esleu la pl^o lōgue voye, le restē fut despeschē en diligēce. Car les espies auoiēt rapor-
té, q̄ les Allemās celebriēt ceste nuit vne feste, & vn festin solēnel, ou ils faisoient plusieurs folies. Cecinna fut enuoyē deuāt avec quelqs cheuaux legers pour faire abatre ce q̄ pouuoit nuire en la forest: D'assez pres le sui-
uoient les legiōs. La nuit clere de lune leur ayda tellemēt qu'ils vindrēt iusq̄s aux bourgs des Marsiēs, autour des-
quels ils dresserēt leur guet. Les Marsiēs estoient encor ^{Marsiens.} lors estēdus sur leurs lits ou deuāt les tables, & n'auoiēt au parauāt dressē aucun guet sur eux, pource qu'ils ne se doutoiēt de riē: tāt leur choses estoient mal ordōnees par leur nōchalance. Car il n'y à point de crainte de guerre entre gēs yures, ny mesmes point de paix, sinon remise lāguide & mal asseuree. Or à fin qu'il y eut plus de pays gaste, Germanicus diuīsa ces legiōs aspres au pillage en quatre bēdes, au moyē de quoy mirēt à feu & à sang biē 50. mil de pays, sās espargner ou auoir pitié, de sexe ny d'age, de choses sacrees ou pp̄hanes: mesmes ce tēple tāt renōmé entre ce peuple appellē le tēple de Tāsane, <sup>Temple de
Tansane.</sup> fut rasē à fleur de terre, & ny eut pas vn des soldats qui fut blessē, pource qu'ils n'auoiēt eu à faire qu'à gēs à demy endormis, desarmez, vagabonds, & sans ordre.

LE I. LIVRE DES ANNALES

*Bructeres,
Tubates,
Vsiptes.*

Ceste tuerie refueilla les Bructeres, Tubantes, & Vsiptes, lesquels vindrent à occuper les forests par où il falloit que l'armee retournaft. Dequoy aduertý Germanicus, tenoit tousiours par le chemin ses gens rangez en bataille. Vne partie des gens de cheual avec les bendes Auxiliaires faisoient l'auantgarde, apres lesquels marchoit la premiere legion. La dixneuuesime gardoit le costé senestre, & la cinquiesme le dextre, estant le bagage enclos au milieu. La vingtiesme legion faisoit l'arrieregarde, laquelle estoit suiue de la reste des bendes confederées. Les ennemis se tindrent cois iusques à ce que l'armee fut espandue parmi la forest, & lors commencerent à voltiger & faire petites courses sur l'auantgarde & sur les ailles, puis en fin se ruerent de toute leur puissance sur l'arrieregarde, tellement que les bendes legeres cōmençoierent à se troubler & estre mises en desordre par ces espais ses troupes d'Allemands. Quand Germanicus s'approchant de la vingtiesme legion, crioit que maintenant ils auoient l'occasion & le moyen d'effacer la memoire de leur sedition, & pour ce qu'ils continuoient, & se hastassent de tourner en gloire, l'ignominie encourue par leur coulpe. Par ce moyen leurs courages commencerent à s'eschauffer, de sorte qu'ayans d'une impetuosité rompu leurs ennemis, les rengerent en lieux pleins & descouverts, & en feirent grande boucherie. Et en mesme instant l'auantgarde trouua moyen de sortir de la forest, & de dresser son camp. Depuis ils ne furent aucunement inquietez en leur chemin. Parquoy les soldats se confians de ce que nouuellement

nouvellement ils auoient fait, & mettans les choses passees en oubly, se retirerent en leur fort d'Hyuer.

Ces choses annoncees à Tibere le rendoiēt & perplex, & ioyeux ensemble: ioyeux de la sedition qui auoit esté opprimee, mais perplex de la gloire qu'auoit acquise Germanicus en ceste guerre: & dequoy par largesses, & pour auoir octroyé aux gens d'armes leur cōgé en trop brief temps, il auoit gaigné leur faueur. Toutesfois il feit le rapport au Senat de ses gestes, & tint plusieurs propos de sa vertu, lesquels il sembloit plustost coulourer de paroles, que les dire du cœur. Il loua aussi Drusus & l'ysue du tumulte d'Illyrie, en peu de paroles, mais de plus grande affection & de meilleur courage. Et si garda ce que Germanicus auoit remis, & octroyé, mesmes à l'armee de Pannonie.

En ceste mesme annee Iulia alla de vie à trespas, ^{Iulia fille d'Auguste.} laquelle long-temps au parauant auoit pour sa lubricité esté confinee par son pere Auguste, premiere-
ment en l'Isle Pandaterie, & depuis en la ville de Rhenes, qui est situee, és destroits de Sicile. Elle auoit esté mariee à Tibere au temps que Caius & Lucius Césars florissoient, & l'auoit dedaigné comme n'estât egal à elle. Qui fut la principale occasion pour laquelle Tibere se retira à Rhodes. Mais depuis estant fait Empereur, feit mourir de pauureté, mesaise, & langueur ceste pauvre bānie, infame, & (apres la mort d'Agrippa Posthume) priuee de toute esperance. Pensant que pour le lōg-temps, auquel elle auoit esté en exil; il ne seroit aucune mention de sa mort.

LE I. LIVRE DES ANNALES

*Sempronius
Gracchus
adultere
de Iulia.*

Pour la mesme cause il exercea sa cruauté contre Sempronius Gracchus, lequel estant de noble maison, de subtil esprit, & eloquent en meschanceté, auoit commis adultere avec la mesme Iulia au temps qu'elle estoit mariee avec M. Agrippa, & n'auoit lors mis fin à ses paillardises : ains apres qu'elle fut mariee à Tibere, cest adultere obstiné la persuadoit de mespriser & hayr son mary. Et croyoit on que les lettres, qu'elle auoit escrites à son pere Auguste, au d'esauantage de Tibere auoient esté composees par Gracchus. Estant doncques Sempronius transporté à Cercinna, qui est vne Isle de la mer d'Affrique, il endura son exil par l'espace de quatorze ans. Finalement comme quelques soldats fussent enuoyez pour le mettre à mort, le trouuerent au plus haut du riuage de la mer n'attendant aucunes ioyeuses nouvelles : & eux arriuez leur demanda seulement vn brief delay pour faire ses dernieres recommandations par lettres à sa femme Alliaria. Quoy fait leur presenta sa teste à trancher. Et certes pour la constâce qu'il eut à sa mort il ne se monstra indigne du nom des Semproniens, ores qu'en sa vie il eut forligné. Aucuns ont escrit que ces soldats n'auoient esté enuoyez de Rome, ains par L. Asprenas proconsul d'Affrique à la suasio de Tibere, qui en vain auoit esperé que le blasme de ceste mort tomberoit entiere-
ment sur le susdit Asprenas.

*Ceremo-
nies nou-
uelles.
Prebistres
Augustaux.*

En c'est an furent instituees nouvelles Ceremonies, & fonda l'on vn college de prebistres, qu'on appelloit compagnons Augustaux, ainsi qu'anciennement

T. Tatijs

T. Tatius pour retenir les ceremonies des Sabins auoit institué les cōpagnons Tatiens. Il en y eut vingt & vn des plus apparens de la cité qui furent esleuz par sort. A ce nombre furent adioustez, Tibere, Drusus, Claudius, & Germanicus. Les ieux Augustaux qui n'auoient encor iamais esté veuz, furent troublez pour la premiere fois par la discorde & debat des ioueurs. Or Auguste auoit permis ces ieux & farce-ries, pour faire plaisir à Mecenas qui estoit amoureux de Bathyllus. Et luy mesmes ne trouuoit ces manieres de recreations mauuaises, estimant chose ciuile, & humaine, de prendre quelques fois son plaisir & se recreer avec le menu peuple. Mais les manieres de faire de Tibere estoient toutes autres. Toutesfois, il n'osoit encor tourner le peuple nourry par si lōg tēps en plaisirs, à vne plus estroicte maniere de viure.

*T. Tatius.
Presbtres
Tatiens.*

*Ieux Aug-
ustaux.*

*Mecenas.
Bathyllus*

Estans Drusus Cesar, & C. Norbanus Consuls, on decerna vn triōphe à Germanicus encor que sa guerre ne fut acheuee. Et cōmbien qu'il ne se hastast de faire les appareils de ceste guerre que pour l'esté prochain, toutesfois il preoccupa, prenant les Cattes au despourueu, & se ruant sur eux des le commencement du printemps. Ce qu'il feit pource qu'il auoit quelque esperance que les ennemis se diuiseroient pour Arminius & Segestes, l'un desquels se mōstroit tresdesloyal enuers nous, & l'autre fort loyal. Arminius estoit celuy qui troubloit la Germanie. Mais Segestes au dernier souper qui se feit auant la bataille, auoit (ainsi que par plusieurs autres fois) descouuert à Varus la rebellion qui se deuoit fai-

*C'est la
premiere
annee de
Tibere.*

Catter. }

*Arminius
Prince des
Cheru-
siens.
Segestes.*

LE I. LIVRE DES ANNALES

re, au moyen dequoy luy conseilloit, qu'il mit luy, Arminius, & autres plus apparens es liens : pource que la multitude se voyant priuee de ses Princes ne seroit si hardie d'attēpter quelque chose. Luy disant au reste, qu'avec le temps il pourroit discerner les delinquens d'avec les innocens. Mais nonobstant cest aduertissement Varus fut deffait, par sa destinee, & par la force d'Arminius. Segestes iāçoit ce que par le consentement de sa gent il eut esté appellé en ceste guerre, demouroit toutesfois en discord avec Arminius, estant sa priuee haine augmentee, pour autant qu'Arminius luy auoit rauy sa fille qui estoit promise à vn autre. Ainsi le gendre estoit hay, & les beaux peres ennemis, tellement que ce qui est lien de charité entre gēs qui sont d'accord, seruoit desguillon à augmenter la haine de ces gens courroucez.

Pour la cause susdicte Germanicus donna à Cincinna quatre legions, cinq mille Auxiliaires: & quelques bendes d'Allemands de deçà le Rhin qui auoient esté leuez à la haste. Et de sa part print autant de legions, & des Auxiliaires au double, & ayant dressé vn fort sur le mont Thaunus, (au lieu ou estoient encores les enseignes & marques de celuy qu'y auoit fait faire autresfois son pere) & laissé L. Apronius pour garder les passages & riuieres: mena en grande diligence son armee legiere & sans bagage contre les Cattes. Car la secheresse & peu d'eau qui estoit aux riuieres (chose peu commune en ce pays) luy auoient beaucoup accourcy son chemin, & rendu facile: & craignoit au retour les pluyes, & torrens des caues.

*Mont
Thaunus,
L. Apronius.*

cauës. Toutesfois il prit les Cattes tât au despourueu, que tout ce qui estoit d'aage ou de sexe imbecile fut incontinent pris ou tué. Les ieunes se sauuerēt passant à nage le fleuve Adrana, & empeschans le plus qu'ils pouuoient les Romains qui vouloient là commencer vn pont. Toutesfois à la parfin ils furent repoussez du traiçt & des bastons à ietter pierres, & boulets, & ayās en vain tasché de faire paix sous quelques conditions (apres qu'aucuns d'eux se furent réduz à Germanicus, & que les autres eurent laissé leurs bourgs & villages) s'escarterent parmy les forests. Quād Germanicus eut bruslé Mattium ville capitale de ceste terre, & pillé le plat pays, il retourna son armee deuers le Rhin, sans que les ennemis osassēt leur venir dōner sur la queue: ce qu'ils auoient accoustumé de faire, quand plus par vne ruse & cautelle, que pour festimer les plus foibles ils tournoient le dos. Les Cheruscien^{cheruscien.}s auoient delibéré de secourir les Cattes. Mais Cecinna faisant courses de costé & d'autre leur feit peur. Et deffit les Marisien^{Marisien.}s qui s'estoient ose^{cheruscien.}z attacher à luy.

Peu apres vindrent Ambassadeurs de la part de Segestes, pour demāder secours cōtre la force du populaire qui le tenoit assiegé. Car Arminius auoit beaucoup pl⁹ de credit enuers ce peuple, que Segestes, principalement quand il les incitoit à faire guerre. Car entre gens Barbares, le plus audacieux, est celuy auquel ils se fient le plus: & de tel font leur Capitaine quand leurs affaires tōbent en trouble & esmotion. Segestes avec ces Ambassadeurs, auoit enuoyé son fils Segimund^{Segimund.}: mais ce ieune homme différoit d'y aller pour

LE I. LIVRE DES ANNALES

quelque remors qu'il auoit en sa conscience. Car ayãt esté créé Sacrificateur à l'autel des Vbiens auoit rompu les bendes & rubens qu'il auoit à sa teste, & s'estoit retiré avec les rebelles. Toutesfois se cõfiant en la clemence des Romains porta le message de son pere, & ayant d'eux esté receu benignement, fut enuoyé avec garnison sur les limites de Gaule. Germanic⁹ veit que il estoit bon de retourner. Parquoy alla charger sur ceux qui tenoient le siege, tellement qu'il deliura Segestes avec grand nombre de ses prochains & vassaux. En ceste compagnie yauoit plusieurs femmes nobles & entre autres la femme d'Arminius qui estoit fille de Segestes, toutesfois plus affectionnee enuers son mary qu'enuers son pere, laquelle se voyant vaincuë ne se print à plorer, ou à s'humilier & faire requestes, ains seulement regardoit son ventre plein, & tenoit les maïs serrées sur son sein. L'õ portoit aussi les despouilles de la deffaiçte de Varus, lesquelles auoient esté données en proye à plusieurs de ceux qui lors s'estoiẽt venuz rendre. Pareillemẽt y estoit Segestes en personne homme de belle representatiõ, & assuré pour la memoire de son alliance loyaument entretenuë avec les Romains, lequel commença à parler ainsi.

*Flavangne
de Seges-
tes.*

Ce n'est icy le premier iour auquel i'ay donné experience de ma foy, & cõstance enuers le peuple Romain, ayant (depuis que premierement Auguste me donna droict de bourgeoisie à Rome) tousiours faict election ou d'amis ou d'ennemis, selon que ie voyois vous estre profitable. Et ce nõ point pour haine que i'eusse contre ma patrie (estant bien assuré que les
traistres

traistres sont mesmes hays de ceux lesquels ils preferent) mais pour ce que ie voyois cela estre profitable, & aux Romains & aux Allemans, & trouuois la paix beaucoup plus expediente que la guerre. Ainsi doncques i'accusay Arminius ravisseur de ma fille, & violateur de l'alliance faicte avec vous, par deuant Varus lors Capitaine general de l'armee. Et voyant que par sa negligence cecy prenoit trop long traict: ie (pour le peu de support que ie trouuois ésloix) le poursuiuy de mettre moy, Arminius, & autres coupables es liens. Ceste nuit m'en portera tesmoignage: & à la mienne volonté que plustost elle m'eust esté derniere. Quant à ce qui aduint depuis il peut beaucoup plus facilement estre ploré qu'excusé. Au reste i'enchaisnay Armini⁹, mais ie fus aussi enchainé par ceux de sa faction. Et pour ce que ie te voy en personne, i'ayme beaucoup mieux les choses anciennes, que les presentes: & les paisibles que les troublees, non pour loyer ou recompense que i'en attende, mais à fin que par vn mesme moyen ie me purge de trahison, & sois mediateur idoine pour le peuple des Allemãs, moyénant qu'ils aiment mieux eux repentir, qu'estre destruits & ruinez. Aussi ie demande pardon pour la jeunesse & faute de mon fils. Quant à ma fille, ie confesse que par contrainte elle est icy venue. Mais ie te laisseray à considerer, dequoy tu te dois plus esmouuoir, ou de ce qu'elle est grosse d'Arminius, ou de ce qu'elle est ma fille.

Germanicus avec vne benigne responce promist sauueté à ses enfans, & prochains: & à luy, de le re-

LE I. LIVRE DES ANNALES

mettre en son ancien estat en la prouince. Apres cela il feit retourner son armee, & par le moyen de Tibere prist le nom d'Empereur. La femme d'Arminius accoucha d'un enfant male, qui fut nourry à Rauenne: duquel, & comme il fut depuis mocqué & affligé, ie diray en temps & lieu.

La renommee courut incontinent comme Segestes s'estoit rendu, & comme il auoit esté recueilly humainement: & fut ce bruit receu en fâcherie ou esperance, selon que chacun souhaittoit ou auoit en haine la guerre.

Mais Arminius outre ce qu'il estoit violent & impetueux de nature, deuint à demy forcené & hors du sens, quand il veit sa femme rauie, & l'enfant qu'elle auoit en son ventre subiet à seruitude, & couroit çà & là par le pays des Cherusciens, demandant les armes tantost contre Segestes, & tantost contre Germanicus iusques à ne s'abstenir d'iniures. Et disoit par moquerie que l'un estoit un notable pere, l'autre un vaillant Capitaine, & l'armee estre vertueuse d'auoir avec telle force de gens peu emmenervne seule femelle. Que de sa part il auoit mis à sac trois legions, & autant d'Ambassadeurs. Qu'il ne faisoit point la guerre par trahison, ny contre les femmes grosses, mais ouuertement, & contre gens armez. Que l'on voyoit encores les enseignes Romaines és forests de Germanie, lesquelles il auoit là pendues en l'honneur des dieux de la patrie. Que Segestes habite (disoit-il) tant qu'il voudra son riuage vaincu, & rende la prestrise à son fils: les Allemans routesfois ne pourront iamais l'excuser,

l'excuser, ayans veu les verges, les coignes, & longues robes des Romains entre les riuieres d'Elbe & du Rhin. Les autres natiōs pour n'auoir cognoissance de l'Empire Romain, n'ont aussi experimenté la rigueur de leurs punitions leurs tribus, & impositions, desquelles nous estans autrefois deschargez, & ayans contraint ce gentil Auguste (duquel ils ont fait vn Dieu) de se retirer sans rien faire, & pareillement ce Tibere lors esleu à l'Empire: c'est grande folie à nous d'auoir maintenant crainte d'un ieune enfant peu experimenté, & d'une armee mutine & seditionneuse. Et pource si vous aymez mieux vostre pays ancien, & voz parens, que des Seigneurs, & nouvelles Colonies, suyuez plustost Arminius Capitaine de vostre gloire & liberté, que Segestes chef de vostre lasche & malheureuse seruitude. Par ces propos les Cherusciens furent non seulement esmeuz mais aussi ceux des pays circonuoisins. Pareillement Ingnomere oncle d'Arminius se mist de la partie: lequel de toute ancienneté auoit eu grande autorité entre les Romains. Ce qui fut cause de plus estonner Germanicus: au moyen dequoy à fin que ses ennemis ne se ruassent tout à vn coup sur luy, enuoya Cicinna avec quarante cohortes Romaines au pays des Bructeres droit au fleuve Amisia, à fin de faire separer les ennemis en plusieurs bandes. Pedito qui auoit la charge de gens de cheual les mena par les limites de Frise. Et Germanicus, ayant fait entrer quatre legions en ses vaisseaux, les conduit par les lacs, de sorte que les gens de pied, les gens de cheual, & l'armee de mer se

*Colonie
cest vn
lieu ou l'on
enuoye
gens pour
habiter.*

*Cherus-
ciens.
Ingno-
merus.*

*Bructeres.
Amisia.*

Frise.

LE I. LIVRE DES ANNALES

Chaucien. trouuerét ensemble sur ceste riuiera. Les Chauciens pource qu'ils promettoient de nous donner secours, furent admis en ceste compagnie. L. Stertinius qui auoit esté enuoyé par Germanicus avec sa bédé legiere, deffit les Bructeres, lesquels trouua bruslans leurs biés, & cōme il saccageoit & pilloit tout, trouua l'aigle de la dixneuxiesme legiō qui auoit esté perdue avec Varus. De là l'armee fut menee iusques aux derniers limites des Bructeres & fut gasté & pillé tout ce qui estoit de pays entre les fleuues Amisia & Lupia, assez pres de la forest de Teutoberg, ou l'on disoit les reliques de Varus & des legions estre demeurees non enterrees ny enseuelies. A ceste cause il va prédre enuie à Germanicus de faire les funerailles des soldats & du Capitaine là occis, estāt toute l'armee assistente esmeue à pitié, non seulement à cause de leurs parés & amis, mais aussi pour les accidēs des guerres, & destinees des hommes. Et pource enuoya Cecinna deuant pour chercher diligemment les lieux plus secrets de de la forest, & pour dresser des pons & chaussees en ces humides mareschaiges, & es lieux qui sembloiēt estre solides & ne l'estoient pas. Ainsi ils s'acheminēt par ces tristes lieux, difformes & hideux, tāt au veoir, que pour la memoire des choses aduenues en iceux. La place ou au commencement estoit campé Varus, close d'un grand circuit, monstroit par la mesure & compassement du deuant, qu'il y auoit eu trois legions. Apres on voyoit vn rempart demy abbatu, & vn petit fossé, ou l'on presumoit le demeurāt des soldats rompus s'estre arresté. Au milieu du champ l'on

*Lupia
fleuve
Teuto-
berg.*

*Camp de
Quint.
Varus.*

l'on voyoit leurs ossemēs blancs, espars, ou en monceaux, selon qu'ils auoient fuy ou tenu bon. Tout au pres estoient les pieces de leurs bastons rompus, & les membres des cheuaux, ayans les museaux tournez vers les troncs des arbres ausquels ils auoient esté attachez. Aux forests prochaines estoient les autels Barbares, esquels les Tribuns, & principaux Cēteniers auoient esté immolez. Ceux qui restans de ceste bataille auoient echeué la mort ou la prison: monstroient les lieux ou les Ambassadeurs auoient esté occis, & ou les Aigles auoient esté rauies & abbatues. Monstroient le lieu ou Varus auoit receu la premiere playe, & ou par sa dextre infortunee s'estoit donné le coup de la mort. Monstroient le Tribunal d'ou Arminius auoit fait sa harangue aux soldats: monstroient combien y auoit de gibets dressez pour les prisonniers: combien de fosses. Comme par grād orgueil Arminius s'estoit moqué des enseignes & des Aigles. Doncques se trouuant l'ost des Romains en ce lieu six ans apres ceste deffaicte, les gens d'armes tristes, courroucez, & plus que deuant animez cōtre les ennemis, enterrent les os de ces trois legions, comme si tous eussent esté leurs parens amis & aliez. Combien que nul d'eux cogneut, si ceux qu'il enterroit estoient de sa parenté ou estrangers. Germanicus mist la premiere motte de terre pour leur edifier vn tombeau, en quoy il feit present tresagreable aux trespassez, & se monstra participāt de la douleur de ceux qui estoient presens. Ce que Tibere ne trouua pas trop bō, ou pource qu'il prenoit mal tout

*Autels
Barbares.*

LE I. LIVRE DES ANNALES

ce que faisoit Germanicus , ou pource qu'il croyoit, que par la veue & apprehension de ces corps morts, & non enseuelis, les soldats auoient peu estre rendus plus lasches au combat , & plus craintifs des ennemis. Et pource aussi qu'il n'estoit licite à vn chef de guerre ayât dignité Augurale, & garny de tresanciennes ceremonies, de manier les reliques des trespassez.

Mais Germanicus poursuyuant Arminius qui fuyoit par lieux deserts & desuoyez, aussi tost qu'il eut le moyen, commâda aux gens de cheual de marcher & gagner le champ ou les ennemis festoient câpez. Arminius ayât aduertty les siens d'eux rallier, & se tenir pres les forests, tourna soudainement visage, & aussi tost fit signe à ceux qu'il auoit fait cacher és bois, de sortir visuellement sur nous. Lors les gens de cheual furent tous perturbez de ceste nouuelle armee, mesmes les cohortes qui auoient esté enuoyees pour renfort, estans repoulsees par la multitude des fuyans, auoient donné encor plus grand espouuementement : tellement que si Germanicus n'eut fait marcher les legions en bon ordre & equipage, ils estoient ia poussez en vn marests fort cogneu des vainqueurs, & desauantageux pour ceux qui ne le cognoissoient. Ces legions eltonnerent fort les ennemis, & rassurerent les nostres : tellement que les deux armees se departirent sans auoir rien d'aduantage l'une sur l'autre. Ainsi ayant Germanicus réduit son armee pres du fleuve Amisia; remena les legions par eau comme il les auoit amenees. Il fut commandé à vne partie de la
gensd'ar-

général d'armement de suivre le riuage de la mer Oceane, & se rendre au fleuve du Rhin. Cecinna qui conduisoit ceux qu'il auoit souz sa charge, auoit esté admonesté (iaçoit ce qu'il retournast par chemins assez cogneuz) de passer en la plus grande diligence qu'il pourroit, les longs pons. Ces pons estoient vne chaussée étroite au milieu de grans & spacieux mareschages, autresfois dressée par L. Domitius. Tout le reste estoit limonneux, plein de fort & gluant borbier, & mal assuré pour les eaux. A l'entour y auoit force forests qui venoient en descendant, lesquelles Arminius auoit lors remply de ses gens: car pource qu'il cognoissoit les plus cours chemins, il auoit fait diligenter son armee de sorte qu'il y estoit beaucoup plus tost arriué que nos gens d'armes, chargez d'armures & de fardeaux. Estant Cecinna en doute comme il pourroit readouber ces pons tous gastez & rompus de vieillesse: & par mesme moyen repousser l'ennemy, delibera de se camper au mesme lieu, occupant partie de ses gens apres ces pons: & l'autre partie à commencer le combat. Les barbares taschans à rompre l'esquadron des Romains, & se ruer sur ceux qui estoient à la besoigne, les prouoquent, les enuironnent, & se présentent deuant eux. Au moyen de quoy le cry, tant de ceux qui estoient à la besoigne, que de ceux qui combattoient, se va entremesler, estans toutes choses egallement contraires aux Romains. Car le lieu plein de profond borbier empechoit, qu'ils ne se peussent tenir fermes ny marcher auant: pource qu'il estoit grillant & lubrique. Pareil-

*Longs
pons.*

*L. Domi-
tius.*

LE I. LIVRE DES ANNALES

lement leurs hallegrets leur pesoient beaucoup, & ne leur estoit possible lancer dards ny iauclots dedans ces eauës.

Au contraire les Cherusciens estoient tous accoustumez de combattre en ces marests, estoient grands & membruz, leur picques longues, desquelles ils pouuoient frapper de loing. Mais la nuit venant, les legions (ja en branlle d'estre vaincuës) furent deliurees de ce combat à elles du tout contraire. Les Allemans voyans la fortune pour eux, ne se lassoient point: qui plus est ne prindrent ceste nuit aucun repos, ne faisant autre chose que destourner toutes les eauës qui fourdoient és montagnes de là autour, pour les faire tomber en ce lieu bas, tellement qu'en estant la terre, & l'ouurage ja acheué tout couuert: le trauail des soldats se troubla.

Or il y auoit ja quarante ans que Cecinna hantoit la guerre, ou comme simple soldat, ou ayant charge: tellement qu'il auoit experience de toutes choses prosperes & aduerses, & cecy estoit cause que iamais ne festonnoit. Parquoy considerant en soy mesme les choses qui pouuoient aduenir, ne trouua autre moyë d'eschapper, sinon qu'il retint & arrestast son ennemy dedans les forests, iusques à ce que les naurez, & les plus pesamment armez fussent passez deuant. Car au milieu des montagnes, & des marests s'estendoit vne plaine, capable d'une petite armee. Au moyen dequoy il va ainsi ordonner ses legions. La cinquiesme tenoit le costé dextre, la vingtiesme le senestre. La premiere faisoit l'auantgarde, & la vingtiesme estoit

estoit pour soustenir ceux qui viendroient charger sur
 la queue. La nuit par fois estoit sans repos, car ces
 Barbares faisans festes & banquetts remplissoient de
 leurs chants ioyeux ou de sons espouventables, les
 valles d'audeffous, & faisoient retentir les forests.
 Au fort des Romains les feux estoient à demy morts,
 les voix entrerompues, & les soldats couchez çà & là
 aupres du rempart, ou allant de tente en tête: ny veil-
 lans, ny dormans. Le Capitaine aussi fut fort espou-
 uenté d'une vision horrible qu'il eut la nuit. Car il ^{vision ef-}
 luy sembla qu'il voyoit & oyoit Quintilius Varus sor- ^{pouventable.}
 tant du marest tout plein de sang, qui faisoit semblât
 de l'appeller, toutesfois auquel ne voulut obeyr, &
 repoussa la main qu'il luy tendoit.

Le iour venu les legions qui auoient esté mises
 aux aïsses, ou par crainte, ou par orgueil, abandon-
 nerent leurs places, occupans hastiuement la plaine
 qui estoit au delà de ces lieux humides. Et iagoit ce
 qu'Arminius leur eust peu lors courir sus facilement,
 si ne le feit il toutesfois: ains attendit iusques à ce
 qu'il veit le bagage arresté és fanges, & fosses, & les
 gens d'armes à l'entour bien troublez & empeschez,
 leurs enseignes en desordre, & vn chacun d'eux (com-
 me la coustume est en tel accessoire) diligent
 pour soy-mesme, sans prester l'oreille aux admo-
 nitions des Capitains. Cela voyant commanda
 aux Allemans de leur courir sus, criant voicy Varus
 reuenu, & voicy les legions de rechef vaincues par
 mesme destinee. Ce disant, avec aucuns des siens
 plus gentils compagnons fendit la presse, s'efforçant.

LE I. LIVRE DES ANNALES

principalement de tuer les cheuaux. Lesquels se laissoient tomber tant pour la lubricité du marest que de leur sang : & ayans ietté par terre ceux qui les cheuauchioient, renuersoient aussi ceux qu'ils rencontroiēt, & froissoiēt ceux qui estoient abbatu. Le plus grand affaire, & ou il y eut plus à suer fut autour des Aigles, lesquelles pour la multitude des dards & du trait, ne pouuoient estre soustenues à l'encontre, n'y tenir fermes, quand elles estoient fichees en ceste terre molle & limonneuse. Et comme Cecinna soustenoit la poincte, son cheual fut tué souz luy: parquoy renuersé par terre, estoit enuironné des ennemis, sans la premiere legion qui se meit au deuant. Finablement, il n'y eut rien qui aydast tant les Romains que l'auarice des ennemis: lesquels laissant la tuerie, s'amuserent au butin. Au moyen dequoy quand vint sur le soir, les legions tascherent à gagner les lieux fermes & descouuers. Et toutesfois cecy ne fut la fin de leurs miseres. Car il failloit de rechef faire vn fort, & gagner de rechef le chemin de la chaussee, & si auoient perdu la pluspart de leurs instrumens à tirer la terre, & couper les mottes. Les manipules & chambrees n'auoient point de tentes, les n'aurez n'auoient dequoy habiller leurs playes, & partissoient ensemble leurs viandes toutes souillees de fange & de sang, faisans regres, & lamentans ceste nuit funeste & douloureuse, attendu qu'à tant de milliers d'hommes ne restoit plus qu'un seul iour pour viure. Or d'adventure il y eut vn cheual, lequel ayant rompu son licol, couroit çà & là, & estonné du cry
que

quel'on faisoit, abbattoit aucuns de ceux qui trouuoit en son chemin. Cecy les espouuenta de telle sorte (pensans que les Allemans se vinssent ruer sur eux) que tous s'enfuyoient vers les portes du camp, & spécialement vers la Decumane, laquelle pour estre de l'autre costé des ennemis, sembloit beaucoup plus seure aux fuyars. Cecinna ayant cogneu que sans cause ils estoient estonnez, & voyant que ny par autorité, ny par prieres, ny par mesmes avec les mains il les pouuoit arrester, finalement se coucha à trauers de la porte, leur fermant par ce moyen la voye, de pitié qu'ils eurent, dont il leur falloit passer par dessus le corps de luy qui estoit Ambassadeur. Ioint aussi que les Tribús & Centeniers leur donnerent à entendre que sans occasion ils craignoient. Ainsi les ayant rassemblez sur les principes, & leur ayant commandé de faire silence & l'escouter parler, leur remonstra le temps ou ils estoient & la necessité. Qu'une seule voye restoit, à leur salut, c'estoient les armes, laquelle toutesfois il falloit moderer par conseil. A ceste cause, qu'il estoit besoin qu'ils demourassent dedans le fort & attendissent à approcher iusques à ce qu'ils se sentissent assez fors pour vaincre leurs ennemis. Que lors de tous costez se falloit ruer sur eux, & que par ceste saillie impetueuse, ils pourroient paruenir iusques au Rhin. Ou s'ils fuyoient, il leur restoit encor plusieurs forests, plusieurs marefts plus profonds, & la cruauté des ennemis à escheuer. Mais au contraire ayans vaincu leurs ennemis, leur remonstroit l'honneur & la gloire qu'ils auroient: leur remettoit en

*La porte
Decuma-
ne estoit
la princi-
pale por-
te du camp,
par la-
quelle l'on
entroit
& sor-
toit le
plus sou-
uent.*

*Principes
ou Princes
estoit le
second rég-
du Batail-
lon des
Romains,
le premier
estoit des
Hastaires
le second
des Prin-
ces, & le
tiers des
Triaires.*

LE I. LIVRE DES ANNALES

memoire ce qu'ils auoient cher en leurs maisons, & ce qui estoit honneste en vn camp, sans faire aucune mention des choses aduerses. Cela fait, distribua sans ambition les cheuaux des Tribuns & Ambassadeurs (commençant aux siens propres) à ceux qui estoient les plus gentils compagnons, à fin qu'ils se ruaissent les premiers sur l'ennemy, & que les pietons les suyussent.

*Ingnio-
merna.*

Les Allemans n'ayans gueres plus de repos de leur costé, estoient menez d'esperance, d'auarice, & des opinions diuerfes de leurs Capitaines. Car Arminius estoit d'aduis qu'on les laissast sortir de leur fort à fin de les environner de rechef en ces lieux humides & difficiles. Mais Ingniomere y vouloit proceder de plus grande furie, (chose qui estoit fort agreable à ces barbares) & suadoit d'environner leur rempart de gens armez, disant que par ce moyen il les prendroient promptement d'assaut, auroient d'auantage de prisonniers, & seroit la proye toute entiere. Ainsi le iour venu, ils emplissent les fossez, y iettent clayes, & taschent à gagner le dessus du rempart, sur lequel y auoit peu de soldats, lesquels encor sembloit estre là quasi fichez de crainte: Depuis qu'on les veit attachez aux rempars, on feit le signe aux cohortes, & sonnerent les cors & trompettes. Consequemment avec grand cry & impetuosité elles s'espendent sur la queue des Allemans, leur disant par maniere de reproche, qu'ils n'estoient plus en leurs forests, ny en leurs marécages, & qu'es lieux ou l'un n'a plus d'aduantage que l'autre, les dieux aus-
si

si estoient egaux. Les ennemis considerans qu'ils seroient aisement deffaits veu qu'ils n'estoient qu'à demy armez & en petit nombre, trouuerent le son des trompettes, & la lueur des armures d'autant plus grands, que plus à l'impourueu ils les auoient rencontrez: & ainsi se laissoient tuer, pour auoir autant mal preueu les aduersitez futures, comme ils auoient esté auares en leur prosperité. Arminius estant encor sain & entier, & Ingniomere, apres auoir receu vne grande playe, s'enfuirent de la bataille. La tuerie sur le menu peuple ne cessa, que le iour, & leur ire ne fut assouuie. En fin les legions retournerent qu'il estoit toute nuit. Et iacoit ce que la disette de viures ne fut en rien diminuee & eussent beaucoup plus de playes qu'auparauant, toutesfois en ceste victoire ils penserent auoir, force, santé, grosse armee, & toutes autres choses en abondance.

Or le bruit estoit ia espandu comme l'armee auoit esté surprise, & enuironnee, & que les Allemans bien deliberez de faire du mal alloiét en grosse multitude se ruer sur les Gaules. Dont aucuns furent si espouuentez que si Agrippina n'eut empesché d'at- *Agrippi-
na.* battre le pont qui estoit sur le Rhin, ils eussent bien ausé faire vne si grande lascheté. Mais ceste femme ayant le cœur hautain, feit durant ces iours l'estat & office d'un vray Capitaine, distribuant aux soldats habits & vnguens pour habiller leurs playes selon qu'ils estoient pauures ou naurez. C. Plinius qui *C. Plin.* à escrit l'histoire des guerres Germaniques, dit qu'elle demoura toute droicte au bout du Pont, louant

LE I. LIVRE DES ANNALES

& remerciant les legions qui estoient de retour: de-
 quoy Tibere eut fort mal à sa teste, pensant que ce
 soing n'estoit sans grande occasion, & qu'on ne taf-
 choit ainsi à gagner les soldats, seulement pour les
 affaires d'encontre les estrangers. Que rien n'estoit
 demeuré d'aduantage aux capitaines, puis qu'une
 femme s'entremettoit de visiter les Manipules, abor-
 der les enseignes, & de faire des largesses, comme si
 c'eust esté peu d'ambition de porter le fils du chef de
 l'armee parmy le camp habillé à la soldarde, & l'ap-
 peller Cesar Caligula. Que ia Agrippina auoit plus
 de credit enuers les soldats, que les Ambassadeurs,
 ou Capitaines mesmes. Que la sedition auoit esté ap-
 paisée par ceste femme, à laquelle le nom du Prince
Seianus. n'auoit sceu remedier. D'auantage Seianus cognois-
 sant les meurs de Tibere, l'enflammoit encores plus,
 & faisoit ces choses plus perilleuses, semant des hai-
 nes & malueillances de longue main, lesquelles il dis-
 simuloit, pour puis apres qu'il les verroit augmētees,
 les descouurir & mettre hors.

Mais des legions que Germanicus auoit menees
 par eau, il en donna la seconde & quatorzieme à P.
*P. Vitel-
 lius.* Vitellius pour les conduire par terre à fin qu'estans
 les nauires deschargees d'autant, elles ne fussent assa-
 blees de la grene, ny arrestees des guez & peussent
 plus facilement ancrer, si la mer venoit à estre agitée.
 Vitellius eut au commencement assez beau che-
 min, & sec, & n'approchoient encor les flots & re-
 gorgemens de la mer, que peu à peu. Mais tout in-
 continent apres va se leuer vn vent de Bise, par le-
 quel

quel (ioint l'estoile de l'equinoce qui a accoustumé entre autres de faire enfler la mer) ceste troupe fut tourmentee & transportee çà & là, & ja la terre estoit toute couuerte d'eau , & auoient la mer , le riuage, & les champs vne mesme face, tellement qu'on ne pouuoit discerner les lieux solides d'auec les incertains, ny les profonds d'auec les moins profonds . Les cheuaux & bagages furent renuersez par les flots , & engloutiz par les gouffres d'eauës, les corps sans vie flot-toient dessus, & s'entrencontroient: les Manipules & chambrees, se ioignent ensemble & maintenant estoient en l'eau iusques à la poitrine, tantost iusques aux oreilles, & aucunes fois perdans pied, estoient separez d'ensemble, ou noyez, & ne se pouuoient aider n'y de voix, n'y par mutuels aduertissemens . Estans ainsi tourmentez des eauës tout estoit par mesme violence d'icelles enueloppé, & estoit impossible de discerner le couïard d'auec le hardy, le sage d'auec le prudent, n'y les conseils d'auec les cas fortuits . En fin Vitellius taschant à gagner les lieux plus hauts & esleuez, y retira aussi ceux de sa troupe, & là ils passerent la nuit sans feu, sans vtensiles, estans pour la plus part nuds, ou fort mal en point, & non moins miserables que ceux qui sont assiegez par l'ennemy . Car les assiegez pour le moins reçoieut vne mort glorieuse & honnelle, mais ceux icy mouroient sans aucune gloire. Le iour venu la terre leur fut renduë, & lors marcherent iusques au fleue Visurgis, ou Germani-
cus estoit arriué par mer. Là fait monter en ses nauires les legions qu'on croyoit auoir esté submergees, &

*Visurgis
fleue.*

LE I. LIVRE DES ANNALES

*Sterti-
nius.
Segime-
rus.*

ne fut l'on asseuré du salut d'icelles, que l'on n'eust veu Germanicus de retour avec toute son armee. Stertinus (qui auoit esté enuoyé deuant, pour receuoir Segimerus frere de Segestes, qui f'estoit rendu) auoit ia mené luy & son fils en la cité des Vbiens & auoit pardonné à tous deux, à Segimerus facilement, & à son fils avec plus grande difficulté: pource que l'on disoit qu'il f'estoit mocqué du corps mort de Quintilius Varus.

Au surplus les Gaules, les Hespagnes, l'Italie, s'efforçoient à qui mieux mieux, à recompenser les dommages que l'armee auoit receu, leur offrant ce que promptemēt il leur pouuoient dōner, comme or, armes, & cheuaux. Mais Germanicus apres auoir loué leur bon vouloir, & seulement retenu d'eux les armes & les cheuaux, ayda ses soldats de son argent propre. Et à fin que par sa courtoisie & gracieuseté, il adoucist aussi la memoire de ceste grande destruction, visitoit les naurez, louoit les beaux faits d'un chacun, regardoit leur playes, & les confermoit pour soy & pour la bataille, deuissant à eux tous, donnant esperance à l'un, à l'autre gloire, & prenant soing d'un chacun particulierement.

En ceste annee les enseignes du triomphe furent decernees à A. Cecinna, L. Apronius, & C. Sillius, pour les beaux actes par eux acheuez en la compagnie de Germanicus.

*Pere du
pays.*

Tibere refusa le nom de Pere de la patrie, iacoit ce que par plusieurs fois le peuple luy eust offert, & ne voulut que l'on feist le serment de garder ses ordonnan-

donnances, encor qu'il eut esté decerné par le Senat, allegant que toutes les entreprises des hommes estoient incertaines, & que d'autant qu'il estoit devenu plus grand, d'autant il estoit constitué en lieu plus lubrique & hazardeux. Ces choses toutesfois, ne pouoient faire à croire qu'il eut quelque affection ciuile. Car il auoit remise sus la loy de Maiesté. Ceste loy *Crime de Maiesté* auoit eu ce mesme nó du temps des anciens: mais autres choses estoient traitées lors en ce iugement, & pour suy uoit l'on seulement souz iceluy, ceux qui auoient trahy l'armee, qui auoient concité le peuple à seditiō, ou par leur mauuaise administration auoient diminué la Maiesté du peuple Romain. Les faits estoient punis, mais les paroles estoient libres. Auguste fut le premier, qui traita la cognoissance des libelles diffamatoires, comme si c'eust esté vn mēbre & espee de ceste loy, incité de la fantasie desreiglee de Cassius Seuerus, qui auoit diffamé plusieurs hommes & femmes notables par ses escrits eshontez & iniurieux. Bien tost apres comme Pompeius Macer Preteur demandast si l'on deuoit faire poursuyte du crime de Maiesté. Tibere respondit qu'il falloit exercer les loix. Et aussi il auoit esté irrité, dont quelques vers (les auteurs desquels estoient incertains) auoient esté publicz, esquels il estoit taxé d'orgueil, de cruauté, & du discord qu'il auoit avec sa mere.

Je ne veux aussi obmettre à vous raconpter icy les crimes qui furent intentez contre Falanius & Rubrius, Cheualiers Romains d'assez petite estoffe, à fin *Falanius.* que l'on cognoisse, par quels commencemens, par

LE I. LIVRE DES ANNALES

quelles menees de Tibere , s'ourdît vne merueilleuse
persequution , laquelle ayant depuis esté reprimée,
& finalement reallumée s'attacha generalement à vn
chacun. Doncques l'accusateur mettoit sus à Falanius
qu'entre les adorateurs d'Auguste, (desquels y auoit à
Rome par toutes les maisons en forme de Colleges)
il y auoit admis vn ioüeur de farces nommé Cassius,
infame de son corps . Et d'auantage qu'ayant vendu
ses iardins , il auoit aussi aliené la statuë d'Auguste.

*Auguste
adoré à
Rome par
toutes les
maisons.*

Rubrius.

Quant à Rubrius il estoit accusé, de s'estre parjuré
par le nom d'Auguste. Ces choses venuës à la cognois
sance de Tibere il escriuit aux Consuls , que le
ciel n'auoit esté decerné à son pere, à fin que cest hon
neur tournast au preiudice & dommage des citoyës.
Qu'un farceur nommé Cassius entre autres de pareil
mestier, auoit accoustumé d'assister aux ieux, lesquels
sa mere auoit sacrez pour la memoire d'Auguste. Auf
si que l'on n'estimoit contreuenir à la religion quand
en vendant des maisons & iardins , l'on vendoit par
mesme moyen ses effigies, comme aussi les autres si
mulachres des dieux. Que le iurement estoit d'aussi
grande consequence comme sil eust trompé Iupiter,
mesmes attendu que les dieux se soucioient des iniu
res faictes à leurs compagnons.

*Granius
Marcellus.
Cepio
Crispinus
Rom.
Hispo.*

Peu de temps apres, Granius Marcellus Preteur de
Bithinie fut accusé de Maiesté par son receueur Cepio
Crispinus se ioignant Romanus Hispo à ceste accu
sation, lequel commença lors vne maniere de viure,
qui fut depuis renduë celebre & annoblie par la mi
sere des temps, & par l'audace des hommes. Car com
me

me il fust auparauant souffreteux, incogneu, & mal-
 aisé, finsinua en la cruauté du Prince par petits liures
 secrets, tellement qu'en peu de temps, il donna beau-
 coup d'affaires, & mist les plus grands en vne gros-
 se peine, ayant acquis grand credit enuers vn seul,
 & la mal-vueillance d'un chacun. Au moyen de-
 quoy fait vne ouuerture, & donna vn exem-
 ple, qui rendit ceux qui l'ensuiuirent de pauvres,
 riches : & de contemptibles, redoutez. Bref, les-
 quels feirent de grands dommages à autrui, & fina-
 lement à eux mesmes. Or doncques il accusoit Mar-
 cellus d'auoir tenu quelques mauuais propos de Ti-
 bere. Et estoit ce crime ineuitable, pour autant que
 l'accusateur entre les vices, desquels il cognoissoit le
 Prince entaché, esli-soit les plus infames pour les ob-
 iecter à l'accusé. Car pour ce que la chose estoit d'elle
 mesme veritable, l'on croyoit facilement qu'elle eust
 esté dicté. D'auantage Hispo disoit, que la statuë de
 Marcellus estoit plus haut erigee que celle des Cefars,
 & qu'ayant fait abbatre la teste à vne statuë d'Augu-
 ste, il y auoit enté l'effigie de Tibere. Dequoy Tibe-
 re senflamma si fort, que rompant tout silence il s'es-
 cria, qu'en ceste cause aussi il opineroit publiquemēt,
 apres auoir faict le serment : à fin que les autres fus-
 sent contrainsts de faire le semblable. Ainsi encores
 alors y auoit quelque apparence de la liberté qui s'en
 alloit perduë & annihilée. Parquoy Cn. Piso luy va
 dire. Et le quantiesme, ô Cesar, veux tu opiner ? Car
 si tu opines le premier j'auray quelqu'un deuant moy,
 l'aduis duquel ie pourray suiure : mais si tu dis le der-

Cn. Piso.

LE I. LIVRE DES ANNALES

nier ton aduis, ie crains que sans y penser ie die quelque chose qui contreuienne à ton opinion. Meu de ces paroles, & de la repentance qu'il auoit d'estre trop inconsiderement entré en cholere, endura que l'accusé fust absous des crimes de leze maisté. Quant aux concussions & deniers mal pris sur le peuple, il fut renuoyé par deuant les iuges deleguez pour celt affaire.

Or Tibere ne se contentoit pas d'auoir assisté aux iugemens du Senat, mais aussi assistoit aux autres iugemens, & s'asseoit au coing du Tribunal, à fin de ne chasser le Preteur de sa chaire : & y eut plusieurs choses ordonnees en sa presence contre l'ambition, requestes & poursuites des plus puissans. Mais comme l'on vouloit pourueoir à la verité, la liberté se corrompoit.

Pius Aurelius.

En ces entrefaictes, Pius Aurelius Sénateur, se complaignant de ce que par la pesanteur de la ruë publique, & esgouts des eauës, sa maison estoit corrompuë & galtee, requeroit l'aide du Senat, & comme les Preteurs du thresor public s'y opposassent: Tibere luy aida, & donna à Aurelius autant d'argent que pouuoit valloir sa maison, monstrant l'enuie qu'il auoit d'employer l'argent en choses honnestes. Et retint ceste vertu assez longuement, estant despouillé de toutes autres.

Liberalité de Tibere.

Ce sont vingtreing mil esces couronne à trente cinq sols l'esce.

Il donna dix fois Sesterces à Propertius Celer autresfois Preteur, lequel requeroit estre desmis de son estat, pour ne pouuoir (à cause de sa pauuereté) fournir aux fraiz qu'il y conuenoit faire. Mais ce fut apres auoir

auoir cogneu qu'il n'estoit tombé en pauureté par sa faute, ains pour le peu de biens que son pere luy auoit laissez. Les autres qui vouloient essayer le mesme, il renuoyoit par deuant le Senat, pour faire apparoir de leur dire se monstrant aigre & fascheux mesmes és choses qu'il faisoit deuément & à droict: par vne enuie qu'il auoit d'estre estimé seuer. Au moyen de quoy plusieurs aimoient mieux se taire & demourer pauures, que confesser leur pauureté pour receuoir quelque bien faict.

*Propertius.
Celer.*

En la mesme annee estant le Tybre accreu à cause des continuelles pluyes, s'estoit espandu par toute la ville de Rome, & retournant en son premier estat auoit faict vne grande destruction de personnes, & d'edifices. Parquoy Asinius Gallus fut d'aduis qu'on alast regarder és liures de la Sibille. Ce que Tibere ne voulut permettre taschant à couurir aussi bié les choses diuines que les humaines. Toutesfois l'on en chargea à Atteius Capito, & à L. Aruntius de donner ordre que ceste riuiera ne se desbordast.

*Le Tybre
desbordé.*

Aussi pour ce que les pays de Macedone, & Achaie se plaignoient d'auoir trop grosses charges, & impositions, il fut conclud que pour lors elles n'auroient plus de Proconsul, & que l'office de Proconsul seroit transferé, en la personne de l'Empereur.

*Macedone
Achaie.*

Parcillement Drusus presida aux ieux des Gladiateurs & escrimeurs, lesquels il auoit presentez au nom de son frere Germanicus & de luy. Iagoit ce que le peuple craintif, & mesmes son pere, luy eussent re-

LE I. LIVRE DES ANNALES

proché qu'il se delectoit trop en l'effusion de ce sang vil & abie&t. Plusieurs interpretoient diuerſement pourquoy Tibere n'auoit voulu eſtre preſent à ce ſpectacle. Aucuns, que c'eſtoit pour ce qu'il n'aimoit guerres ſi grandes aſſembles, les autres, pour ce qu'il eſtoit de nature melancholique, & craignoit que l'on feiſt quelque comparaiſon de luy & de ſon pere Auguſte, lequel par courtoisie ſ'eſtoit autresfois trouué en telles aſſembles. Quoy que ſoit ie ne penſe point qu'il euſt donné ceſte matiere & o&caſion à ſon fils de faire monſtre de ſa cruauté, & d'ainſi offenſer le peuple. Et ja&oit ce que, comme nous auons dit cy deſſus, la licence du theatre euſt commencé l'annee prochaine de deuant, toutesſois elle vint lors en plus grand abandon, & y furent occis non ſeulement aucuns ſoldats, & gens du menu peuple : mais auſſi vn Centenier, & vn Tribun bleſſé de la cohorte Pretorienne, lors qu'ils vouloient empescher la diſſention du peuple, & donner ordre que l'on n'iniuriaſt les Magiſtrats. Ceſte ſedition fut miſe en auant au Senat: & eſtoit l'on ja en propos d'ordonner, que les Preteurs auroient puiſſance de faire donner le foïet aux ioïeurs. Mais Haterius Agrippa Tribun du peuple ſy vint oppoſer, dequoy il fut blaſmé & repris, par l'oraïſon que feit Aſinius Gallus, Tibere ne ſonnant mot, & repaiſſant le Senat de telles apparences de liberté. Toutesſois Haterius fut receu à ſon oppoſition, pour ce qu'Auguſte auoit autresſois reſpondu, que les farceurs ſeroient exemptſ du foïet: & n'eſtoit loiſible à Tibere d'aller au contraire de

*Haterius
Agrippa*

*Aſinius
Gallus.*

*Farceurs
exemptſ du
foïet.*

de ses dits. Consequēment y eut plusieurs ordonnances quāt à la despēce des ieux, & superfluité de ceux qui les entretenoient. Entre autres choses fut ordonné, que les Senateurs n'y roiēt point aux maisons des ioueurs. Que quand telles manieres de gens fortiroient en public, les cheualiers Romains ne les accōpagneroient. Qu'ils ne seroient veuz autre part que dedans le theatre : & que les Preteurs pourroiet punir par exil ceux qui immodestemēt & insolemment se porteroient à regarder les ieux.

Aussi (ce requerans les Hespagnols) eurent permission d'edifier vn temple à Auguste en la Colonie de Tarraſcon, & seruit cecy d'exemple à toutes les autres prouinces.

*Temple à
Auguste.
Tarraſcō.*

Pareillement comme le peuple requist que l'imposition de la centiesme partie des choses qui se vendoiēt, mise sus depuis les guerres ciuiles, leur fut remise: Tibere respondit, que la paye des gensd'armes se prenoit la dessus, & que la Republique ne pourroit soustenir vne telle charge, si les vieux soldats n'estoient enuoyez apres auoir suiuy vingt ans la guerre. Ainsi les choses mal entreprises par ceux qui dernièrement auoient esmeu la sedition, par lesquelles ils auoiēt par force obtenu, qu'apres seze ans ils fussent enuoyez, ne leur seruirent de rien, & furent abolies pour l'aduenir. Depuis Aruntius & Ateius, mirent en fait au Senat à ſcauoir mon, si pour empēcher que le Tybre ne desbordast si souuent, il seroit bon de destourner les riuieres & lacs qui le faisoient croistre en ceste sorte. A ceste fin furent oys les Am-

*Impositiō
de la cen-
tiesme.*

LE I. LIVRE DES ANNALES

*Flavéins.
Clauis
fleu. Ar-
nus fleu.*

*Interam-
nates.
Nar fleu-
ne.*

Reatins.

Lac velin.

basilladeurs de plusieurs villes vſans du droit de Ro-
me, & Colonies. Les Florentins requeroient qu'on ne
deſtournast le cours accoustumé de la riuere du Clā
pour le faire cheoir dedans le fleuve Arnus, attendu
que cela leur eut esté fort dommageable. Les Inter-
amnates feirent vne quasi semblable requeste, alle-
gans, que si le fleuve Nar estant diuisé en petits ruiſ-
seaux (comme ia l'on s'appareilloit de faire) se deſ-
bordoit par dessus, les plus fertiles terres de toute l'I-
talie seroient gastees. Les Reatins aussi ne se taisoient
empeſchans, que le lac Velin ne fut estouppé à l'en-
droict ou il entre dedans le fleuve Nar, pource que
ce faisant il eut gasté tout le plat pays d'à l'entour, &
disoient que Nature auoit tout bien ordonné pour le
proffit des hommes, ayant donné aux riuieres leurs
bouches, leurs cours, & leur fin aussi bien que leurs
sources. Pareillemēt qu'il falloit auoir eſgard à la reli-
giō des alliez, qui auoient dedié des solénitez, des fo-
rests & des autels aux fleuves de leurs païs, & meſmes
que le Tibre ne l'édureroit pas, se voyāt priué de tels
fleuves accoustumez de cheoir en luy, & la gloire par
ce moyē amoindrie. Ainsi, ou les prieres de ces Colo-
nies, ou la difficulté de l'œuure, ou biē la superstition,
furent cause qu'on ſarresta à l'opinion de Pifo, qui a-
uoit esté d'aduis qu'il ny falloit rien changer.

*Tibere
cōtinnoit
les gou-
uernem-
ens.*

A Popeus Sabinus fut continué le gouuernement
de la Prouince Meſie, & outre fut fait gouuerneur
d'Achaie, & de Macedone. Car aussi Tibere auoit ce-
ſte couſtume, de cōtinuer les gouuernemens, & rete-
nir la pluſpart de ſes officiers en vne meſme armee,

ou

ou mesme iurisdiction, iusques à la fin de leur vie. Et de cecy l'on réd diuerfes raisons. Aucuns dient que pour eiter nouuelle sollicitude, il gardoit à tousiours ce qu'il auoit vne fois arresté. D'autres que c'estoit par vne enuie, & qu'il eut esté marry que plusieurs eussent iouy de telles dignitez. Mais plusieurs ont opinion que tout ainsi qu'il auoit l'esprit cault & subtil, aussi qu'il auoit le iugemēt chagrin & soupçonueux, au moyē dequoy ne s'accointoit iamais de gens: les vertus desquels fussent trop hautes ou eminentes, combien qu'il hayst les vices: pource que des vertueux, il craignoit son d'esauantage: & des meschans, le deshonneur de la Republique. Estât mené de ce soupçon vint finablement iusques là, qu'il feit aucuns gouuerneurs de Prouinces, lesquels autremēt à peine eut laissé sortir de Rome. Quant à la maniere de faire les Comices & assemblees pour creer les Cōsuls, qui cō-

*Comices
consulari-
res.*

mença lors premièrement souz ce Prince, & depuis à esté continuee, ie n'en aise rien affermer, tant i'en trouue de diuersitez, non seulement és autheurs, mais és oraisons mesmes de Tibere. Car quelque fois ayāt effacé du roolle les noms des Candidats, & poursuyuans, il y escriuoit leur origine, leur vie, & le temps qu'ils auoiēt suiuy la guerre, à fin que par ce ils peussent estre cogneuz. Vne autrefois effaçant ce parquoy ils estoient cogneuz, & les admonnestant de ne troubler les Comices par leur ambition, les asseuroit de faire pour eux en cecy tout ce qu'il luy seroit possible, & bien souuent remonstroit qu'il en auoit présenté plusieurs aux Cōsuls, qui ne luy auoient que
seulement

LE I. LIVRE DES ANNALES

seulement dit leur nom : & pource, que les autres se pouuoient bien faire enrooller, pourueu qu'ils fasseraient de leurs merites , & de la grace du peuple. Toutes ces choses n'estoient que belles paroles vaines quant à l'effect, & pleines de tromperie, lesquelles d'autant que plus elles estoient couuertes d'une semblance de liberté, d'autant promettoient une servitude plus ennuyeuse.

FIN DV PREMIER LIVRE DES
ANNALES DE P. CORNILE TACITE,
TE, CHEVALIER ROMAIN.

LE



LE SECOND LIVRE
DES ANNALES DE P. COR-
NILE TACITE CHEVÀ-
LIER ROMAIN.



STANS, Consuls Sisenna *L'an second de Tibere.*
Statilius Taurus, & L. Libo

les Royaumes d'Orient, &
Prouinces Romaines se re-
uolterent. Le commence-
ment vint des Parthes, les-
quels ayans demandé vn
Roy aux Romains, & ice-
luy accepté, le mesprisoient
toutesfois comme estran-

ger, encor qu'il fut de la lignee des Arsacides. Ce Roy
s'appelloit Vonones, & auoit esté baillé en ostage à
Auguste, par Phrahates. Car combien que Phrahates
eut repoussé l'armée & Capitaines des Romains, si ne
laissa il pourtant à monstrier tout deuoir de reuerce,
& humilité enuers Auguste, iusques à luy enuoyer
(pour confirmation de l'amitié qui estoit entre eux)
vne partie de ses enfans: non tant pour crainte qu'il
eut des nostres, que pour la defiance qu'il auoit des
siens. Apres la mort de Phrahates, & autres Roys sub-

LE II. LIVRE DES ANNALES

sequés (aduenue par les meurdres intestins qu'ils faisoient les vns sur les autres) vindrent Ambassadeurs à Rome de la part des principaux de Parthe, pour retirer par deuers eux Vonones, le plus aagé des enfans de Phrahates. Cefar pensant, que ce luy vint à grand honneur feit de grands biens à Vonones, au moyen dequoy fut receu de ces Barbares en grande ioye, comme est quasi leur coustume quand ils viennent à changer de Prince. Bien tost apres ils commencerent à eux vergoigner, dont ils s'estoient tant abastardis, que d'auoir esté demander vn Roy en pays estranger: ia tout duyt & accoustumé és maniere de viure des ennemis. Se plaignans que le throsne, & siege Royal des Arsacides estoit conserué ne plus ne moins, que l'vne des Prouinces Romaines. Que deuiendra (disoient-ils) la gloire de ceux qui ont tué Crassus, & repoulsé Antonius, si l'esclaue d'un Empereur de Rome, apres auoir si longuement enduré la seruitude, vient à commander aux Parthes? Et combien que pour ceste cause ils l'eussent en mespris, il les enflammoit neantmoins encor d'auantage, pour se gouuerner autrement que ses predecesseurs: comme pour aller peu souuent à la chasse, pour estre peu curieux de cheuaux, pour se faire porter en lictiere quand il marchoit par les villes, & pour auoir en desdaing les viandes, & manieres de viure du pays. Ils se mocquoient aussi, dont il s'accompagnoit de Grecs, & enfermoit souz son scel, & anneau, tous les plus vils de ses vtensiles. Mais l'acces qu'il donnoit à vn chacun, la grande courtoisie dont il vsoit enuers tous, estoit ne

estoyent vertus incognues aux Parthes: ausquels toutesfois ces petits vices sembloient estranges, pour ne les auoir veuz en leurs predecesseurs. Et pour ceste cause, auoyent en haine tant ses bonnes manieres de faire que les mauuaises. Parquoy luy vont susciter vn Artabanus de la lignee des Arsacides lequel auoit esté nourry au pays des Dahes. Cestuy, ayant esté def- Artaba-
nus Da-
hes. fait à la premiere rencontre, renforça depuis son armee, & conquist le Royaume.

Estant Vonones deffaiët ne trouua refuge qu'en Armenie laquelle pour lors estoit sans Roy, & situee armenie. au milieu des Romains & Parthes, (tous deux puissans) Au moyen dequoy n'estoit bon de se trop fier en eux, pour le meschant tour que leur auoit ioué Antonius, lequel ayant par belles paroles, & souz couleur d'amytié faict venir à luy Artauasdes leur Artauas-
des. Roy, l'auoit enchesné & depuis fait mourir. Son fils Artaxias (grandement courroucé contre nous, pour la memoire de son pere) auoit avec la puissance des Artaxias. Arsacides deffendu & sa personne, & son Royaume. Depuis estant Artaxias occis, par la fraude & trôperie de ses plus prochains & familiers, Cesar feit Tigranes Roy des Armeniens, & fut conduit en son Royaume par Tibere Neron. Le regne de Tigranes ne fut de longue duree, ny pareillement celuy de ses Tigranes. enfans combien que selon la coustume des estrangers il les eut appellez en part du Royaume, & ioincts les yns avec les autres par mariage. Apres cela Artauasdes fut estably en ce Royaume par le commâdement d'Auguste, & depuis chassé d'iceluy non sans

LE II. LIVRE DES ANNALES

grande deffaicte de noz gens. Au moyen dequoy C.
C. Cesar Cesar fut lors cōmis pour appaiser & mettre fin aux
filz d'A- discordes des Armeniens, lequel de leur consente-
grippa & ment leur donna pour Roy Ariobarzanes Medien
inlea. de nation, tant pour la beauté de son corps que pour
Ariobar- son gentil courage. Cestuy mort, par eas d'aduen-
zanes. ture ils ne sceurent endurer la domination de ceux
 de sa race. Parquoy ayans enuye d'esprouuer celle
 d'une femme, vont faire leur Roynē vne nommee
Erato. Erato: laquelle ayans tost apres chassée, & pris vne
 forme de viure incertaine, & dissolue (par laquel-
 le ils se pouuoient plustost vanter de viure sans sei-
 gneur, qu'en franchise, & liberté) receurent en fin
 pour leur Roy le fugitif Vonones. Mais depuis que
 Artabanus eut commencé à vser de menaces, & que
 nous veismes qu'il y auoit peu d'esperance, en l'ayde
 des Armeniens (& aussi que si nous voulions entre-
 prendre de defendre Vonones, il falloit commen-
Creticus. cer la guerre cōtre les Parthes) Creticus Sillanus gou-
Syllanus. uerneur de Syrie l'ayant fait venir, mit garde au-
 tour de luy, luy laissant neantmoins le nom de Roy,
 & ne luy diminuant en rien ses estats. Mais cy-
 apres nous dirons quand viendra à propos, la maniere
 comme Vonones cuyda eschapper, & se deliurer d'une
 telle fourbe.

Or Tibere ne fut trop marry de veoir les affaires
 del'Oriēt ainsi troublees, pour auoir occasion de re-
 tirer Germanicus d'avec ses legions accoustumees, &
 luy dōner le gouvernement de nouuelles Prouinces,
 au moyen dequoy il fut exposé aux calomnies, & ac-
 cidens.

cidés. Mais Germanicus d'autant que plus il cognoissoit l'affection que luy portoient les soldats, & le peu de bien que luy vouloit son oncle: d'autant plus il deuint ententif à diligenter sa victoire & à chercher les moyens de donner la bataille, discourant en son esprit toutes les fortunes tant aduerses que prosperes, qui luy estoient suruenues depuis trois ans qu'il auoit commencé ceste guerre, par lesquelles il cognoissoit que les Allemans estoient aisez à deffaire en bataille rengee, & en lieux ou ils neussent point d'auantage. Au contraire que les forests, les marefcages, la briefueté de l'esté, & l'Hyuer incontinent venu leur aydoient beaucoup. Cognoissoit aussi que ses soldats n'estoient tât endommagez des playes qu'ils receuoient, comme de la pesanteur des armes & de la longueur du chemin. Pareillement que les Gaules se lassoient de fournir cheuaux, & que le long train de son bagage estoit fort subiet aux embusches des ennemis, & de peu de deffence. Voyoit au contraire que s'il mettoit ses gens sur mer, il s'en saisiroit incontinent, & mettroit en possession: pour estre incongneue, & peu frequentee des ennemis. Que par ce moyen la guerre commenceroit plustost que de coustume, & seroient les legions & viures conduits ensemblemēt, de sorte que les gens d'armes & cheuaux menez par les bouches & canals des riuieres arriuerent tous frais, & entiers au milieu de la Germanie. Ainsi il commença à poursuyure ceste entreprise, ayant enuoyé P. Vitellius & Cantius pour leuer le reuenue des Gaules. Silius, Anteius, & Cecinna furent

P. Vitellius.
Cantius.
Silius.
Anteius.
Cecinna.

LE II. LIVRE DES ANNALES

com mis à faire faire les nauires, & equippage de mer, & fut aduifé, qu'il y en auroit assez de mil, lesquelles furent incontinent despechees: aucunes estoient courtes, & auoient la poupe & la prouë estroittes, & le ventre large & ample, à fin que plus facilement elles resistassent aux vagues & flots de la mer: les autres auoient la carine & le fond plat, à fin que sans danger elles peussent prendre terre. Plusieurs auoient gouuernaux des deux costez, à fin que les rames soudainement retournees, elles peussent à l'instant aborder à terre, ou par vn bout ou par l'autre. Parcillement en y eut beaucoup, sur lesquelles on dressa des ponts, pour passer les tourmens, & machines de guerre, & celles seruoient aussi à porter cheuaux & viures, estés prompts aux voiles, & soudaines aux auirons, sembloient encor plus magnifiques, & plus espouuentables à veoir, à cause de l'allegresse & gayeté des soldats.

Hollande
Isle. Le lieu où tous se deuoient trouuer, fut assigné en l'Isle de Hollande, pour ce qu'elle estoit aisee à aborder, propre pour receuoir les gens d'armes, & pour les passer au lieu où se feroit la guerre. Car le fleuve du Rhin à son cours par vn seul canal, où il embrasse quelques isles c'est en peu d'endroits, sinon quand il vient à entrer au pays de Hollande, il se separe comme en deux bras: & le bras qui passe par la Germanie retient son nom, & l'impetuosité de son cours, iusques à ce qu'il entre dedans l'Ocean, mais l'autre bras qui va par la frontiere de Gaule, est bien plus large & plus paisible, & luy est son nom changé par ceux du
pays

pays qui l'appellent Vahalis, lequel nom il muë de re-
chef, & est appellé Meuse, & par sa bouche large &
tresample est respandu dedans le mesme Ocean.

*Vahalis.**Meuse.*

Or cōme l'on approchoit les nauires de terre, Ger-
manicus commanda à l'Ambassadeur Silius de pren-
dre quelques gens armez à la legere, & se ruer impe-
tueusement dessus les Cattes. Et pour ce qu'il auoit
entendu, que le fort qu'auoient les Romains, sur le
fleuve Luppia estoit assiegé, luy mesmes en personne
y mena six legions. Quant est de Silius, il ne peut rien
exploiter, à cause des soudaines & grandes pluyes, si-
non qu'il amassa quelque peu de butin, & rauist la fil-
le & la femme d'Arpus Prince des Cattes. Mais ceux
qui estoient au siege n'attendirēt le combat, ains s'es-
uanouyrent incontinent qu'ils eurent ouy le bruit de
la venuë de Germanicus. Toutesfois ils auoient ja ab-
batu le tombeau, qui fut dressé aux legions de Varus
auec l'anciē autel, qui auoit esté edifié à Drusus. Quāt
à l'autel il le fait refaire, & en l'honneur de son pere, y
fait ioustes & tournois auec les legions. Mais il laissa
le tombeau comme il estoit, & fortifia de nouuelles
frontieres & rempars tout ce qui estoit entre le cha-
steau Aliso, & le fleuve du Rhin.

*Cattes.**Luppia.
fleuve.**Arpus.
Prince
des. Cat-
tes.**Aliso.
Chasteau.*

La l'armee de mer estoit arriuee, quand apres auoir
enuoyé les viures deuant, & party ses nauires entre
les legionnaires & alliez, il entra en la fosse nommee
Drusienne. Et là il fait vne priere à son pere Drusus,
qu'il ne trouuaſt mauuais, dont il entreprenoit les
mesmes choses que luy, ains l'aidast par l'exemple, &
par la memoire de ses conseils, & hautes entrepri-

*Fosse Drus-
sienne.*

LE II. LIVRE DES ANNALES

Amisia. ses. Dela trauerfant par les lacs & par l'Ocean en fin arriua sans tormenté iusques au fleuue Amisia: ou les nefz furent laissées ayans la riuere à gauche. Enquoy l'on faillit grandemét qu'on ne les tira d'autre costé: pource que depuis il feit passer l'armee es pays qui estoient à dextre. Au moyen dequoy y eut beaucoup de temps consommé à faire des pons. Les gens de cheual, & les legions passerent sans crainte les premiers bras de mer, pource qu'elle n'anticipoit encor guerres auant. Mais la derniere trouppes des bendes Auxiliaires, & quelques Hollandois se iouas en l'eau, & voulans monstrer comme ils sçauoient nouer, furent enuoloppez des eaux, & en partiè noyez.

Angriuariens. Or comme Germanicus plantoit son camp, on luy vint annoncer par le derriere la reuolte des Angriuariens. Parquoy soudain enuoya Stertinius, avec quelques cheuaux legers, lequel prist vengeance de ceste desloyauté mettant tout à feu & à sang.

Visurgis fleuve. Entre le camp des Romains & Cherusciens passoit le fleuue Visurgis. Sur le bort d'iceluy se trouua Arminius avec quelques vns des principaux de son armee. Lequel ayant demandé si Germanicus estoit arriué, & qu'on luy eut respondu qu'ouy: pria qu'il luy fut permis de parler avec son frere. Or il auoit vn frere au cap des Romains nommé Flavius homme fort loyal, & qui quelque temps au parauant auoit perdu vn œil en guerre souz Tibere. Ainsi ils eurent permission de parleméter ensemble. Cestuy s'estât quelque peu approché fut salué par Arminius, lequel apres auoir fait retirer ses gens, requist que pareillement l'on fit retirer noz

Flavius frere d'Arminius.

rer noz archers q̄ estoïent régez sur le bort de la riuere. Eux retirez, Arminius demāda à son frere dont luy procedoit ceste deformité en la face. Lequel luy ayāt nommé le lieu, & la bataille ou il luy auoit esté fait: Arminius luy demāda de rechef quelle recōpense il en auoit eu. Flavius lors luy vint à dire q̄ ses gaiges en auoiēt esté augmentez, & à luy monstrer son colier, sa courōne, & autres choses qui se dōnent aux gens d'armes, se mocquāt Arminius d'un si vil & pauvre loyer de sa seruitude. Sur ces propos vōt entrer en debat. L'un extolloit l'excellence des Romains, les richesses de l'Empereur, la punitiō qu'ils faisoïent des vaincus & la grande humanité de laquelle ils vsoïent enuers ceux qui de leur gré se venoiēt rēdre à eux. Mesmes cōme la fēme & le fils d'Arminius n'estoïent point traittez cōme ennemis. L'autre, au cōtraire alleguoit, ce qu'ō deuoit à la patrie, leur ancienne liberté, & les dieux du fond de la Germanie, luy monstroient pareillement la mere d'eux deux, qui estoit là venue expressement, à fin qu'ensemble ils le priaissent, de plustost eslire à estre Capitaine, & conducteur de ses parens & allicz, que traistre & desloyal enuers eux. Ainsi estant petit à petit venuz iusques aux iniures, à peine eussent ils peu estre gardez de s'entrebatre (iaçoit ce que la riuere fut entre deux) si Stertinius accourant là n'eust retenu Flavius, lequel plein d'ire & de courroux demandoit ia ses armes & son cheual. De l'autre costé l'on voyoit Arminius qui menassoit, & denonçoit la bataille, & l'entendoit l'on, pource qu'il entremesloit quelques mots Latins, comme celuy

LE II. LIVRE DES ANNALES

qui autrefois auoit esté soldat, au camp des Romains, comme Capitaine & conduéteur de ceux de sa ville. Le lendemain les Allemans se presenterent en bataille, d'autre costé du fleuve Visurgis. Germanicus sçachant bien que ce n'estoit fait en bon Capitaine de hazarder les legions qu'il n'y eut premiere-
ment faict construire des pons, & mis gens pour les garder: fait passer à gué ses gens de cheual de l'autre costé. Desquels furent chefs Stertinius & Emilius, du nombre des primipilaires. Ceux donc se separerent, & allerent passer loing l'un de l'autre, à fin de faire aussi separer les ennemis. Carioualda qui estoit chef des Hollandois, passa l'endroit ou la riuiera estoit plus roide. Parquoy les Cheruscienz faignans de fuyr, le tirerent iusques en vne plaine toute enuironnee de forests. Delà sortans tous ensemble & s'espandans par tout, repousoient ceux qui leur resistoient, & pressoient ceux qui reculloient, & apres qu'ils furent assemblez en vn rond les renuersoient & culbutoient, les vns de pres, les autres de loing. Carioualda (apres auoir longuemēt soustenu leur impetuosité) enhortant les siens (ainsi amassez qu'il estoient) de rompre les troupes des ennemis, & fendant la presse ou il les voyoit plus espaiz, fut abbatu à force de trait, apres que son cheual luy eut esté tué souz luy. Les autres furent ostez de ce peril, ou par leur force, ou par les gens de cheual qui leur vindrent au secours, avec Stertinius & Emilius. Germanicus ayant passé le fleuve Visurgis, sçeut par vn qui s'en estoit fuy du camp des ennemis, le lieu ou Arminius auoit

Carionalda.

auoit deliberé de donner la bataille, & si sceut que plusieurs autres nations s'estoient assemblees, en la forest sacree à Hercules, & qu'ils oseroient bien la nuit venir assaillir le camp. Cest homme fut creu, & ja de loing l'on voyoit des feuz allumez, tellement que les auant-coureurs festans vn peu plus approchez, rapporterent qu'ils auoient ouy vn bruit de cheuaux, & le murmure d'une grosse troupe de gens confuse & mal ordonnee. Parquoy Germanicus voyant les choses si prochaines du danger, & trouuant bon de tenter le courage de ses soldats, cherchoit le moyen comme il le pourroit cognoistre purement, & à la verité. Car il sçauoit assez que les Tribuns & Centeniers, luy annonçoient plustost les choses qu'ils pensoient luy estre agreables, que ce qu'au vray ils cognoissoient. Sçauoir que les libertins & affranchiz auoient encores quelque reste de ce courage seruil, & qu'entre les amis y auoit tousiours quelque flatterie. Au surplus il cognoissoit que faisant vne congregation, ce qui se commenceroit par peu de gens, seroit troublé par le bruit de plusieurs. A ceste cause que pour cognoistre entieremēt ce qu'ils auroient au cueur, il les falloir espier, lors qu'estās retirez à part, & ne se soupçonnans d'estre d'aucun escoutez, ils declareroient franchement en banquetant, fil y auoit en eux quelque crainte ou esperance. Quand doncques la nuit fut venue, il sortit par la porte Augurale, & chemina par lieux couuerts & incogneus du guer, acompagné d'un homme seul. Et ayant la peau d'une beste sauuage sur le dos, alloit par les ruës du

Forest sacree à Hercules.

Germanicus tente ses soldats.

Porte Augurale.

LE II. LIVRE DES ANNALES

camp, mettant l'oreille pres des tentes, & ainsi iouy-
 fant des propos qui de luy se tenoient. L'un loüoit la
 noblesse de ce Prince, l'autre sa beauté, plusieurs sa pa-
 tience, sa courtoisie, & son courage tousiours vn, fust
 és choses de plaisir, ou d'importance. Et pource (di-
 soient ils) il faut luy rendre le plaisir, & faire quelque
 chose pour luy en ceste bataille, & consequemment
 sacrifier à la gloire, & à la vengeance les traistres &
 violateurs de la paix.

*Chacun
 de ces se-
 sterces
 pouuoit
 valoir un
 carolus
 & obole
 tournois.*

Durant cecy vn des ennemis qui sçauoit parler La-
 tin, faisant approcher son cheual des tranches, com-
 mença à crier, qu'Arminius promettoit de donner
 femmes, terres, & tous les iours cent Sesterces de ga-
 ge tant que la guerre dureroit, à ceux qui laisseroient
 le party des Romains pour prendre le sien. Les legiōs
 furent merueilleusement irritees de ceste contume-
 lie. Que le iour vienne (disoient ils) & que la batail-
 le se donne, & l'on verra si les gens d'armes ne pren-
 dront pas les terres, & par force rauront les femmes
 des Germains. Ainsi cecy fut tourné en bon presage,
 & commença l'on à vouier cest argent & ces mariages
 au butin. A l'assiette du troisieme guet l'on feit quel-
 ques escarmouches autour du camp, toutesfois sans
 coup ruer, pour ce que les ennemis trouuerent plu-
 sieurs cohortes pour deffendre le rampart, & veirent
 qu'il n'y auoit personne qui fust paresseux ou endor-
 my. Ceste nuictée feit que Germanicus reposa ioy-
 eusement & à son aise, & luy fut aduis en dormant
 qu'il sacrifioit, & qu'estant sa pretexte toute taincte
 du sang sacré, l'Imperatrix sa grand mere, luy en a-
 uoit

*Songe de
 Germani-
 que.*

uoit baillé vne autre plus belle. Ainsi ayant double
 preface, & voyant son entreprise approuuee des au-
 spices, il feit assembler ses gens d'armes, & leur decla-
 ra tout ce que par sa prudence il auoit preueu, & ce
 qui luy sembloit commode pour la prochaine ba-
 taille. C'est à sçauoir que non seulement la campai-
 gne estoit aduantageuse aux Romains pour le com-
 bat, mais aussi les bois & les forests moyennant que
 ils y procedassent par discretion. Que ces grandes tar-
 ges, & longues picques desquelles vsoient ces Barba-
 res, n'estoient si maniables entre les arbrisseaux &
 rameaux des arbres, comme estoient leurs dards, ia-
 uelots, espees, & armures bien iointes sur le corps.
 Et pour ce qu'ils les chargeassent menu & souuent, &
 tirassent leurs coups au visage, attendu que les Alle-
 mans n'auoient cabassets ne cuirasses, n'y aucuns pa-
 uois qui fussent renforcez de fer, ou de nerfs. Ains
 seulement quelques boucliers d'osiers entrelassez, ou
 d'aiz fort deliez, & peints de couleurs. Quant à leur
 premiere pointe, qu'elle estoit tellement quellement
 embastonnee de picques, n'ayant le reste que ie ne
 sçay quels bastons bruslez par le bout, ou autres fort
 courts. D'auantage que tout ainsi qu'ils auoient les
 corps hideux à regarder & parauanture puissans pour
 soustenir quelque brief assaut: aussi certes qu'ils n'e-
 stoient pour endurer playes à la longue, & se soucioi-
 ent peu du deshonneur, ny de leurs Capitaines, veu
 qu'à tous coups ils fuyoient, & abandonnoient leur
 camp: perdans tout courage quand la fortune leur
 bastoit mal, & oublians en leur prosperité, tout droit

*Admi-
 nition de
 Germani-
 cus aux
 soldats.*

*Armes
 des Alle-
 mans.
 Esus
 d'aiz
 peints
 & d'a-
 sier.*

LE II. LIVRE DES ANNALES

*Rhin.
Elbe.*

diuin & humain. Et pource (disoit-il) si vous auez enuie de mettre fin à l'ennuy que vous auez du trop lōg chemin & de la mer, vous en auez le moyen par ceste bataille. Et d'auantage vous estes ia plus prochains du fleuve d'Elbe que du Rhin. Au moyen dequoy ne vous restera plus de guerre, moyennant que vous me rēdiez victorieux en ces mēsmes terres, esquelles ie marche apres mon pere & mon oncle.

*Exhorta-
tion des
Capitai-
nes Alle-
mans à
leurs sol-
dats.*

Par ceste harāgue du Prince, les soldats furēt incontinent enflāmez, & donna l'on le signe de la bataille. Arminius au contraire & autres principaux de la Germanie n'estoient paresseux a reclamer, & faire protestatiōs à leurs gēs, disans que ceux ausquels ils auoiēt a faire estoient les fuyars de l'armee de Varus, lesquels de peur de soustenir la guerre auoient suscitē vne sedition: partie desquels estās naurez par le derriere, & les autres ayans les membres rōpuz & cassez des flots & tempestes de la mer, venoient de rechef se presenter deuant la face de leurs ennemis courroucez & malueillans, sans aucune esperance de bien. Car ils estoient aduisez de faire leur chemin par la mer, & par les lieux destournez de l'Ocean à fin qu'on ne leur alast au deuant, & qu'estans repousez, ils ne fussent poursuiuis. Toutesfois quand ce viēdroit au ioindre qu'en vain ils auroient leur refuge aux vens, & aux auirons. Et pource (disoiēt-ils) si vous pensez seulement à l'auarice, cruauté, & grand orgueil de voz ennemis, y à il chose que vous aymiez mieux en ce monde, que maintenir vostre liberté, ou mourir auant que de cheoir en seruitude?

Estans

Estans ainsi enflammez, & crians bataille, ils ^{Idistiauisum} les menerēt en vne plaine nommee Idistiauisum, laquelle est moyenne entre le fleuve Visurgis, & les montagnes, & se tortuē inegallement selon que le riuage donne lieu à l'eau, ou que la hauteur des montagnes luy resiste. Sur le derriere y auoit vne forest dont les arbres auoiēt les branches fort hautes, mais la terre apparoiſſoit plaine entre les pillles d'iceux. Ceste plaine avec l'entree de la forest, fut occupee par les Barbares. Seulement les Cherusciens se mirent sur les cymes des montagnes à fin de se ruer sur les Romains, quand ils les verroient empeschez à combattre.

Quant à nostre armee elle estoit ainsi ordonnee. Les bendes auxiliaires des Gaulois, avecques les Allemans faisoient la poincte, & estoient suyuis des archers à pied. Apres marchoient quatre legions, & ensemble Germanicus, avec deux cohortes Pretorienes, & quelques gens de cheual d'élite. Suyuoient apres encor autant d'autres legions avec les cheuaux legers, les archers à cheual, & la reste des bendes confederées. Les soldats estoient ententifz & soigneux, de tenir tousiours leur troupe preste, & en ordre de bataille. Germanicus voyant les bendes des Cherusciens, estre visuentent entrees dedās ses gens, enuoya les plus adextres de ses gens de cheual leur dōner en flancs, & commanda à Stertinius de les environner avec les autres troupes, ou de les charger sur la queue, promettant que ou il veroit qu'il en auroiēt besoin il les secourroit.

*Ordōnam
ce de l'ar-
mee des
Romains.
Bendes
Pretoria-
nes estoient
comme la
garde
d'un Roy,
ou pour
mieux di-
re comme
les tanif-
saires du
grand
Turc.*

LE II. LIVRE DES ANNALES

Durant cecy Germanicus va aduifer vn tresbel a-
gure, à sçauoir huit Aigles qui tiroient deuers la fo-
rest, & entroient dedans. Lors commença à crier à
ses gens qu'aussi ils tirassent en cest endroict, & sui-
uissent ces oiseaux Romains, dieux peculiers des le-
gions. Parquoy les gens de pied s'y ruent apres, &
ceux de cheual qui auoient auparauant esté enuoyez,
les chargerent sur les flancs, & sur le derriere. Lors
(chose merueilleuse) deux bandes des ennemis, à sça-
uoir ceux qui tenoient les lieux descouverts de la fo-
rest, & ceux aussi qui tenoient la plaine, fuyans au re-
bours les vns des autres, taschoient à gagner la fo-
rest. Au milieu de ces deux bandes l'on voit les Che-
rusciens estre renuersez du haut en bas des môtagnes,
entre lesquels le vaillant Arminius, avec la force de
ses bras, avec la voix, & les grands coups qu'il don-
noit, soustenoit la bataille. Et ja s'estoit ietté de toute
sa force sur les archers, & s'en alloient en route, sans
les Rhetiens, Vindeliciens, & cohortes Gauloises, qui
se vindrent mettre au deuant avec leurs enseignes.
Toutesfois en fin Arminius trouua moyen d'eschap-
per tant avec la force de son corps, que par l'agilité &
vitesse de son cheual, ayât souillé la face de son sang,
de peur d'estre descouvert. Aucuns ont escrit qu'il a-
uoit esté cogneu des Chauciens, qui estoient pour lors
avec les bandes auxiliaires des Romains, lesquels fai-
gnans ne le cognoistre, le laisserent aller. La vertu, ou
la mesme fraude feit qu'Inguiomerus eschappa. Les
autres furent saccagez çà & là. Aucuns voulans pas-
ser outre le fleuve Visurgis, furent couverts ou de traits
qu'on

*Aigles
oiseaux
Romains.*

*Rhetiens,
Vindeli-
ciens, Gau-
lois.*

*Ingui-
omerus.*

qu'on leur iettoit, ou par la force de l'eau, & finalement par la presse des autres qui vouloient se sauuer comme eux, ou par les bords du fleuve, qui d'adventure tóboient & fondoient dessouz les pieds de ceux là. Les autres fuians honteusement grauissoient és cymes des arbres, & se cachâs sous les branches & fueilles, furent en partie transpercez des archers, comme par mocquerie, & en partie accablez par les arbres que l'on iettoit par terre.

Ceste victoire fut grande, & y eut peu de noz gens occis. La tuerie ne cessa depuis la cinquiesme heure du iour iusques à la nuit, tellement qu'il y eut bien dix mil de pays tout remply d'armes, & de corps morts. Et trouua l'on entre les despouilles des vaincus, des chesnes qu'ils auoient portees pour enchesner les Romains, comme s'ils eussent esté assurez de la victoire. Les gens d'armes saluerent Tibere comme Empereur au lieu ou la bataille auoit esté faicte, & dresserent vne bute, sur laquelle ils mçrent les harnoys des ennemis en mode d'un trophée, ayans escrit au dessouz les noms des nations vaincues. Les Germains receurent plus de courroux de ceste maniere de faire, que non pas de leurs plaies, deuil, & destruction, tellement que ceux qui maintenant vouloient abandonner leur pays, & aller demourer outre le fleuve d'Elbe, vindrent soudain à demâder le combat, & à prédre leurs armes. Le peuple, les grands seigneurs, ieunes, & vieux, viennent en vn instât courir sus aux Romains, & les perturber. Finalement ils choisirent vne place enuironnée d'eau

*chesnes
pour en-
chesner
les Ro-
mains.*

Trophée.

LE II. LIVRE DES ANNALES

& de forests, dedans laquelle estoit vne plaine estroicte & marescageuse. Et y auoit vn autre profond marest, qui enuironnoit les forests tout autour fors que d'un costé ou les Angriuariens auoient fait vne chaussee fort large, par laquelle leurs terres estoient separees d'auec celles des Cherusciens. Là ils assirent leurs gens de pied, & embuscherent leur gens d'armes dedans l'especeur des bois plus prochains, à fin que quand les legions seroient entrees dedans la forest, ils les vinssent charger sur la queue. Germanicus estoit bien aduertý de tout cecy: car il scauoit leurs entreprises, les places, les choses notoires & secretes, & tournoit les ruses & finesses des ennemis en leur propre ruine & destruction: au moyen de quoy il donna le gouuernement des gens de cheual, & de la plaine à Seius Tubero Ambassadeur, & dressa la bataille des gens de pied de sorte, qu'une partie d'eux entroit dedans la forest, & tout quant & quant l'autre partie alloit pour gagner ceste leuee. Quat au reste il laissa faire les Ambassadeurs. Ceux qui estoient enuoyez à la plaine, la gagnerent aisement: mais ceux qui auoient à gagner la chaussee, estoient repoussez de grans coups qui venoient d'enhaut, comme s'ils eussent eu vne muraille a escheller. Le Capitaine congneut incontinent que la partie estoit mal faicte en combatant ainsi de pres, au moyen de quoy ayant fait quelque peu retirer les legionnaires, commanda à ceux qui vsoient de fondes, & iecteurs de pierre, de lancer le traict, & renuerser les ennemis par terre. Lors furent iettees force picques & lances par
les

*Scim Tu-
bera.*

les tourmens propres à cest affaire, tellement que d'autant que les combatans estoient en lieu plus haut & apparent, d'autant de plus de coups ils estoient abatus.

Germanicus apres auoir gaigné la chauffee, se ietta impetueusement dedans les bois tout le premier, accompagné des bendes Pretorienes, & là fut combatu entre eux main à main. Les ennemis estoient par le derriere enclos des marests, & les Romains de riuieres & de montagnes. Il faillloit que les vns & les autres demourassent là necessairement. Leur esperance gisoit en la vertu, & leur salut en la victoire. Les Allemans n'auoient pas moins de courage que les Romains, mais ils estoient inferieurs quant à la maniere de combattre, & sorte d'armes, attendu qu'il estoit impossible qu'une telle multitude en lieu si estroit peut lancer ces longues picques, & soudain les retirer, ou courir sus à son ennemy, ou sayder de legereté de corps, ains estoient contraincts à combattre pied à pied: ou au contraire les gens d'armes Romains ayas leurs escus contre leur poitrine, & leurs espees es poings, transperçoient les grands corps & faces nues de ces Barbares, & se faisoient voye par la boucherie qu'ils faisoient des ennemis, estant Arminius deuenu pesant, & moins deliberé ou pour ses continuels dangers, ou pour auoir receu quelque nouvelle playe. Mesmement Inguiomere voltigeant parmy la bataille, se trouua plustost abandonné de la fortune q̃ de la vertu. Germanicus pour estre mieux cogneu auoit osté son armet de la teste, & prioit ces

LE II. LIVRE DES ANNALES

gens de ne cesser ceste tuerie, leur remonstrant qu'ils n'auoient que faire de prisonnières, & que la fin de leur guerre consistoit au seul sac, & entiere destruction de leurs ennemis. Et comme le iour commençoit à decliner, il feit retirer vne des legions de la bataille pour aller dresser le camp. Les autres iusques à la nuit, se soulerent & assouuient du sang des ennemis. Quant aux gens de cheual l'on ne scait lesquels eurent du meilleur. Germanicus les ayant assemblez, feit vne harangue à la louange des vainqueurs, & dressa vn amas d'armures, & de harnois, avec ce tiltre, & inscription superbe. *L'armee de Tibere Cesar, apres auoir debellé les nations qui sont entre les fleuves du Rhin, & d'Elbe, a consacré ces muniments à Mars, à Iupiter, & à Auguste.* Enquoy ne feit aucune mention de sa personne, & ne scait l'on si ce fut pour crainte de l'enuie, ou pource qu'il estimoit la seule conscience des biensfaits nous deuoir rendre contents.

Angriuariens. Incontinent apres il alloit enuoyer Stertinius contre les Angriuariens, fils ne se fussent vistiment rendus, lesquels s'humilians & luy octroyans ce qu'il demandoit, eurent pardon de toutes leurs offences passées. Or pource que l'esté estoit ia bien auancé aucunes des legions furent enuoyees par terre, aux lieux ou elles auoient accoustumé d'hiuerner. Et Germanicus ayant fait embarquer le demeurant en ses vaisseaux, les mena par le fleuve Amisia iusques à l'Océa. Au commencement estant la mer calme & paisible, n'y auoit autre bruit que celuy des rames de mille nefes, ou estoit pousée seulement des voiles. Mais soudain

soudain d'une grosse & obscure nuee soudit une gresle tresespaisse: laquelle, ensemble les vagues incertaines par les orages & tempestes, leur feirēt perdre toute cognoissance, & abandonner le gouvernement de leurs vaisseaux. Les gens d'armes espouventez, & non accoustumez à ces accidens de mer, lors qu'ils troublent les matelots & s'entrēmettent de vouloir aider où il n'en est besoin, empeschoient le deuoir des plus experimentez. Consequemment vn vent d'Auton se va faire maistre du ciel & de la mer, lequel renforcé par innumerables nuees attraićtes des terres enflées, & profondes riuieres de Germanie, & rendu plus violent, par la grande froidure du prochain Septentrion, auoit escarté les vaisseaux és lieux plus descouuerts de l'Ocean, & Isles, enuironnees de rochers inaccessibles, ou dangereux à aborder, à cause des guez incogneuz. Estans les nauires avec grande difficulté, aucunement eschappees de ces lieux, pour ce que le flot de la mer s'estoit changé, qui les conduisoit à la mercy des vents: il ne fut en aucune maniere possible d'ancrer, n'y espuiser l'eauē qui entroit dedans leurs vaisseaux. Parquoy ils vont ietter en la mer, cheuaux, bestes d'aide, hardes, & mesmes les armures, à fin qu'estans les trompes & esgouts soubseleuez, ils se peussent plus aisément escouler par les costez.

*Tourmente
de mer.*

*L'Ocean
plus violent
que
les autres
mers.*

Or d'autant que l'Ocean est plus violent que toute autre mer, & l'air d'Allemagne plus aspre & rigoureux que tout autre, d'autant ceste perte fut plus nouuelle, & excessiue, ayant esté faite au riuage des terres

LE II. LIVRE DES ANNALES

ennemies, ou en ceste mer qui est si profonde & spatieuse, que l'on la pense estre toute la dernière, & que outre elle n'y a plus aucune terre.

Partie des nauires furent enfoncées en mer, & les autres iettées és Isles fort loingtaines & esgarées. Et pour autant que ceste terre n'estoit aucunement habitée, ou cultivée, les soldats y moururent tous de faim, exceptez ceux qui peurent viure de la chair de leurs chevaux, qui là auoient esté rompuz & desbrisez. La seule nauire ou estoit Germanicus arriua en la *Chaucien*, terre des Chauciens. Lequel se trouuant sur les rochers, & riuages hauts & eminents crioit iour & nuit, que luy seul estoit cause de ceste grande destruction, tellement qu'à peine peut il estre gardé de ses amis, qu'il ne se precipitast en la mesme mer. Finablement le fluz retourna, & le vent adoucy, les nauires furent conduites au port, les vnes avec le peu de rames qui leur estoient demourées, plusieurs par le moyen de quelques habillemens qu'on y auoit tenduz en lieu de voiles, & les autres furent tirées par celles qui estoient plus entières & fortes. Et les ayant Germanicus fait r'habiller à la haste les enuoya pour chercher diligemment par les Isles. En ceste façon plusieurs furent ramassez. Aussi les Angriuariens qui peu auparavant s'estoient renduz, en enuoyerent beaucoup que ils auoient rachetez de ceux du pays. Aucuns furent transportez iusques en Angleterre, & furent renuoyez par les gouuerneurs du pays, & racontoit chacun les merueilles qu'il auoit veües, selon qu'il estoit retourné de plus loing, comme de la force des tourbillons d'oiseaux,

Angriuariens.

Angleterre.

d'oiseaux, desquels l'on n'auoit encores ouy parler, des monstres de mer, des diuerſes formes d'hommes, & de beſtes, leſquelles ils auoient veuës, ou croyoient auoir veuës pour la grande peur en laquelle ils auoient eſté.

Or tout ainſi que la perte des nauires auoit excité les Allemans à vouloir recommencer la guerre: ainſi auoit elle Germanicus à les vouloir chaſtier. Au moyē dequoy commanda à C. Silius d'aller ſur les Cattes, *Catten* avec trente mil hommes de pied, & trois mil hommes de cheual. Quant à luy avec vne plus groſſe armee il ſalla ruer ſur les Marſes. Le chef d'eux nommé Malouendus, qui ſeſtoit rendu vn peu auparavant, enseigna que pres de là, l'aigle de la legion de Varus eſtoit enfouye en terre, & gardee avec petite garde. Parquoy ſur le champ l'on enuoya vne bende de gens à fin d'affaillir les ennemis ſur le deuant & les faire ſortir: & d'autres pour aller par le derriero faire ouuerture de la terre, qui couuroit ceſte Aigle. A l'vne & l'autre de ces bendes la fortune ſe monſtra fauorable. Au moyen dequoy Germanicus plus proprement ſerua dedans le pays, pillant, & ſaccageant ſes ennemis leſquels ne ſ'oſoient mettre en deſſence. Ou ſi quelquesfois ils oſoient luy tenir pied, ils eſtoient tantost repouſſez, & ne ſeſtoient (à ce que l'on entendit de ceux qui furent pris priſonniers) iamais trouuez ſi eſpouuentez. Et pour ce diſoient que les Romains eſtoient inuincibles, & inſuperables quelques accidens qu'ils leurs ſuruinſſent, attendu qu'apres auoir perdu leurs nauires, & leurs armes, apres que des

Marſes
Malouendus
dw. Aigle de la
legion de
Varus

LE II. LIVRE DES ANNALES

*Talio-
rum citè.* corps d'eux & de leurs cheuaux, le riuage de la mer auoit esté tout couuert, ils n'auoient laissé à se ruer dessus eux avec la mesme force, le mesme courage, & comme fil leur fust arriué quelque nouveau secours. De là les soldats furent remenez à luhionum fort ioyeux, d'auoir recompensé l'aduersité de la mer par vne si heureuse entreprise. Et leur feit Germanicus vne largesse, remboursant vn chacun d'eux du dommage qu'il affermoit auoir receu.

Au reste l'on ne doutoit point que les ennemis ne perdissent courage, & sçauoit l'on bien qu'ils estoient en deliberation de demander la paix, & que la guerre pourroit estre du tout acheuee dedans le prochain Esté. Mais Germanicus estoit souuent admonesté de retourner par les lettres de Tibere, à fin de receuoir le triomphe qui luy estoit decerné: luy remonstrant que ja il auoit assez souffert de fortunes & accidens: qu'il auoit acheué plusieurs grandes batailles à son honneur: mais aussi qu'il se souuint, des dommages & grandes pertes qu'auoient fait les vents & tourmente de la mer, lesquelles encores qu'elles fussent aduenues sans la coulpe ou faute du Capitaine, estoient toutesfois griefues & fascheuses à porter. Luy remonstroit aussi, comme neuf fois il auoit esté enuoyé en Allemagne par Auguste, où il estoit venu à bout de plus de choses, en y procedant par conseil & deliberation, qu'en y allant par force. *Sicambri-
Souaues.* Que par ce moyen, les Sicambriens & Souaues estoient renduz à luy, & auoit le Roy Maroboduus *Maroboduus.* esté contrainct de faire paix. Et pour ce, puis que
les

les Romains festoient assez vengez, il n'y auoit point de danger de laisser les Cherusciens en leurs debats, & noies intestines.

Comme donc Germanicus luy demanda encor vn an seulement pour mettre fin à son entreprise, il vint avec plus de vehemence à assaillir sa modestie, en luy offrant vne autrefois le Cōsulat, pour l'exercer en personne: luy remonstrant, que ou il seroit besoing de faire encor la guerre, il estoit bō qu'il laissast quelque subiet, & matiere pour la gloire de son frere Drusus. Lequel pour n'auoir lors contre qui faire la guerre, n'auoit aussi moyen d'acquerir nom d'Empereur, ou porter la couronne de Laurier, sinon en Allemagne. Au moyē dequoy Germanicus sans delay s'en retourna, iacoit ce qu'il cogneust cecy n'estre qu'vne faincte, & que par enuie on le vouloit frustrer d'vn honneur, qui ia luy estoit acquis.

En ce temps Libo Drusus de la famille des Scriboniens fut accusé, de vouloir brasser & entreprendre choses nouuelles. Je descriray le plus diligemment que ie pourray, le commencement, l'ordre, & la fin de ceste entreprise, pource que lors premierement furent descouuertes les choses, qui par tant d'annees ont miné & consommé la Republique. Firmius Catus Sénateur, & des plus priuez amys de Libo, auoit tant fait qu'il auoit mis en teste à ce ieune homme (peu aduilé, & qui legerement se persuadoit choses vaines) de donner foy aux promesses des Caldeens, sacrifices des Magiciens, & aux interpretes des son-

*Libo Drusus,
Scriboniens.*

Firmius Catus.

*Caldees,
Magiciens.*

II. LIVRE DES ANNALES

Pompee. ges, luy ramenant en memoire son bisayeul Pompee, la tante Scribonia (laquelle autresfois auoit esté
Scribonia femme d'Auguste) les Cefars (qui estoient ses cousins germains) & la maison pleine des images & armoiries de ses predecesseurs. Et par mesme moyen l'incitoit de faire plusieurs superfluitez, & excez, & emprunter argent à toutes mains, se rendant compaignon de ses paillardises & amities, à fin de le lier & rendre subiet à plus d'accusations. Finablement ayant trouué assez de tesmoins, & de seruiteurs qui sçauoient autant de ces choses que luy, il demanda entree pour parler au Prince, luy donnant à cognoistre, tant le crime que
accus l'accusé, par le moyen de Flaccus Vescularius Cheua-
Vescula- lier Romain, qui auoit grande familiarité avec Tibere.
rius. Cesar iagoit ce qu'il ne mesprisast ceste accusation, ne voulut pourtant que l'accusateur parlast à luy, disant qu'il auroit assez de moyen de luy faire entendre tout ce qu'il voudroit par le mesme Flaccus, ne laissant ce temps pendant à pouruoit Libo en l'office de Preteur, de l'appeller à sa table, sans luy faire pire chere que de coustume, ou vser en son endroit de plus rudes paroles: tant il tenoit son ire couuerte. Et iagoit ce qu'il eust peu deslors empescher les propos & entreprin-
Iunius. ses de Libo, si aimia il mieux toutesfois seulement les entendre. Et iusques à ce qu'un nommé Iunius, preslé de faire sortir les ombres des enfers par charmes & forceceries, le vint declarer à Fulcinus
Fulcinus Trio. Ce Trio entre les accusateurs, auoit le bruit d'a-
Trio. uoir l'esprit fort subtil, & prenoit plaisir à estre mal renommé. Donc il se va incontinent attacher à l'accusé,

cusé, se transporte aux Consuls, & requiert que le Senat prenne cognoissance de ceste matiere. Parquoy le Senat fut assemblé, & donna l'on à entendre, que c'estoit pour deliberer d'une chose de grande importance.

Ce pendant Libo ayât changé de robbe, accompagné de quelques femmes nobles, alloit par les maisons, pour prier ses parens & alliez de l'aider de paroles en ce danger. Lesquels ayâs tous vne mesme crainte, le refuserent, & s'excuserent par diuers moyens.

Le iour du Senat, estant Libo las & trauaillé tant de crainte, que de maladie, ou bien (comme aucuns ont voulu dire) saignant estre malade, se fait porter en litiere iusques aux portes du Palais: & s'appuyant sur son frere, il rendoit les mains à Tibere, & le supplioit de luy pardonner: lequel le receut les yeux tousiours fichez sur luy.

Lors sur le champ il leut les libelles, & les auteurs d'iceux, se moderant de telle sorte, qu'on n'eust sceu iuger qu'il dist ou feist quelque chose qui seruiſt à adoucir ces crimes, ou les aigrir. Outre Catus & Trio, estoient encores arriuez deux autres accusateurs, à ſçauoir Fonteius Agrippa, & C. Liuius; & estoient en debat à qui plaideroit contre l'accusé; iusques à ce que Liuius (pour ce qu'ils ne se pouuoient accorder, & que Libo estoit là entré sans aduocat) ayant promis deduire vn chacun des crimes par le menu, produist ie ne ſçay quels liurets si sots & impertinents, qu'en eux estoit faite mention cōme Libo seſtoit conſeillé aux deuins ſil pourroit auoir

Fonteius.
Agrippa
C. Liuius.

LE II. LIVRE DES ANNALES.

tant de richesses que d'icelles il peust courir la voye Appie iusques à Brindes. Plusieurs autres choses fortes & vaines y estoient aussi contenues, & a les interpreter moins rigoureusement, plustost dignes de pitié & commiseration, que de punition. Toutesfois l'accusateur maintenoit, qu'en vn libelle escrit de la main de Libo, y auoit des marques & caracteres denotans quelque eruaute, ou incogneus, adioustes aux noms des Cefars, & des Senateurs. Ce qu'estant nyé par l'accusé, il fut dit que ses seuiteurs seroient mis en la question. Et pource que par ancien arrest du Senat il auoit esté deffendu de donner la question aux seruiteurs pour les faire confesser ce qu'ils scauoient contre leurs maistres, Tibere fort subtil & cauteleux, & grand inuenteur de droits nouueaux, commanda au greffier de les tous emanciper & mettre hors de la puissance de leur seigneur, à scauoir à fin que sans preiudice de l'arrest du Senat, l'on peut donner la question aux seruiteurs de Libo pour déposer contre leur maistre. Pour ces causes l'accusé demanda delay iusques au lendemain, & donna la dernière charge de supplier le prince pour luy, à P. Quirinius son parent. Auquel fut respôdu qu'il s'adressast au Senat. Cependant la maison de Libo estoit toute enuironnée de gens d'armes, & faisoient grand bruit à l'entrée de la maison, tellement qu'il les pouuoit facilement voir & ouyr: & lors regardât a contre-cœur les viandes qu'il auoit fait seruir pour sa dernière volupté, commença à appeller quelcun pour l'occire, à empoigner les mains de ses seruiteurs, & leur fourrer

*Tibere in-
uiteur de
droits
nou-
ueaux.*

*Quirinius
son parent.
Senat.*

le cousteau dedans, à fin qu'ils le tuassent : lesquels tous estonnez & refusans de ce faire, renuerferent la chandelle qui estoit sur la table. Et luy estans ces tenebres faictes mortelles, se donna deux coups dedans les entrailles. Au cry qu'il feit en cheant accoururent ses affranchis, & pareillement les gens d'armes, voyas. qu'il estoit mort. Ce neâtmoins l'accusation fut tousjours poursuie au Senat, avec mesme instance & affirmation. Et iura Tibere que sil ne se fut trop hasté de se deffaire soy mesmes, encor qu'il se fut trouué coupable, si eut il prié le Senat de luy sauuer la vie. Ses biens furent partis entre les accusateurs. Ses estats & pretures furent extraordinairement donnees à ceux qui estoiet du Senat. Lors Cotta Messalinus fut d'aduis que l'effigie de Libo ne seroit portee pour acompagner les funerailles de ceux de ceste famille qui mourroient a l'aduenir. Cn. Lentulus fut pareillement d'aduis que l'on deffendit que nul de la famille des Scriboniens s'ingeraist de prendre le surnom de Drusus. Pomponius Flaccus ordōna iours pour faire processions generales. L. P. & Gallus Asinius, Papius Mutilus, & L. Apronius decernerēt qu'on feroit des oblations à Iupiter, à Mars, & à Concorde, & que l'on festeroit le iour des Ides de Septembre, auquel Libo festoit luy mesmes tué. J'ay bien icy voulu inserer les autoritez & flateries de ces personnages, à fin que l'on cogneut ce mal n'estre nouveau en la Republique.

Il y eut aussi quelques arrests du Senat pour chasser les Mathematiciens, & Magiciens hors d'Italie,

LE II. LIVRE DES ANNALES

*Or Magi-
cien chaj-
ses d'Ita-
lie.
L. Pitua-
nius.
P. Mar-
tius.
Porte Ex
quiline.
Contre
les super-
fluités de
Rome.
Octavius
Fronto.
Soye des-
fendue
de porter.*

entre lesquels L. Pituanus fut precipité du haut d'un rocher. Et les Consuls ayans mis P. Martius hors la porte Exquiline, & ayans fait sonner la trompette, le punirent à la mode ancienne

Le iour d'apres que le Senat tint, Q. Haterius autrefois Consul, dit plusieurs choses contre les exces & superfluités qui se faisoient en la ville, pour autant que Octavius Fronto estoit ia desmis de sa Preture. A ceste cause y eut arrest par lequel fut ordonné, que l'on ne seruiroit plus à table de vaisselle d'or massif, & que les hommes ne porteroient plus de soye.

*Pour les
superflui-
tés.
Fabrices.
Scipions.*

Fronto en dit d'auantage, & requist que l'on donnast aussi quelque regle à la vaisselle d'argent, aux meubles, & au nombre des seruiteurs. Car encor en ce temps les Senateurs auoient loy de donner iugement de ce qu'ils leur sembloit bon pour la Republique. Gallus Cninius disputa au contraire, alleguant que les richesses priuées estoient augmentées avec l'Empire, & que ce n'estoit point chose nouuelle d'en auoir, ains receue de toute ancienneté. Que c'estoit tout autre chose de la richesse des Fabrices, & de celle des Scipions, toutesfois que tout se r'apportoit à la Republique. Laquelle estant pauvre, estoit aussi necessaire les maisons des citoyens estre pauvres. Et maintenant qu'elle est creue en ceste magnificence, les biens des particuliers sont aussi augmentez. Qu'il n'y auoit rien de trop, ou de trop peu, au nombre des seruiteurs ou de l'argent, sinon quant à la condition du possédant. Qu'à ceste cause les reuenus des Sénateurs & Cheualiers estoient distinguez, non que de leur

leur nature ces personnes fussent diuerſes: mais à fin qu'ils precedaſſent en lieux, en ordre & dignitez, & euſſent ces choſes aſſignées pour le repos de leur eſprit, & pour la ſanté de leurs corps: ſi d'aduéture l'on ne vouloit que les plus grands & apparens euſſent tout le ſoucy, & fuſſent contraints de ſe mettre en pluſieurs dangers, ſans toutesſois iouyr des choſes qui ont acouſtumé d'adoucir les ſoucis & penſées, & rendre les perils beaucoup moindres. L'on ſ'accorda facilement à Gallus, pource qu'il couuroit la confeſſion de ces vices ſouz tiltres honneſtes, & pource que les eſcoutans auoient la meſme affection, & auſſi que Tibere dit le temps n'eſtre lors propre pour ceſte reformation, & que ou les manieres de viure tomberoient en diſſolution, il n'y auroit faute de reformateur.

En ces entrefaiçtes L. Piſo blaſmât l'ambition des gens de iuſtice, la corruption des iugemens, la cruauté des Aduocats qui menaſſoient de faire accuſatiōs: proteſtoit de laiſſer la ville, & ſ'en aller viure aux chāps en quelque lieu loingtain & couuert. Et cedant laiſſoit là la court. Tibere fut eſmeu de cecy: & iaçoit ce qu'il eut taſché d'appaiſer Piſo de douces paroles, ſi preſſa il ſes amis de le retenir, ou par autorité, ou par prieres.

Ce meſme Piſo donna teſmoinage d'un auſſi libre courroux, ayant fait adiourner Vrgulania, laquelle par la faueur de l'Imperatrix eſtoit deuenue plus puiſſante que les loix ne permettoient. Mais Vrgulania meſpriſant l'adiournement, & faiſant peu de

Ce Piſo eſt appelle Calpurnius au 4. liure.

Vrgulania.

LE II. LIVRE DES ANNALES

conte de Piso, se feit mener en la maison de l'Em-
pereur. Toutesfois Piso ne se voulut desister, iacoit
ce que l'Imperatrix se plaignist qu'on luy faisoit vio-
lence, & qu'on la vouloit trop abaisser. Tibere estimât
n'estre raisonnable de souffrir à sa mere finon iusques
à ce point, luy promit de se trouuer au Tribunal du
Preteur, & de soustenir la cause d'Vrgulania. De fait
partit du Palais, commandant à ses gens d'armes le
suyure de loing. Vous l'eussiez lors veu marcher (luy
venant le peuple au deuant) avec vn visage seant &
composé, passant le tēps & le chemin par diuers pro-
pos, & se traueillans en vaines amis de Piso pour le
retirer de son propos, iusques à ce que l'Imperatrix
eut fait deliurer l'argent qui estoit demandé à Vrgu-
lania. Telle fut l'ysue de ceste chose, de laquelle Piso
ne rapporta peu de gloire, & si en fut la renommee de
Tibere plus grāde. Au reste la puissance d'Vrgulania
estoit à la verité si excessiue à la cité, qu'estāt quelque
iour adiournee pour porter tesmoignage en vne cau-
se qui se menoit au Senat, elle n'y daigna venir: & fut
l'on contraint d'enuoyer le Preteur en sa maison pour
l'ouyr iacoit ce que la coustume fut de toute ancien-
neté d'ouyr au lieu du plaidoyé & en iugement les
vierges Vestales mesmes, routes & quātesfois qu'el-
les deposoient de quelque chose.

Le me tairois des affaires qui furent differees en
ceste annee, n'estoit qu'il m'a semblé vtile de con-
gnoistre la diuersité des opinions de Cn. Piso & A-
sinus Gallus touchant telles affaires. Piso cōbien que
Tibere eut promis de deffendre la cause d'Vrgulania,
ne se

ne se desista pourtant, ains estima que plustost il en deuoit faire poursuyte, à fin que ne se trouuant le Prince au iugement du proces, pource qu'il festoit fait Aduocat, les Senateurs & Cheualiers peussēt faire le deuoir de leur estat, chose qui estoit biē conuenāte à la Republique. Gallus pource que Piso auoit preoccupé ceste apparence de liberté, disoit au contraire que rien n'estoit excellent, ou digne du peuple Romain, sinon ce qui estoit fait en la presence de l'Empereur, & pource que l'assemblée de toute l'Italie & des Prouinces deuoit estre reseruee à sa presence. Ces choses furent debatues d'un costé & d'autre avec grandes contentions, oyant le tout Tibere, & se taisant. Finablement elles furent differees.

Il y sourdit vn autre debat entre Gallus & Tibere: car Gallus vouloit que les Comices & assemblees qui se faisoient pour créer les magistrats, se feissent de cinq ans en cinq ans: & vouloit aussi que les Ambassadeurs des legions qui auoient ceste charge en guerre auāt qu'auoir esté Preteurs, fussent deslors destineez pour l'estre: & que par chacun an le Prince presentast douze candidats ou poursuyuans. Il n'y auoit point de doute que cest aduis ne penetraſt bien auant, & que par ce moyen les secrets de l'Empire estoient tentez. Tibere toutesfois, comme si on eut voulu donner quelque charge nouuelle à sa puissance, remōstroit que c'estoit griefue chose & ennuieuse à sa modestie d'en nommer vn si grand nombre, & leur donner vn si long delay. Remonstroit aussi que quand les comices se faisoient par chacun an, à peine

LE II. LIVRE DES ANNALES

pouuoit on garder que quelques vns se mesconté-
 fissent, iacoit ce qu'ils eussent quelque consolation &
 esperance en l'annee prochaine. Qu'elle haine donc
 (disoit-il) me porteront ceux qui seront remis a plus
 de cinq ans apres? Cōment pourra l'on cognoistre en
 si long-temps, quelle volūtē, quelle maison, & quelle
 fortune aura vn chacun d'eux? S'ils se mescognois-
 sent, & deuient orgueilleux, estant designez pour
 vne seule annee, que feront ils voyans par cinq ans
 leur Magistrat estre continué? Car par ce moyen les
 Magistrats estoient prorogez entierement des cinq
 parts, les loix renuerſees, lesquelles auoient ordonnē
 certains termes aux cādids pour exercer leur indu-
 strie, & pour poursuyuir ou iouyr des dignitez par
 eux pretendues. Par ceste harangue, qui auoir quel-
 que apparence de deuoir estre bien recueillie, il con-
 ferma son Empire, & accreut le reuenu d'aucūs Sena-
 teurs. Au moyen dequoy l'on se ſemerueilla d'auanta-
 ge dequoy il auoit si mal pris la requeste que luy fai-
 soit en euidente pauureté M. Hortalus noble adole-
 scēt. Cestuy estoit petit fils de l'orateur Hortensius, &
 luy auoit Auguste par sa liberalité & par le moyen de
 dix fois sesterces qu'il luy donna, persuadé de prédre
 fēme, & faire des enfans, à fin q̄ ceste tāt noble famil-
 le ne fut estaincte. Ayant donc Hortalus fait renger
 ses quatre fils deuāt l'entree de la court, & iettant sa
 veue tantost sur l'effigie d'Hortensius mise au rēg des
 orateurs, & tantost sur celle d'Auguste (pource que le
 Senat estoit assemblé au palays) au lieu d'opiner &
 dire son aduis, va commencer tels propos.

*M. Hor-
 talus.*

*Ce sont
 25 mil es-
 cus.*

Peres

Peres Conſcrits, ie n'ay de mon gré & ſeul vou- *Harague de Hortensius.*
loir engendré ces enfans, deſquels vous voyez icy le
nôbre & la ieuneſſe, mais pource que le Prince m'en
poursuiuoit, & auſſi que mes anceſtres meritoient
d'auoir aucuns qui leurs ſuccedaſſent: car ie (qui
pour la mutation des temps ne pouuois receuoir ou
acquérir grans biens, faueur du peuple, ou eloquen-
ce, qui eſt le bien peculier de noſtre maiſon) me cō-
tentois pourueu que mon peu de bien ne cauſaſt à
moy quelque vergôgne, ou à autruy quelque faſche-
rie. Ainſi par le commandement de l'Empereur ie
vins à prédre femme. Voyla la race, voila la lignee de
tant de Conſuls & Dictateurs. Et ne viens à ramen-
teuoir ces choſes pour conciter malueillâce ou blaſ-
me à aucun, mais à fin de vous eſmouuoir à miſeri-
corde. Ils iouront, ô Ceſar, lors que tu floriras, des e-
ſtats que leurs auras donnez. Ce temps pendant deſ-
ſens de pauureté les arrierenepueux d'Hortensius, la
nourriture d'Auguſte. Tibere pource qu'il vit les Se-
nateurs y eſtre ia enclins & affectionnez, fut incité à
plus promptement y contredire, en telles paroles.

Si tous ceux qui ſont pauvres, commēcent à venir
icy, & demander argent pour leurs enfans, iamais ne *Reſponſe de Tibere.*
ſeront ſoullez ny ſatisfaits, & n'y pourra fournir la
Republique. Et certes noz prodeceſſeurs n'ôt permis
de laiſſer quelque fois la maniere qui eſtoit au con-
ſeil, & au lieu d'en donner aduis, traicter les matieres
concernantes le public: à fin que par ce moyen nous
peuſſions deuifer en ce lieu de noz affaires priuees,
& augmenter noſtre bien avec le blaſme du Senat &

LE II. LIVRE DES ANNALES

des Princes, soit qu'ils octroient ou refusent ce que l'on demâde: car cecy ne se doit appeller requeste ou priere, ains plustost vne demande importune, faicte hors saison, & à l'impourueu, se leuer icy lors que le Senat est en conseil pour autres affaires: & presser la modestie d'iceluy souz couleur d'un nombre de petits enfans, & mesmement faire à moy la mesme violence, & vouloir par maniere de dire rompre & forcer le thresor public: lequel si par ambition il est espuisé, faudra remplir par meschans moyens. O Hortalus, Auguste ta donné de l'argent, mais non par cōtraincte, n'y à la charge que cela continuast. Autrement n'y auroit homme qui vouldut s'employer à la besongne, & donneroit l'on occasion à tous de devenir paresseux, tellement que fils n'auoient quelque crainte de leurs personnes, ou quelque esperance, & sans aucun soing se reposoient sur l'ayde d'autrui, ils feroient pour eux inutiles, & pour nous chargeans & ennuyeux. Telles & semblables paroles (iaçoit ce qu'elles eussent esté ouyes & approuuees par ceux qui ont accoustumé de louer toutes choses faictes par les Princes, soient honnestes ou deshonestes) furerēt toutesfois de la pluspart receues en silēce, ou bien en secret murmure. Dequoy Tibere s'apperceut biē: au moyen dequoy s'estāt peu quelque espace de tēps, vint à dire qu'il auoit respondu à Hortalus, & toutesfois si le Senat le trouuoit bon, qu'il donneroit à vn chacun de ses enfans masses, deux cens grans Sesterces. Les autres l'en remercierent, mais Hortalus ne respondit aucun mot, fut par crainte, ou bien par ce qu'il

*ce sont
ving mil
seuts.*

qu'il retenoit encores en sa grande pauvreté, quelque chose de la noblesse de ses ancestres. Depuis Tibere n'eut aucune pitié d'eux, iacoit ce que la maison d'Hortensius tombast en honteuse pauvreté.

En ceste mesme annee la Republique s'en alloit en branle de discordes & guerres ciuiles, par l'audacieuse entreprise de ie ne sçay quel serf ou esclau, si l'on n'y eust remedié de bonne heure. Vn serf d'Agrippa *Clemens.*
 Posthume nommé Clemens, ayât sceu la mort d'Augu- *serf d'Agrippa*
 ste, delibera avec vn courage nō seruil, d'aller en l'Isle *Posthume.*
 Planasie, & là par force ou par finesse raur Agrippa *Planasie.*
 pour puis apres le porter à l'armee de Germanie. Mais *Isle.*
 ceste entreprinse fut rompuë par la tardiuete & trop
 longue demeure d'un nauire de marchâds: car ce tēps
 pendant Agrippa fut occis: au moyen dequoy aspirât
 à choses plus hautes & precipitees, il en desrobba les
 cendres, & se fait mener à Coram, qui est vn promon- *Corā promon-*
 toire d'Ethrurie, où il se cacha en lieux esgarez & in- *toire.*
 cogneus, iusques à ce que sa barbe & ses cheveux fus-
 sent deuenuz longs: car quant à l'aage & forme du
 corps il ne ressembloit pas mal à son seigneur. Cela
 fait, il sema vn bruit par gens attiltrez, & participans
 de son secret, qu'Agrippa estoit viuant, premieremēt
 par propos secrets, ainsi qu'on a accoustumé en cho-
 ses deffenduës: & soudain par vn bruit espandu es o-
 reilles promptes des plus fols & ignorans, ou des mu-
 tins, & pour ce cōuoiteux de choses nouuelles. Quāt
 à luy, il alloit par les petites villes quand venoit sur le
 soir, ne se monstrant en public que le moins qu'il
 pouuoit, n'y demourant long temps en vn mesme

LE II. LIVRE DES ANNALES

lieu. Mais cognoissant que la verité est confermee & renforcee par la veüe, & laps de temps, & au contraire les choses fausses par soudaineré & incertitude, il laissoit de foy quelque renommee, ou la preuenoit. Tandis le bruit courroit par toute l'Italie, cōme par la bonté des dieux Agrippa Posthume auoit esté sauué, & le croyoit l'on à Rome, tellement qu'estant arriué à Hostie plusieurs gens en faisoient feste, & se faisoient ja secretes assemblees à Rome, quand Tibere commença à deuenir fort perplex, à sçauoir mon fil deuoit employer la force de ses soldats pour chastier son serf, ou si avec le temps il deuoit laisser esuanouyr ceste vaine credulité. Tantost pensoit que nulle chose se deuoit mespriser, & tantost que l'on ne deuoit aussi auoir crainte de toutes choses : & estoit ainsi en suspens entre crainte & honte. Finablement il en donna la charge à Salustius Crispus : lequel ayant esleu deux de ses clients (aucuns disent qu'ils estoient soldats) leur suada, que faignans estre en crainte pour quelque forfait, ils se retirent vers ce rustre, & luy offrent quelque argent, luy promettans fidelité, & de ne fuir aucun peril pour l'amour de luy. Ces compagnons font soudain comme il leur estoit commandé. Parquoy l'espians vne nuit qu'il ne faisoit bon guet, & ayans pris gens pour les accompagner, le trainerēt au Palais, lié, & ayant la bouche estouppee. Et comme Tibere luy demanda en quelle sorte il estoit deuenu Agrippa ? Mais toy (respondit-il) comme es tu deuenu Cesar ? Au reste l'on ne peut tant faire qu'il encusast aucun de ses compagnons. Tibere n'osant le punir

*Salustius
Crispus.*

*Comme
es tu de-
uenu Co-
sar ?*

punir publicquement, le feit tuer en l'endroit le plus secret du Palais, & emporter son corps en cachette.

Etiagoit que plusieurs de la maison du Prince tant Cheualiers que Senateurs fussent accusez de l'auoir aidé de biens & de conseil: si n'en feit il toutes fois aucune inquisition.

Sur la fin de ceste annee l'on edifiavn arceau aupres du temple de Saturne, pour ce que les enseignes perduës avec Varus, auoient esté recouuertes par la conduite de Germanicus, & par la bonne fortune de Tibere. Aussi fut sacré vn temple à Fortune pres le Tibre *Temple de Fortune.* és iardins que le Dictateur Cesar auoit laissé par testament au peuple Romain. Et fut dedié vn sacraire à la famille, des Iules, & vne effigie à Auguste. à Bouilles.

Estans Consuls C. Celiuss, & L. Pomponius, le septiesme des Calendes de Iuing, Germanicus Cesar triompha des Cherusciens, Cattes, Angriuariens, & de toutes autres natiōs qui habitēt iusques au fleuve d'Elbe. Là furent menees les despouilles, les captifs, avec les pourtraits & simulachres des montagnes, riuieres, & batailles. Ainsi ceste guerre estoit tenue pour acheuee, laquelle il estoit empesché de mettre à fin. La beauté de sa personne augmentoit le plaisir des regardans, aussi faisoit son char chargé de cinq de ses enfans. Mais ils auoient vne secrette crainte quād ils venoient à pēser cōme peu prospere auoir esté à son pere la faueur que le peuple luy auoit porté, & pareillemēt cōme son oncle Marcellus estāt fort biē voulu du peuple, leur auoir esté osté en sa fleur de jeunesse. Au *L'an troiesime de l'Empire de Tibere. Triumphe de Germanicus. Marcellus.*

LE II. LIVRE DES ANNALES

*Ce sont
environ
13. livres
2. sols 6.
deniers
tournois.*

*Archelaus. Cap
padoce.*

moyen de quoy estimoient l'amour du peuple estre de peu de duree, & infortuné. Au surplus Tibere distribua au peuple au nom de Germanicus trois cës petits Sesterces pour hõme, & se destina colleague & compagnon en son Consulat. Et toutesfois par cecy n'attingnit le point de la foy de vraye & sincere amitié, & tascha à se despeschier de ce ieune homme sous ombre de l'hõnorer, en bastissant les moyës, ou bien s'en aidant quand ils luy estoient offerts. Il y auoit ja cinq ans que malgré Tibere Archelaus iouyssoit du Royaume de Cappadoce. Or il estoit fort mal voulu de Tibere, pour ce qu'il n'auoit fait son deuoir de l'hõnorer quand il estoit à Rhodes. Ce qu'Archelaus n'auoit obmis pour orgueil qui fust en luy, mais pour ce qu'il en auoit esté admonesté par les familiers d'Auguste: car florissant C. Cesar, & estant enuoyé pour les affaires de l'Orient, l'on pensoit qu'il ne fust pas trop seur, estre des familiers de Tibere. Mais apres qu'estât la lignee des Cefars renuersee, il se fut emparé de l'Empire, il tascha de faire venir Archelaus à soy par le moyen des lettres de sa mere: laquelle ne dissimulant en rien que son fils se sentoist offensé de luy, luy offroit neantmoins toute douceur & clémence, moyennant qu'il vint à s'humilier & le prier. Archelaus ne se doutant de tromperie, ou craignant (s'il faisoit semblant de l'entendre) que l'on n'allast cõtre luy à main forte, prit son chemin droit à Rome: où estant rigoureusement receu du Prince, & incontinent accusé au Senat mourut, ou de sa volonté, ou pour ce que son heure estoit venuë, non point pour ses crimes, car ils estoient

controu-

controuuez, mais ou par ennuy & falcherie, ou par ce qu'il estoit ia vieil & cassé, ou bien pource qu'aux Roys non seulement les choses basses & infimes, mais aussi les iustes & tolerables semblent nouuelles & inusitees. Le Royaume fut reduit en Prouince. Et ayant remonstré l'Empereur que des fruits d'iceluy l'on pourroit bien leuer vne centiesme partie, ordonna que d'oresnauant on en leueroit vne du centiesme seulement.

En ce mesme temps, comme Antiochus Roy des Comageniens, & Philopator Roy des Ciliciens fussent allez de vie à trespas, ces nations estoient en voye de faire des troubles, pource qu'aucuns demandoient à estre gouuernez par les Roys, & les autres par les Romains. D'auantage les Prouinces de Syrie & de Iudee se sentans trop foutees de charges, demandoient que leurs impositions leurs fussent rabaissees. Parquoy Tibere mit ces choses, & ce que i'ay dit cy dessus d'Armenie, en auant au Senat, remonstrât que les tumultes de l'Orient ne pouuoient estre appeaisez que par la prudence de Germanicus: Car quât à moy (disoit-il) ie suis ia fort vieil, & Drusus est encor trop ieune. Lors le Senat decerna à Germanicus toutes les Prouinces que la mer separe, & luy fut beaucoup plus donné de puissance & souueraineté par toutes celles ou il alloit, qu'à ceux qui par sort, ou enuoyez du Prince, les obtenoient. Or Tibere auant esté le gouuernement de Syrie à Creticus Sillanus (allié par affinité avec Germanicus, pource que sa fille estoit accordée à Nero, aîné des enfans de Germanicus) & au

Antiochus, Comageniens Philopator, Ciliciens.

Syrie. Iudee.

LE II. LIVRE DES ANNALES

Cn. Piso. lieu de Sillanus y auoit estably Cn. Piso, hōme impetueux, & qui n'eut enduré d'homme viuant, tenant
Piso. naturellemēt ceste arrogance de son pere Piso, lequel
Brutus. durant les guerres ciuiles ayda tant qu'il peult les parties
Cassius. qui reprenoient cœur en Aphrique à l'encōtre de Cesar, & ayāt depuis suiuy le party de Brutus & Cassius, eut sauſconduit pour retourner à Rome, ou il s'abstint de pourchasser aucuns estats publiques, iusques à ce qu'il fut poursuyui d'accepter le Consulat que luy offroit Auguste. Or outre ceste arrogance naturelle qu'auoit Piso, il estoit aussi incité d'auantage tant à cause de sa noblesse, que des grands biens de sa femme Plancina: de sorte qu'à peine vouloit il ceder
Plancina femme de Piso. à Tibere, tenant peu de compte des enfans d'iceluy, comme beaucoup moindres & inferieurs à soy. D'auantage il cognoissoit bien qu'il auoit esté esleu gouuerneur de Syrie pour reprimer les entreprises de Germanicus. Et ont aucuns eu opinion que Tibere luy auoit donné quelques charges en secrez, & que l'Imperatrix auoit mis en teste à Plâcina de tousiours debatre & se formaliser contre Agrippina: car du reste toute la Court estoit diuisee, les vns fauorisans secretemēt à Drusus, & les autres à Germanicus. Tibere soustenoit Drusus comme sien propre, & procréé de son sang: mais le peu de bien qu'il vouloit à Germanicus, faisoit que l'amour des autres enuers luy estoit augmenté & pource aussi que du costé maternel il estoit exalté de sang plus noble, ayant M. Antonius pour son ayeul, & Auguste pour son oncle. Au contraire sembloit que Pōponius Atticus, Cheualier Ro-

main,

main, & bifayeul de Drusus, ne respondit aucunemēt à la noblesse des Claudiens. Pareillement Agrippina femme de Germanicus, estoit plus excellente en fecūdité & bōne renommee que Liuia femme de Drusus. Ce nonobstant les deux freres ne laissoient à fort sentreaymer, & ne pouuoiet estre esmeuz à sentrehayr par les debats & emulations de leurs prochains.

Liuia femme de Drusus.

Peu de temps apres Drusus fut enuoyé en Esclauonie, à fin qu'il saccoustumast à la guerre, & gaignast le cœur des gens d'armes, ioint que Tibere auoit opinion que ce ieune hōme ia plongé és delices de la ville, se feroit biē mieux dedans vn camp, & seroit de sa part plus asséuré ayant ses deux enfans chefs & capitaines des legions. Toutesfois il faignoit que ce fut à cause des Souaues qui demandoient ayde contre les Cherusciens: car voyans les gens de ces pays qu'ils estoient hors du danger des guerres des estrangers à cause des Romains qui en estoient deslogez, ils tournerent leurs armes à l'encōtre deux mesmes, pource que telle est leur coustume: mais lors principalement ils le feirēt pour la gloire. La force de ces deux natiōs, & vertu des Capitaines, estoiet esgales: sinō que Maroboduus estoit mal voulu du peuple, à cause du nō de Roy, qui leur estoit odieux: & Arminius combatāt pour la liberré, estoit fauorisé: parquoy non seulement les Cherusciens leurs alliez, & les anciens soldats d'Arminius entreprindrēt ceste guerre pour luy, mais aussi se rendirēt de son party quelques Souaues, Sēnon, & Lombards, qui estoient du Royaume de Maroboduus, lesquels ioints avec Arminius le rendoiēt plus

Les Souaues demandent ayde aux Romains contre les Cherusciens.

Maroboduus. Arminius.

Souaues Sēnon Lombards.

LE II. LIVRE DES ANNALES

Inguiomere.

fort, sans Inguiomerus, lequel avec vne cōpagnie de ses cliens & vassaux se tourna du costé de Maroboduus, non pour autre cause sinon qu'estant vieil, il luy faschoit d'obeyr à son nepueu fils de son frere, qui estoit vn ieune homme. Donques ils dresserent leurs batailles, ayans des deux costez vne mesme esperance, sans faire courses çà ne là, ou se separer en petites bendes, comme ils auoient anciennement accoustumé : Car pour la longue guerre que nous leur auions menee, ils auoient appris à suyure leurs enseignes, se renforcer d'aydes, & obeyr à leurs Capitaines. Lors Arminius faisant reueue de son armee, monté sur vn cheual, remōstroit à tous ceux lesquels il approchoit, la liberté recouuerre, & les legiōs saccagees : mesmes monstroit les despouilles & bastons ostez par force aux Romains, qui estoient es mains de plusieurs de ses soldats. Au contraire appelloit Maroboduus fuyant, sans experience de guerre : lequel n'ayant eu autre deffence que les cachettes de la forest Hercine, auoit incontinent apres par dons & par ambassades demandé l'alliance des Romains, l'appelloit trahistre de son pays, satellite de Cesar, & qu'il le failloit chasser avec non moindre violence & force, qu'ils auoient occis Quintilius Varus. Et pource qu'ils eussent memoire de tant de combats, par l'ysue desquels (ayans en fin chassé les Romains de leurs pays) ils auoient assez donné à cognoistre qui auoit eu du meilleur en ceste guerre.

C'est la forest noire.

Maroboduus de son costé n'en faisoit pas moins, fut à louer soy mesme, ou à mal dire de son ennemy.

Et

Et tenant Inguiomerus , remonstroit qu'en ce corps consistoit tout l'honneur des Cherusciens, & que tout ce dont iusques icy ils auoient eu bonne yssue, auoit esté entrepris par le conseil d'iceluy . Qu'Arminius estoit vn homme de peu de sens, & sans experience, lequel tournoit sur soy, & s'attribuoit la gloire d'autrui pour autant qu'il auoit deceu trois legions avec leur Capitaine, qui ne se doutoient de sa tromperie, & ce avec la grande perte de l'Allemagne , & à son grand deshonneur , attendu que sa femme & son fils en estoient encor en seruitude. Mais quant à luy, encores qu'il fust assailly par douze legions conduites par Tibere, si auoit il gardé l'honneur des Allemans immaculé, & s'estoient les deux armées retirees sous conditions honnestes . Au reste qu'il ne se repentoit de quoy il estoit encore en leur election de faire la guerre aux Romains , ou accepter la paix sans effusion de sang.

Estans les deux osts animez par ces paroles , ils auoient encores d'autres causes peculieres qui les enflammoient d'auantage : car les Cherusciens & Langobards combattoient pour leur honneur ancien, ou pour la recente liberté: & au contraire les autres pour accroistre leur dominatiō. Iamais l'on auoit veu deux si puissantes armées s'entrecourir sus , ny avec yssue plus douteuse, estans les cornes dextres rompuës tant d'vn costé que d'autre. Et auoient esperance de recommencer le combat , si Maroboduus n'eust retiré son camp dedans les montagnes. Cela môstra qu'il auoit peur. Et estant desnudé petit à petit de ceux qui alloiēt

LE II. LIVRE DES ANNALES

*Marco-
mannes.*

prédre le party des ennemis, se retira au pays des Marcomannes, & enuoya Ambassadeurs à Tibere, pour le prier de luy donner secours: mais il luy fut respondu, qu'il n'auoit nul droit de demander secours aux Romains contre les Cherusciens, attendu qu'il n'auoit donné aucune aide aux Romains durât qu'ils faisoient la guerre contre le mesme ennemy. Toutesfois (comme nous auons ja dit) Drusus y fut enuoyé pour confier la paix.

*Douze
villes
d'Asie
reuerſées
par le tré-
blement
de terre.*

En cest an mesme douze des plus renommées villes d'Asie furent ruinees par vn tremblement de terre qui suruint la nuit, au moyen dequoy le dommage fut d'autant plus grand que moins l'on s'en donnoit de garde. Mesmes ils ne pouuoient s'aider du remede accoustumé en tels accidens, ny se sauuer és lieux decouverts, pour ce que s'ouurant la terre, elle les engloutissoit. L'on raconte que lors on vit les grandes montagnes en vn instant applanies, & les plaines & campagnes eleuees en hautes montagnes, & que durant ce tremblement l'on auoit veu luire de grands feus. L'on eut entre autres grâde compassion des Sardiens, pour auoir esté merueilleusement endomma-

Sardiens.

*Ce sont
deux cens
cinquan-
te mil es-
cuz.
Magne-
siens.
Sypile.*

gez de ceste destruction & degast. Mesmement Tibere leur ayant promis cent fois Sesterces, leur remist aussi pour cinq ans ce qu'ils estoient tenus fournir au thresor public, & au fisc. Les Magnesiens de Sypile, ayans receu vn quasi pareil dommage, furent aussi secourus quasi en la mesme sorte. L'on fut d'aduis de remettre les tributs pour quelque temps aux Temniés, Philadelphiés, Egeates, Apolloniés, & ceux qu'on

appelle

appelle Mosceniés, ou Macedoniés d'Hircanie. Pareil
 lement à ceux de Hierocésaree, de Myrine, de Cyme, *Temniés.*
 & de Tmolus. Et que l'on enuoyeroit aucuns du Se- *Philadel-*
 nat pour veoir ce qui estoit aduenü, & y donner or- *phiens.*
 dre. M. Alerus y fut commis, & pris du nombre de *Ageates*
 ceux qui auoient esté autresfois Preteurs, afin que si *Apollo.*
 d'aventure vn de ceux qui autresfois auoyent esté *Mosceni-*
 Consuls, venoit à estre gouuerneur de la prouince *ens, Mace-*
 d'Asie, il n'y eüst quelque emulation entr'eux. Le voy- *doniens,*
 ans esgaulx, & que par ce moyen la besongne fust re- *Hircanie,*
 tardée. Cesar aussi augmenta la magnifique largesse *Hierocés-*
 qui se faisoit au peuple. Mais il ne fit vnë moins ag- *saree.*
 gréable liberalité, quād il dōna les biens d'Emilia Mu- *Myrine.*
 sa riche femme (qui estoit morte sans faire testamēt) *Cyme.*
 lesquels on vouloit appliquer au fisc, à Emilius Lepi- *Tmolus.*
 dus, lequel on estimoit estre de la famille d'elle. Pareil- *M. Alex-*
 lement quād il dōna l'heredité de Patuleius Cheualier *andus.*
 Romain (iaçoit ce qu'il eüst esté institué heritier en *Emilia*
 partie) à M. Seruilius, lequel il auoit cogneu estre insti- *Musa.*
 tué heritier par le premier testamēt nullemēt suspect: *Emilius*
 ayāt prealablement remōstré qu'il estoit hōneste d'ai- *Lepidus.*
 der d'argēt la noblesse de ces deux psonnages. Mes- *Patuleius*
 mes iamaïs ne se porta heritier de persōne, q'il ne l'eüst *M. Serui-*
 merité par sō amitié. Si quelq̃ hōme incogneu ou hay *lius.*
 des autres, l'instituoit pour ceste cause son heritier, il
 reiettoit telle heredité. Au reste tout ainsi qu'il soula- *Vibidius.*
 geoit l'hōneste pauureté des gēs de bien, tout ainsi il *Varro.*
 depōsa du Senat, ou permist de s'en desmettre à Vibi- *Marinus*
 dius Varro, Marius Nepos, Appius Appianus, Cor- *Nepos.*
 nelius Silla, & Q. Vitellius, gens prodigues, & qui *Appius*
 tellans. *Appia-*
nus.
Corn.
Sylla.
Q. Vi-
tellus.

LE II. LIVRE DES ANNALES

pour leur mauuaise vie estoient tombez en indigence.

Aulus Postumius
Flora.
Lucius & Marcus Publiciens.
C. Duilius
Attilius

En ce mesme temps les temples des dieux (lesquels ruinez par feu ou par trop grande ancienneté auoient esté commencez par Auguste) furent par luy dediez à Bacchus, à Proserpine, & à Ceres: lesquels Aulus Postumius Dictateur auoit vouez. Il dedia aussi en ce mesme lieu le temple de Flora, lequel auoit esté ordonné par Lucius & Marcus Publiciens, lors Ediles. Pareillement le temple de Ianus, lequel auoit esté construit pres le marché aux herbes par C. Duilius. Cestuy fut le premier des Romains qui batailla heureusement sur la mer, & merita vn triomphe naual des Aphricains. Le temple d'Esperance fut aussi consacré par Germanicus, lequel en la mesme guerre nauale auoit esté voué par Attilius.

Apuleia Varilia

Ce temps pendant la loy de Maïesté venoit en regne: mesmes l'accusateur poursuiuoit du crime de Maïesté Apuleia Varilia niepce de la seur d'Auguste, luy mettât sus que par paroles iniurieuses elle s'estoit mocquée d'Auguste, de Tibere, & de sa mere: & que estant coniointe avec Cesar, elle auoit commis adultere. Quant au crime d'adultere, l'on fut d'aduís que la loy Iulie y auoit assez pourueu: mais Tibere requist que le crime de Maïesté fust distingué: disant que ceux qui parleroient irreueremment d'Auguste, fussent puniz, toutesfois qu'il ne vouloit qu'on fist cas de ce que l'on diroit de luy. Et comme le Consul luy demandast qu'il vouloit estre ordonné de ce qu'elle estoit accusée d'auoir parlé de sa mere autrement que bien,

bien, il ne respondit mot. Depuis le iour prochain qu'on tint Senat, il requist au nom de sa mere, que les propos tenus d'elle, en quelque sorte que ce fut, ne fussent aucunement tournez à crime: & absolut Apuleia du crime de Maiesté: requerant d'auantage qu'elle ne fut trop griefuement punie de son adultere, & que suyuant la maniere de faire des predecesseurs, elle fut seulement eslongnee de ses parens plus de deux cēs mil pas. Pareillement son adultere Manlius fut banny d'Italie & d'Aphrique.

Manlius.

Après cecy il sourdit vn debat pour subroger vn preteur au lieu de Vipfanius Gallus, qui estoit allé de vie à trespas. Germanicus & Drusus (lesquels estoient encor pour lors à Rome) faisoient pour **Haterius Agrippa** proche parent de Germanicus: les autres au contraire vouloient que suyuant les loix, ceux des cādidsats fussent preferez qui auroiēt le plus d'enfans. Tibere se resiouissoit voyant le Senat disputer entre la loy & ses enfans. Et veritablement la loy fut vaincue, mais ce ne fut pas aisēement, ny avec moyen nombre de voix, & ainli mesmes qu'anciēnement elles estoient vaincues, mesmes au temps qu'elles florifsoient.

Vipfanius Gallus. Brigue pour eslire vn preteur.

En l'an mesme la guerre commença en Aphrique estāt Tacfarinas Capitaine des ennemis. Cestuy estoit Numidien de natiō, & auoit esté au cāp des Romains, souldoyé avec les auxiliaires. Depuis laissant leur party, commença premierement à faire vn amas de gens vagabonds & accoustumez à brigāder, pour piller & resrober ce qu'il pourroit. Consequemment

Tacfarinas. Numidien.

LE II. LIVRE DES ANNALES

à la façon de la guerre il les diuisa souz enseignes, & par bandes: & en fin fut tenu non cōme conducteur de ceste confuse multitude, mais comme Duc & Capitaine des Musulans. Ceste natiō est fort robuste, & prochaine des deserts d'Aphrique, laquelle n'ayant encor pour lors aucunes villes pour habiter, prist les armes, & s'accointa en ceste guerre des Maures, qui estoient voisins, & desquels Mazippa estoit chef. Et fut ceste armee separee en sorte que Tacfarinas deuoit tenir dedans le camp les gens d'elite, & armez à la façō des Romains, & les accoustumer à la discipline militaire, & à obeyr aux commandemens des Capitaines. Et Mazippa avec gens armez à la legiere deuoit espouuenter le pays, & mettre tout à feu & à sang. Ils auoient aussi contrainct les Cinithiens, qui est vne assez puissante nation, d'entreprendre les choses mesmes, quand Furius Camillus proconsul d'Aphrique, ayant assemblé vne legion avec ce qui estoit souz les enseignes des alliez, mena ceste compagnie (petite certes au regard de la multitude des Maures & Numidiens) pour combattre ses ennemis. Et sur tout se donoit de garde que par quelque ruse ils n'eussent le combat. Au moyen dequoy leur donnāt quelque esperance de victoire, les mit au point par lequel ils furent vaincus. Furius doncques mit sa legion au milieu, & feit ses cornes des deux ailles & des cheuaux legiers. Tacfarinas de son costé ne refusa la bataille. Ainsi les Numidiens furent rōpus, & le nom des Furiens recouura l'ors l'honneur de la guerre, lequel auoit esté long-temps enseuely: car depuis ce

Camille

*Musulā,
Plinē les
appelle
Musulās.*

*Maures.
Mazippa.
p^a.*

Cinithiens

*Furius
Camillus.*

Camille qui auoit rescoux de la ville de Rome, & l'autre Camille son fils, l'honneur de Capitaine & chef d'armee auoit tousiours esté pardeuers les autres familles: qui plus est, l'on pensoit celuy duquel nous parlons, n'auoir aucune experience en la guerre: au moyé dequoy Tibere en fut plus enclin à racompter ses gestes au Senat, par lequel les enseignes du triôphe luy furent decernees: ce qui ne porta aucun dommage à Camille, à cause de sa modestie.

L'annee ensuiuant Tibere fut Consul pour la troisieme fois, & Germanicus pour la seconde. Mais Germanicus commença à exercer cest estat à Nicopolis ville d'Achaie, en laquelle il estoit arriué suiuant la coste d'Esclauonie, apres auoir visité son frere Drusus qui faisoit sa residéce en Dalmatie, ayant eu la tormente premieremēt en la mer Hadriatique, & depuis en l'Ionique. Ainsi doncques il employa quelques iours à faire radoubier ses vaisseaux, & à visiter les riuages tant renomméz par la victoire Actiaque, ensemble les despouilles consacrees par Auguste, & le lieu ou auoit esté le camp d'Antonius, le tout avec vne recordation de ses ancestres & predecesseurs: car comme i'ay dit, Auguste estoit son grand oncle, & Antonius son ayeul: au moyen dequoy se representa deuant luy vne merueilleuse imagination de choses tristes, & ioyeuses.

De là il vint à Athenes, & donna permission à ceste cité d'auoir vn licteur, tant à cause de son ancienneté, que pource qu'elle estoit confederée. Les Grecs le recueillirent avec honneurs singuliers &

LE II. LIVRE DES ANNALES

exquis, mettans en auant les faicts & dits anciens de leurs predecesseurs, à fin que leur flatterie eust plus d'autorité. D'Athenes arriua à Eubee, & trauersâ outre iusques à Lesbos, ou Agrippina pour sa derniere portee accoucha de Iulia.

*Eubee.
Lesbos.*

Consequemment visita les limites d'Asie, visita Perinthe & Bizance villes de Thrace. Apres entra és destroits de Propontide, & en la bouche de la mer Pontique, conuoiteux de veoir ces lieux anciens & celebres par la renommee. Et ce faisant soulageoit & remettoit en nature les prouinces lasses & foullees par debats & guerres intestines, ou par les torts & iniures des Magistrats. Aussi comme il taschast & eust enuie de veoir à son retour les sacrifices & ceremonies des Samothraces, & autres choses dignes de memoire, tant pour la mutation de la fortune, que pour ce que nostre origine en est aussi venue, il fut repoussé par les vents de Bise, lesquels il eut contraires. Depuis il repassa par Asie, & vint à Colophone, à fin d'interroger l'Oracle d'Apollo Clarius. Or là il n'y a vne femme, comme en Delphes, mais l'on a coustume d'esslire vn prestre, lequel est choisi en certaines familles, & le plus souuent de Milete, lequel oit seulement le nom & le nombre de ceux qui viennent demander conseil. Lors descendant en vne cauerne basse, & ayant beu de l'eau d'une fontaine secrette, rend ses responses en vers composez sur les choses que ceux qui viennent au conseil, ont pourpensees, iacoit ce que tel prestre soit le plus souuent ignorant & de lettres & de vers. Le bruit estoit que par paroles obscures & ambiguës

Perinthe.

*Byzance,
c'est Constantinople.*

Samothracas.

*Colophone.
Apollo
Clarius.*

Milete.

ambiguës (comme est la coustume des Oracles) il auoit annoncé à Germanicus que sa mort estoit prochaine. *Ambi-
guité des
Oracles.*

Mais Cn. Piso pour plustost mettre à execution ce qu'il auoit deliberé, vint par paroles cruelles & outrageuses à blasmer la cité d'Athenes (laquelle j'ai auoit auparauant espouuentee par son marcher terrible) taxant obliquement Germanicus pour auoir contre l'honneur du nom Romain vsé de trop de courtoisie non enuers les Atheniens (lesquels par tant de pertes & deffaites auoient esté esteints & aboliz) mais enuers ie ne sçay quelles gens ramassez de toutes natiōs: que tous auoient esté compagnons de Mithridates quand il faisoit la guerre contre Sylla, & d'Antonius contre Auguste. Il leur reprochoit aussi les choses anciennes, comme celles qu'infortuneement ils auoient entreprises contre les Macedoniens: & la rigueur de laquelle ils auoient vsé enuers leurs gens melmes. D'auantage il auoit vne haine peculiere contre ceste cité, pour ce qu'à sa priere ils n'auoient voulu sauuer vn quidam nommé Theophile, qui par les Arcopagites auoit esté condamné de fausseté. Ce fait, passant avec diligente nauigation par les Isles Cyclades, & cherchant les adresses de la mer, ataignit Germanicus en l'Isle de Rhodes, lequel n'ignoroit point les propos que Piso auoit tenus contre luy: mais il estoit si debonnaire, que s'estant leué vne tempeste, qui auoit ietté les vaisseaux de son ennemy par les rochers & lieux desuoyez de la mer (de sorte que la perte de luy eust peu facilement estre imputee à la fortune) il

Cn. Piso;

*Theophi-
le. Arcopagites.
Isles Cy-
clades.*

LE II. LIVRE DES ANNALES

enuoya ce neantmoins quelques galeres, par l'aide
desquelles Piso fut tiré hors de ce danger. Dequoy
n'estant Piso aucunement appaisé ny adoucy, & n'ay-
ant à peine eu la patience d'attendre vn iour, laissa là
Germanicus: vint gagner la prouince deuant luy.
Quand il fut arriué en Syrie, & se veit pres des le-
gions, il commença par largesse & ambition aider aux
plus petits des Manipulaires, & à oster les anciens
Centeniers & plus seueres Tribuns de leurs places,
pour les donner à ses vassaux & clients, & à quelques
vns des plus meschans: laissant ceux des villes viure à
leur plaisir, & les soldats oiseux dedans le camp leur
permettoit de courir & follastrer parmy les champs:
quoy faisant les corrompit de telle sorte, que vulgai-
rement il estoit appellé pere des legions. Mesmes
Plancina ne se contentoit és limites des choses bien-
seantes aux femmes: ains se trouuant és lieux où les
gens de cheual s'exercitoient, & aux ioustes & tour-
nois des cohortes, ne s'abstenoit d'outrager de paro-
les Germanicus & Agrippina: & mesmes y auoit quel-
ques soldats des plus gens de bien, qui se monstroiet
pröpts à obeyr à sa meschanceté, pour ce que secret-
temét le bruit couroit cela ne se faire sans l'adueu du
Prince: ce que Germanicus n'ignoroit point, mais le
plus de son soucy estoit d'aller gagner l'Armenie. Ce
ste nation de toute ancienneté s'est tousiours mon-
stree neutre & incertaine, non seulement d'affection,
mais aussi pour la situation des terres: car l'assiette en
est telle, qu'entrât bien auant dedás plusieurs de noz
prouinces, elle se continue iusques au pays de Medic.

ARMENIE.

Au

Au moyé de quoy estât ce peuple separé de plusieurs Royaumes & gouuernemens qui sont entre deux, est aussi le plus souuent en guerres & dissensions, tât pour la haine qu'il a aux Romains, que pour l'enuie qu'il porte aux Parthes. Pour lors il n'auoient point de Roy, estant Vononés desmis. Mais la faueur des gens du pays finclinoit fort sur Zenon fils de Polemō Roy Zenon fils de Polemon Roy de Pont. de Pont, pour ce qu'imitant dès son ieune aage leurs mœurs & façons d'habits, allant à la chasse, banquetant, & s'addonnant aux autres choses esquelles ces gens barbares prennēt plaisir, il auoit gaigné le cuer tant du peuple que des grands seigneurs. Parquoy Germanicus estant en la ville d'Artaxate, Artaxate mist (du consentement des nobles, & estant la multitude à l'entour) l'enseigne Royale dessus le chef de Zenon. Les autres voulans faire honneur à leur Roy, le salüans l'appelloient Artaxias, luy ayans imposé ce nom de Artaxias celui de leur cité.

Les Cappadociens reduits en forme de prouince, Cappadociens. eurent pour Ambassadeur Q. Veranius. Plusieurs des Q. Veranius. tributs qu'ils auoient accoustumez de payer à leur Roy, leur furent diminuez, à fin de leur donner quelque esperance du doux traictement qui leur seroit fait par les Romains.

Q. Serueus fut fait gouuerneur des Commageniens, lors premierement reduits souz puissance de Q. Serueus Commageniens. Preteur.

Or comme par ce moyen toutes les affaires des alliez fussent mises en bō ordre, Germanicus n'estoit pourtant à son aise, à cause de l'orgueil de Piso,

LE II. LIVRE DES ANNALES

lequel ayant eu commandement de conduire luy
mesmes, ou enuoyer par son fils partie des legions en
Armenie, n'auoit fait conte n'y de l'un, n'y de l'autre.
Cyrr. Finablement luy & Germanicus se trouuerent & par-
lerent ensemble à Cyrr, ou la dixiesme legion faisoit
sa residence l'Hyuer. Piso auoit asseuré son visage, à
fin qu'il ne semblast craindre Germanicus: & Germa-
nicus en auoit faict autant de sa part, à fin de ne don-
ner quelque opinion qu'il menassast Piso, ioint (com-
me i'ay dit) que de sa nature il estoit assez debonnaire.
Mais ses amis & familiers duits & stilez pour allu-
mer inimitiez & offenses, mettoient sus à Piso cho-
ses vrayes, ausquelles ils en adioustoient de fausses,
blasmans & accusans en plusieurs sortes, luy, Planci-
na sa femme, & leurs enfans. Finablement ayant Ger-
manicus faict entrer aucuns de ses familiers en petit
nombre, commença à vser de paroles enuers Piso
telles qu'à accoustumé d'engendrer vn courroux cou-
uert & dissimulé. A quoy Piso respondit luy faisant
quelques requestes assez arrogantes. Ainsi ils se de-
partirent avec vne haine couuerte. Depuis ce temps
Piso ne se trouua gueres au Tribunal de Germanicus,
& si quelques fois il y assistoit, il se monstroient fier, ou-
trageux, & manifestement contraire à l'opinion d'i-
celuy. Mesmes comme quelques fois en vn banquet
Naba-
thees. que faisoit le Roy des Nabathees, l'on eust présenté
des couronnes d'or de grand pois à Germanicus &
Agrippina, & d'autres plus legeres à Piso, & autres
gens. L'on ouyt la voix de Piso disant que ce banquet
se faisoit à vn fils d'un Prince Romain, & non à vn fils
d'un

d'un Roy des Parthes. Lesquelles paroles dictes il ietta là sa couronne, & y adiousta plusieurs autres propos, blasmant la superfluité de ce banquet. Ces choses iajoit ce qu'elles fussent de fâcheuse digestion, furent toutesfois supportees par Germanicus.

En ces entrefaictes vindrent Ambassadeurs de la part d'Artabanus Roy de Parthe, lesquels il auoit en-
*Artaba-
nus.*
 uoyez pour remettre en memoire leur ancienne amitié & alliance, & pour remontrer l'enuie qu'il auoit de rafraischir ceste accointance, offrant à Germanicus, pour luy faire honneur, de pouuoir visiter sans danger toute la riuée d'Euphrates, requerant ce
*Euphrates.
Vonones.*
 pèdant que Vonones ne demourast en Sirie, ou qu'il ne luy fut permis de solliciter par messages, à guerres & à discordes les seigneurs des pays voisins. Quāt à l'alliance des Romains & des Parthes, Germanicus y feit vne magnifique responce: mais quant à la venue du Roy, & l'honneur qu'il auoit deliberé luy faire il en parla hōnestement & en grande modestie.
*Pompeio-
polis.*
 Au surplus Vonones fut entoyé à Pōpeiopolis ville de Cilicie prochaine de la mer. Ce qui fut fait non tant à la requeste d'Artabanus, qu'en despit de Piso, lequel portoit grande affection à Vonones pour plusieurs seruices & presens par lesquels il auoit gaigné Plancina.

Estans Consuls M. Sillanus & L. Norbanus, Germanicus voulut aller en Egypte, à fin de veoir les antiquitez du lieu: faignāt neātmoins que c'estoit pour reuisciter, & se dōner garde de la Prouince. Aussi ayāt fait faire ouuerture des greniers, fut cause que le
*L'an cin-
quiesme
de Tibere.
Germani-
cus en E-
gypte.*

LE II. LIVRE DES ANNALES

bled vint à marché: & feit plusieurs autres choses pour gagner la grace du peuple: comme d'aller nuds pieds par les rues sans garde de gēd'armes, s'habiller à la mode des Grecs; à l'imitation de P. Scipio, lequel on dit auoir fait le mesmes en Sicile, iacoit ce que la guerre contre les Aphricans fut encor bien aspre & enflammee.

*Alexā-
drie.*

Tibere ayant legerement taxé sa maniere de viure & ses habits, le reprit aigrement dont contre l'ordonnance d'Auguste il estoit entré en Alexandrie sans permission du Prince: car Auguste entre les autres secrets de sa domination auoit reserué l'Egypte & mise à part, deffendant à tous Senateurs & illustres Cheualiers Romains d'y entrer sans permissiō, pour ce qu'il craignoit que celuy qui voudroit avec garnison tant petite fut elle, s'emparer de ceste Prouince, & occuper tous les passages tant de la mer que de la terre à l'encontre des puissantes armées, n'affamast toute l'Italie.

*Canope.
Canopus.*

*Mene-
laus.*

*Hercu-
les d'E-
gypte.*

Mais Germanicus n'estant encor aduertý que son voyage estoit trouué mauuais, partant de la ville de Canope se faisoit conduire par le Nil. Ce Canope fut edifié par les Lacedemoniens en l'honneur de Canopus gouuerneur de leur nauire, lequel auoit là esté enseuely au temps que Menelaus retournant en Grece, fut poulsé en mer & region cōtraire, à sçauoir en Libye. La prochaine bouche du Nil que l'on trouue au partir de là, est sacree à Hercules: & tiennēt les gens du pays, que le plus ancien de ce nom à pris naissance en ceste contree, & que depuis ceux qui ont

ont esté douez de pareille force & vertu, ont emprunté ce nom de luy.

Au partir de là Germanicus visita les amples ruines & masures des anciennes Thebes, ou restoit *Thebes.* encores es murailles non entierement demolies, lettres Egyptiennes faisans mention de l'antique opulence de ceste cité. Et là comme il fut commandé à quelqu'un des plus anciens prestres d'interpreter ce que disoient ces lettres, en langage du pays: racontoit *Sept cens mil hommes portans armes de- dās Thebes.* qu'en ceste cité y auoit autrefois eu sept cens mil habitans, en aage de pouuoir porter armes, & aller à la guerre: qu'avec ceste armee le Roy Rhamfes auoit subiugué les pais de Libye, Ethiopie, Medie, Perse, la Bactriane, & la Scythie: qu'aussi il auoit tenu *Rhamfes.* souz sa domination les terres habitees des Suriens, Armeniens, & Cappadociens leurs voisins, la mer Bithynique d'un costé, & de l'autre la mer Lycie. On y lisoit aussi la quantité des tributs imposez aux nations, le poix d'or & d'argent, le nombre des armes, & des cheuaux, l'yuoire qu'elles deuoient donner pour les temples, les odeurs, la quantité de bleds, & de tous vtenfiles qu'estoit tenue fournir vne chacune d'icelles. Lesquelles choses pour lors n'estoient moins magnifiques, que celles que leur font aujourd'huy payer ou les Parthes par leur force, ou les Romains par leur puissance. Germanicus eut aussi en- *Singularitez de Thebes.* uie de veoir les autres singularitez & choses merueilleuses, entre lesquelles les principales estoient l'effigie *Effigie de Memnō.* de pierre de Memnon, laquelle frappee de rays du *Pyramides.*

LE II. LIVRE DES ANNALES

soleil, rendoit le son d'une voix. Pareillemēt les Pyramides aussi grandes que montagnes, edifiees par les Roys à l'enuy l'un de l'autre, pour monstrier leurs richesses, en lieux areneux & escartez, par lesquels à peine pouuoit l'on passer pour l'espeſſeur & multitude des ſables : pareillemēt des lacs, lesquels fosſoyez receuoient l'eau du Nil quand il ſe desbordoit, eſtoit en quelques endroits, & de telle profondeur qu'il eſtoit impoſſible d'en trouuer le fons. De là vint à Elephantine, & à Syēne, ou anciennement eſtoient les limites de l'Empire Romain, lequel au iourd'huy ſ'eſtend iuſques à la mer rouge.

*Elephantine.
Syene.*

Ainſi que Germanicus paſſoit là ſon eſté en viſitant pluſieurs prouinces : Druſus acquit gros hōneur en Germanie pour auoir mis les Allemās en diſcord, & fait qu'eſtant Maroboduus rompu, il fut pourſuiuy iuſques à eſtre entierement deſſait. Il y auoit entre les Gothons vn ieune homme nōmé Catualda, lequel autrefois par la force de Maroboduus auoit eſté cōtraint abandonner le pays : & lors voyant que la fortune luy baſtoit mal, auoit entrepris de ſe venger. Parquoy avec aſſez puisſante armee entra dedans le pays des Marcomānes, & ayant par corruption alié avec ſoy les principaux du pays, entra par force en la maiſon Royale, & gaigna le fort qui eſtoit aupres. Là il trouua les anciēnes proyes des Souaues, & quelques femmes de noz Prouinces qui auoient accouſtumé de ſuiure le camp pour faire la cuiſine ou blanchir le linge des gens de guerre. Y trouua auſſi quelques marchans, lesquels premierement pour le fait de leur

*Drusus
en Ger-
manie.*

*Gothons.
Catual-
da.*

*Marco-
mannes.*

de leur marchandise, depuis pour vne conuoitise d'ammasser de l'argent, & finablement par vne oubliance de leur pays, l'estoient (laissans leurs propres maisons) transportez en vne terre ennemie.

Se voyant donc Maroboduus abandonné de toutes parts, n'eut recours sinon à la misericorde de l'Empereur. Parquoy ayant trauersé la Danoe où elle passe par le pays Norique, escriuit à Tibere, non point en fugitif, ou en homme qui va aux requestes, mais comme ayant memoire de sa premiere fortune: allegant qu'encore qu'il eust esté inuité à l'amitié de plusieurs nations comme Roy autresfois tresrenommé, auoit neantmoins preferé l'amitié & alliance des Romains. Tibere luy fait responce, que s'il vouloit demourer en Italie, il y seroit honorablement traicté, & en asseurance: & toutesfois & quantes qu'il verroit luy estre meilleur & plus profitable, il s'en pourroit retourner au mesme saufconduit qu'il seroit venu.

Au surplus Tibere vint à remonstrer au Senat que iamais le peuple d'Athenes n'eut occasion de tât craindre Philippes, ny le peuple Romain Pyrrhus ou Antiochus, comme cestuy-cy. Et voit on encores vne de ses oraisons par laquelle loüant la hauteſſe & magnanimité de Maroboduus, & la puissance des nations à luy subiettes, il remontre aussi combien il estoit prochain ennemy de l'Italie, extollant par mesme moyen les conseils & entreprises qu'il auoit faictes pour ruiner vn tel personnage. Par ce moyen Maroboduus fut retenu à Rauenne, à fin que si les Souaues vouloient quelquesfois se rebequer & faire les facheux, on

LE II. LIVRE DES ANNALES

leur mist en barbe pour leur donner crainte de luy, comme estant prest à estre mis en son royaume. Toutesfois par l'espace de dixhuiet ans il ne sortit point d'Italie, & y deuint vieil, ayant beaucoup diminué de sa reputation pour s'estre monstré trop amy de sa vie.

Catualda eut vne pareille fortune, & le mesme recours: car estant tost apres chassé par la puissance des Hermunduriens (desquels Vibilius estoit Capitaine) il fut receu & enuoyé à Friol, qui est vne Colonie de la Gaule de Narbonne.

Les Barbares qui auoient accompaigné & l'un & l'autre, furent enuoyez habiter outre la Danoe, entre les riuieres de Mare & de Cuse, apres qu'on leur eut donné pour Roy vn Vannius, qui estoit du pays des Quades, & ce à fin que ces Barbares ne troublasent & feissent reuolter les nations paisibles, si d'aduanture ils fussent demourez parmy elles.

Estans en ce mesme temps les nouuelles venuës que Germanicus auoit créé Artaxias Roy d'Armenie, le Senat decerna que Germanicus & Drusus entreiroient en triomphe dedans Rome: & furent construits des arceaux aux costez du temple de Mars Vlateur, avec les effigies de ces deux Césars, estant Tibere beaucoup plus ioyeux d'auoir confermé la paix par sa prudence, que fil eut deffait ses ennemis en bataille.

*Rhescuporis.
Rhoemetaces.*

Parquoy il voulut aussi aborder Rhescuporis Roy de Thrace par finesse. Or Rhoemetaces auoit autresfois tenu tout ce pays, apres le trespas duquel

duquel Auguste en auoit baillé la moitié à Rhescuporis son frere, & l'autre moitié à Cotys son fils. Par ce partage Cotys eut pour son lot & portion les terres labourables, les villes, & ce qui estoit prochain de la Grece : & Rhescuporis eut le pays inhabité, desert, & prochain des ennemis : car aussi le naturel de ces deux Rois estoit diuers, estant Cotys doux, paisible & debonnaire, & l'autre au contraire, cruel, avaritieux, & ne pouuant endurer compaignon. Au commencement ils s'entretindrent en vne concorde faine & dissimulee : mais Rhescuporis n'arresta gueres qu'il n'entreprist sur les limites de Cotys, & vsurpast ce qui luy auoit esté donné. Si Cotys se mettoit en deuoir d'y resister, Rhescuporis y alloit à main forte : & au premier y procedoit assez lentement, pour ce qu'Auguste estoit encores viuant, & craignoit (pour autant qu'il auoit esté autheur des Royaumes de l'un & de l'autre) d'estre par luy chastié s'il faisoit quelque chose contre son intention. Mais depuis qu'il eut entendu le changement du Prince, il commença à y enuoyer grosses troupes de brigands abbatre les forteresses, & chercher les occasions de guerre. Or ce que Tibere craignoit le plus, estoit, que les choses paisibles ne vinssent à se troubler : au moyen dequoy despescha vn Centenier par deuers ces Rois, par lequel leur mandoit qu'ils n'eussent à proceder par armes. Ce qu'entendu par Cotys, renuoya incontinent le secours qu'il auoit appareillé. Au moyen dequoy Rhescuporis par vne faine modestie le pria qu'ils fassemblassent en quelque certain lieu,

LE II. LIVRE DES ANNALES

& que là ils pourtoient en parlementant transiger de leurs differens. Ainsi le temps, le lieu, les conditions furent incontinent accordees, pour ce que l'un par vne facilité, & l'autre par vne tromperie, accordoient aisément ce qu'ils demandoient l'un de l'autre. Rhescuporis, pour confermer ceste alliance (comme il disoit) prepara vn banquet: & comme ils eussent passé la pluspart de la nuit en ioye à boire & faire grand chere, il vint surprendre Cotys au despourueu, & le lia de chesnes: lequel ayant entendu ceste fraude, commença à adiurer & appeller en tesmoignage les choses sacrees du Royaume, les dieux d'une mesme famille, & les tables hospitalières. Rhescuporis apres festre fait entierement seigneur de la Thrace, escriuit à Tibere, que luy estant vne embusche dressée, il auoit preuenu son insidiateur. Et ce pendant faisoit nouuel amas de gens de pied & de cheual, faignant qu'il vouloit aller faire la guerre aux Baltarnes & Scythes. Tibere luy rescriuit assez doucement, que s'il n'y auoit point de fraude en son fait, il se pouuoit asseurer sur son innocence: qu'au reste il n'estoit possible à luy ou au Senat de discerner qui auoit le tort ou le droit, sans prendre cognoissance de cause: & pour ce qu'il estoit bon, qu'ayant premierement rendu Cotys, il vint pour se purger, & reietter sur sa partie aduersée le blâme & mauuaise opinion que l'on auoit de ce crime.

*Latinius
Pandus.*

Latinius Pandus (qui auoit charge comme Preteur de gouverner la Mesie) enuoya ces lettres en Thrace, avec quelques soldats, entre les mains desquels Cotys fut deliuré: mais Rhescuporis constitué entre crainte

&

& ire, faisant le long, & delayant le plus qu'il pouuoit, ayma mieux estre accusé d'auoir mis ceste meschanceté à execution, que de l'auoir seulement commencée : parquoy il feit tuer Cotys, donnant fausement à entendre que luy mesmes s'estoit deffait.

Ce neantmoins Tibere ne voulut chager les moyes par lesquels il auoit cōmencé d'y proceder, ains cōme Pandus fut allé de vie à trespas (lequel Rhescuporis disoit estre son ennemy) il feit pour ceste cause principalement Pomponius Flaccus vieil soldat gouuerneur de Mesie, pensant qu'il seroit propre à deceuoir Rhescuporis, pour la grande amitié qu'il auoit avec luy. Ainsi estat Flaccus passé en Thrace, & ayant par belles promesses persuadé à Rhescuporis (iaçoit ce qu'il en feit difficulté pour ses meschancetez qui luy reuenoient au deuant) d'entrer dedans les garnisons des Romains, on l'accompagna d'une bonne troupe de gens d'armes, souz vmbre de luy faire hōneur. Les Tribuns & Cēteniers par suasiōs & belles paroles (& d'autant que plus il s'elloignoit, luy donnans assez à entendre qu'il estoit souz garde, & finalement pource qu'il veit que c'estoit force) feirent tant qu'ils le tirerent à Rome. Là estant accusé au Senat par la femme de Cotys, il fut condamné à se tenir loing de son Royaume. La Thrace fut departie entre son fils Rhoemetalces (lequel on sçauoit certainement auoir resisté aux entreprises de son pere) & les enfans de Cotys. Et pource autant qu'ils n'estoiēt en aage suffisant, Trebellenus Rufus, qui autrefois auoit esté Preteur, fut ce pēdant cōmis pour gouuer-

Pomponius Flaccus.

Trebellenus Rufus.

LE II. LIVRE DES ANNALES

ner le Royaume à l'exēple de noz predecesseurs, lesquels auoient enuoyé M. Lepidus en Egypte pour estre tuteur des enfans de Ptolemee. Rhescuporis fut mené en Alexādrie, & là fut occis pour ce qu'il tascha à s'enfuir, ou bien on luy voulut faire à croire.

En ce mesme temps Vonones (lequel nous auons dit auoir esté confiné en Cilicie) ayant corrompu ses gardes, & faignant d'aller à la chasse, tascha de s'enfuyr en Armenie, delà aux Albanois & Heniochiens, & pardeuers son parent le Roy des Scythes. Ayant doneques laissé les lieux prochains de la mer, gaigna les plus desuoyables forests, d'ou auecques la bonté & viffesse de son cheual, il se transporta en peu de temps iusques au fleuue Pyramus. Or ceux du pays ayans entendu la fuite du Roy, auoiēt abbatu le pont: & qui fut encor pis pour luy, ce fleuue ne se pouuoit passer à gué. Au moyē de quoy estant attrapé pres le bort d'iceluy par Vibius Fronto, Remmius Euocatus, lequel auparauant auoit esté commis à la garde du Roy, comme par maniere de courroux luy passa l'espee au trauers du corps. Qui fut cause que plusieurs creurent qu'il auoit ainsi tué Vonones, stimulé de sa conscience, & craignant d'estre par luy accusé.

*Germanicus
retourne d'Egy-
pte.*

Mais Germanicus retournant d'Egypte, trouua que tout ce qu'il auoit ordonné aux legions, ou aux villes, estoit aboly, ou renuersé au cōtraire, de là vindrent les grosses paroles que tint Germanicus à Piso, & les entreprises de Piso nō moins griefues à l'encōtre de

tre de Germanicus. Ce fait, Pifo auoit delibéré se par-
tir de Surie, mais soudain il se raduifa, aduertý de la
maladie de Germanicus. Et ayât entêdu qu'il cōmen-
çoit à se mieux porter, & qu'o accomplissoit les veux
faits pour sa santé, il feit renuerfer par ses licteurs (ou
bedeaux) les hosties qui estoient là prestes, l'appareil
du sacrifice, & troubla tout le peuple d'Antioche qui
là estoit assemblé pour ceste feste. De là il alla en Se-
leucie, attendant l'issue de la maladie en laquelle
Germanicus estoit tombé de rechef: car la violence
d'icelle festoit augmentee pour la persuation qu'il
auoit d'estre empoisonné par Pifo. Et qu'il fut ainfi,
l'on trouuoit des ossemens & reliques de corps hu-
mains tirez de la terre ou des murailles ou ils auoient
esté mis. L'on trouuoit des charmes, des inuocations,
& le nom de Germanicus engraué en tables de plōb.
L'on trouuoit des cendres à demy bruslees, meslees
auecques du sang pourry, & plusieurs autres sor-
celleries, par lesquelles l'on croit les ames estre con-
sacrees aux dieux infernaux. D'auantage l'on ac-
cusoit quelques vns comme ayans esté enuoyez par
Pifo pour espier en quelle sorte Germanicus se por-
teroit.

*charmes
& sorcel-
leries.*

De tout cecy Germanicus ne se trouua moins cour-
roucé, qu'estonné, considerant quelle chose deuoit
aduenir à sa miserable femme, & à ses enfans encor
fort ieunes, si la porte estoit occupee par ses ennemis,
& luy contraint de rēdre son esprit deuât leurs yeux:
car Pifo (disoit-il) pource que les poisons luy sem-
blent trop lentes, se haste & met toute peine d'estre

LE II. LIVRE DES ANNALES

seul gouverneur de la prouince & des legions. Toutesfois l'on ne trouuera que Germanicus soit encor si recreu ou destitué, que le salaire de cest homicide demeure entre les mains du meurtrier. Et là dessus feit vne lettre par laquelle il renonçoit à l'amitié de Piso. Aucuns ont adiousté qu'il luy auoit aussi mädé qu'il eut à sortir de la Prouince: au moyen dequoy Piso sans autre delay desancra ses nauires, callant la voille, & moderant son cours, à fin de plustost estre de retour en Syrie, si par la mort de Germanicus le chemin luy eut par aduenture esté ouuert. Germanicus auoit repris quelque peu de cœur, mais depuis estant son corps affoibly, & voyant que sa fin approchoit, parla en ceste sorte à ses amis là presens.

*Harangue
de Ger-
manicus
à sa mort.*

Encor que ie mourusse de ma mort naturelle (ô amis) si aurois-ie iuste occasion de me plaindre, mesmes des dieux, pour m'auoir par vne mort trop hastee, & en ma grande ieunesse, rauy à mes parens, à mes enfans, & à mon pays. Mais maintenant que ie suis surpris par la meschanceté de Piso & de Plancina, ie laisse dedans voz cueurs mes dernieres prieres, à fin que vous rapportiez à mon pere & à mon frere par quelles inhumanitez deschiré, par quelle trahison circonuenu i'ay finy ma trop malheureuse vie par vne mort encor plus miserable. Si aucuns ont esté meus de mes esperâces, si aucuns par la prochaineté du sang, & mesmes si aucuns durât ma vie ont eu enuie contre moy, ie suis asseuré qu'ils ploreront apres qu'ils auront entendu qu'un personnage nagueres si florissant, & venu à chef de tant de batailles, est mort
par la

par la fraude & tromperie d'une femme. Certes (ô amis) vous aurez assez d'occasion de vous plaindre au Senat, & inuoker les loix: toutesfois ce n'est pas le principal deuoir des amis, de monstrier son affection enuers le defunct par complaints inutiles, mais de retenir en memoire son vouloir, & mettre ce qu'il aura enchargé, à execution. Au reste Germanicus sera ploré mesmes de ceux qui ne le cogneurent iamais. Quant à vous, j'ay esperance que vous me vengerez, si d'auenture vous ne portiez plus de faueur à ma fortune, qu'à ma personne mesme. Monstrez donc au peuple Romain la niepce de feu Auguste, & la femme de moy. Remonstrez le nombre de mes enfans, qui sont six: & ie suis asseuré que la misericorde sera du costé des accusateurs, & que les hommes ne croiront à ceux qui se voudront couvrir de quelques fauses & meschantes commissions: ou s'ils le croient, pour le moins ils ne leur pardonneront.

Ceste harangue acheuee, ses amis luy iurerent, touchas en sa main, que plustost ils mourroient qu'ils ne le végeassent. Et lors se retournant deuers sa femme, la pria par la memoire de luy, & par leurs communs enfans, qu'elle mit arriere toute fiereté & arrogance, & soubmist son courage à la cruauté de fortune, & que retournée à Rome, elle ne concitast les plus puissans cōtre elle par vne cōtention & debat de sa puissance. Ces choses furent dictes deuant tout le mode, & plusieurs autres en secret, par lesquelles sembloit qu'il monstroit auoir crainte de Tibere. Bien tost apres il trespassa, ploré & regretté de la Prouince, & peuples.

*Mort de
Germani-
cus.*

LE II. LIVRE DES ANNALES

*Comparai-
son de Ger-
manicus
avec A-
lexandre
le Grand.*

circonuoifins . Mesmes les Rois & nations estran-
ges en furent dolens, pour la grande courtoisie de la-
quelle il vsoit enuers ses ennemis, & pour sa douceur
& debonnaireté enuers ses ennemis. Ne se monstroit
moins venerable au veoir, qu'à l'ouyr : & retenoit la
grandeur & grauité de sa haute fortune , cuitant ne-
antmoins l'enuie & arrogance . Ses funerailles sans
pompes ny effigies, furēt rendues celebres par loüan-
ges, & par la memoire de ses vertus. Aucuns faisoient
comparaison de sa beauté, de son aage, & mesmes du
genre de sa mort (pour la prochaineté des lieux où
l'un & l'autre auoit rendu l'esprit) avec les destinees du
grand Alexandre : car estans & l'un & l'autre d'assez
belle corpulence, extraits de noble sang, & aagez seu-
lement d'environ trente ans, moururent en pays e-
stranger, par la trahison de leurs gens mesmes . Mais
que cestuy outre les perfectiones d'Alexandre, se mon-
strant debonnaire aux ennemis, & peu subiet à ses
plaisirs , auoit vescu content d'une femme & de cer-
tains enfans . Que toutesfois il n'estoit moins bon
guerroyeur que l'autre, iaçoit ce qu'il ne fust si teme-
raire, & ait esté empesché de reduire sous le ioug de
seruitude les Germanies ja rompues & esbranlees de
tant de batailles.

Que si seul il eust eu la souueraineté des choses , &
eust eue le nom & droit d'un Roy , il n'y a point de
doute que d'autant qu'il passoit Alexandre en dou-
ceur, temperance, & autres bōnes vertus, d'autant plu-
stost que luy il eust acquis grand bruit aux armes.

Auant qu'on l'enseuelist, son corps fut despouil-
lé nud

lé nud au marché d'Antioche, qui estoit le lieu destiné à la sepulture. Il n'est pas certain si l'on trouua quelques enseignes qui demonstassent qu'il eust esté empoisonné: car vn chacun l'interpretoit diuerfement, selon qu'il auoit compassion de Germanicus, & ceste suspicion ia imprimée: ou portoit faueur à Piso. Ce fait fut deliberé entre les Ambassadeurs & autres Senateurs qui estoient là presens, qui ils commettroient au gouuernement de Syrie. Et comme quelques vns poursuiussent cest estat assez froidement, il fut longuement debattu entre Vibius Marfus & Cn. Sentius. Finablement Marfus ceda à Sentius, comme au plus ancien, & pour ce aussi qu'il poursuiuoit plus asprement. Cestuy enuoya à Rome vne nommee Martine, laquelle auoit bruit en ce pays d'estre forcere, & fort aimée de Plancina, & ce à la réqueste de Vitellius & Veranius, qui ja bastissoient leurs accusations comme contre gens ia receus entre les reez & accusez. Mais Agrippina, iaçoit ce qu'elle fust toute trauaillee de plorer, & en mauuaise disposition de son corps: toutesfois ne pouoit rien souffrir qui differast la vengeance de son mary, monta en ses nauires avec les cendres de Germanicus, & ses enfans: & auoient plusieurs cōpassion de veoir ceste princesse de noble lignee (laquelle pour l'excellēce de sō mariage l'ō auoit peu auparauāt veüe au milieu de ceux qui luy faisoient tout l'honneur & reuerence qu'ils pouuoient) porter maintenant dedans son sein ces mortelles reliques, incertaine de la vengeance, mal asseuree de la personne, & tant de fois.

*Vibius**Marfus.**Cn. Sentius.**l'ime.**Martine**forcere.**Agrippina**retour**ne à Rome.**me.*

LE II. LIVRE DES ANNALES

rendue subiette à la fortune par son infortunee fécondité.

Ce pendant Piso fut atteint en l'isle de Coé par son messager, qui l'aduerit que Germanicus estoit trespassé. Lequel receuât ceste nouuelle intéperamment, fei tuer bestes pour sacrifier, & visita les temples, ne pouuât moderer ne contenir sa ioye. Mesmes Plancina deuenue plus orgueilleuse, changea lors seulement le dueil qu'elle portoit à cause de la mort de sa sœur, pour prendre ses habits de ioye. De tous costez s'adressoient Centeniers à Piso, qui l'admônestoient que les legions luy portoient prompte faueur, & pource qu'il deuoit retourner en la Prouince, laquelle iniustement luy auoit esté ostee, & maintenât estoit sans gouuerneur. Donc comme il demanda cōseil de ce qu'il deuoit faire, M. Piso son fils fut d'aduis qu'il deuoit retourner à Rome, & qu'il n'auoit encor rien perpetré qui ne se peust purger & appaiser. Aussi qu'il ne deuoit auoir crainte de ie ne sçay quelles suspiciōs de peu deffect, ou de quelques vaines renommées. Que la dissension qu'il auoit eue avec Germanicus, se trouueroit par aduenture digne de haine, & non de punition. Et pource que se desmettant de la Prouince, il auoit satisfait à ses ennemis: ou s'il taschoit d'y retourner, Sentius y contredisant, c'estoit commencé vne guerre ciuile, durant laquelle il ne pourroit longuement retenir de son party les Cēteniers & soldats, à l'endroit desquels beaucoup plus pouuoit la memoire de leur Capitaine encores fresche, & l'amour qu'ils auoient entierement fiché aux Césars. Au con-

traire

M. Piso.

traire Domitius Celer, grand amy & familier de Piso, fut d'avis qu'il falloit vler de l'aduenture qui s'offroit. *Domitius Celer.*

Que Piso, & non Sentius auoit esté fait gouuerneur de Surie. Qu'à luy les flambeaux, le droit de Preteur, & les legions auoient esté donnees. Et si d'aduenture (disoit-il) il suruiét quelque chose ennemie, qui à meilleur droit y doit opposer les armes, que celui qui a autorité d'Ambassadeur, & propre cōmission du Prince? Disoit aussi qu'il falloit laisser couller quelque temps, à fin que le bruit s'enuieillist, pour autant que le plus souuent les innocens mesmes n'estoiēt suffisans à porter vn blasme recēt & nouveau. Mais que sil auoit l'armee par deuers luy, & regardoit d'augmēter ses forces, il trouueroit que plusieurs choses par cas d'aduenture se tourneroient en bien, ausquelles il eut esté impossible pourueoir. Quoy (disoit-il) no⁹ hastōs nous pour arriuer à Rome quād & les cendres de Germanicus, à fin que sans t'ouyr en tes deffences, tu sois rauy & emporté au premier bruit par les plaintes d'Agrippina, & par l'ignorance du peuple? Tu as pour toy la conscience de l'Imperatrix, & la faueur de Tibere, mais secretement: mesmes n'y a gens qui facent plus de semblant d'estre marris de la mort de Germanicus, que ceux qui en sont les plus aises.

Ainsi Piso pource qu'il estoit plus prompt à felonie, fut aisement tiré en ceste opinion: & enuoyant des lettres à Tibere, accusoit en icelles les superfluitez & arrogance de Germanicus, & que par luy il auoit esté chassé, à fin qu'il ne luy cōtredit lors qu'il entre-

LE II. LIVRE DES ANNALES

prendroit choses nouvelles. Quant à luy, qu'il auoit repris la charge de l'armee pour la gouverner en pareille fidelité qu'il auoit ia fait: parquoy il. feit monter Domitius en vne galere de trois rames, & luy cōmanda que euitant les costes & riuages, sinon seulement des isles, il cinglast en haute mer, & tirast droit en Surie. Ce fait, ordonna par chambrees & dizaines ceux qui ayans abandonné l'armee, festoient venus rendre de son party: & arma tous ceux qui suiuoient le bagage. Ainsi ayant fait passer ses nauires en terre ferme, surprist & s'empara d'une enseigne de nouueaux soldats qui alloient en Surie: & pareillemēt escriuit aux gouuerneurs de Cilicie, qu'ils luy enuoyassent du secours.

Quant au ieune Piso, il ne se monstroit paresseux és affaires de ceste guerre, iaçoit ce qu'il y eut tousiours donné empeschemēt. Doncques comme ils estoient le riuage de Lycie & Pamphylie, ils eurent à la rencontre les nauires qui conduisoient Agrippina: & irritez tant d'un costé que d'autre, se preparent pour combattre: toutesfois en fin s'entrecraignans ne se batirent que de paroles: & Marsus Vibius somma Piso de venir à Rome pour se deffendre: lequel se mocquant respondit qu'il sy trouueroit incontinent que le Preteur qui deuoit cognoistre des empoisonnemens, auroit assigné iour tant aux accusateurs qu'à l'accusé.

Laodicee. Ce temps pendant Domitius estant arriué à Laodicee ville de Syrie, & voulāt aller au lieu ou hyuernoit la sixiesme legion, pource qu'elle luy sembloit propre

pre pour leurs nouuelles entreprifes, fut preuenu par l'Ambassadeur Pacuius. Ce que Sentius escriuit à Piffo, l'admonestant de ne tascher à gaigner l'armee par corruptions, ny la Prouince par guerre. Quoy fait, il assemble tous ceux qu'il pensoit encor auoir au cœur la memoire de Germanicus, ou estre cōtraires aux ennemis d'iceluy, leur mettant audeuât à chacune heure la grandeur de leur Empereur, &cōme la Republique estoit assaillie par armes. Par ce moyen assemble vne grosse armee toute preste à combattre. Mais Piffo, iasoit ce que son entreprise succedast mal, ne laissa derriere les choses qui luy sembloient les plus seures pour l'heure: & s'empara d'une forteresse de Cilicie bien munie, laquelle estoit appelée Celenderis: car ^{Celenderis.} ayant fait vn amas de ceux qui ayans abandonné l'armee, festoiēt retirez à luy: des nouueaux soldats desquels peu au parauât il festoit emparé: des seruiteurs tant de luy que de Plácina: & pareillemēt du secours que luy auoiēt enuoyé les gouuerneurs de Cilicie: les auoit ordōnez en forme de legiō. A ceux il affermoit qu'il estoit ambassade de l'Empereur, qu'il estoit chafsé de la Prouince qui luy auoit esté dōnee en gouuernement, nō point par les legiōs) car, disoit il, ie suis icy venu appellé d'elles) mais par Sétius, lequel veut courir sa haine priuee de crimes faux & controuuez. Et pource tenez vous hardimēt en la bataille, car iamais voz ennemis ne voudront cōbatre apres qu'ils aurōt veu Piffo, leq̃l nagueres ils ont appellé leur pere: & lequel, a y proceder par iustice, à beaucoup le meilleur droit, n'estât au reste des plus foibles quāt aux armes.

LE II. LIVRE DES ANNALES

Ce dit, il ordonna ses châbrees & dizaines, & les rengea deuant les répars de la forteresse, dessus vne montaignette droicte & fascheuse à gaigner. Au contraire les vieux soldats estoient garniz de leurs rangs accoustumez, & de ceux qui estoient venuz à leur secours. D'un costé estoit l'aspreté des gens d'armes, & de l'autre l'aspreté du lieu: mais d'une part le courage n'estoit egal, ny l'esperance pareille. Mesmes n'estoit garnie sinon de bastions champestres, mal propres pour la guerre, & faits à la haste, pour vne soudaine entreprise. Incontinent qu'ils se furent ioints, l'on fut quelque peu en doute à qui auroit du meilleur: mais ce doute fut osté incontînēt que les cohortes Romaines eurent reduits leurs ennemis en lieux ou l'un n'auoit plus d'auantage que l'autre: car lors les Ciliciens commencerent à tourner le dos, & s'enfermerent dedans la forteresse.

Ce pendāt Piso s'efforçoit en vain de combattre l'armée de mer, qui l'attendoit là aupres: au moyen dequoy estāt de retour, & se tournētant dessus les murailles, & appellāt vn chacun des soldats par son nom, & leur promettant de grands dons, auoit quasi commencé vne sedition, & les auoit tant esmeuz, que le port'enseigne de la sixiesme legion s'estoit tourné de son party. Mais Sentius feit sonner les cors & trôpettes, & ayant fait assaillir le rempart, & dresser force echelles, cōmanda aux plus habilles de gaigner la muraille, & aux autres d'approcher les tourmens, & ieter pierres, dards, feu, & telles autres choses. Finablement estāt l'obstination de Piso vaincue, il pria qu'ayāt
rendu

rendu les armes , il luy fust permis de demourer au chasteau iusques à ce qu'on eust esté par deuers l'Empereur pour sçauoir à qui il entendoit appartenir le gouuernement de Surie . Mais ces conditions ne furent receuës, & luy furent seulement oëtroyees quelques nauires avec sauf-conduit pour aller iusques à Rome.

Incontinent que le bruit fut publié à Rome de la maladie de Germanicus , & que l'on r'apportoit les choses encores pirement qu'elles n'alloient, ainsi que la coustume est d'adiouster aux nouuelles qu'on apporte de loingtain pays: tout fut remply de douleur, d'ire, & de complaints . Le peuple disoit qu'à ceste seule intention il auoit esté enuoyé en paystant esloigné: que ny Piso auoit pour autre occasion esté enuoyé en la prouince, ny les secrets d'entre l'Imperatrix & Plancina tendoient à autre but . Disoient aussi que les anciens parlans de Drusus, auoient parlé à la verité, sçauoir, qu'à ceux qui regnoient, estoit peu agreable que leurs enfans se monstassent courtois & gracieux enuers le peuple, & que l'on auoit cherché les moyens de faire mourir & l'un & l'autre, non pour autre occasion, sinon pour ce qu'ils auoient tasché à remettre le peuple Romain en equalité, & à luy rendre sa liberté . Ce cōmun bruit de peuple s'enflamma si fort apres que l'on eut entendu la mort de Germanicus, qu'auant qu'il fust ordonné par les Magistrats, ny decerné par le Senat, vn chacun prenant de soy-mesme vacations, laissa d'aller à la plaidoirie, chacun ferma sa maison: & ne voyoit l'on de tous

LE II. LIVRE DES ANNALES

costez que silence & complaints, sans ce qu'il y eut en cecy rien affecté pour ostentation: car iagoit qu'ils portaissent sur eux les enseignes de dueil, si est-ce toutesfois que leur dueil estoit bien plus grand en leur cœur, qu'ils ne monstroient par le dehors. Aucuns marchans sortans de cas d'adventure du pays de Syrie auant la mort de Germanicus, auoient apporté quelques ioyeuses nouuelles de sa santé: cela fut incontinent sceu, incontinent semé par tout: vn chacun selon qu'ils se rencontroient (encor qu'ils n'en eussent ouy parler que legierement) l'alloient redire aux autres, & ceux y adioustans tousiours quelque chose, pour la ioye qu'ils en auoient, l'alloient annoncer à encor plus de gens. Ce faisant courroient par la ville, & vouloient forcer les portes des tēples. La nuit encor ayda à ceste credulité, & affermoit l'on cecy & asseuroit beaucoup plus promptement à cause des tenebres. Toutesfois Tibere ne contredit aucunement à ce faux bruit de ville, attendant qu'auue le temps il se passast: mais le peuple ayant entendu la verité, porta ceste nouuelle trop plus impatiemment, d'autant qu'il pensoit ce personnage luy auoir esté rauy par deux fois.

*Honneurs
decernés
à Germanicus.
Vers Sal-
liaires.
Sieges Cu-
rules es-
toient
chaires*

On decerna des honneurs à Germanicus, tels que les peurent inuenter ceux qui l'aymoient, ou les gens de grand esprit, à sçauoir que son nom seroit chanté en vers Saliaires, & que les prestres Augustaux seroient assis en sieges Curules, sur lesquels y auroit des courōnes de Chefne: aussi que son effigie portraicte en yuoire, seroit portee deuant les ieux Circenses. Par-
reillement

reillement que personne ne seroit cree Flamine ou Augure en la place de Germanicus, qui ne fut de la famille des Iules. Et feit l'on des arceaux à Rome plus qu'il n'en y auoit, & sur le Rhin, & sur le môr Amanus de Syrie, avec inscription de ses gestes, & comme il estoit mort pour la Republique. Son sepulchre est à Antioche ou son corps fut brullé: & son tribunal à Epidaphne, ou il trespassa. Au reste il seroit trop difficile de nombrer les statues & les lieux ou il fut honoré. Aussi comme on luy voulut decerner vn bouclier ou escu excellent en or & en grandeur, entre les autheurs d'eloquence, Tibere afferma qu'il ne luy en dederoit point de plus grand que ceux qu'on auoit accoustumé dedier aux autres, pour autant que l'on ne pouuoit iuger de l'eloquence par la fortune, & que ce luy estoit assez d'honneur d'estre mis au reng des anciens escriuans. Les Cheualiers appellerēt le coing de Germanicus, ce qui au parauāt estoit appelé le coing des Iuniens: & ordōnerent qu'es Ides de Iuillet, les bēdes des gēns d'armes seroient tenues de suiure son effigie. Plusieurs de ces ceremonies demeurēt encor auourd'huy, aucunes furent incōtinent laissees, & les autres ont esté abolies par le laps du temps. Au surplus cōme ceste douleur fut encor recēte, Liuia seur de Germanicus mariee avec Drusus, accoucha de deux enfans masles à vne fois. Laquelle chose estant peu cōmune, & fort agreable mesmes aux petites familles, donna tant de ioye. au Prince que ne peut tenir qu'il ne se vantaſt en plein Senat, que iamais à Romain de sa qualite n'estoient aduenus deux enfans à la fois.

d'yuoire,
esquelles
estoit
portez les
grās ma-
gistrats à
Rome.
Amanus
mont de
Syrie.
Epidaph-
ne.

coing c'est
une ordō-
nance de
gens de
pied es-
troitte
par de-
uant qui
va en es-
largissant
par le der-
riere.

LE II. LIVRE DES ANNALES

car il auoit accoustumé de tourner à sa gloire les choses mesmes qui aduenoient par accident : mais en tel temps cela mesmes n'apporta que douleur au peuple, comme si par l'augmentation du nombre des enfans de Drusus, il eust deu faire tort à la maison de Germanicus. En la mesme annee le Senat par graues arrests chastia l'intemperance & impudicité des femmes : & fut deffendu à toutes celles qui auroient vn Cheualier Romain pour ayeul, pour pere, ou pour mary, de faire gaing de leurs corps : car Vistilia descendue de maison Pretoriale, estoit venue declarer deuant les Ediles qu'elle estoit paillarda, suiuant la coustume receue des anciens, lesquels pensoient assez auoir puny les femmes impudiques leur faisant publiquement confesser que telles elles estoient. Titidius Labeo mary de Vistilia fut aussi mis en cause pour autant qu'ayant trouué sa femme en delict manifeste, il ne l'auoit punie ainsi que les loix luy permettoient. Et comme il s'excusast allegant que les soixante iours donnez au mary pour deliberer, n'estoient encor passez, l'on estima qu'il suffiroit de punir Vistilia : à ceste cause elle fut confinee en l'Isle de Seriphe. L'on parla aussi d'extirper toutes les ceremonies des Egyptiens, & des Iuifs : & par arrest du Senat quatre mil Libertins d'aage competent, & infectez de ceste superstition, furent enuoyez en l'Isle de Sardaigne pour reprimer les larcins & voleries qui sy faisoient, ou si d'aduanture ils venoient à mourir pour l'intemperance de l'air, la perte en seroit petite. A tous les autres l'on feit commandement de sortir d'Italie, si de-

dans

dans certain tēps ils ne laissoient ces ceremonies prophanes. Apres ces choses Tibere mit en auāt qu'il failloit subroger vne Vierge au lieu d'Occia, laquelle en grande saincteté auoit gouuerné les Vierges Vestales par l'espace de cinquante sept ans: & remercia Fonteius Agrippa, & Comitus Pollio, dequoy en faisant offre de leurs filles, ils combatoiet à qui mieux feroit son deuoir pour la Republique. La fille de Pollio fut preferee, nō pour autre cause sinon que sa mere estoit tousiours demeuree avec son premier mary, ou au contraire Agrippa par diuorce auoit diminuē le nōbre de sa famille. Toutesfois Tibere en consolation de ce que sa fille auoit esté moins estimee, luy donna dix fois Sesterces pour son douaire.

*Occia Ves-
tale.*

*Ce sont
vingt cinq
mil escus.*

Au surplus cōme le peuple se plaignist de la cherté des viures, il cōstitua certain pris pour acheter le bled promettant aux marchans, à fin qu'ils ne fussent interessez, de leur bailler outre pour chacū muid deux nummes. Et toutesfois pour toutes ces choses ne voulut accepter le nom de pere de la patrie, lequel luy auoit ia au parauant esté offert: & reprist aigrement ceux qui auoient nōmé ses occupations diuines, & l'auoiet appelé Seigneur. Au moyen dequoy ne failloit vser de beaucoup de paroles, & estoit le parler dangereux sous ce Prince, qui craignoit que le peuple reuint en liberté, & neantmoins hayoit les flateurs. Je trouue par les escriuans & Senateurs de ce temps, que les missiues d'Algandestrius Prince des Cattes furent leues au Senat, par lesquelles il promettoit faire mourir Arminius moyennant que pour ce faire on

*Le muid
Romain
vaut en-
viron un
boisseau.
Deux
nummes
vallery en-
viron 22
denier
tournois.*

*Alganda-
strius
Prince
des Cat-
tes.*

LE II. LIVRE DES ANNALES

luy enuoyast des poisons: mais il luy fut respôdu que le peuple Romain auoit accoustumé de prendre vengeance de ses ennemis apertement, & par force d'armes, non point par secretes fraudes & tromperie. Et par ceste gloire Tibere se parangonnoit aux anciens Capitaines lesquels n'auoiét voulu qu'on empoisonnast Pyrrhus, & mesmes l'en auoient aduertiy. Au reste Arminius affectant le Royaume, pource qu'il voyoit les Romains retirez, & Maroboduus chassé, suscita contre soy le peuple qui vouloit garder sa liberté: & estant assailly par armes, & ayant la fortune tantost prospere & tâtost contraire en ceste guerre, fut tué par la fraude de ses plus prochains & familiers. Et certes ce personnage auoit esté liberateur de la Germanie, & n'auoit prouocqué l'Empire Romain par armes lors qu'il cōmençoit à venir, ainsi que les autres Roys & Capitaines: mais au temps qu'il estoit en sa grâde fleur & excellence. En ces batailles la fortune luy auoit esté diuerse, tantost bōne, tâtost mauuaise, mais iamais n'auoit esté vaincu. Quand il mourut, il estoit aagé de trente sept ans, & auoit gouuerné douze ans. Les nations Barbares le chantent encor aujourd'huy. Les Annales des Grecs n'en font aucune mention, pource qu'ils admirent seulement les choses qui sortent d'eux. Mesmes les Romains n'en ont fait grande memoire, pource qu'ayans accoustumé de nous amuser seulement à extoller les choses anciennes, nous laissons là celles de nostre temps.

*La mort
d'Armi-
nius.
Armi-
nius libe-
rateur de
la Ger-
manie.*

FIN DV SECOND LIVRE.

LE



LE TROISIÈME LI-
VRE DES ANNALES DE
P. CORNILE TACITE
CHEVALIER ROMAIN.



'A Y A N T Agrippina pour *Agrip-
pina.*
Hyuer qu'il fit, discontinué
son voyage de mer, elle arri-
ua à Corcyre, qui est vne is- *Corcyre.*
le opposée à la coste de Ca-
labre : & là employa quel-
que temps à reprendre &
moderer ses esprits : pour ce
qu'elle estoit violée en son
ducil, & ne pouuoit rien en-

durer. L'on n'eut pas plustost ouy dire qu'elle arri-
uoit, que les plus grands de ses amis, & plusieurs sol-
dats, principalement de ceux qui auoient suiuy la
guerre soubz Germanicus, avec plusieurs autres in-
cogneus des villes prochaines (les vns pensans faire
seruice au Prince, & les autres pour les luyure, & fai-
re comme eux) coururent droit à la ville de Brindes,
qui estoit le plus seur & prochain lieu qu'elle eut sceu
aborder. Aussi tost que ses vaisseaux peurent estre

LE IIL LIVRE DES ANNALES

apperceus, non seulement les ports & lieux prochains de la mer, mais aussi les murailles, les couuertures des maisons, & autres lieux d'ou l'on pouuoit veoir de plus loing, furēt remplis de gēs plorans, & s'entrede-mandans s'ils la deuoiēt recevoir en silence, ou biē avecques quelque voix & acclamation. Et certes l'on ne sçauoit bonnement comme s'y gouuerner pour le tēps, iusques à ce que s'approchās les vaisseaux, l'on apperceut ceux qui tiroient à la rame, n'estre gais & deliberez (cōme en tel cas est de coustume) ains tous generalement disposez à tristesse. Mais apres qu'avec les deux enfans elle fut sortie du nauire tenant en ses

*En ce va-
se estoient
les cēdres
de Ger-
manicus.*

maines ce mortel vase, & eut iecté sa veuē sur le peuple, chacun commença à faire plainctes & lamentations, si egalemēt, qu'à peine pouuoit l'on discernr celles des amis d'avec celles des estrangers, n'y celles des hommes d'avec celles des femmes, excepté que ceux de la compagnie d'Agrippina ne faisoient si grād dueil que les suruenans, ausquels ceste douleur estoit encor toute fraiche & recente. Tibere y auoit enuoyé deux des cohortes Pretorienes, commandāt au surplus aux Magistrats de la Pouille, de la Calabre, & de la Champagne, de faire obseques & fune-

*Funerail-
les de Ger-
manicus.*

raillies en la memoire de son fils. Les cendres doncques furent portees sur les espauls des Tribuns & Centeniers. Les enseignes mal attournees marchoiēt deuant: les Sergeans (& Bedeaux) portoiēt leurs poignes de verges renuersees contrebas: & quād ils passoiēt par quelque Colonie, le peuple de la ville s'accoustroit en dueil, les Cheualiers se vestoiēt de

Trabes:

Trabes : & brusloient leurs vestemens, odeurs, & au-
 tres telles choses accoustumees de brusler és funeraill-
 les, selon que la ville estoit riche. Mesmes ceux qui
 auoient leurs villes loing du chemin, venoient au de-
 uant : lesquels edificans des autels, & faisans sacrifices
 sur iceux aux ames des trespassez, donnoient par lar-
 mes, cris & gemissemens tesmoignage de leur dou-
 leur. Drusus alla au deuant iusques à Tarracine, ac-
 compagné de son frere Claudius, & d'une partie des
 enfans de Germanicus qui estoient demourez à Ro-
 me. M. Valerius, & C. Aurelius Consuls (qui ja a-
 uoient commencé à exercer leur Magistrat) le Senat
 pareillement, avec une grande partie du peuple rem-
 plirent les chemins, s'escartans çà & là, & plorans
 ainsi qu'ils en auoient affection. En quoy n'y auoit
 flatterie ou dissimulation : car tous sçauoient bien que
 Tibere estoit ioyeux de la mort de Germanicus, ia-
 çoit ce qu'il fist semblant du contraire. Quant est de
 Tibere & de l'Imperatrix, ils ne sortirent aucunemēt
 en public, ou pource qu'ils pensoient n'estre conue-
 nable à leur maistté de plorer publiquement, ou de
 peur que leurs visages (estans exposez à la veüe d'un
 chacun) ne fussent descouuerts, & s'apperceust le peup-
 le qu'en eux n'y auoit que dissimulation. Je ne trouue
 point aussi par les auteurs, ou actes iournaux, qu'An-
 tonia mere de Germanicus fist lors quelque memo-
 rable deuoit : combien qu'outre ce qu'ils ont es-
 crit de Drusus & de Claudius, ils ayent aussi
 nommeement fait mention de tous les autres pa-
 rens d'iceluy : & n'en sçait on que soupçonner si

*Trabe,
c'est une
sorte d'ha-
bit, dont
vsaient
les Rois
& les
Sui-
gurs.*

*Drusus,
Claudius
Enfans
de Ger-
manicus.
Consuls.
Senar.*

*Peuple.
L'an six-
iesme de
Tibera.*

Antonia.

LE III. LIVRE DES ANNALES

non que pour lors elle fust malade, ou que son cueur vaincu de trop de douleur, n'eust peu endurer de veoir vn si grand mal à l'œil. Quant à moy ie croirois plustost que Tibere & l'Imperatrix (qui ne sortoient point de la maison) l'eussent retenuë avec eux, à fin que leur douleur semblast estre esgale à la sienne, & qu'à l'exemple d'elle (qui estoit mere) l'on creust l'oncle & la grand mere estre atteints de mesme facherie. Le iour que les reliques de Germanicus furent mises au tombeau d'Auguste, estoit tantost si coy que rien plus: & en l'instant remply de tant de pleurs & gemissemens, qu'on n'y eust pas ouy tonner. Les ruës estoient pleines de gens, & le champ de Mars remply de flambeaux ardans. Là les soldats avec leurs armes, les Magistrats sans leurs enseignes: & le peuple separé en ses tributs & bandes, crioient tous que la Republique estoit ruinee, & qu'il n'y restoit plus d'esperance: & ce si promptement & si franchement, qu'ils sembloient ne se souuenir qu'il y eust des Princes ou Empereurs par dessus eux. Mais il n'y eut chose qui de si pres touchast le cueur de Tibere, que la grande affection des hommes enuers Agrippina, lors qu'ils l'appelloient l'honneur du pays, seule du sang d'Auguste, & seule exemplaire & patron de l'antiquité: & se retournans vers le ciel & vers les dieux, prioient que sa lignee luy demourast entiere, & suruesquist les meschans.

Il en y eut aucuns qui furent marris qu'on ne faisoit plus de pompes & solennitez à ces funerailles, ramenans à memoire & faisans comparaison des hon-
neurs

neurs & magnificences qu'auoit fait Auguste aux obseques de Drusus pere de Germanicus. Et disoient qu'Auguste en plein Hyuer, & lors qu'il faisoit vne extreme froidure, estoit allé iusques à Ticinum, & c'est par là que de là sans se separer d'avec la compagnie, estoit avec icelle entré dedans Rome. Disoient d'auantage qu'autour du lit du trespasé y auoit plusieurs effigies des Claudiens attachees: qu'il auoit esté ploré au marché public, loué deuant les Rostres: & qu'on auoit fait à son honneur tout ce que les anciens auoient peu inuenter, avec tout ce que les modernes y auoient seua diouster: ou au contraire à Germanicus l'on n'auoit seulement fait les honneurs accoustumez, & deuz au moindre des gentilshommes. Au reste quant à ce que son corps auoit pour la longueur des chemins tellement quellement esté brulé en pays estrange, cela estoit tolerable: mais que pour recompense on luy deuoit augmenter ses honneurs d'autant que sa premiere fortune les luy auoit deniez. Reprochoient aussi que son frere n'estoit allé au deuant sinon le chemin d'une iournee, & qu'à grand peine son oncle estoit allé iusques à la porte. Mais où sont (disoient-ils) les manieres de faire des anciens, lesquels souloient mettre deuant la couche l'effigie du trespasé, chanter vers composez en la memoire de sa vertu, le louer, le plorer, ou bien faire quelques saintes donnans apparence de dueil? Tibere estoit assez aduertie de tout ce-cy: au moyen dequoy pour assopir ce bruit de ville, feit vn edict par lequel il remonstrois qu'encores que plusieurs nobles Romains fussent autresfois morts.

LE III. LIVRE DES ANNALES

pour la Republicque, l'on n'en auoit toutesfois iamais veu vn autant regretté que cestuy cy. Que ce seroit chose fort honnelle à luy, & à vn chacun, si l'on donnoit quelque certaine reigle à telles manieres de faire: attendu que les mesmes choses ne sont bien scées aux grands seigneurs, à l'Empereur, & au peuple: & pour ce qu'il auoit esté assez conuenable aux villes & maisons de moyenne estoffe, de porter le dueil de ceste nouuelle fascherie, & de prendre quelque recreation apres: parquoy maintenant il falloit raffermir son courage ne plus ne moins que Iules Cesar apres auoir perdu sa fille vnique, & Auguste ayant perdu ses neueuz, auoient mis hors toute tristesse & melancholie. Qu'il n'estoit point besoing d'alleguer exemples plus anciennes pour monstrier combien de fois le peuple Romain auoit constamment porté la destruction des armées, la mort des Capitaines, & l'entiere perte des nobles & anciennes familles. Que les Princes estoient mortels, & la Republicque eternelle. A ceste cause qu'ils recommençassent leurs solennitez, & pour ce que le temps des ieux Megalenses s'approchoit, retournassent hardiment à leurs plaisirs. Estans par ce moyen les vacations rompues, chacun se remist à sa besongne, & se retira Drusus par deuers l'armée qui estoit en Escclauonie.

ieux Megalenses.

Or le peuple bien deliberé de demander vengeance de Piso, se plaignoit souuent dequoy se pourmenant par les seiours & lieux de plaifance d'Asie & Achaye, par ses arrogans & frauduleux subterfuges renuersoit

uerſoit & affoibliſſoit les preuues de ſes meſchance-
tez: car le bruit eſtoit tout commun que Cn. Sen-
tius (comme i'ay dit) auoit enuoyé à Rome Martine
ſorciere tref-renommee, laquelle eſtoit tout ſoudai-
nement morte à Brindes. L'on trouua qu'elle auoit
du poiſon caché dedans vn nœud de ſes cheueux, tou-
tesfois l'on ne ſ'apperceut qu'il y euſt aucun ſigne ſur
ſon corps par lequel l'on peut cognoiſtre qu'elle ſe
fuſt elle meſme deſſaiſte.

Mais Piſo ayant deuant enuoyé ſon fils à Rome a-
uec charge de taſcher à adoucir le Prince, ſe retira par
deuers Druſus, n'eſperant le trouuer plus cruel en ſon
endroit pour la mort de ſon frere, que fauorable pour
l'auoir deſpeſché d'un tel competitor. Tibere pour
faire monſtre de l'entiereté & droicteure de ſon iuge-
ment, ayant courtoieſement receu ce ieune homme,
vſa enuers luy de la meſme liberalité dont il auoit ac-
couſtumé d'uſer enuers les enfans de noble famille:
mais Drufus d'autre part feit reſponce à Piſo, que ſi
ce que l'on diſoit, eſtoit vray, que pour le mieux que
il euſt ſceu auoir, eſtoit douleur & faſcherie: toutes-
fois qu'il aimoit beaucoup mieux que ce bruit fuſt
trouué faux: à fin que la mort de Germanicus ne por-
taſt dommage à homme du monde. Ces choſes fu-
rent dictes non en ſecret, ains publicquement: & ne
doutoit l'on point que Tibere ne luy euſt fait ſa le-
çon, attendu qu'encor qu'il ne fuſt ny fin ny ruzé, ains
facile & traicteable pour ſa ieuneſſe, vſoit neantmoins
lors des ruzes de ce vieillard.

Piſo ayant paſſé la mer Dalmatique, & laiſſé ſes

LE III. LIVRE DES ANNALES

nauires à Ancone:trauersant par Picene,& par la voye
 Flaminie, attaignit la legion qu'on conduisoit de Pá-
 nonie à Rome pour de là estre enuoyee en garnison
 en Aphrique. Et fut grand bruit comme souuent sur
 le chemin & en la troupe il festoit monstré aux sol-
 dats. De Narnie se faisant mener par le fleuve Nar, &
 par le Tibre (fust ou pour euitertout soupçon, ou
 bien pour ce que ceux qui sont en crainte,n'ont point
 de conseil certain) augmenta la malucillance du peu-
 ple, ayant fait aborder son vaisseau pres le tombeau
 des Césars (mesmemēt à vn iour auquel y auoit force
 gens sur le port) & aussi pour ce que de là il auoit esté
 accompagné d'une grosse troupe de ses clients &
 vassaux, & Plancina de plusieurs femmes, qui tous se
 monstroient gais & deliberez. Et qui irrita encores
 plus le peuple, fut qu'il auoit fait parer sa maison (la-
 quelle regardoit sur le marché) comme pour vne fe-
 ste: tellement que par la frequentation & celebrité
 du lieu, le banquet, les viandes, & toutes autres cho-
 ses estoient en la veuë de tout le monde.

*Piso accu-
 sé.
 Fulcinius
 Trio.
 Vitellius.
 Veranius*

Le lendemain Fulcinius Trio accusa Piso deuant
 les Consuls. Au contraire Vitellius, Veranius, & au-
 tres qui auoient accompagné Germanicus, mainte-
 noient qu'à eux, non à Trio appartenoit cest office,
 & que non comme simples accusateurs, ains com-
 me tesmoins & enseigneurs du fait, ils mettoient
 en auant ce qui leur auoit esté enchargé par Ger-
 manicus: au moyen dequoy ayant Trio delais-
 sée ceste poursuite, eut permission de pouoir accu-
 ser la vie-passe de Piso: & pria l'on le Prince de
 prendre

prendre la cognoissance de ceste cause: dequoy l'accusé fut assez content, pour ce qu'il craignoit la faueur du peuple & du Senat, au contraire scauoit que Tibere ne faisoit pas grand cas de ces communs bruits: & d'auantage qu'il estoit participant des secrets & entreprises de sa mere: & aussi s'en contentoit, estimant qu'un homme seul pourroit mieux discerner les choses vraies d'avec celles qui pour telles sont tenues & reputées: ou au rebours la haine & la malice pouuoient beaucoup en vne multitude. Tibere n'ignoroit pas quelle charge ce luy estoit d'en prédre la cognoissance, ny les propos que l'on tenoit de luy: au moyen dequoy y ayant appellé aucuns de ses plus familiers en petit nombre, ouyt d'un costé les menasses des accusateurs, & d'autre des requestes & prieres. Ce fait, renuoya la cause au Senat en l'estat qu'elle estoit.

Ce temps pendant Drusus retournât d'Esclauonie, entra simplement à Rome, nonobstant que le Senat eust ordonné que tant pour auoir receu maroboduus, que pour les hautes proüesses qu'il auoit fait l'Esté passé, il y entreroit en triomphe. Et fut par ce moyen son triomphe différé iusques à vne autrefois.

Après doncques que l'accusé eut demandé pour ses aduocats T. Arruntius, Fulcinus, Asinius Gallus, Esernius, Marcellus, & Sex. Pompeius, & qu'ils s'en furent excusés: M. Lepidus, L. Piso, & Liueneius Regulus entreprirent de le deffendre, estant tout le peuple attentif pour cognoistre combien les amis de Germanicus se môstreroient fideles: quelle assurance mô-

T. Arruntius.

Fulcinus

Asin. Gallus. Eser-

ninus.

Marcellus.

Sex. Pompeius.

M. Lepidus.

L. Piso.

Liueius Regulus.

LE III. LIVRE DES ANNALES

*Harangue
de Tibere.*

streroit l'accusé: & si Tibere pourroit bien couvrir & dissimuler ses affections, ou s'il les doneroit à cognoistre. Et certes ce peuple ne s'estoit oncques monstré si attétif à telles choses, ny iamis s'estoit plus permis à parler bas mal du Prince, ou bien faire vn silence duquel on ne pouuoit bien soupçonner. Tibere feit vne harangue, laquelle il auoit premeditee pour se moderer. En icelle remonstroit que Piso auoit esté amy & Ambassadeur de son pere, & que par ordonnance du Senat il auoit esté donné à Germanicus pour aide en l'administration des affaires de l'Orient. Qu'il falloit iuger sainement, & en conscience, si là par son inobedience, altercations & debats il auoit courroucé ce ieune Prince: si l'estoit resiouy de sa mort: ou qui pis est, si luy mesme par sa meschanceté l'auoit fait mourir. Car (disoit-il) si estant Ambassadeur il a trespaslé les limites de son office, si l'est despoillé du deuoir qu'il deuoit au chef de l'armee: si l'est resiouy de la mort de ce Prince, & par consequent de ma douleur: ie le hairray aussi, & l'estrangeray de ma maison, vengeance les priuees inimitiez de ce nouveau Prince. Mais si l'on trouue qu'il ait fait cas si enorme qu'il se doie punir par la mort de quiconque l'aura commis: donnez à vous, aux enfans de Germanicus, & à moy qui suis son pere, quelque suffisante & raisonnable consolation. Et semblablement examinez, si à la verité Piso a concité l'armee à trouble & sedition: si l'est retourné en armes en la prouince: où si ces choses sont fausses, ou bien ont esté faites plus grandes qu'elles ne sont, par les accusateurs.

accusateurs. Et certes à bon droit ie leur scay mau-
uais gré de s'estre monstrez trop affectionnez: car
qu'estoit il besoing de monstrez le corps nud de Ger-
manicus, le laisser manier en la veuë de tout le mon-
de, & faire semer le bruit par gens estrangers qu'il
auoit esté empoisonné, puis que ces choses sont en-
cores incertaines, & qu'on est apres à en faire inquisi-
tion? Certes ie plore la mort de mon fils, & la
plorera y iamais: mais si ne veux-je empescher
que l'accusé ne die tout ce que bon luy semblera
pour sa iustification, ou bien pour monstrez qu'il
y auoit de la faute & grande mauuaistié du costé
de Germanicus. Et vous supplie que combien que ce-
ste cause soit iointe à ma douleur, vous ne teniez pour
clairs & tous prouuez les crimes dont il sera chargé.
Et vous ses parens, si la fidelité ou la prochaineté du
sang a eu tant de pouuoir en vostre endroit, que vous
ayez entrepris de deffendre sa cause, ie vous prie d'ai-
der ce pauvre homme qui est en danger, autant que
vous pourrez, par vostre sollicitude & eloquence.
L'admoneste par mesme moyen les accusateurs de
prendre semblable peine, & auoir toute telle constan-
ce. Que l'on ne puisse dire que nous ayons octroyé
autre chose à Germanicus par dessus les loix, sinõ que
son procez a plustost esté décidé à la cour & au Se-
nat, que deuant les autres iuges: car nous voulõs tout
le reste estre traitté en pareille modestie, sans auoir es-
gard ny aux larmes de Drusus, ny à ma tristesse, ny
aux aduersitez que l'on pourroit penser nous estre ad-
uenues.

LE III. LIVRE DES ANNALES

Après cela deux iours furent ordonnez pour ouyr les accusateurs, & fut dit que six iours apres l'accusé viédroit, & auroit trois iours pour alleguer ses deffenses. Lors Fulcinius vint cōmencer par ie ne sçay quels cas commis long temps au parauant, & ne seruans riē à la cause, sçauoir que l'Espagne auoit par luy esté traittee en toute ambition & auarice. Lesquels crimes prouuez ne pouuoient nuire à l'accusé, & moins (sen estant iustificié) le rendre absous, si d'auanture il se trouuoit chargé d'autres plus grands cas. Apres luy Serueus, Veranius, & Vitellius vindrēt cōmencer leur accusation d'un mesme zele & affectiō (mais Vitellius avec vne plus grande facōde & eloquence) & disoiēt que Piso pour la haine qu'il portoit à Germanicus, & pour le grand desir qu'il auoit de mettre sus choses nouuelles, auoit par trop grande licence (laissant passer les iniures faites aux alliez) tant fait, que par les plus meschans d'entreux il estoit appelé pere des legions: au contraire qu'il auoit exercé la cruauté contre les plus gens de bien, & mesmement contre les amis & ceux de la compagnie de Germanicus. Que finalement par charmes, forcelleries & poisons il auoit mis Germanicus à mort. Que de là venoient les ceremonies & execrables sacrifices qu'ils faisoient luy & Plancina. Qu'il auoit pris les armes contre la Republique, & ne fust iamais comparu en iugement pour venir dire ses deffenses, si l'n'y eust esté contraint par armes: car il ne se pouoit nier qu'il n'eust gaigné les soldats par ambition: que la prouince ne fust en la subiection des plus meschans: & mesmes qu'il n'eust
dit

dit de grosses iniures au chef de l'armée. Seulement il sembla qu'il se fust purgé de l'empoisonnement: ce que les accusateurs aussi ne confessoient assez, pour ce que seulement ils luy mettoient à sus qu'estant vn iour au dessus de Germanicus en vn bācquet qu'il faisoit, il auoit en mangeant empoisonné les viandes qui estoient deuant luy: car on trouuoit estrāge qu'il eust osé entreprendre cela entre tant de seruiteurs qui n'estoient siens, & en la veuë de tant de gens, & de Germanicus mesmes. Et offroit l'accusé que sa famille fust interrogée, & requeroit à ceste fin que ses seruiteurs fussent mis en la question. Mais les iuges estoient implacables, pour diuerses raisons: à sçauoir Tibere pour ce qu'il auoit assailly la prouince par armes: & le Senat pour autant qu'il ne pouuoit croire que Germanicus fust mort sans fraude: & obiectoient à Piso, que luy & Germanicus s'estoient par lettres plaints l'vn de l'autre: ce qui fut nié par Tibere aussi bien que par Piso. L'on oyoit pareillement les voix du peuple deuant la cour se vantant que si Piso eschappoit la condamnation du Senat, qu'il ne se saueroit pas de leurs mains. Et ja auoient trainé ses effigies és Gemonies, & ja les desfrompoient, si le Prince ne les eust mises en sa protection, & commandé de les remettre.

Piso donc fut mis en vne litiere, & conduit par le Tribun de la bande Pretorienne, & ne sçait l'on si c'estoit pour le garder, à fin qu'on ne luy fust tort, ou bien pour le faire mourir. Plancina d'autre part n'estoit pas moins haye, ny mal vouluë, mais aussi elle estoit plus fauorisée, & pour ce l'on doutoit cōbien Tibere au-

*C'est cō-
me vn
Capitai-
ne de la
garde.*

LE III. LIVRE DES ANNALES

seroit entreprendre sur elle. Or tant que les esperances de Piso furent moyennes, elle luy promettoit de se faire compaignie de toutes ses fortunes, mesmes de mourir avec luy si la fortune aduenoit: mais apres qu'elle eut par les secretes menées de l'Imperatrix obtenu pardon, elle commença peu à peu à se defaire de son mary, & dresser ses defences à part. Ce que prenât l'accusé pour mauuais signe, & doubtrât s'il se deuoit encore vne fois presenter en iugement, se resolut à la persuation de ses enfans d'entrer de rechef au Senat. Et là comme l'accusation fust renforcée, & eust enduré de grosses paroles des Senateurs & toutes autres choses aduerses & cruelles: toute fois rien ne l'espouuata tant, que quand il veit Tibere sans ire, sans pitié aucune, estre ferme & resolu à ne se laisser vaincre d'affection quelconque. Estant de là reporté à sa maison, se mist quelque peu à escrire, comme s'il eust premedité ses defences pour le lendemain: & ayât scellé ce qu'il auoit escript, le dōna à son affranchy. Ce faict, il pēsa de son corps ainsi qu'il auoit accoustumé. Depuis cōme vne grande partie de la nuit fust passée, & sestāt sa femme retirée de sa chābre, il feit fermer les portes & le lendemain au poinct du iour fut trouué qu'il auoit la gorge coupee, & le glaiue à terre aupres de luy. Il me souuiet que i'ay ouy dire aux plus anciens, que l'on auoit souuentes fois veu vn petit liure entre les mains de Piso, lequel il n'auoit diuulgué, mais que ses amis disoient qu'en iceluy estoient contenuës les lettres de Tibere, & ce qu'il luy auoit commandé de faire contre Germanicus: mesmes qu'il auoit delibéré de

*La mort
de Piso.*

ré de les monstrier au Senat, & accuser le Prince, si Seianus ne l'eust abusé de belles promesses. Disoient pareillement qu'il ne s'estoit defait soy mesme, mais qu'on auoit enuoyé vn homme pour le tuer. Or ie ne voudrois pas asseurer que ces choses fussent vrayes. Toutesfois aussi ne deuois-je pas les taire, les ayant entendu de ceux qui auoient vescu iusques à nostre temps.

Tibere monstrant vn visage triste, se plaignoit que par ceste mort il auoit acquis mauuaise reputation, & demandoit souuent au Senat en quelle sorte Piso auoit passé ses derniers iour & nuit. Et comme il luy fut respondu aucunesfois assez prudemment, & d'autresfois assez indiscretement, il vint à reciter quelques libelles de luy en la forme qui s'ensuit.

Estant opprimé par la cōspiration de mes ennemis, ^{Libelles} & par la mauuaise reputation qu'on a eu de moy à ^{de Piso.} cause du crime dont fausement i'ay esté accusé, entant que l'on n'a voulu dōner lieu à la verité, ny à mon innocence, ie prens (ô Cesar) les dieux immortels à tesmoins, qu'en ma vie ie n'ay porté la loyauté que ie deuois, & n'ay vlé de moindre deuoir enuers ta mere: parquoy ie vous prie de vouloir ayder à mes enfans, entre lesquels Cn. Piso n'a iamais voulu consentir à ^{Cn. Piso.} ma telle quele fortune, ayant tousiours durant ce tēps demouré à Rome. Quāt à M. Piso, il a tousiours tasché à me dissuader le retour de Syrie. Et pleust aux dieux que i'eusse plustost obey au conseil de luy qui estoit ieune, qu'il ne fut prompt de ceder à celuy de son ancien pere. Pour ceste cause d'autant plus affe-

LE III. LIVRE DES ANNALES

étionnéement ie te supplie qu'en son innocence il ne porte la peine de ma meschante entreprise. Ie te prie donc par le seruice que ie t'ay fait l'espace de quarante cinq ans: & par la compagnie du Consulat lequel nous auons exercé ensemble (estât approuué par ton pere Auguste, & de toy aymé) que tu laisses la vie à mon infortuné fils: & iamais cy apres ie ne te feray aucune requeste. Quant est de Plácina, il n'en fait aucune mention. Apres lesquelles choses Tibere rendit ce ieune homme absous du crime de ceste guerre civile: pource qu'il n'estoit licite à vn fils de refuser de faire le commandement de son pere. Il eut aussi grande compassion de la noblesse de ceste maison, & memes de la fortune de Piso, encor qu'en toutes sortes il l'eut meritee. Qui plus est, il entreprist la deffense de Plancina, non sans grande honte & deshonneur, quoy qu'il s'excusast sur les prieres de sa mere contre laquelle s'enflammoiét de plus en plus les plainctes secrectes des plus gens de bien. Comment (disoient-ils) est il honnesté à vne ayeulle souffrir de veoir la meurdriere de son fils? de parler à elle? l'oster des mains du Senat, à fin que iustice n'en soit faiète? Est il possible que Germanicus soit seul debouré de ce qui est par les loix permis à tous les citoyens? Est il possible qu'il ayt esté ploré par Vitellius & Veranius, & que Plácina ayt esté supportee & deffedue par l'Empereur & par l'Imperatrix? Que donc Plancina tourne hardiment son sçauoir, & les poisons que si heureusement elle à experimentees, contre Agrippine & ses enfans, à fin que ceste venerable ayeulle & ce gentil

gentil oncle soient assouuiz du sang de ceste trop miserable famille. Or il y eut icy deux iours consommez sous couleur de vouloir faire le procez à Plancina, pressant Tibere les enfans de Piso de desfendre leur mere. Et comme les tesmoings & accusateurs dissent contre elle à qui mieux mieux tout ce que bon leur sembloit, sans que personne s'entremist de leur respondre: la pitié en fin se tourna en son endroit, laquelle eut plus de pouuoir beaucoup, que n'auoit au parauant eu la malueillance. L'on demanda premierement l'opinion à Aurelius Cotta Consul (car quand l'Empereur rapportoit, les Magistrats ne laissoient de faire aussi le mesme estat) lequel fut d'auis que le nom de Piso deuoit estre rayé des Fastes: que partie de ses biens deuoient estre confisquees, & l'autre partie demeurer à Cn. Piso, moyennant qu'il changeast son propre nom: que M. Piso estant depolé de son estat, & luy estans deliurez cinquante fois Sesterces, seroit banny pour dix ans: & que Plancina eschapperait à cause des prieres de l'Imperatrix. Plusieurs de ces choses furent mitiguees & adoucies par le Prince: entre autres que le nom de Piso ne seroit rayé des Fastes, attendu que celuy de M. Antonius (qui auoit fait guerre contre la patrie) & celuy de Iulius Antonius (qui auoit violé la maison d'Auguste) y estoient demourrez. Pareillement M. Piso fut exempt d'infamie, & luy laissa le Prince ses biens paternels, se monstrant (comme i'ay dit plusieurs fois) assez ferme à ne tenir conte d'argent, & lors estant plus traictable & facile à appaiser, pour la honte qu'il auoit de

*Ce sont
six vingts
cinq mil
estus.*

LE III. LIVRE DES ANNALES

l'absolution de Plancina. Et comme pour ces causes Valerius Messalinus, & Cecinna Seuerus eussent ordonné, l'un qu'on dressast vne statue d'or au temple de Mars Vlteur, & l'autre vn autel à la Vengeance: il ne le voulut permettre, allegant qu'on auoit accoustumé de consacrer telles choses pour les victoires obtenues en terres estranges: mais que les aduersitez domestiques deuoient estre couuertes & enseuelies en tristesse. Messalinus auoit aussi adiousté que pour la vengeance prise de la mort de Germanicus, il falloit rendre graces à Tibere, à l'Imperatrix, à Antonia, à Agrippina, & à Drusus, sans faire mention de Claudius: mais L. Asprenas interrogea Messalinus en plein Senat, pourquoy & si à son escient il l'auoit obmis? Au moyen dequoy lors premierement le nom *Claudius* de Claudius y fut adiousté. Certainement tant plus ie feuillette & retourne les hystoires tant anciennes que modernes, d'autant plus se representent deuant mes yeux les follies & vanitez des choses mortelles, en quelque affaire que ce soit: car il n'y auoit homme duquel il fut moins de bruit, auquel on fit moins d'honneur, ny duquel on eut moins d'esperance de le veoir quelque iour esleué à l'Empire & souueraineté des choses, que de celuy que la fortune tenoit caché, pour quelque iour l'exaucer à la principauté.

Peu de iours apres le Senat par le moyen de Tibere donna estat de prebstre, & la charge des sacrifices à Vitellius, Veranius, & Serueus. Tibere ayant promis à Fulcinius de luy donner sa voix toutes & quantes.

quantés fois qu'il pourchasseroit quelque estat: l'admonnesta de ne precipiter sa grace de bien dire par vne violence & impetuosité. Voila l'issue de la vengeance de la mort de Germanicus, de laquelle l'on parloit diuersement, non seulement en ce temps là, mais aussi és temps qui sont venus depuis tant sont toutes choses grandes douteuses, pource que ceux qui en quelque sorte que ce soit, en ont ouy parler, tiennent ce qu'ils en ont ouy dire, pour tout assuré: & les autres rapportent les choses vrayes autrement qu'elles ne sont, tellement que l'un & l'autre faugmente par le laps du temps.

Mais Drusus sortant de la ville pour recommencer les auspices, y entra incontinent apres en triôphe.

Peu de temps apres sa mere Vipfania alla de vie à trespas, seule entre tous les enfans d'Agrippa qui soit morte de sa belle mort: pource qu'il est tout certain que les vns ont esté occis de glaiue, & des autres l'on se doute qu'ils soient morts de faim, ou ayent esté empoisonnez.

Ceste année mesme Tacfarinas, lequel (comme i'ay dit) auoit esté chassé l'esté passé, par Camillus, recommença la guerre en Aphrique, faisant au commencement plusieurs pilleries, & ça & là, lesquelles demouroient impunies pour la soudaineté dont il y procedoit. Depuis il commença à destruire les bourgs, & en emporter de gros butins. Et finablement assiegea vne cohorte Romaine aupres du fleuve Pagys. Or il y auoit vn Decrius qui estoit Capitaine du chasteau, homme vaillant à la main, & fort expérimenté

Triôphe
de Drusus.

Ceste Vipfania estoit aussi nommée

Agrippina, & ainsi l'appelle Suetone: & fut Tibere contraint de la laisser pour espouser Julia.

Tacfarinas.

Pagys, fleuve. Decrius.

LE III. LIVRE DES ANNALES

en guerre, lequel voyoit biẽ qu'il estoit assiegé de gẽs qui ne valloient gueres: parquoy ayant encouragé ses soldats de cõbatre en pleine campagne, ordõna la bataille deuant sa forteresse. Là estans les gens repoussez à la premiere rencontre, se ietta promptement parmy glaiues & traits au deuant de ceux qui fuyoiẽt, reprenant aigremẽt les port'enseignes dequoy les gẽs d'armes Romains tournoient le dos à gens trahistres & mal ordonnez. Ce disant il fut fort nauré: & combien qu'il eust vn œil creué, si mōstra il pourtant tousiours visage à son ennemy, & ne laissa le combat iusques à ce qu'estant abandonné des siens, il fut là occis.

Ce qu'entendu par L. Apronius (qui auoit succédé à Camille) il fut plus perplex du deshonneur qu'auoient receu ses gens d'armes, que de la gloire de son ennemy: au moyen dequoy ayant pris en ceste cohorte diffamée de chacune dizaine celui sur lequel tomboit le sort, les fait battre de verges iusques à ce que mort s'ensuiuiſt: chose rare en ce temps, & ramenee de la memoire des anciens. Et profſita tant par ceste feuerité, que depuis vne seule enseigne des vieilles bandes (où ny auoit pas plus de cinq cens hommes) deffait la mesme armée de Tacfarinas, ainsi qu'elle vouloit assieger vne forteresse nommée Thala. En ceste bataille Ruffus Heluius simple soldat eut l'honneur d'auoir sauué la vie à vn citoyen: au moyen dequoy Apronius luy fait present d'une picque, & de quelques colliers d'or. Tibere outre cela luy donna la couronne Ciuique, se plaignant (plus toutesfois qu'il n'en estoit marry) dequoy Apronius ne luy auoit luy mesme

L. Apronius.

Decimation de gens d'armes.

Ruffus Heluius.

Couronne Ciuique.

me donnée, ayant pouuoir de ce faire à cause de son Proconsulat.

Tacfarinas voyant les Numidiens estonnez, & ne voulans manger du siege, fait semer qu'il vouloit donner la bataille, reculant toutesfois quand il se voyoit pressé, & se ruant par apres sur la queue. Tant que ce barbare y proceda en ceste maniere, il ne faisoit que se iouer, & amuser les Romains, qui se lassoient & trouuailloient en vain. Mais quand il comença à tirer aux lieux prochains de la mer, s'amusant à la proye, feist arrester là son camp. Et lors estant Apronius Cesianus enuoyé par son pere avec quelques gens de cheual, & bandes auxiliaires, & ayant d'abondant avec luy les plus legers & adextres des legionnaires, gaigna la bataille contre les Numidiens, & les chassa iusques dedans les deserts.

En ce temps à Rome Lepida (laquelle outre ce que ^{Lepida.} elle estoit descèduë des Emiliens, auoit aussi pour bisayeux L. Sylla & Cn. Pompeius) fut accusée qu'elle auoit fainct estre enceinte du fait de P. Quirinius ^{P. Quirinius.} Homme fort riche, & sans enfans. Pareillement fut accusée de plusieurs adulteres & empoisonnemens, & d'auoir esté demâder conseil aux Chaldeens contre la maison des Césars. Elle auoit pour aduocat son frere Manius Lepidus. Quirinius (pour le ^{Manius Lepidus.} mauuais vouloir qu'il luy portoit encores apres l'auoir repudiée) fut cause que iagoit ce qu'elle fust coupable & infame, l'on prenoit toutesfois pitié d'elle. En ce iugement il eust esté difficile de cognoistre quelle fantasie auoit le Prince; tant il changea &

LE III. LIVRE DES ANNALES

entremesla des signes tant de courroux que de clemence, apres auoir prié le Senat qu'on ne fit pour lors mention des crimes de Maïesté. Mais depuis il attirâ M. Seruilius autrefois Consul, & autres tesmoings pour venir mettre en auant ce qu'il auoit fait semblant de vouloir taire. Luy mesme depuis mist entre le mains des consuls les seruiteurs de Lepida, lesquels au parauant estoient sous la garde des gens d'armes: & ne voulut qu'on leur donnast la question pour estre interrogez sur les choses appartenâtes à sa maison. D'auantage il ne voulut que Drusus (Consul designé) dit le premier son aduis: ce qu'aucuns interpretoient à ciuilité & courtoisie, disans que cela auoit esté fait à fin que les autres ne fussent contrains à sentencier comme luy. Les autres le tournoient à cruauté, & disoient que iamais Drusus n'eut quitté son lieu, s'il n'eut veu qu'y demeurant il eut esté contrainct de condamner l'accusée.

Durant les iours des ieux qui estoient interuenus pendât le proces, Lepida entra dedans le theatre, accompagnée de plusieurs nobles dames: & là appelant ses ancestres avec vne voix lamétable, & entre autre Pōpee (duquel l'on voyoit là les monumens & effigies enleuees) esmeut tellement le monde à pitié, que plorans & larmoyans ils commencerent tous à crier apres Quirinius, luy disans paroles outrageuses & execrables, & reprochans qu'à luy (qui estoit vieil, sans enfans, & d'obscure maison) estoit abandonnée celle qui autresfois auoit esté destinee pour femme à L. Cesar. Depuis les meschancetez d'elle furent descouuertes

descouuertes par les seruiteurs qui furent mis en la questiō: & sarresta l'on à la sentēce de Rubellius Blā-
 dus qui l'auoit cōdamnee à estre bannie. Drusus sar-
 resta à cest aduis: iāçoit ce que l'opiniō des autres fut
 moins rigoureuse. Tost apres Scaurus (qui auoit eu *Scaurus.*
 vne fille d'elle) impetra que ses biens ne fussent point
 confisquez. Et lors finablement Tibere declaira
 qu'il auoit sceu des seruiteurs de P. Quirinius, que Le-
 pida ennemye des maisons nobles & illustres, auoit
 tasché l'empoisonner. Par ce moyē la famille des Cal-
 purniens auoit perdu Piso: & celle des Emiliens, Le-
 pida. Mais ils furent tous consolez pour D. Sillanus, *Calpur-
 niens.
 Emiliens.
 D. Silla-
 nus.*
 qui fut rendu à la famille des Iuniens. Or ie vueil icy
 en brieſ vous racompter toute sa fortune. *Iuniens.*

Tout ainsi qu'Auguste à esté heureux au gou-
 uernement de la Republique, aussi à il esté infortuné *Auguste
 infortu-
 né en sa
 maison.*
 quant à sa maison pour la lubricité tant de sa fille que
 de sa niepce, lesquelles il chassa de Rome, punissant
 leurs adulteres par mort, ou par bannissement: car
 voyant leur forfait diuulgué entre les hommes &
 femmes, luy donna vn nom fort rigoureux, l'appel-
 lant crime de religion violee, & de lese maiesté: quoy
 faisant trespasloit la clemence des anciens, & les
 loix que luy mesme auoit establies. Or vne autrefois
 ie parleray de la fin des autres, & des choses qui ad-
 uindrent durant ce temps, si apres auoir acheué ce
 que i'ay commencé, ma vie peut suffire à autres en-
 treprises.

Doncques D. Sillanus adultere de la niepce d'Aug- *D. Silla-
 nus.*
 bb

LE III. LIVRE DES ANNALES

guste, cogneur bien (encores qu'il n'eust eu autre punition, *sinon d'estre estrangé de son amitié*) que c'estoit à dire qu'il falloit qu'il allast en exil: & n'osa jamais son frere M. Sillanus (combien que pour lors il eust grand pouuoir, & excellast en noblesse & eloquence) prier le Prince ny le Senat, iusques à ce que Tibere vint à estre Empereur. Mais comme il remerciaست quelquesfois Tibere, il luy respondit en la presence des Senateurs, qu'aussi il estoit fort ioyeux dont son frere estoit retourné d'un si loingtain voyage, & que cela luy estoit permis de droit, attendu que ny par l'autorité du Senat, ny par la loy il auoit esté chassé: & ce neantmoins qu'il se reseruoit l'entiere cognoissance des offenses qui auoient esté faites à son pere, & ne vouloit que par ce retour les choses de luy ordonnees par Auguste, fussent mises au neant. Depuis Sillanus demoura à Rome sans exercer aucuns estats ou dignitez. Consequemment l'on parla de moderer la loy Papia Poppea, laquelle Auguste ja ancien auoit estable depuis les loix Iulies pour punir ceux qui ne se marioient point, à fin d'accroistre par ce moyen le thresor public. Et toutesfois les mariages & education des enfans n'en estoient d'auantage frequentez, estant le celibat plus estimé: tellement que de iour en iour croissoit la multitude de ceux qui se mettoient au danger de la peine, pour ce que toutes maisons estoient destruites & subuerties par le faux donné à entendre des rapporteurs, tellement que comme anciennement l'on estoit en peine pour la multitude des vices, on ne l'estoit moins auourd'huy pour la multitude

rude des loix. Cecy nous admonneſte de raconter vn peu plus auant du commencement des droits, & par quels moyens l'on eſt depuis venu à ceſte infinie multitude & diuerſité de loix.

Les premiers & plus anciens des hommes n'eſtans encorres corrompuz d'affections deſordonnees, viuoient ſans vice, & ſans reproche: au moyen dequoy n'eſtoient ſubiets à eſtre puniz ou corrigez: & n'eſtoit pour lors queſtion de remuneration ou loyer, pour autant que les choſes honneſtes eſtoient ſeulement cherchees à cauſe d'elles meſmes. Ainſi comme l'on ne ſouhaittaſt rien qui fuſt contre la maniere de viure accouſtume, conſequemment rien n'eſtoit par crainte deſſendu. Mais depuis que ceſte equalité miſe hors, ambition & violence ſont venuës à occuper le lieu de honte & de modeſtie, les dominations furent miſes ſus, & demeurèrent perpetuellement entre pluſieurs nations. Toutesfois aucunes, ou dès le commencement, ou depuis, pour ce que les Rois ne leur venoiēt à gré, ont beaucoup mieux aimé eſtre gouuérnees par loix & ordonnances. Au commencement, pour ce que les eſprits des hommes eſtoient rudes & groſſiers, elles furent auſſi ſimples, & ſans aucun artifice. Entre autres, celles que Minos inuenta pour les Cretois, & celles auſſi que Lycurgus compoſa pour les Lacedemoniens, furent fort renommees, & non moins celles que peu de temps apres Solon feit pour les Atheniens, leſquelles eſtoient plus exquiſes, & en plus grand nombre. Romulus nous auoit gouuérné comme il luy auoit plu. Depuis Numa gaigna le peuple,

Commencement des loix.

Dominations.

Loix.

Minos.

Lycurgus.

Solon.

*Romulus
Numa.*

LE III. LIVRE DES ANNALES

Tullus.

Ancus.

Ser. Tul-

lius. Tar-

quinius.

Decemui-

res.

Loix des

douze ta-

bles.

Gracches.

Saturnis.

Drusus.

L. Sylla.

Lepidus.

& le lia à soy par ceremonies, & droits diuins. Pareille-
ment Tullus & Ancus en inuenterent quelques vnes:
mais Seruius Tullius les passa tous en matiere de loix,
ausquelles mesmes les Rois estoient tenus obeir. De-
puis comme Tarquinius eust esté chassé, le peuple se
garnist de plusieurs choses pour garder sa liberté à
l'encontre des factiōs & ligues du Senat, & pour touf-
iours s'entretenir en paix. Lors les Decemuires furent
establiz: & apres qu'on eut ramassé tout ce qui estoit
de bon és autres pays, l'on composa les loix des douze
tables, esquelles consiste la fin de tout droit & equi-
té: car combiē que les loix qui depuis sont ensuiuies,
ayent quelquesfois esté ordonnees pour les malfai-
cteurs, si est ce que le plus souuent elles ont esté esta-
blies ou par force, ou par la dissention des estats, ou
pour acquerir honneurs illicites, ou bien pour chas-
ser les gens de bien de la cité, & autres mauuaises cau-
ses. En ceste façon les Gracches & Saturnins furent
perturbateurs du peuple: & ne se monstra Drusus
moins prodigue au nom du Senat, tellement qu'il
corrompit les alliez par esperance, & se trouuerent
depuis mocquez par plusieurs oppositions. Qui plus
est, l'on ne laissa à faire plusieurs loix du temps mes-
mes que la guerre estoit en Italie, & peu apres durât la
guerre ciuile, iusques à ce que L. Sylla Dictateur ayât
aboly ou renuersé les loix faites auparauant, & en ay-
ant publié d'autres en plus grand nōbre, donna quel-
que relasche à ceste besongne: laquelle toutesfois ne
dura guieres, à cause des seditieuses loix de Lepidus,
qui suruindrent, & pour ce que tost apres il fut de
rechef

rechef permis aux Tribuns de tourner le peuple où bon leur sembloit. Et ja deslors ne se faisoient seulement generales & communes, mais aussi pour les personnes priuees: tellement qu'au temps que la Republique a esté le plus corrompuë, ç'a esté lors qu'il y a eu plus de loix. Lors Cn. Pompeius fut créé Consul la troisieme fois, pour la reformation des mœurs: lequel vsant de remedes plus rigoureux que les delicts n'estoient grands, fut luy mesmes auteur & destructeur de ses loix, perdant par armes, ce que par armes il vouloit deffendre. Depuis ce temps la Republique a tousiours esté en discord par l'espace de vingts ans, & n'y auoit droit ny coustume gardee: les meschancetez estoient impunies, & les choses honestes chastiees. Finablement estant Auguste Cesar Consul pour la sixiesme fois, & asscuré de sa principauté, abolist tout ce qu'il auoit ordonné en son Triumvirat, & fait des ordonnances desquelles nous eussions à vser en temps de paix, & luy estant Prince. Depuis les liens des loix deuindrent beaucoup plus aspres & rigoureux, & establist l'on gardes ausquels par la loy Papia Poppea l'on donnoit certains salaires. pour espier diligemment s'ils en verroient aucuns ausquels deffaillissent les priueleges de pere, à fin que le peuple en ce deffaut comme commun pere de tous, occupast leurs biens vacants. Mais ceux icy excedoient leurs commissions: & ia estoient attachez à tant de citoyës qu'ils auoient trouué à Rome, en Italie, & autres lieux, tellement que ils en auoient destruit plusieurs, & espouuentoient,

Cn. Pompe
prim.

Auguste

Loy Papie

LE III. LIVRE DES ANNALES

tout le monde, si Tibere pour y donner remede n'eust par fort estably cinq de ceux qui auoient esté Consuls, cinq de ceux qui auoient esté Preteurs, & pareil nombre du Senat, lesquels desmeslerent plusieurs nœuds & implications de ceste loy: qui donna pour lors quelque peu de soulagement.

*Neron fils
de Ger-
manicus.*

En ce mesme temps Tibere recommanda au Senat, Neron fils de Germanicus, lequel estoit ja hors l'aage d'enfance: & pria (sen mocquant les assistans) qu'il feust dispensé d'exercer l'office de Vigintivir, & receu à demander celle de Questeur, cinq ans plus tost qu'il n'estoit permis par les loix. Et qui plus est, alleguoit comme à luy & à son frere les mesmes choses auoient esté autresfois permises à la requeste d'Auguste. Mais aussi certes ie ne doute point que deslors il n'en y eust qui se moquassent secrettement de telles requestes. Et cōbien que les Césars eussent quelques commencemens de leur grandeur, l'on auoit toutesfois plus d'esgard à l'ancienne coustume: ioint qu'un beau pere n'estoit tant tenu aux enfans de sa femme, qu'un ayeul enuers son petit fils. Ainsi outre cecy le Pontificat fut decerné à Neron: & le premier iour que il entra au plaidoyé, il fit vne largesse au peuple, lequel estoit fort ioyeux de veoir un de la lignee de Germanicus, à qui la barbe commençoit à poindre. Ceste ioye fut augmentee pour le mariage qui fut fait de Neron avec Iulia fille de Drusus. Et tout ainsi que cecy fut trouué bō, aussi l'on trouua mauuais de quoy l'on vouloit faire le fils de Claudius gendre de Seianus: car ils sembloient par cela auoir pollū la noblesse de leur

de leur famille, & auoir de leur gré trop haut esleué Seianus, lequel estoit ja suspect pour ses trop grandes esperances.

Sur la fin de ceste annee L. Volusius & Sallustius *L. Volusius*
 Crispus nobles personnages allerent de vie à trespas. *fin.*
 Volusius estoit de famille assez ancienne: toutesfois
 ses ancestres n'auoient administré plus grand estat
 que de Preteur: mais quant à luy il fut Consul, & eut
 office de Censeur, en faisant eslite des decuries & ban-
 des de gens de cheual: & fut le premier qui amassa
 les richesses, esquelles ceste famille a depuis merueil-
 leusement abondé. Les predecesseurs de Crispus Sal-
 lustius estoient Cheualiers. Ce nom luy auoit esté
 donné par Crispus Sallustius excellent Historiogra- *Crispus*
 phe des gestes Romains, pour ce qu'il estoit petit fils *Sallustius*
 de sa sœur. Cestuy donc iagoit ce qu'il eust prompt *neveu de*
 & facile entree au Prince pour se faire pourueoir d'e- *Saluste*
 tats, toutesfois à l'imitation de Mecenas (iagoit ce *Historien.*
 qu'il ne fust venu iusques à estre Senateur) passa en
 puissance & autorité plusieurs de ceux qui auoient
 triomphé, ou esté Consuls: & estoit contraire à la ma-
 niere de viure des anciens, tellement que pour se tenir
 trop propre, trop miste, & en trop grande abondance
 de biens, il approchoit beaucoup de la superfluité: tou-
 tesfois il auoit vne viuacité d'esprit telle qui pouuoit
 suffire à grandes entreprises: & d'autant il estoit plus
 subtil & vehement, que plus il se monstroit paresseux
 & endormy. Cestuy donc durant la vie de Mecenas
 estoit le second auquel se commettoient les secrets
 des Princes: apres la mort duquel il fut le premier, &

LE III. LIVRE DES ANNALES

participant du conseil de la mort d'Agrippa Posthume. Estant deuenue vicil, il demeura en l'amitié du Prince, plus par vne maniere d'acquit, que pource que telle amitié eust quelque force ou vertu : ce qui estoit aduenue à Mécenas : & ne sçay si cela se fait par vne destinee qui empesche que les puissances & auctoritez ne soient de longue duree, pour ce que l'une partie se fasche, ne pouuant plus rien donner : l'autre pour ce qu'elle en a tant eu, qu'elle ne peut plus rien souhaitter.

L'an septiesme de Tibere. S'ensuit maintenant le quatriesme Consulat de Tibere, & le second de Drusus, duquel il fut fort grand bruit, pour ce que le pere & le fils furent collegues & compagnons : car deux ans auparauant Germanicus auoit eu la mesme dignité avec Tibere : mais il n'auoit esté si agreable à l'oncle, pour ce qu'il n'approchoit tant de la nature. Sur le commencement de ceste annee, Tibere se retira en Champaigne, sous couleur de s'aller esbatre & prendre de l'air pour renforcer sa santé, mais à la verité il taschoit à trouuer le moyen de s'absenter de Rome pour quelque temps : ou bien le faisoit à fin qu'estât le pere dehors, Drusus seul eust toutes les affaires du Consulat en maniement. Et est possible qu'un petit commencement (qui vint lors à un debat de grosse consequence) donna occasion & matiere à ce ieune homme de gaigner la faueur : car Domitius Corbulo ayant autresfois esté Preteur se plaignit au Senat de quoy L. Sylla noble adolescent ne fesoit leué pour luy faire place au spectacle des Gladiateurs. L'age, la coustume du pays, la faueur
des

*Domitius
Corbulo.
L. Sylla.*

des plus anciens faisoient pour Corbulo: au contraire Mamercus Scaurus, L. Arruntius, & autres prochains parens de L. Sylla le soustenoient, & plaidoiēt fort & ferme les vns contre les autres, allegans plusieurs exemples des predecesseurs, lesquels par graues arreſts auoient chaſtié l'irreuerence des ieunes gens, iusques à ce que Drusus vint à raisonner la dessus, & deduire propos propres à les appaiser: tellement que Mamercus tres-excellent Orateur de ce temps (lequel estoit oncle de Sylla, & auoit aussi espouſé sa mere) satisfeit & contenta Corbulo. Le meſme Corlo cryant en plein Senat que par la fraude des fermiers, & negligence des Magistrats, plusieurs grâds chemins de l'Italie estoient rompus tellement que l'on n'y pouuoit passer, receut de bon cueur ceste cōmiſſion: laquelle chose ne se trouua ſi profitable à la Republique, que dommageable à pluſieurs, les biens deſquels il pourſuyuoit par condēmnations & confiscations. Peu de temps apres Tibere eſcriuit au Senat, que par les incuſions de Tacfarinas l'Aphrique estoit de rechef troublee, & que par l'aduis des Senateurs il estoit beſoing d'eſlire vn Proconſul, lequel fut expert en guerre, robuste de corps, & ſuffiſant pour ſatisfaire à ceste guerre. Par ce moyē ayāt Sex. Pōpeius trouué occaſion d'exercer ſa haine cōtre M. Lepidus, luy reprocha qu'il estoit paresſeux, ſouſfreux, & qu'il faiſoit deſhonneur à ſes anceſtres, & q̄ pour ceste cauſe il le falloir oſter du nôbre de ceux qui tiroient au ſort pour auoir le gouuernement d'Aſie. Le Senat au contraire faiſoit pour Lepidus, esti-

Mamer-
cus.Tacfar-
nas.Sex. Pom-
peius.
M. Lepi-
dus.

LE III. LIVRE DES ANNALES

*Seuerus
Cecina.*

mât que ce qu'on appelloit faitardise & paresse, estoit plustost vne bonté & douceur: & que le peu de bien que luy auoit laissé son pere, & sa noblesse passée sans reproche, luy deuoient plustost estre tournees à honneur, que non pas à ignominie. Par ce moyen il fut enuoyé en Asie. Quant à l'Aphrique, il fut arresté que l'Empereur elliroit celuy qui luy sembleroit propre pour y enuoyer. Pendant cecy Seuerus Cecina fut d'auis que nul Magistrat auquel seroit donné le gouuernement d'une Prouince, eut à mener sa femme avec luy: & ce apres que par plusieurs fois il eut repeté comme il auoit vne femme avec laquelle viuoit paisiblement, & de laquelle il auoit eu six enfans, & auoit gardé en sa maison ce qu'il ordonnoit en public, laissant tousiours sa femme en Italie, iaçoit que par l'espace de quarâre ans il eut continuellemēt eu charge de diuerses Prouinces. Disoit qu'anciennemēt l'on n'auoit sans cause ordonné que les femmes ne fussent menees és pays des alliez, ny és pays estranges. Que ou les femmes sont, elles empeschēt la paix par leurs dissolutions & superfluitiez: & la guerre par leur crainte & timidité, cōuertissans l'armee Romaine en la semblâce d'une monstre & marche de Barbares. Que ce sexe non seulemēt est foible imbecille & impatient de trauail: mais aussi si on luy lasche la bride, est cruel, ambitieux, cōuoiteux de domination: marche entre les soldats, & à les Centeniers prests & en main: ainsi que depuis peu de temps l'on auoit veu vne femme qui auoit presidé aux exercices des cohortes, & aux tournois des legions. Et pource qu'ils considerassent

considerassent vn peu, & ils trouueroient que toutes-fois qu'aucuns auoiēt esté accusez de cōcussion & deniers mal prins durant leur Magistrat, les crimes principaux auoiēt esté obiectez à leurs femmes: aussi que les plus meschans de la Prouince s'accointoient tousiours d'elles. Qu'elles s'entremettoient de toutes affaires, & en dispoient à leur fantasie. Qu'il falloit necessairemēt faire la court à deux, & qu'il y eut deux Pretaires, estans les femmes beaucoup plus obstinees & rigoureuses en ce qu'elles auoient commandé: lesquelles anciennemēt reglees & reformees par les loix Oppies & autres, auoiēt auourd'huy rompu ^{Loix Oppies.} leurs liens, & tenoient la superintendance des maisons, des affaires publiques, & des armées. Ces propos furent entrerōpus de plusieurs, & de peu de gens escoutez: mesmes ne fut l'affaire mis au conseil pour en deliberer, pource que Cecina n'estoit homme de telle mise qu'il peut entreprendre vne telle reformatiō. A cecy respondit Valerius Messalinus, fils de Messala ^{Valerius Messalinus.} (lequel retenoit encor la naturelle image de l'eloquence de son pere) & dit, que plusieurs choses anciennes dures & fascheuses auoient esté changees en de meilleures, & plus plaisantes: car pour le iourd'huy la ville de Rome n'estoit assiegee des ennemis, comme anciennement, ny les Prouinces ennemies. Que aucunes choses estoient permises pour la necessité des femmes, lesquelles tant s'en faut qu'elles fassent ennuy aux Prouinces & pays confederez, que seulement leurs maisons ne s'en trouuent chargees. Quant aux autres choses, elles estoient communes

LE III. LIVRE DES ANNALES

aux femmes avec leurs marys, & n'estoit pour cela la paix aucunement retardee ou empeschee: bien estoit vray qu'il falloit aller dispos & deliberez à la bataille: mais aussi quel soulagement plus doux ou plus honneste pouuoïent ils auoir à leur retour que leur femmes? Que quelques vnes par auanture pouuoient estre deuenues ambitieuses, ou auaricieuses: mais quoy? n'auoit l'on veu plusieurs des hōmes mesmes cōstituez en Magistrat subiets à diuerses affectiōs desordōnees? differoit l'on pourtāt à les enuoyer es Provinces, & les en faire gouuerneurs? Et si beaucoup de marys auoiēt esté corrompus par les meschācetez de leurs femmes, falloit il pourtāt inferer que toutes gēs nō mariez fussent entiers & sans reproche? Au surplus que les loix Oppies auoiēt autrefois eu leur cours selon que l'vtilité de la Republique le requeroit pour lors: que depuis elles n'auoiēt esté si estroittemēt gardees, & auoiēt esté en aucūs cas adoucies ou abrogees selon qu'il estoit expediēt pour le tēps. Et pource (disoit-il) en vain nous voulons dissimuler nostre lascheté, & la couvrir d'autres termes: car si les fēmes estoïēt trop excessiues & dissolues, c'estoit la faute des marys: & pource, qu'on auoit tort pour l'imbecilité & faute de cuer de quelques vns, d'oster aux marys la societé & participation des choses prosperes ou aduerses que leurs femmes ont avec eux: ioint que par ce moyen on laissoit ce sexe debile & impuissant exposé pour ses superfluitez, aux desordōnees affectiōs d'autrui: car si les marys par leur presence ne pouuoïēt à peine garder leurs mariages entiers & inuiolez,

lez, que seroit-ce si par vn long temps absents ils se mettoient en oubly, ny plus ny moins que s'il y auoit diuorse ou separation? Et pour ce qu'il estoit bon de donner ordre aux abus qui se faisoient és pays estranges, moyennant qu'on ne laissast derriere les meschâcetez qui se commettoient dedans Rome. Drusus adiousta à ces propos quelques choses de son mariage, & dist qu'il estoit aucunesfois besoing aux Princes de visiter les lieux plus loingtains de l'Empire.

Que plusieurs fois Auguste auoit esté en Orient & Occident en la compagnie de Liuia. Quant à luy, que il auoit aussi esté en Escлаuonie, & estoit prest d'aller en autres pays où il en seroit besoing, toutesfois non sans grand regret si à chacune fois on le separoit d'avec sa tres-chere femme, de laquelle il auoit eu tant d'enfans. Ainsi l'aduis de Cecinna fut moqué.

Au iour plus prochain qu'on tint le Senat, Tibere ayant par quelques lettres obliquement repris les Senateurs de quoy ils remettoient toutes sollicitudes & affaires sur le Prince, presenta M. Lepidus, & Iunius Blesus, à fin que l'un d'eux fust esleu Proconsul d'Aphrique. Lors furent ouys les propos & de l'un & de l'autre, s'excusant Lepidus de plus grand affection, remontrant sa maladie, l'age de ses enfans, & comme il auoit vne fille à marier, se taisant (ce que toutesfois l'on entendoit assez) que Blesus estoit oncle de Seianus, & que pour ce il n'auoit garde qu'il ne l'emportast. Blesus feit quelque responce faignant ne vouloir accepter ceste charge: mais non point avec telle affection que l'autre: & luy fut donné audience par les

LE III. LIVRE DES ANNALES

flateurs. Quelque temps apres les plaintes cachees és
cœurs de plusieurs, furent mises en lumiere: car il e-
stoit permis aux plus meschans de dire iniures & su-
sciter vn blasme contre les bós, sans crainte de puni-
tiō, moyennant qu'ils peussent empoigner l'effigie
de Cesar. Et mesmes les serfs & affrāchis menassans &
leuans leurs mains contre leurs patrons & seigneurs,
Cestius. se faisoient craindre & redouter. Parquoy Cestius Se-
nateur disputa de ceste matiere, disant qu'à la verité
les Princes estoient semblables aux dieux: mais aussi
que les dieux n'admettoient les prieres des suppliās si
elles n'estoient iustes & ciuiles. Pareillement que l'on
n'en voyoit aucuns fuyr au Capitole ou autres tēples
des dieux pour y estre supportez en leurs forfaits &
meschancetēz. Par ainsi que les loix estoient abolies
& entieremēt renuersees puis que *Annia* *Rufilla* (par
luy cōuaincue de fraude en iugement) le menassoit,
& luy disoit plusieurs iniures en plain marché & à
l'entree de la court, sans que pour ceste cause il aüst
l'appeller en iustice, pource qu'elle touchoit à l'effigie
de l'Empereur. Plusieurs estans autour de luy mur-
muroient de telles & semblables choses, & d'autres
encores qui estoient encores plus outrageuses & fa-
cheuses à porter: & ne cesserent de prier Drusus d'en
faire punition pour dōner exēple aux autres, iusques
à ce qu'ayāt fait appeller *Annia Rufilla*, & celle con-
uaincue des cas à elle imposez, la feit mettre en pri-
son. Pareillement *Considius Equus* & *Celius* *Cursor*
Cheualiers Romains furent punis tant par l'autorité
du Prince, que par decret du Senat, d'auoir faussemēt
accusé

accusé Magius Cecilius Preteur du crime de lese Ma-
 iesté. Ces deux choses tournerent à la louage de Dru-
 sus, & aussi pource que par luy (qui hantoit les com-
 paignies, & tenoit propos à vn chacun) les entrepri-
 ses secretes de son pere estoient appaisees & adoucies.
 Mesmes la dissolution & superfluité ne desplaisoit
 trop en ce ieune homme : & disoit on qu'il valloit
 mieux qu'il sadonnast le iour à faire bastimens, & la
 nuit à banqueter, qu'il demourast seul exerçant son
 esprit en plusieurs mauuaises fantasies, sans pouuoir
 estre retiré de son triste veiller par aucunes voluptez:
 car l'on ne voyoit point que Tibere ou les accusateurs
 se lassassent : car Ancharius Priscus auoit accusé Ge-
 sius Cordus Proconsul de Crete, de concussion, &
 deniers mal pris, y adioustant le crime de lese Ma-
 iesté, lequel pour lors estoit le but & accomplisse-
 ment de toutes autres accusations. Pareillement Ti-
 bere voyant que Antistius Vetus (qui estoit des plus
 apparens de Macedonie) auoit esté absous du cri-
 me d'adultere à luy imposé, il reprit aigrement les
 iuges, & le feit rappeler pour venir proposer en
 iugement ses deffences touchant le crime de Maie-
 sté, comme estant seditieux, & ayant participé aux
 conseils & entreprises de Rhescuporis au temps
 qu'ayant tué son frere Cotys, il se deliberoit nous fai-
 re la guerre. Parquoy il fut enuoyé en exil : & fut dit
 d'auantage que ce seroit en vne isle en laquelle il ne
 pourroit auoir aucunes commoditez du pays de
 Thrace, ny de Macedone: car estât diuisé le Royaume
 de Thrace entre Rhoemetaces & les enfans de Cotys.

*Magius
Cecilius.*

*Ancha-
rius Prif-
cus.
Cesius
Cordus.*

*Anti-
stius Ve-
tus.*

LE III. LIVRE DES ANNALES

(desquels pour leur peu d'aage Trebellienus Ruffus estoit tuteur) ceux du pays par l'insolence des nostres tomberent en plusieurs discordes, n'accusans moins Rhoemetalces que Trebellius dequoy ils laissoient les iniures du menu peuple impunies. Les *Celaleres.* Celaleres, Odrusiens, & autres puissantes nations *Odrusici.* commencerent à prendre les armes, ayans esleu diuers Capitaines non nobles toutesfois semblables: car ils estoient tous vilains: qui fut cause qu'ils ne se peurent bien accorder ny assembler pour entreprendre vne forte guerre: car aucuns d'eux troubloient les entreprises presentes: les autres passoient outre le *Mont Hemus.* mont Hemus, pour amasser les peuples trop esloignez. La plus grand part de ceux qui estoient les mieux ordonnez, assiegerent Philippopolis, autresfois construite par Philippes Roy de Macedone. Ces choses entendues par P. Velleius (qui estoit chef de l'armee plus prochaine) il enuoya quelques gens de cheual des ailles avec quelques bendes legeres, contre ceux qui estoient espars & escartez pour piller, ou pour amasser gens à leur secours: mais il mena la force de ses gens de pied pour leuer le siege. Or l'une & l'autre entreprise eut bonne yssue, par ce que ces pillars & gasteurs de pays furent tous deffaits. Et ceux qui estoient au siege, tomberent en dissention, ioint la faillie que le Roy feit à heure opportune, & l'arriuee d'une legion qui suruint. Et certes ie ne voy point pourquoy cecy doieue estre appellé bataille, en laquelle furent occis gens seulement demy armez & vagabonds, sans que aucun de noz gens y perdist goutte de sang.

En

En cest an mesme les citez de Gaule commencerēt à se rebeller, à cause du grand argent qu'ils deuoient. Le principal auteur de ceste rebellion entre les Treuiriens estoit Iulius Florus: & entre ceux d'Autun, Iulius Sacrouir. Tous deux estoient de noble maison, & auoient leurs predecesseurs fait plusieurs beaux actes: au moyen dequoy leur auoit esté autresfois donné droit de bourgeoisie à Rome, iagoit ce qu'il se donast peu communément, & seulement pour loyer & recompense de la vertu. Ceux donc par secrets parlements ayans attiré à leur ligue les plus cruels & audacieux, & ceux qui ont besoing de mal faire, soit pour remedier à leur grande pauureté, ou pour obuier à la punition de leurs forfaits: entreprirent de conciter, c'est à sçauoir Florus les Belges, & Sacrouir les autres Gaulois plus prochains. Ainsi en leurs assemblees & conuenticules secrets ils mettoient en auant plusieurs choses tendantes à sedition, comme de la continuation des tributs, de l'exces des vsures, & de la cruauté & arrogance des gouuerneurs. D'auantage que les soldats estoient tombez en discord ayant entendu la mort de Germanicus: au moyen dequoy auoient le temps tout à propos pour recouurer leur liberté: & (considerans leurs puissances) ils prenoient aussi garde à la pauureté de l'Italie, à la couardise des gens de ville quand ils sont en guerre, & aussi qu'il n'y auoit rien de bon en toute l'armee des Romains, si non les estrangers. Il n'y eut quasi ville qui ne fust infectee de la semence de ceste sedition. Les Angeuins & Tourangeaux s'elueurent les premiers: mais

*Reuolte
des Gau-
lois.*

*Iulius
Florus
Iul. Sa-
crouir.
Autun.*

*Angeuins.
Touran-
geaux.*

LE III. LIVRE DES ANNALES

Acilius
Aniola. les Angeuins furent rembarrez par Acilius Aniola Ambassadeur, lequel auoit appellé en secours la légion qui estoit en garnison à Lion. Les Tourangeaux furent deffaits par les legionnaires qu'auoit enuoyé Virgellius Varro Ambassadeur de la basse Germanie, sous la conduite du mesme Aniola, & d'aucuns des principaux de Gaule, qui luy donnoient aide, à fin de courir & dissimuler leur reuolte & trahison, & icelle plus asséurer pour le temps aduenir. Sacrouit fut aussi veu combattant pour les Romains le chef descouuert, à fin (comme il disoit) de monstrier sa force & hardiesse: mais ceux qui auoient esté pris, l'accusoient que c'estoit pour mieux se donner à cognoistre, à fin qu'on ne le blestast du trait. Et comme l'on demanda conseil à Tibere sur cecy, il ne fit pas grand conte de cest aduertissement, & nourrissoit la guerre tenant cecy trop longuement en doute. Ce temps pendant Florus poursuiuoit son entreprise, & taschoit à gaigner l'aille des gens de cheual; laquelle enroollé à Triers estoit de nostre gendarmerie & discipline, à fin qu'auyant tué quelques marchands Romains, la guerre commençast. Toutesfois peu de ces gens de cheual se laisserent corrompre, demourant la plus grand part en son deuoir & office. La reste des gens de bas estar, qui estoient ou endettez, ou vassaux d'autrui, prirent les armes, & se retiroient en la forest d'Ardaine: mais ils furent repoussez par les legions enuoyees des deux armées lesquelles Vitellius & C. Silius leur auoient mises en barbe. Iulius Indus (qui estoit d'une mesme ville avec Florus, mais contraire à luy, & pour

Forest:
d'Ardaine.

Iulius
Indus.

pour ceste cause mieux deliberé de bien faire) fut en-
uoyé deuant avec vne compaignie de gens d'élite, &
escarta ceste multitude confuse & mal ordonnée. Flo-
rus ayant frustré les vainqueurs de sa personne pour
se estre retiré en lieux secrets & incognez, & voyant
que les gens d'armes auoient occupé les passages par
lesquels il se pensoit sauuer, se deffist soy-mesme. Et
telle fut la fin de la mutinerie des Treuirois.

Mais au pays d'entour Autun il y eut plus de diffi-
culté, d'autant que la cité est plus opulente, & le moyé
de les chastier plus esloigné. Autun est ville capitale *Autun.*
de ce pays, de laquelle s'estant emparé Sacrouir avec
quelques gens armez, y retint les enfans des plus no-
bles maisons de Gaule, lesquels sy estoient retirez
pour estudier, à fin que par ce gage il alliaist avec soy
leurs parens & prochains: & sur l'heure distribua ar-
mes aux ieunes gens, lesquelles secrettement il auoit
fait forger. Ainsi ils se trouuerent quarante mil, dont
la cinquiesme partie estoit armee à la façon des legio-
naires: les autres auoient cousteaux, voulges, espieux,
& autres bastons de chasse. Pareillement il prit quel-
ques serfs destinez à l'escrime, lesquels à la façon du
pays sont couuerts de fer de pied en cap, & pour ceste
cause mal propres pour donner coups, mais aussi im-
penetrables à les recevoir. Ceux là estoient appelez
Crupellaires. Ceste multitude estoit encores aug- *Crupel-
laires.*
mentee par ceux des prochaines villes qui s'entendoient
avec eux: lesquels combien qu'ils ne se fussent en-
cores ouuertement declarez, si est ce que chacun
d'eux particulièrement y estoit affecté, & d'avan-
d d ij

LE III. LIVRE DES ANNALES

rage pour ce que les capitaines Romains estoient en debat à qui auroit la bataille. Toutesfois Varro estant ia cassé de vieillesse, ceda à Silius, lequel estoit en sa force.

Or à Rome le bruit estoit que non seulement ceux d'Autun & les Treuirois s'estoient reuoltez, mais que il y auoit bien encores soixante & quatre villes, & aussi que les Germains s'estoient alliez avec eux, & les Espaignes en grand bransle, tellement que l'on en croyoit beaucoup plus qu'il n'y en auoit, comme est la coustume de la renommee: & se lamentoient les plus gens de bien, pour le soing qu'ils auoient de la Republicque. Plusieurs pour auoir en haine l'estat des choses presentes, & par vne conuaitise de veoir des mutations, s'esioiussent mesmes en leurs perils, & accusoient Tibere de ce que durant vn tel trouble il famusoit aux libelles des accusateurs. Quoy (disoient ils) Iulius Sacrouir sera il conuaincu au Senat de crime de maiesté? Ha, en fin ceux sont venus lesquels, par armes reprimeront ces cruelles & sanguinolentes missiues, l'eschange n'est point mauuais quand d'une paix miserable les choses sont conuerties en une guerre. Tibere neantmoins d'autant plus monstroir contenance d'homme asseuré, & qui peu se soucioit de tout cecy, ne changeant ny de place, ny de visage: & feit durant ces iours ne plus ne moins qu'il auoit accoustumé, fust ou pour la hauteur de son courage, ou pour ce qu'il auoit esté asseuré que tout cecy ne seroit rien. Cependant Silius marchant avec deux legions, & ayant enuoyé deuant quelque compagnie des auxiliaires,

xiliaires, pilloir les bourgs & villages des Bourguignons, lesquels estoient limitrophes de ceux d'Auncun, s'efforçans les port'enseignes à qui mieux, & faisans les soldats grand bruit, disans qu'il ne falloit attendre le repos accoustumé, ny que les nuits fussent acheuees : qu'ils tenoient la victoire pour asseuree, moyénant qu'ils peussent veoir leurs ennemis en barbe, & estre veus d'eux. A douze mil de là Sacrouir fut veu avec son armee en vn lieu apparent & descouuert.. Il auoit mis ses gens de fer à la pointe, les cohortes aux ailles, & les moins armez sur le derriere : & estant entre les plus apparens de son armee, monté sur vn beau cheual, vint aborder ses gens, leur remettant en memoire les anciennes gloires des Gaulois, & la peine qu'ils auoient donnee aux Romains: combien leur liberté seroit glorieuse s'ils estoient victorieux, & leur seruitude intolerable, si de rechef ils estoient vaincuz. Ces propos ne furent longuement tenuz, ny à gens fort deliberez, car la pointe des legions s'approchoit: & estans ces payfans en mauuais ordre, & non accoustumez à la guerre, ne voyoient ny entendoient guieres bien ce qu'ils deuoient faire. Au contraire Silius (iaçoit ce que l'esperance qu'il auoit ia conceüe, luy eust osté les occasions de haranguer les gens) crioit toutesfois qu'ils deuoient auoir honte de ce qu'ayans vaincu les Allemans, ils estoient menez contre les Gaulois comme contre ennemis. Qu'vne seule cohorte auoit puis peu de temps defait les Tourangeaux, & vne seule aille les Treuirois: & que quelques bandes de ceste mesme armee en petit nôbre auoient

LE III. LIVRE DES ANNALES

faccagé les Bourguignons. Que d'autant que ceux cy estoient plus riches d'auoir, & abondans en voluptez, d'autant ils auoient moins de courage. Parquoy (disoit-il) liez les moy, & courez apres ceux qui fuiront. A ces paroles ils vont faire vn grand cry. Les gens de cheual les enuironnent, & les pietons se ietterent dessus leur pointe. Les hommes de fer les arresterent quelque temps, pour ce que ces lames ne se laissoient facilement fausser par les glaiues & iaelots: mais les soldats avec belles cognees & douloires (comme s'ils eussent voulu rompre vne muraille) fendoient & les armures & les corps ensemble. Aucuns avec fourches & autres instrumens à pousser, renuersoiēt ceste masse sans force, & les laissoient là couchez cōme morts, sans qu'ils feissent aucun semblant d'eux releuer. Sacrouir premierement se retira à Autun, & depuis (de crainte que la ville se rendist) au prochain village avec aucuns de ceux auxquels il se fioit le plus: là il se defeat soy mesme: & ceux qui estoient avec luy, s'entre-tuerent l'vn l'autre. Ce village estant mis en feu, les brusta tous.

*La mort
de Sacrouir.*

Lors premierement Tibere escriuit au Senat le commencement & yssüe de ceste guerre, & n'augmenta ou diminua en aucune maniere de ce qui estoit vray, ains escriuit seulement que les Ambassadeurs sy estoient gouuernez loyaument & vertueusement: mais luy par conseil. Il rendit pareillement la raison pour laquelle ny luy, ny Drusus s'estoient trouuez en ceste guerre, extollant grandement l'excellence de l'Empire, & allegāt qu'il n'estoit bien seant pour

vnc

vne ou deux citez qui se mutinoient, que les Princes y allassent en personne, laissant la ville de laquelle procedoit le gouuernement & reformation de tout le reste. Et toutefois qu'il se deliberoit d'y aller maintenant que toute crainte en estoit dehors, à fin de composer & mettre en ordre deu les choses presentes. Le Senat decerna vœux, processions, & autres telles solennitez pour son retour. Cornelius Dola-
Cornelius Dolabella
 belle seul, se pensant plus aduancer que les autres, & tombant en vne lourde & sorte flatterie, fut d'avis qu'à son retour de Champagne il entraist en triomphe en la ville. Mais Tibere enuoya autres lettres, par lesquelles il remonstra qu'il n'estoit tant vuide ny despourueu de gloire & honneurs, qu'apres auoir debellé tant de barbares nations, apres auoir durant sa ieunesse receu, ou bien refusé tant de triomphes, il voulust en son vieil aage pourchasser vne recompense vaine & inutile d'un voyage si prochain de la ville.

En ce mesme temps il feit requeste au Senat, que la mort de Sulpitius Quirinius fust honoree de funeraillles publicques. Toutesfois Quirinius n'appartint
Quirinius
 iamais en rien à l'anciëne & patriciale famille des Sulpices, ains estoit natif de Lanuuium, ville qui estoit vn Municipi de Rome: depuis s'estant monsté vigilant
Lanuuium
 & soigneux aux affaires de la guerre, & vehement es charges qu'il auoit entreprises, obtint le Consulat sous Auguste: & consequemment pour auoir pris d'assaut les forteresses des Honomadois en Cilicie,
Honomadois
 obtint les enseignes de triomphe, & fut donné pour

LE III. LIVRE DES ANNALES

gouverneur à C. Cesar, qui lors estoit chef d'Armenie. Aussi estant Tibere à Rhodes, il auoit fait tout ce qu'il auoit peu pour acquerir sa grace : ce que Tibere declara lors assez au Senat, le louant d'auoir bien fait son deuoir enuers luy: & accusoit M. Folius, lequel il disoit auoir incité Cesar à plusieurs meschancetez, discordes, & seditions. Quant aux autres, la memoire de Quirinius leur estoit odieuse, tant pour les crimes intentez cōtre Lepida (ainsi que i'ay dit cy dessus) que pour auoir esté sur la fin de ses iours auare, mechani-que, & esleué en trop de puissance.

*Clutorius
Priscus.*

*P. Petro-
nius.
Vitellia.*

Sur la fin de ceste annee Clutorius Priscus Cheualier Romain ayant receu quelque argent de Tibere pour quelques vers faits en la louange de Germanicus (par lesquels il deploroit la mort d'iceluy) fut accusé par vn delateur, qui luy mettoit à sus d'auoir composé ces vers pour Drusus, qui estoit malade, à fin que sil fust venu à mourir, il les eust mis en lumiere avec plus grande recompense. P. Clutorius par vne vaine gloire les auoit leuz en la maison de P. Petronius, en la presence de sa belle mere Vitellia, & plusieurs autres nobles femmes. Apres que l'accusateur se fut présenté, tous ceux qui auoient esté presens, de crainte qu'ils eurent, tesmoignerent incontinent ce qu'ils en auoient ouy, excepté Vitellia, qui afferma n'en auoir rien entendu: mais l'on adiouta plus de foy à ceux qui tesmoignoient contre l'accusé, tellement qu'il fut condamné à mourir par la sentence de Haterius Agrippa designé Cōsul. Cōtre lequel M. Lepidus commença à faire la harangue en ceste sorte:

Peres

Peres conscripts, si nous regardons seulement com- *Havague*
 bien ceste voix a esté meschante, par laquelle Cluto- *de M. Le-*
 rius Priscus a pollué & son esprit, & les oreilles des es- *pidius au*
 coutans: ie confesse qu'il n'y a prison, qu'il n'y a cor- *senat.*
 de, ny tourment par lequel on ait accoustumé cha-
 stier les serfs, qui soient suffisans pour le punir. Mais
 estans les crimes & meschans actes sans nombre &
 sans mesure: la modestie du Prince, & l'exemple de
 noz maieurs, & de vous, ont accoustumé les mode-
 rer, tant par punitions & supplices, que par remedes:
 car il y a difference entre les meschans actes, & les cho-
 ses qui sont vaines & de nulle consequence, entre les
 faits & les paroles. L'on peut bien donner vne sen-
 tence, par laquelle l'offense de Clutorius ne demou-
 rera impunie, & si n'aurons occasion de nous repentir
 ou de nostre clemence, ou de nostre trop grande se-
 uerité. J'ay souuent ouy nostre Prince se plaindre si
 quelqu'un se deffaisant soy-mesme, auoit preueni sa
 misericorde. La vie de Clutorius est en son entier, le-
 quel estant gardé ne peut nuire à la Republique: &
 s'il est deffait, ne peut servir d'exemple aux autres. Et
 certes tout ainsi que ses études sont pleines de follic
 & faute de sens, aussi sont elles vaines, & de peu de du-
 ree. Et ne faut auoir crainte qu'aucune chose graue
 ou de consequence puisse sortir de celuy qui luy mes-
 me est accusateur de ses meschancetez, & ne tasche à
 gaigner les cœurs des hommes, ains s'amuse à conter
 les affaires à ie ne sçay quelles femmelettes. Toutes-
 fois qu'on le chasse de la cité, & ses biens confisque,
 qu'il soit enuoyé en exil: Ce que ie prens ne plus ne

LE III. LIVRE DES ANNALES

*Rubellius
Blandus.*

moins que fil estoit conuaincu de leze maiesté. Il n'y eut entre tous les Consulaires que Rubellius Blandus qui fust de l'aduis de Lepidus: les autres suiuioint l'opinion d'Agrippa: parquoy Priscus fut mené en prison, & là mis à mort. Tibere par ses ambiguïtez accoustumées blasma ce fait au Senat, cōme s'il ne l'eust trouué bon, louât ce neantmoins le deuoir qu'ils rendoient au Prince, en punissant asprement les iniures à luy faites, tant petites fussent elles. Toutesfois il les prioit qu'une autresfois ils ne fussent si soudains & hastifs à faire punition de quelques paroles, louant Lepidus, sans toutesfois blasmer Agrippa. Parquoy lors y eut vn arrest du Senat, par lequel fut ordonné que les arrests d'iceluy ne seroient portez au lieu du thresor public, sinon apres vn iour passé, & que ce delay de viure seroit donné aux condamnez. Mais le Senat n'auoit liberté de se repentir, ny Tibere par le long laps de temps estoit adoucy. Apres cela C. Sulpitius & D. Haterius furent creéz Consuls.

*L'ambu-
scieuse
de Tibere.*

Ceste année fut sans aucuns troubles quant aux pays estranges: mais à la ville l'on craignoit que les excez & superfluitéz fussent reformez, pour estre desmesurées en toutes choses, esquelles inutilement l'argent est despendu. Aucunes de ces superfluitéz (iaçoit ce qu'elles fussent plus excessiues) estoient tenues couuertes & cachees, pour ce que le plus souuēt on en dissimuloit le pris. Mais le bruit qui couroit des excès & grandes despenses de bouche qui se faisoient és tauernes & cabarets, faisoient craindre que le Prince considerant la frugalité des anciens, n'en feist

feist quelque rigoureuse reformation. Or depuis que Bibulus eut commencé, tous les autres Ediles estoient venus à remonstrer comme l'on ne tenoit conte de la loy faite sur la despense: que le trop grand pris des ventiles deffendu, s'augmentoient de iour en iour, & que avec moyens remedes il estoit impossible d'y donner ordre. Le Senat requis de dire son aduis, remist tout cest affaire en la cognoissance du Prince. Mais Tibere ayant souuentefois considéré en soy mesme s'il seroit bien possible de reprimer ces superfluités tant excessiues, & si ceste reformatiō seroit point cause d'un plus grand mal en vne Republicque, considerant aussi qu'il estoit mal feant d'entreprendre vne chose de laquelle on ne peult venir à chef: ou si on en venoit à chef, ce ne pouuoit estre qu'avec l'infamie & ignominie des plus nobles & illustres personnes: finalement composa des lettres pour enuoyer au Senat, desquelles la teneur s'ensuit:

Peres conscripts, il seroit parauanture bon qu'en toutes autres choses ie fusse interrogé, & deisse mon aduis en personne: toutesfois en ceste relation il m'a semblé beaucoup meilleur de retirer mes yeux, à fin que quand vous prendrez garde à la contenance & à la crainte d'un chacun de ceux qui seront taxez de ceste honteuse despense, ie ne fusse aussi contraint de les veoir, & par maniere de dire les surprendre en ceste faute. Que si les Ediles gens soigneux & diligens m'eussent auparauant demandé mon aduis, i'eusse parauanture esté d'opinion que l'on eust plustost laissé là ces vices ja enracinez & par-

*Lettres de
Tibere au
Senat.*

LE III. LIVRE DES ANNALES

creuz, que faire tant que le monde cogneult quels vices il n'estoit en nostre puissance de corriger: mais certes ils ont fait leur deuoir, & à la mienne volonté que tous les autres Magistrats le feissent aussi bien en leur endroit. Quant à moy, pour mon honneur ie ne me puistaire, & si ne sçay bonnement que dire, pour ce que ie ne suis ny Edile, ny Preteur, ny Consul. L'on requiert du Prince vne chose plus haute, & de plus d'importance: & combien qu'un chacun retienne à soy la grace de ses biens-faits, toutesfois quand tous pechent, ou font quelque faute, tout le blasme en tombe sur le seul Prince. Car quelle chose commenceray-ie à deffendre, ou reduire à la mode ancienne? Commenceray-ie à la reformation des mestairies, lesquelles contiennent vn pays infiny? Au nombre de la famille & seruiteurs, si grande qu'on en pourroit faire vne nation? A l'infinité d'or & d'argent? Aux miracles des tableaux, & statuës de cuiure? A la superfluité des habits, qui touche aussi bien les hommes que les femmes? Ou bien à ces choses peculieres aux femmes, moyennant lesquelles nostre argent est transporté es nations estranges? Le n'ignore point que telles choses ne soient taxees par tous les bancquets & ieux publicques: & sçay qu'on demande qu'elles soient reduites à quelque certaine reigle & mesure: & toutesfois si l'on en fait vne loy ou ordonnance, son en establist quelque peine: vous verrez iceux mesmes crier que la cité est renuersee, que l'on tasche à faire mourir tous les plus apparens, & qu'il ny a personne qui se puisse sauuer qu'on ne luy iette le
chat

chat aux iambes. Et d'auantage nous voyons les maladies du corps venues de longue main & enracinees ne pouuoir estre iectees hors sans remedes violens & rigoureux: parquoy il faudra icy que le corrupteur, & celuy qui est corrompu, que l'esprit malade & embrasé de cupiditez, soit esteint par remedes nō moins forts & ardens, que sont les desordonnez appetits desquels il est embrasé. Il y a tant eu de bonnes loix inuentees par noz predecesseurs, tant d'autres establies par Auguste: mais estans les premieres venues en oubliance, & (qui pis est) les autres abolies par vn mespris & contemnement: les superfluites & dissolutions sont ensuiuiues sans soucy aucun d'en estre repris. Car si l'on veut deffendre vne chose qui n'ayt point encor esté deffendue, il y a seulement danger qu'on ne le vueille pas permettre: mais quand sans crainte de punition l'on viole & transgresse les loix, & ce qui est deffendu, lors n'y reste plus ny honte ny crainte aucune. Comment donc anciennemēt estoit entretenue frugalité? pource qu'un chacun regardoit à se donner quelque mesure. Nous estions cytoiens d'une seule ville: & mesmes estans ia seigneurs de l'Italie, nous n'auions encor ces aiguillons & prouoque-mens: mais depuis nous auōs appris à despēdre les choses d'autrui par victoires obtenues sur les estrangers, & les nostres par guerres & victoires ciuiles. Combiē peu de chose est ce dequoy les Ediles nous admōnestent? combien peu de compte en doit on faire, au regard de plusieurs autres? Et routesfois personne ne se plaint que l'Italie soit venue en tel estat, qu'elle à be-

LE III. LIVRE DES ANNALES

soing de l'aide des estrangers: nul ne se plaint que la vie du peuple est de iour en iour roullee par la mer incertaine, & par les tempestes: mais si les armées qui sont es prouinces, ne deffendent les maistres, les seruiteurs, & les terres, noz forests & mestairies nous deffendront elles? Voila, Peres conscripts, le soing que doit auoir le Prince, lequel obmis est impossible que la Republicque puisse aucunement subsister. Quant aux autres, il faut medeciner l'esprit. Et pour ce changeons noz manieres de viure en mieux: c'est à sçauoir, nous par vne honte honnestes: les patures, par necessité: & les riches, pour estre saouls & ennuyez de leur premiere vie. Toutesfois il y a aucun des Magistrats qui promette tant de son industrie & seuerité, qu'il y puisse donner ordre, ie louë cestuy, & confesse que par luy ie seray deschargé de partie de mes labeurs. Mais s'ils veulent seulement entreprendre d'accuser les vices, & apres auoir acquis honneur de cecy, viennent à susciter des inimitiez, les me laissant sur le doz: croyez Peres conscripts, que ie n'aime point à encourir la male-grace des hommes: & i'açoit ce qu'aucunesfois i'aye esté contraint d'y tomber à tort, pour le profit de la Republicque: si est-ce qu'à bon droit ie prie que ie ne l'encoure inutilement & en vain, & sinon pour le profit & de vous & de moy.

Les lettres de l'Empereur ouyes, les Ediles furent deschargez de ceste commission: toutefois petit à petit les excez & superfluitez de la table furent abolies avec le temps, lesquelles auoient continué en toute despenſe

despense excessiue depuis la fin de la guerre Actiaque
 iusques aux guerres par lesquelles *Sergius Galba* se
 fait seigneur de toutes choses. Et certes il me prend
 enuie d'esplucher les causes de telles mutations.

Anciennement les riches maisons de ceux qui estoient nobles ou de grand renom, venoient en decadence, & se ruinoient par leur magnificence: car des lors il estoit permis de faire presents pour acquerir la grace du peuple, des alliez & des Rois: & pareillement d'en prendre. Selon qu'un chacun estoit riche, & tenoit maison somptueuse, & magnifique appareil, d'autant plus il estoit grand & illustre entre ses vassaux, & sa renommee plus diuulguee. Mais depuis que l'on commença à s'entretuer, & que le grand bruit & renommee estoit cause qu'on cherchoit les personnes à la mort: les autres regarderent d'y besongner plus discrettement. Par ce moyen plusieurs hommes. nouveaux & peu cogneuz, qui habitoient es petites villes & colonies, & mesmes es pays prouinciaux, estoient souuent appelez pour estre faits Senateurs, lesquels amenerent quant & eux ceste parsimonie & frugalité de laquelle ils auoient accoustumé vser en leurs maisons. Et iagoit ce qu'aucuns d'eux ou par la fortune ou par leur industrie deuinssent riches sur leur aage, toutesfois ils entretenoient tousiours ce mesme vouloir, & la mesme maniere de viure. Mais *Vespasian* fut principal auteur de ceste estroite façon de viure, l'accousturant luy mesme & viuant à la mode ancienne. Depuis l'on a voulu complaire au Prince, & imiter

LE III. LIVRE DES ANNALES

ses façons, chose qui a beaucoup eu plus d'effect que toutes les peines desquelles les loix eussent sceu menasser: si d'aventure nous ne voulions dire qu'en toutes choses eut vne circonvolution & contour: & que les meurs se chageassent à leur tour, ne plus ne moins que font les temps. Et qu'ainsi soit, les manieres de faire des anciens n'estoient toutes meilleures que les nostres: & à nostre siecle laissé beaucoup de beaux arts & autres choses louables pour imiter à ceux qui viendront apres nous. Mais certes ie suis content que telles manieres de debats ne cessent point entre nous & noz ancestres.

*Puissance
Tribuna-
le.*

*Tibere
Nero.*

Or Tibere voyant qu'il auoit acquis le bruit de Prince modeste, pour auoir reprimé les accusateurs qui estoient prests d'eux attacher à vn chacun, enuoya lettres au Senat pour impetrer la puissance Tribunale pour Drusus. Or Auguste auoit inuëté ce terme, qui denotoit souueraineté, pour par iceluy monstrier qu'il estoit par dessus tous autres Magistrats, sans toutesfois prendre le nom de Roy ou de dictateur. Depuis il auoit pris Agrippa pour compagnon en ceste dignité: apres la mort duquel il meit Tibere Nero en sa place, à fin d'estre assuré d'un successeur: pensant par ce moyen qu'il reprimerait les mauuaises esperances des autres, se fiant en la modestie de Nero & en sa grandeur. Par cest exēple Tibere associa lors Drusus en ceste souueraineté: iagoit ce qu'auant la mort de Germanicus il n'eut monstrier plus de faueur à l'un qu'à l'autre. Et ayant au commencement de ses lettres prié les Dieux que toutes ses entreprises fussent

fussent salutaires à la Republique, fait aussi quelque peu de mention des meurs de ce ieune homme, sans rien y adiouster de faux. C'est à sçauoir qu'il estoit marié, & de sa femme auoit eu trois enfans: qu'il estoit en l'aage que luy mesmes pouuoit auoir quand il fut appellé au mesme estat par Auguste. Que non point maintenant à la haste, mais apres auoir fait experience de l'ay par l'espace de huiët ans: & l'ayant veu (apres auoir reprimé les seditions, & appaisé les guerres) triompher, & estre Consul par deux fois: il le prenoit pour compaignon de ce labeur à tous cogneu. Les Senateurs sçauoient ia bien auparavant tout ce qu'il deuoit dire, au moyen de quoy leur flaterie en fut plus exquise & premeditee: & toutesfois ils n'inuenterent rien de nouveau, sinon qu'ils ordonnerient qu'on dressast des effigies aux Princes: & des autels, des temples, & arceaux aux Dieux. Seulement M. Syllanus requist que l'en fait vn honneur aux Princes qui ne se pouuoit faire qu'avec la grande iniure & contumelie du Consulat: car il fut d'aduis qu'es actes & monumens tant priuez que publics pour la date & memoire des temps, l'on n'escriuist plus les noms des Consuls, mais le nom de ceux qui administreroient la puissance Tribunale. Pareillement Haterius fut moqué pour auoir esté d'aduis que les choses arrestees ce iour au Senat, fussent affichees à la Court escrites en lettres d'or: & ne rapporta cest ancien personnage autre chose de cecy, sinon vne infamie de sa vile & trop abiecte flaterie.

LE III. LIVRE DES ANNALES

Durant ces choses à Iunius Blefus fut continué le gouvernement d'Aphrique.

*Ser. Maluginensis
Flam.
Dial,
c'est pre-
stre de
Iupiter.
Ce sont
les pre-
stres de
Mars &
de Quiri-
nus, ou
Romulus*

Seruius Maluginensis qui estoit Flamine Dial, requist qu'il luy fut aussi permis de tirer au sort pour le gouvernement d'Asie: disant qu'en vain l'on auoit semé vn bruit qu'il n'estoit permis aux Flamines Diaux saillir hors de l'Italie: attendu que leur droit n'estoit point autre que celuy des Flamines Martiaux & Quirinaux.

*Cornelius
Merula.*

Consequemment puis que par sort ils auoient obtenu les Prouinces & gouuernemens d'icelles: pourquoy estoit le mesme prohibé & deffendu aux Flamines Diaux? car l'on ne trouuoit point qu'il y eut quelque ordonnance du peuple au contraire, & l'on ne se lisoit point es liures des ceremonies. Pareillement que souuentefois les Pontifes auoient fair & celebré les sacrifices de Iupiter lors que le Flamine estoit empesché ou par maladie, ou bien pour quelque affaire public. Que par l'espace de soixante & deux ans ou enuiron, & depuis la mort & trespas de Cornelius Merula, personne n'auoit esté subrogé en cest estat & dignité: & toutesfois la religion & ceremonies n'auoient laissé à estre entretenues. Si donc par tant d'annees l'on ne se peut passer d'en creer, sans le dommage des sacrifices: cōbien plus facillemēt se pourra l'on passer de sa presence pour vn an, luy estant Proconsul d'vne Prouince? Disoit aussi qu'anciennement les Pontifes à cause de leurs contentions & inimitiez auoient deffendu aux Flamines Diaux d'administrer les Prouinces: mais qu'aujour-
d'huy

d'huy par la grace des Dieux le souuerain Pontife estoit aussi souuerain sur tous les hommes, & non subiect à haine, à enuie, ou autres priuees affections. Apres que par Lentulus Augure, & autres, il luy eust esté respōdu en plusieurs sortes, la chose vint iusqu'à ce point qu'il fut dit qu'on attendroit l'aduis du souuerain Pontife. Parquoy Tibere voyant le iugement du droit du Flamine differé, modera aussi les ceremonies qui estoient decernees à Drusus à cause de sa puissance Tribunale, reprenant nommeement la sentence laquelle faisoit mention de lettres d'or contre la coustume du pays. Les lettres de Drusus furent aussi recitees : & jaçoit ce qu'elles semblassent tendre à modestie, furent toutesfois tenues pour superbes, & tref-arrogantes : & se plaignoient que les choses estoient venuës en tel estat, que ce ieune homme (ayant mesme receu vn tel honneur) ne daignoit aller visiter les Dieux de la cité, entrer au Senat, & commencer ses auspices en la terre de sa naissance. C'est (disoient ils) bien à propos de s'excuser sur la guerre, ou qu'il est en pays estrāge, lors qu'on sçait bien qu'il se pourmeine par les riuages de mer, & lacs de Champagne. Voila ce qu'il faut enseigner premierement à celuy qui doit auoir le gouuernement de tout le genre humain : voila ce qu'il doit apprendre premierement de tous les conseils de son pere. Quant à Tibere, trouue tant qu'il voudra la compagnie des citoyens ennuyeuse, & s'excuse sur son vieillaage, ou sur ses traux passez : mais quel empeschement peut auoir Drusus sinon son arrogance?

*c'est la
sentence
d'Haterius.*

LE III. LIVRE DES ANNALES

*Licence
des fran-
chises.*

Or Tibere establiſſant la force de ſa principauté, laiſſoit aux Senateurs quelque image & apparence de leur ancienne authorité, réuoyant les requeſtes des Prouinces pardeuant les Senateurs pour en cognoiſtre: car la licence d'edifier des autels & lieux de franchise pour l'impunité, ſe multiplioit de iour en iour par les villes de Grece. Les temples eſtoient pleins des plus meſchans eſclaues: les endebtez ſ'aydoient du meſme à l'encontre de leurs creditiers: & ceux auſſi qui eſtoiēt ſuſpects d'auoir fait cas dignes de mort. Et n'y auoit commandement ou deſſence puiſſant aſſez pour reprimer la ſedition du peuple, qui ſouſtenoit les meſchancetez des hommes, comme les ceremonies des Dieux. Il fut donc conclud que les citez enuoyeroient Ambaſſadeurs pour faire apparoir de leurs droits. Aucunes pource que fauſement elles auoient vſurpé ce droit, ne feirent aucun ſemblant d'y enuoyer. Plusieurs autres ſe fioiēt ou ſur leurs anciennes ſuperſtitioſs, ou ſur les ſeruices qu'elles auoiēt faits à la ville de Rome. Certainement ceſte iournee fut de belle monſtre & apparence, en laquelle le Senat eut la cognoiſſance des biensfaits des predeceſſeurs, des alliances des confederez, des ordonnances des Roys qui auoient eſté auant que les Romains fuſſēt creuz en telle puiſſance: pareillemēt des dieux: & ce avec pouuoir & liberté (comme au temps paſſé) de les confermer ou changer. Les Ephēſiēs ſe preſenterent les premiers, remonſtrans que Diane & Apollo n'auoient eſté nez en Delos, ainſi que le vulgaire crioit: mais qu'en leur pays y auoit vn lieu nommé.

Ephēſiēs.

Delos.

mé Ortygie pres le fleuve Cenchrius, ou Latona pre-
 ste à enfanter, & s'appuyant sur vn oliuier qui est en-
 cores en ce lieu, estoit accouchee de ces Dieux. Que
 par l'admonition des Dieux ceste forest auoit esté cō-
 sacree. Qu'Apollon apres auoir deffait les Cyclopes, en
 ce lieu mesmes euita la fureur de Iupiter. Que tost a-
 pres Bacchus estant victorieux auoit pardonné aux
 Amazones lesquelles s'humilians auoiét peu empoi-
 gner l'autel. Que la ceremonie de ce temple auoit esté
 augmentee par la permission de Hercules lors qu'il
 iouysoit de la Libye: & n'auoit ce droit esté aucune-
 ment diminué durant la seigneurie des Perses. Que
 depuis les Macedoniens l'auoient tousiours gardé, &
 nous apres eux. Consequemment vindrent les Ma-
 gnesiens, qui faidoient des cōstitutions de L. Scipio,
 & L. Sylla, l'vn desquels ayant chassé Antiochus, &
 l'autre Mithridates, auoient merueilleusement ho-
 noré la vertu & fidelité des Magnesiens, deffendans
 de violer aucunement la franchise de Diane Leuco-
 phryenne. Consequemment vindrent les Aphrodi-
 siens & Stratoniciens, qui apporterent vne ordon-
 nance du Dictateur Cesar pour les anciens seruices
 qu'ils auoient faits ayans tenu son party: & vne
 autre toute nouuelle faite par Auguste. Ceux furent
 aussi louez d'auoir soustenu les courses & irruptions
 des Parthes, sans auoir mué aucunement leur
 constance enuers le peuple Romain. Mais les Aphro-
 disiens maintenoient la religion de Venus, & les Stra-
 toniciens celle de Iupiter & de Diane. Quant à
 ceux de Hierocesarée, ils exposerent bien de plus

Ortygie.
 Cenchrius
 fleuve.
 Latona.

Apollo.
 Cyclopes.

Bacchus.
 Ama-
 zones.

Hercules.

Magne-
 siens.
 L. Scipio.
 L. Sylla.

Dia
 Leuco-
 phryene.
 Aphro-
 disiens.
 Stratonici-
 ens.

Hieroco-
 saree.

LE III. LIVRE DES ANNALES

loing la dignité de leur Diane Perfique: & comme ce temple auoit esté fait du temps du Roy Cyrus, ramenant en memoire ie ne sçay quels Perpendes, Isauriques, & plusieurs autres noms d'Empereurs lesquels auoient octroyé ceste sainteté non seulement à ce temple, mais à deux mil à l'environ. Les Cypriens vindrent apres avec leurs trois temples, le premier & plus ancien desquels auoit esté basti par Aërias en l'honneur de Venus Paphie, & l'autre par son fils Amathus en l'honneur de Iupitet Salminius, lors qu'il estoit fugitif pour l'ire de son pere. Plusieurs Ambassadeurs d'autres citez furent aussi ouys: tellement qu'estans les Senateurs ennuyez de la multitude d'iceux, & pour ce qu'ils debattoient qui auoit le plus fait de seruices, permirent aux Consuls qu'apres auoir examiné le droit d'un chacun (s'ils y trouuoient quelque iniquité entremeslee) ils renuoyassent de rechef la chose en l'estat qu'elle estoit, au Senat. Les Consuls outre les citez que i'ay cy dessus specifiees, feirent leur rapport d'un autel dedié à Esculapius qui auoit esté trouué à Pergame: disans au surplus que tous les autres se fondaient sur commencement trop obscurs pour l'antiquité: car les Smyrniens mettoient en auant un oracle d'Apollo, par le commandement duquel ils auoient dedié un temple à Venus Stratonicide: & les Tenediens produisoient le mesme vers, par lequel leur estoit commandé de consacrer une effigie & un temple à Neptune. Quant aux Sardiens, qu'ils parloient de choses plus fresches, alleguans qu'ils auoient eu ce don de franchise, d'Alexandre victorieux. Et non moins

moins qu'eux, les Milefiens, auxquels auoit esté permis de s'aider en leurs franchises de leur Roy Dareus: moyennant que les vns & les autres adorassent ou Diane, ou Apollo. Les Cretois demanderent le mesme pour le simulachre d'Auguste. Au moyen dequoy y eut arrests du Senat par lesquels en toute reuerence on leur ordonnoit vne certaine reigle & moyé: leur commandant au surplus de faire ces autels (instituez pour la memoire) dedans les temples mesmes, à fin que sous couleur de religion ils ne tombassent en ambition.

En ce mesme temps pour ce que l'Imperatrix Iulia fut fort malade, le Prince fut contraint de haster son retour en la ville: estant encores la paix pure & sincere entre la mere & le fils: ou sil y auoit quelque haine, elle estoit fort couuerte: car comme peu auparauint Iulia dediait vne effigie à Auguste aupres du Theatre de Marcellus, elle auoit fait escrire le nom de Tibere apres le sien. Et croyoit l'on qu'il auoit fait semblant de ne se foucher de telle chose, comme indigne de la Maiesté d'un Prince: dissimulât ceste offence, laquelle neantmoins luy estoit griefue à supporter. Toutesfois lors le Senat feit faire processions generales, & furent les grands ieux decerneez par le Senat, lesquels les Pontifices, Augures, & Quindecimuires deuoient faire iouer pour l'honneur des Septemuires & confreres Augustaux. L. Apronius auoit esté d'avis que les Feciaux ou Heraux d'armes presidassent aussi en ces ieux: ce que Tibere ne voulut permettre, faisant distinction des droits des prestres, & ramenant les

*Maladie
de l'impe-
ratrix.*

Feciaux.

LE III. LIVRE DES ANNALES

anciēnes exemples en memoire. Car (disoit-il) l'on ne trouue point que les Feciaux ayent. iamais eu ceste autorité, parquoy les confreres Augustaux y furent adioints, pour ce que ceste prestrie estoit peculiere à la maison pour laquelle ces vœux estoient faits. Or n'ay-ie point icy deliberé de deduire par le menu les sentences d'un chacun, sinon celles qui sont excellentes ou pour leur honnesteté, ou notables par leur infamie: & en ce ie pense que consiste le principal deuoir des annales: à fin que les choses vertueuses ne soient tenues en silence, & qu'il y ait quelque crainte de mal dire ou de mal faire pour l'infamie & memoire de la posterité. Au surplus ces temps furent tant infects de vile & abiecte flaterie, que non seulement les plus grands de la cité (ausquels il estoit necessaire faire ioug pour contregarder leur estat & dignité) mais aussi tous ceux qui auoient esté Consuls, vne grande partie de ceux qui auoient esté Preteurs, & plusieurs Senateurs Pedaires se leuoient à qui mieux mieux pour mettre en auant choses viles & infames, & en trop grand nombre. L'on a escrit que toutes & quantesfois que Tibere sortoit du Senat, il auoit accoustumé de dire en termes Grecs, O hommes disposez & prompts à la seruitude: estant ennuyé (luy qui ne demandoit rien moins que la liberté publique) de la patience de ceux qui se rendoient en vn si vil & abiect seruice. Lors petit à petit des choses mal seantes & deshonestes ils vindrent aux pernicieuses & dangereuses. Syllanus Proconsul d'Asie (duquel les alliez festoient plains pour les concus-

sions

*Pedaires,
estoiēt
Senateurs
qui al-
loient à
pied au
senat, ou
qui ne di-
soient
point au
long leur
opinion,
ains seu-
lement
passoient
au costé
de celuy
duquel ils
approu-
uoient
l'opinion.
Syllanus.*

sions qu'il faisoit) fust accusé par Mamercus Scaurus autrefois Consul: par Iunius Otho Preteur: & par Brutidius Niger Edile. Lors tous ensemble s'attachent à luy, luy mettants à sus qu'il auoit violé la diuinité d'Auguste & mesprié la maiesté de Tibere. Entre autres Mamercus ramenoit les anciennes exemples, & allegoit comme L. Cotta auoit esté accusé par Scipion l'Aphricain, Sergius Galba par Cato Cenforius, & P. Rutilius par M. Scaurus. Mais c'estoit bien à propos, & est bien vraysemblable que Scipio & Cato se souciaissent de telles choses: ou bien ce grand Scaurus, lequel (pour luy estre imposée vne œuvre si deshonneste) estoit diffamé par ce Mamercus deshonneur de tous ses ancestres, & duquel il estoit bisayeul. Iunius Otho de son premier mestier auoit esté maistre d'escholes: depuis il fut fait Sénateur par la puissance & autorité de Scianus: & souilloit encor d'auantage ses obscurs commencemens par ses trop eshontées entreprises. Brutidius qui sçauoit faire beaucoup de bonnes choses, & qui estoit homme pour paruenir à choses hautes (s'il eust pris le bon chemin) n'auoit pas la patience d'attendre sa fortune, ains pressé d'une hastiueré, taschoit à surmonter ses egaux, puy les superieurs, & finablement ses esperâces mesmes. Et certes cecy a esté cause de ruiner plusieurs gens de bien, lesquels laissant là les choses qui se peuuent faire avec vne tardiuë assurance, courent aux choses soudaines & precipitees, encor qu'elles soyent ioinctes à leur ruine. Le nombre de ses accusateurs fut augmenté par Gellius Publicola, & par M. Paconius. l'un estoit receueur de Syllanus, & l'autre son ambassadeur. Or il n'y auoit aucune

*Iunius
Otho.*

LE III. LIVRE DES ANNALES

doute que l'accusé ne fust coupable d'auoir esté cruel, & d'auoir pris de l'argent: mais avec cela on luy r'amasoit encor plusieurs choses, lesquelles eussent esté dangereuses mesmes pour les innocens. Car outre ce qu'il auoit plusieurs Senateurs cōtre luy, il fut cōtraint de respondre aux plus faconds & eloqués de tout l'Asie, qui pour ceste cause auoient esté esleuz à ceste accusation, cōbien qu'il fust seul sans aduocat, non accoustumé de plaider, & perturbé de son propre danger, chose qui pourroit debilitier & rendre foible, vne eloquēce encor qu'elle fust des plus duićtes & exercitees. Qui plus est, Tibere ne se pouuoit contenir qu'il ne le pressast ou de paroles, ou par la contenance: & à tous coups l'interrogoit, sans qu'il luy fust permis de contredire ou renuerſer les obiections: mesmes estoit souuent contraint de cōfesser ce qu'il demãdoit: à fin que sans cause il ne fust veu l'auoir demãdé. D'auātage le greffier auoit acheté les seruiteurs de Syllanus, à fin qu'ils fussent mis en la question pour estre interrogez. Et à fin que nul de ses parés ou amis ſaydaſt en ceste extremité, on l'accusoit de lesemaieſté, au moyen dequoy à tous estoit imposé vn lien & vne neceſſité de se taire. Ayant donc l'accusé demandé delay de quelques iours, laissa-là sa defense, & s'enhardit d'enuoyer des Codicilles à Cesar, par lesquels il le prioit & blasphemoit quant & quant. Tibere, à fin qu'en allegant exemples aduenües en pareil cas, il se rendist plus excusable de ce qu'il machinoit contre Syllanus, feit apporter les libelles d'Auguste touchant

Voleſus
Meſſala. Volēſus Meſſala Proconſul de la meſme Asie, & commanda que l'arrest du Senat faićt contre luy fust recité. Cō-

té. Consequemment demanda l'aduis de L. Piso: lequel apres auoir fait quelques preambules de la clemence du Prince, fut d'opinion qu'il le failloit bannir & confiner en l'isle Gyare. Les autres conclurent de mesmes, excepté Lentulus, qui fut d'auis que pour autant que Syllanus estoit yssu d'une autre mere, ses biens maternels deuoient estre separez & renduz à son fils: à quoy Tibere se consentit. Mais Cornelius Dolabella pourfuyuant plus loing sa flaterie, apres auoir aigrement repris les mœurs de Syllanus, adiousta que nul de vie deshonneste ne tireroit au sort pour estre faict gouverneur de prouince: & que le iugement de cecy appartiendroît au Prince: pour ce que quant aux crimes ils estoient assez puniz par les loix. Car (disoit-il) combien seroit-il meilleur pour eux, & pour les alliez, que l'on donnast ordre que l'on ne feist point de mal? Cesar respondit au contraire, qu'il estoit assez aduertý de ce qu'on disoit de Syllanus: mais qu'il ne failloit ainsi faire les ordonnances sur vn bruit de ville. Que plusieurs s'estoyent portez en leurs prouinces pirement que l'on n'esperoit: & d'autres non du tout si mal comme l'on craignoit. Qu'aucuns par la grandeur des choses estoient incitez à deuenir gens de bien, & mieux faire leur deuoir: & les autres y deuenoient nonchallans & paresseux. Que le Prince par son sçauoir ne pouuoit toutes choses comprendre: & n'estoit expedient qu'il fust empesché de l'ambicion d'autrui. Que pour autant que les choses à aduenir sont incertaines, les loix auoyent esté establies sur les choses ia aduenues: & que pour ceste cause les anciens

LE III. LIVRE DES ANNALES

auoient ordonné, que ou le delict auoit precedé, la peine deuoit ensuyure. Et pource qu'il n'estoit bon de renuerfer les choses prudemment inuentees, & tousiours obseruees. Queles Princes auoient assez de charges, assez de puissance: & s'amoindriroient ces charges, leur puissance s'augmentant. Parquoy ne failloit vler de puissance absolue, ou l'on auoit moyé d'y proceder par les loix. Ces propos, d'autant que moins souuent Tibere se mōstroit courtois & humain, d'autant furent receuz avec plus de ioye. Et luy qui se sçauoit fort bien contenir (si non qu'il fust meü de son propre courroux) dist d'auantage que l'isle ou l'on vouloit confiner Syllanus, estoit trop sauuage & inhabitee, & pource qu'ils octroyassent cela à la famille des Iuniens, & a celuy qui autrefois auoit esté avec eux en la mesme dignité, qu'il fut plustost enuoyé en l'isle Cytheree: attédu mesme que sa sœur Torquata vierge de saincteté ancienne, le requeroit: ainsi chacun s'arresta à ceste sentence.

Cyreni.
Cesius
Cordus.
Anchari
rim Priscus.
Ennius

Depuys les Cyreniens furent ouyz, & fut Cesius Cordus accusé par Ancharius Priscus & condamné de concussions & deniers mal prins: mais Cesar ne voulut pas que Lucius Ennius cheualier Romain accusé de maiesté pour auoir employé l'argent des effigies du Prince à faire vaisselle de laquelle l'on vse indifferemmēt, fust pourtant mis au nombre des reés & criminels: contredisant à ce publiquement Atteius Capito, comme par vne maniere de liberté, & disant qu'on ne deuoit pas oster au Senat la puissance d'en ordonner, & qu'un tel malefice ne deuoit demourer impuny. Que l'Empereur (eüst-il) face tant qu'il vouldra le tardif es choses qui le
rou-

toucheront, toute fois il ne doit pas passer ainsi legere-
 ment les iniures faiçtes à la republique. Tibere entendit
 mieux ces choses ainsi qu'à la verité elles alloient, que
 non pas comme elles estoient diçtes: parquoy il pour-
 suyuit ce que premierement il auoit requis: mais l'infamie
 de Capito fut d'autant plus euidente & à tous co-
 gneuë, que plus il estoit expert en droict diuin & hu-
 main, & auoit prophané & deshonoré ces choses excel-
 lentes en la republique, & honnestes en priué. Depuis
 on eut deuotion de regarder en quel temple seroit col-
 loqué le don qui par les Cheualiers Romains auoit esté
 voué à la Fortune Cheualiere pour le salut & santé de
 l'Imperatrix: car iagoit ce qu'en la cité y eust plusieurs
 temples edifiez au nom de ceste deesse, si n'en trouoit
 l'on pas vn qui fust ainsi surnommé. A la fin son trouua
 qu'à Antium il en y auoit vn ainsi appellé. Et pource que
 toutes les ceremonies qui se faisoient en toutes villes
 d'Italie, tous temples & effigies des dieux estoient soubz
 le droict de l'empire Romain: il fut ordonné que ce pre-
 sent demoureroit à Antium. Or pour autant que l'on es-
 toit sur les propos de la religion, Cesar donna à enten-
 dre la responce que n'agueres il auoit differee cõtre Ser-
 uius Maluginensis Flamine Dial, & recita, le decret des
 Pontifes, par lequel estoit ordonné que toutes & quan-
 tes fois que le Flamine Dial se trouueroit mal, le grand
 Pontife luy dõneroit congé de sortir de la ville, à la char-
 ge de ne coucher plus de deux nuiçts dehors: & aussi
 moyennant que ce ne seroit au tẽps des sacrifices pu-
 bliques, & pl^s de deux fois envn an. Ces choses establies
 du temps d'Auguste, monstroient assez qu'aux Flami-

*Fortune
Cheualie
re.*

Antium.

*Ordonnã.
ce des Põ-
tifes tou-
chant le
Flamine
Dial.*

LE III. LIVRE DES ANNALES

L. Metell. nes Diaulx l'absence d'un an & administration des provinces n'estoit permise. On amenoit là dessus l'exemple
Aul. post. Aulus Posthumius Flaminius de demourer en la ville. Par
Posthumius. ainsi le sort de la province d'Asie fut conféré à celui des
Lepidus. consulaires, qui estoit le plus prochain apres Maluginensis. En ce mesme temps Lepidus feit requeste au Senat, qu'il luy fust permis faire rebastir & raccoustrer à ses despens le Palais de Paulus, memoire & monument de la famille des Emiliens: car encor en ce temps la magnificence publique estoit en vſage, & d'auantage Auguste n'auoit repris Taurus, Philippus, ny Balbus, d'auoir employé les despouilles des ennemis, ou le trop de leurs richesses pour l'ornement & decoration de la ville, & gloire de la posterité. Par lequel exemple Lepidus lors (encor qu'il ne fust fort pecunieux) voulut rafraischir l'honneur de ses predecesseurs. Mais comme le theatre de Pompee eust esté bruslé par cas fortuit, & n'y eust en sa famille homme assez riche pour le remettre au dessus: Tibere promist le faire reedifier, voulant neantmoins que le nom de Pompee luy demourast. Et par mesme moyen loua fort Seianus, comme si par son labeur & diligence la vehemence & force de ce feu eust esté empeschée de brusler plus outre. Pour ceste cause le Senat ordonna que l'effigie de Seianus seroit mise au theatre de Pompeius. Tost apres comme Tibere donnaſt les enseignes de triomphe à Iunius Bleſus Proconsul d'Aphrique, il dist qu'il donnoit cela à l'honneur de Seianus, duquel Bleſus estoit oncle: iacoit ce que les actes & choses escheues par Bleſus meritaſſent bien un
aussi

aussi grand hōneur. Car encor que Tacfarinas eust sou-
 uentes fois esté repoullé, toutes fois ayāt recouuert nou-
 ueles forces & aydes au milieu de l'Aphrique, estoit mō-
 té en tel orgueil, qu'il ausa enuoyer ambassades à Tibere,
 luy demandant terres habitables pour luy & pour ses
 gēs: & en son refus le menassāt d'une guerre de laquelle
 à peine se pourroit il desuelopper. L'on dit que iamais
 Tibere ne fut si fasché d'outrage qui fust faict à luy, ou
 au peuple Romain: que de veoir vn tel trahistre & brig-
 ant faire ne plus ne moins qu'eust faict vn iuste enne-
 my: Car si iamais Spartacus (lequel apres la defaictē de
 tant d'armees consulaires brustoit sans aucune resistan-
 ce toutel'Italie) n'auoit en temps que la republique es-
 toit toute rompuē des grandes guerres de Sertorius
 & Mithridates, seulement sceu obtenir d'estre receu a-
 uec paction au sauſconduict des Romains: tant moins
 ce larron Tacfarinas (estant la republique florissante) se
 deuoit acheter par paix, ou par octroy & deliurance de
 terres & pays. Parquoy il encharge à Bleſus que quant
 aux autres il tasche à leur faire laisser les armes, les asseu-
 rant qu'ils n'auront point de mal: mais quant au ca-
 pitaine, qu'il l'ait mort ou vif. Moyennant ceste gra-
 ce plusieurs se rendirent. Tost apres on feit la guerre
 à Tacfarinas avec les mesmes ruses desquelles il auoit
 accoustumé d'vser: car voyant son armee n'estre si puis-
 sante que celle des Romains, se monstroit le plus ex-
 pert à piller & desrober: faisoit diuerſes courſes en
 bandes separees, trompant son ennemy, & luy dres-
 sant plusieurs embusches & eschauguettes: parquoy
 pour le seruir de mesmes, on separa l'armee en trois

*Tacfarina-
nas.*

LE III. LIVRE DES ANNALES

diuerſes batailles. De la premiere eſtoit chef l'Ambaſſadeur Cornelius Scipio, & ſe tint à l'endroiēt par ou l'on penſoit que Tacſarinas paſſeroit allant piller les Leptins, & ou les Garamantes auoient colloqué leur refuge. Le fils de Bleſus mena les gens dont il eſtoit conducteur, d'un autre coſté: à fin que les bourgs des Cirtoys ne ſe peuſſent aiſement ioindre avec luy. Bleſus qui eſtoit chef ſe miſt au milieu avec ceux qu'il auoit choiſiz: & ayant dreſſé fortereſſes & baſtillons és lieux plus conuenables, auoit enſerré ſes ennemis, & fait que toutes choſes leur eſtoient contraires: car de quelque coſté qu'ils ſe tournaffent, ils auoient touſiours quelque bande de Romains ou en barbe, à coſté, ou ſur la queue: au moyē dequoy en y eut pluſieurs de deceuz & d'occis. Lors Bleſus diuiſa de rechef ces trois armées en pluſieurs autres bandes, ſur leſquelles il commiſt centeniers la vertu deſquels eſtoit experimētee. Et à la fin de l'eſté ne ſe fit retirer ſes gens comme eſtoit la couſtume, ny les enuoya en l'anciēne prouince ou ils ſouloient paſſer l'hiuer: ains ayant diſpoſé ſes forts comme au commencement d'une guerre, avec ſes cheuaux legers & gens qui cognoiſſoient les deſerts, repoulſoit & renuerſoit Tacſarinas (qui ſouuent faiſoit changer de place à ſes tentes & loges) iuſques à ce qu'ayant pris le frere d'iceluy Tacſarinas, il ſe retira pluſtoſt qu'il n'eſtoit de beſoin aux allies, ayant laiſſé gens qui pourroient incontinent renouerler ceſte guerre. Mais Tibere prenant ceſte choſe comme pour toute acheuee, permiſt que Bleſus fuſt ſalué par les legions comme Empereur, qui eſtoit l'honneur qu'anciennement l'on donnoit aux chefs d'armées, leſquels
pour

pour le deuoir qu'ils auoient fait pour la Republique, estoient par les soldats victorieux en ceste sorte haultement appelez. Et y auoit plusieurs Empereurs en vne armee, sans que toutesfois l'un fut plus grand que l'autre. Depuis Auguste octroya ce nom à quelques vns, & pour lors Tibere à Blesus. Finablement en ceste mesme annee moururent de gens d'estat Asinius Salonius, lequel estoit fort noble pour estre petit fils d'Asinius Pollio & de M. Agrippa, frere de Drusus, & accordé pour mary à la petite fille de Tibere. Pareillement mourut Atteius Capito, duquel nous auons cy dessus fait mention: lequel pour estre sçauant en droit ciuil, estoit vn des principaux de la cité, iadis ce que son ayeul ne fut que Centenier, & son pere Pretorien. Auguste l'auoit poulsé au Consulat: à fin que par la dignité de ce Magistrat il precedast Antistius Labeo, lequel ne luy deuoit rien quant à ceste science. Et eut ce siecle deux chefs d'euures du temps de paix. Labeo soustenoit la liberté en plus grande incorruption, au moyen dequoy sa renommee estoit plus grande. Mais Capito pource qu'il se sçauoit mieux accommoder à la seruitude, estoit plus agreable aux Princes. L'iniure faicte à Labeo pour estre demouré au degré de Preture, le feit beaucoup plus estimer: mais Capito pour auoir monté iusques au Consulat, s'estoit d'une simple enuie suscité vne haine & malueillance.

En ce mesme tēps Iunia fille de l'aisné Cato, femme de C. Cassius, & sœur de M. Brutus, alla de vie à trespas, qui fut soixante quatre ans apres la guerre Phi-

LE III. LIVRE DES ANNALES

*Generail-
les de Lu-
nia.*

lippenſe. Il fut grand bruit de ſon teſtament entre le peuple, car ayant (pour ſes grandes richèſſes) nommé tous les plus apparens de la cité pour heritiers, elle ne feit aucune mention de Tibere: ce que toutesfois il ne print en mauuiſe part, & permitt qu'elle fut louee deuant les Roſtres, & que ſon corps fut honoré de toutes autres ceremonies funebres. Deuant iceluy eſtoient portees les effigies de vingt cinq nobles familles, comme des Manliens, des Quintiès, & autres de pareille nobleſſe. Mais entre autres Caſſius & Brutus ſe faiſoient veoir, & ce ſeulement pource que leurs effigies n'y eſtoient point veuës.

FIN DV TROISIESME LIVRE DES
ANNALES DE P. CORNILE TACITE
CHEVALIER ROMAIN.

LE



LE QUATRIESME LI- VRE DES ANNALES DE

P. CORNILE TACITE

CHEVALIER ROMAIN.



ORS que C. Asinius & C. *L'ā neuf-
iesme de
Tibere.*
Antistius furent Consuls,
il y auoit ia neuf ans que
Tibere auoit donné ordre
aux affaires de la Republi-
que, & rendu sa maison flo-
rissante (car aussi il nom-
broit entre ses bonnes for-
tunes la mort de Germa-
nicus) quand soudainement

& à l'impourueu la fortune commença à exiter de
grands troubles. La cause & commencement vint
de Elius Seianus, qui pour lors estoit grand maistre, *Elius Se-
ianus.*
de la puissance & autorité duquel nous auôs cy des-
sus fait mention. Je racompteray maintenant en brief
son origine, ses meurs, & par quels moyens il taschoit
à vsurper l'Empire. Seianus donc natif de Vulstines, &
fils de Seius Strabo Cheualier Romain, suyuit durant
sa ieunesse C. Cesar petit fils d'Auguste, nō sans souf-
peçon d'auoir prostitué son corps pour argēt à Api-
hh ij

LE IIII. LIVRE DES ANNALES

cus homme fort riche & prodigue. Depuis par merueilleuses & diuerfes ruzes il gaigna le cœur de Tibere de telle sorte, qu'encor qu'en l'édroit de tous autres il fut merueilleusement couuert: à cestuy seul toutesfois il ne cachoit riē, ny se desioit de luy aucunemēt. Et n'auoit Seianus gaigné ce point tant par son astuce (car luy mesme fut par ses ruses & finesses surpris) que par l'ire des dieux courrouceez contre la Republique de Rome: car elle ne receut moins de dommage par sa ruine qu'elle auoit au parauāt fait par son exaucement. Quant au corps, il estoit patient de trauail, en courage audacieux, couuert en les affaires, & grād accusateur d'autrui, & si n'estoit moins grand flateur qu'il estoit fier & arrogant. Deuant le monde il faisoit du modeste & du honteux, toutesfois en secret il auoit vne grande conuaitise de deuenir grand: & pour ceste cause faisoit aucunesfois de grandes largesses & superfluitez: & le plus souuent vsoit de trauail de vigilāce, lesquelles ne sont moins nuibles que les autres, quand elles sont dissimulees en intention de se faire seigneur du royaume. Il augmenta la puissance de grand maistre, laquelle au parauant estoit mediocre, assemblant en vn fort les cohortes Romaines qui estoient dispersees ça & là parmy la ville, à fin qu'ensemblement ils receussent les charges & commandemens, & creut on que (pour le nombre & force qu'ils auoient, & pour s'entreueoir ordinairement) l'assurance qu'ils auoient d'eux mesmes, & la crainte des autres, estoient augmentees. Or à fin de faire trouuer cecy bon, il disoit que quand les soldats.

dats sont ainsi espars çà & là, ils ne font que follastrer: ou au contraire quand ils sont assemblez, avec plus grande force ils peuuent donner aide, si d'auanture il suruenoit quelque soudain affaire: & d'auantage que ils viuroient en plus grande seuerité, si leur fort estoit vn peu esloigné des plaisirs & auayemens de la cité. Estant ce fort acheué, il commença petit à petit à gaigner le cueur des gens d'armes, & visitant souuent, les appellant par leur nom, & eslistant luy mesme les Tribuns & Centeniers. Qui plus est, ^{1^{re}} se bastenoit de gaigner le Senat par ambition, distribuant les dignitez & gouuernemens des prouinces à ses clients & vassaux. En quoy Tibere se monstrois si facile & si enclin à trouuer bon tout ce qu'il faisoit, que non seulement és propos qu'il tenoit en priué, mais aussi en plâin Senat & en l'assemblée du peuple, il l'estolloit, l'appellant compaignon de ses labeurs: & permettoit que ses effigies fussent adonnées par les theatres & lieux publicques, & mesme entre les principales bandes des legions.

Or ce qui retardoit son entreprise, estoit qu'il voyoit la maison de Tibere si bien fournie d'enfans, en laquelle y auoit vn fils ieune, & des neueuz assez grâs: ioint que la chose estoit fort hazardeuse d'en assaillir par force tant à la fois, & requeroit ceste fraude que les meschancetez fussent executees par interualles. Toutesfois il esleut la voye qui luy sembloit pl⁹ couuerte, & voulut cōmencer à Drusus, cōtre lequel il auoit cōceu quelq^e nouuelle haine: car cōme quelque

LE IIII. LIVRE DES ANNALES

debat se fut esmeu entre eux deux, Drusus ne pouuât souffrir aucū qui raschast à estre aussi grād que luy, & qui estoit assez aisé à courroucer, auoit leuē la main pour frapper Seianus: & cōme il luy paroît le visage, luy auoit donné sur la ioue. Doncques voulant Seianus experimenter toutes choses, il trouua le plus expedient de s'adresser à Liuia femme de Drusus. Celle estoit sœur de Germanicus, laquelle estant au commencement de son aage assez laide, estoit en peu de temps creüe en toute beauté. Ainsi il feit tant (saignant estre passionné de son amour) qu'il la cogneut par adultere. Et ayant en ceste meschanceté iouy d'elle premièrement (car vne femme qui abandonne son corps & sa pudicité, à peine refusera elle autres choses) elle luy donna esperance de l'auoir à femme, d'estre fait compagnon de l'Empire, & le sollicita à la mort de son mary. Ainsi ceste femme qui estoit petite fille d'Auguste, bru de Tibere, & auoit des enfans de Drusus, souilloit sa personne, ses ancestres & successeurs, se foraisant avec cest homme venu de bas lieu: & preferant aux choses presentes & honnestes, l'expectation des choses infames & incertaines. Eudemus grand amy & medecin de Liuia fut fait participant de ce conseil, lequel auoit moyen de souuent communiquer en secret souz couuerture de son art. Seianus aussi chassa de sa maison Apicata sa femme, de laquelle il auoit eu trois enfans, à fin que ceste concubine n'eust sur elle quelque ialousie. Mais la difficulté & grādeur de ceste entreprise, les mettoit en merueilleuse crainte, tellement qu'elle leur faisoit prendre

Liuia femme de Drusus.

Eudemus.

Apicata femme de Seianus.

prendre plusieurs delais, & bien souuent diuerſes ſortes de conſeils. Durant ces menees vn des fils de Germanicus nomm   Druſus, fut au commencement de l'annee veſtu de robbe virile, & fur  t renouu  lles en luy toutes les choſes qui auoient eſt   decernees par le Senat    ſon frere Neron. Tibere feit lors vne har  gue en laquelle il louoit fort ſon fils, pource qu'il vſoit d'vne affecti   paternelle enuers les enfans de ſon frere. Car Druſus (combien qu'il ſoit fort difficile que la puiſſance & la paix ſoient en vn meſme lieu) m  ſtroit qu'il vouloit moult de bi      ces enfans: pour le moins il ne faiſoit choſe qui donnaſt quelque apparence qu'il leur fut en quelque ſorte contraire.

Apr  s cela la deliberation que Tibere faigno  t de l  g temps auoir de viſiter les Prouinces, fut miſe en au  t, & preno  t ſa couuerture ſur ce qu'il y auoit trop gr  de multitude de vieux ſoldats, & qu'il fallo  t en choiſir de nouueaux pour fournir les armees, pource que l'on en trouuo  t peu qui volontairement vouliſſent ſuiu  re la guerre: & ou ils ſ'en trouuo  i  t quelques vns, ſi n'auoient ils garde d'eſtre ſi vertueux ny modeſtes: pource que le plus ſou  t ceux qui d'eux meſmes ſe mettoient    la guerre, eſto  i  t pour la pluſpart pauures & vagabonds. L   deſſus il feit vn brief recit des legions, & des Prouinces qui eſtoient ſous la garde d'icelles. Mais ie penſe qu'il ne ſera impertinent, ſi ie declare auſſi en ceſt endroit combien de g  s les Romains auoient pour lors en leurs armees, quels Roys eſtoient avec eux confederez, & c  bien depuis l'Empire ſ'eſt amoin  dy.

LE IIII. LIVRE DES ANNALES

*Nombre
des gens
que les
Romains
auoient
en leurs
armees.*

L'Italie auoit des deux costez deux armées de mer, l'une à Misene, & l'autre à Rauenne. Le riuage prochain des Gaules estoit gardé par les galeres, lesquelles Auguste (apres qu'il les eust conquises en la bataille Actiaque) auoit enuoyees à Friol, garnies de trempuissans forcats. Mais la principale force consistoit en huit legions qui estoient aupres du Rhin, qui seruoient pour les affaires tant des Gaules que des Germanies. Pareillement en y auoit trois pour tenir en subiection les Espagnes nouuellement conquises. Le Roy Iuba auoit le Royaume des Maures par donation que luy en auoit faite le peuple Romain. Tout le reste de l'Aphrique auoit deux legions, & le pays d'Egypte autant. Consequemment tout ce grand pays qui est depuis le commencement de Syrie iusques au fleuue Euphrates, estoit contenu & gardé par quatre legions. Les Rois là habitans estoient Hyberus, Albanus, & autres, lesquels par la grandeur de l'Empire Romain estoient soustenuz contre les autres Rois estrangers. Thrace estoit sous la charge de Rhoemetalces, & des enfans de Cotys. Le riuage de la Danoe estoit gardé par quatre legions, deux desquelles estoient en Hongrie, & les deux autres en Mesie. Tout autant y en auoit en Dalmatie, lesquelles estoient au dos de celles là, pour la situation de la region, à fin que si suruenoit quelque vrgent affaire à l'Italie, il ne fallust les aller chercher trop loing: iacoit ce que la ville de Rome eust pour sa garde ses gens d'armes propres: sçauoir trois cohortes de la ville, & neuf pretorienes, lesquelles auoient esté prises & choisies
des

des pays d'Ethruzie, Vmbrie, & de l'ancien Latium, tous anciennement enuoyez de Rome pour là habiter. Mais és endroits des prouinces plus commodés estoient les galeres, les ailles, & aides des confederez, esquels n'y auoit moins de force. Mais il est impossible de les nombrer certainement, pour autant que selon que le temps le requeroit, elles changeoient de lieux: & tantost estoient augmentees, tantost diminuees.

Il me semble que ce ne sera hors de propos, si pareillement ie fais icy mention des autres estats de la Republicque, & comme l'on sy estoit maintenu iusques à ceste annee que l'Empire de Tibere commença à estre mué en pis. Or tout premierement les affaires publicques, & les priuees de plus de consequence, estoient traittees par les Senateurs, & estoit permis aux plus apparens d'en debattre & disputer. Et si aucun se laissoit tomber en quelque flaterie, Tibere mesme l'en reprenoit. D'auantage il leur distribuoit les estats & dignitez selon la noblesse de leurs ancestres, ou selon qu'ils s'estoient monstrez gens de bien à la guerre: & pareillement selon qu'ils se gouuernoient noblement en leurs maisons: tellement qu'il estoit facile à cognoistre que les Senateurs du temps passé n'auoié: esté en plus d'autorité que ceux d'alors. Les Consuls, les Preteurs gardoient leur ancienne forme de faire: & vn chacú des pl⁹ petits Magistrats exerçoit son estat: & estoient les loix en bon vſage, horsmis le crime de Maieſté. Quant aux bleds, à l'argent des gabelles, & autres fruits publicques, ils estoient admi-

*Etat de
la ville
& Repu-
blique de
Rome au
temps de
Tibere.*

LE IIII. LIVRE DES ANNALES

nistrez par les compagnies des Cheualiers Romains. Tibere donnoit charge de ses affaires à gens cogneuz: & experimentez de long temps, & à d'autres aussi qui estoient incogneuz, selon qu'ils auoient bon bruit. Depuis qu'il auoit esleu quelqu'un à vne charge, il falloit qu'il y demourast à tousiours, tellement que plusieurs deuenoient vieux exerceans tousiours vn mesme estat. Le peuple auoit fort grâde disette de viures, mais le Prince n'y auoit coulpe aucune: car mesmes il tascha avec grande diligence à corriger & donner ordre à l'infecundité des terres, & endroits de la mer fascheux & aspres pour la nauigation, n'y espargnant aucune despenſe. Donnoit pareillement ordre que les prouinces ne fussent chargees de nouueaux subsides, & aussi que l'auarice & cruauté des Magistrats n'empeschast aucunemēt qu'ils ne peussent facilement soutenir les anciens. Au reste Tibere auoit peu de terres en Italie, moyen nombre de seruiteurs, & peu d'affranchiz en sa maison: & si auoit quelque debat ou procez avec quelque homme priué, il le faisoit conuenir par deuant le iuge. Toutes lesquelles choses (nō point par vne courtoisie & humanité, ains se montrant horrible & redoutable) il gardoit toutesfois iusques à ce que tout fut renuersé par la mort de Drusus. Car tant qu'il fut en vie, cela fut gardé, pour auant que Seianus commençât encores à deuenir grād, vouloit acquerir bruit, & estre cogneu par son bon conseil: & craignoit d'auantage vn chasteur tel que Drusus, lequel ne dissimuloit gueres la haine qu'il luy portoit: & se plaignoit souuent de quoy luy viuant
qui

qui estoit filz, son pere appelloit vn autre adiuteur en l'Empire. Car (disoit il) que s'en fault il qu'il ne soit compagnon? Vray est que les esperances de dominer sont au commencement difficiles: mais depuis que l'on y est vn peu ancré, l'on trouue assez de ministres & fauteurs. Disoit aussi que de son autorité propre il s'estoit fait dresser vn fort, comme grand maistre: que on luy auoit donné les gens d'armes en main: que son effigie se voyoit entre les monuments de Cn. Pompeius, & qu'il auroit ses neuez communs avec la famille des Drusiens. Qu'il ne restoit sinon à prier pour luy qu'il se gouuernast modestement, & fust content de toutes ces choses. Drusus tenoit tels propos assez souuent, & à plusieurs gens: & d'auantage ses secrets estoient descouuerts par sa femme qui auoit esté corrompue. Donc Seianus voyant bien qu'il estoit temps de se haster, appareilla du poison, lequel gaignant le cueur lentement & peu à peu, semblaist estre quelque maladie accidentele. Ce venin fut baillé à Drusus par Lygdus le chastré, ainsi que l'on a sceu huit ans apres. Au surplus Tibere durant le temps de la maladie de Drusus, ne fait aucun semblant d'auoir crainte de sa mort, & ne sçait l'on si c'estoit pour monstrier la force & constance de son cueur. Mesmes apres qu'il eut rendu l'esprit, & n'estant encore enseuely, il entra au Senat, ou ayant trouué les Consuls qui s'estoient assis (en tesmoignage de leur dueil & tristesse) és plus bas & vulgaires sieges, les admonnesta de leur honneur & de leur lieu. Et voyant aussi les Senateurs tous confits en larmes, les reconforta (contenant les sien-

*Plaintes
de Drusus
contre Se-
ianus.*

*Drusus
empoison-
né.
Lygdus.*

LE IIII. LIVRE DES ANNALES

nes) par vne longue & continuelle harangue : Disoit que l'on ne pouuoit pas penser, qu'ignorant le Senat estre en vne douleur si recente, il festoit presenté deuant les yeux, lors qu'à peine les propos des prochains & familiers estoient escoutez, ny le iour regardé par plusieurs de ceux qui fondoient en larmes & pleurs: mais qu'il ne falloit pourtant les arguer d'imbecilité ou faute de cuer. Et toutesfois quant à luy, que par l'embrassement de la Republique, il auoit acquis vne plus vertueuse cōsolatiō: parquoy monstrant auoir compassiō de la grāde vieillesse de l'Imperatrix (les petits fils de laquelle estoient encor ieunes & ignorans) & aussi de quoy luy mesme venoit sur l'aage, pria que l'on feist entrer les enfans de Germanicus, seul soulagement & reconfort des miseres presentes. Ainsi estans sortis les Consuls, & ayans instruit ces enfans de ce qu'ils deuoient dire, les amenerent deuant Tibere: lequel les empoignant dist ainsi:

*Harangue
de Tibere
au Senat.*

Peres conscripts, voyant ces enfans priuez de leur pere, ie les auois donnez en garde à leur oncle, & ice-luy prié qu'encores qu'il eust des enfans, il prist peine nonobstant de nourrir & eleuer ceux icy, ne plus ne moins que s'ils eussent esté procreez de son sang: & de les dresser & façonner tāt pour soy que pour la posterité. Mais puis q̄ Drusus m'est osté, ie conuertis mes prieres à vo⁹; & vous supplie en la presence des Dieux & de la Patrie, de receuoir & gouverner les arriere neveux d'Auguste, & yssus de tres-nobles parens, & faire en cela vostre deuoir & le miē enfeble. Et vous. Nero, & vous aussi Drusus (tournant sa parole aux enfans)

fans) ceux icy vous seruiront de peres. Vous estes naiz sous vne telle constellation, que le bien & le mal que vous receurez, touchent & appartiennent à toute la Republicque.

Ces paroles furent receuës & ouyes avec larmes & pleurs, & prioit vn chacun qu'ils peussent prosperer. Mesmes si Tibere eust mis lors fin à sa harangue, il auoit remply les oreilles des escoutans de sa gloire, & de compassion. Mais se laissant recheoir en ie ne sçay quelles choses vaines (desquelles ja tant de fois l'on s'estoit mocqué) disant qu'il se vouloit descharger de la Republicque, & priant les Consuls ou autres en prendre le gouuernement: il osta le peu de foy que l'on auoit adiousté aux choses veritables & honnestes. Le mesme qui auoit esté decerné pour la memoire de Germanicus, fut ordonné pour Drusus, & y eut d'autres choses adioustees, comme ont accoustumé les flatteurs qui viennent apres. Les funerailles furent magnifiques pour la pompe des effigies qui y furent portees: car on y voyoit d'une longue suite les images d'Encas (origine & commencement de la famille des Iules) de tous les Rois d'Albanie, & de Romulus premier fondateur de la ville de Rome. Apres suiuoit la noblesse des Sabins, Appius Clausus, & les effigies de tous les Claudiens.

*Funerail-
les de
Drusus.*

En parlant de la mort de Drusus i'en ay dit ce que i'en auois trouué en plusieurs auteurs, & qui estoient plus dignes de foy: toutesfois ie ne veux laisser passer le bruit qui en couroit de ce temps, si ferme qu'il n'est encores auourd'huy assopy, sçauoir que Seianus apres

LE IIII. LIVRE DES ANNALES

auoir corrompu Liuia à ceste entreprise, auoit aussi gagné Lygdus le chastré, en abusant de son corps: car ce Lygdus pour sa grande beauté estoit fort aimé de son maistre, & entre les principaux de ses seruiteurs. Que ce Lygdus apres auoir esté fait participant de ce conseil, & apres que le temps & lieu de bailler le poison furent ordonnez, estoit monté en telle audace, qu'il auoit entrepris de tourner le tout sur Drusus. Et pour ce faire, l'accusant de vouloir empoisonner son pere, il admonnesta Tibere secrettement, que quand il iroit manger chez son fils, il se donnast garde de boire ce qu'on luy verseroit pour la premiere fois. Ainsi estant ce vieillard abusé par ceste tromperie, presenta à Drusus ce qu'on luy auoit versé: lequel ignorant ceste menee, & auallant tout, comme font ieunes gens, augmenta encores le soupçon de Tibere, comme si par crainte & de grande honte il se donnast la mesme mort qu'il auoit preparee à son pere. Voila le cōmun bruit qui en estoit lors, lequel outre ce qu'il n'est fondé sur aucun autheur, est aussi aisé à refuter. Car qui est celuy (non seulement Tibere versé en si grandes choses) celuy dy-ie qui en soy eust quelque peu de prudence, qui allast de sa main propre offrir la mort à son fils, sans l'ouyr en ses deffences, & sans laisser aucun ordre ou moyen de s'en pouuoir apres repentir, ou y remedier? Que ne donnoit il plustost la question à celuy qui auoit versé le poison? que ne s'enqueroit il de l'autheur? que n'ysoit il enuers son fils vnique (non atteint auparauant d'aucun meschant acte.) de ceste tardiueté qui luy estoit naturel, & de laquelle il auoit

il auoit accoustumé d'vser enuers les estrangers? Mais pour ce que Seianus estoit inuenteur de ces meschancetez, & pour la grâde affection que luy portoit Tibere, ioint la haine que tout le monde auoit cõtre eux: l'on croyoit toutes choses d'eux, encores qu'elles fussent fabuleuses & incroyables, auançant tousiours la renommee quelque chose de mauuais aux yssués des personnes constituees en dominatiõ. Or nonobstant cela, l'ordre de ceste entreprise fut descouuert par Apicata femme de Seianus, & par la question qui fut donnee à Eudemus, & à Lygdus: & n'y a eu aucun des escriuans (tant ait esté ennemy de Tibere) qui luy ait obiecté cela, encor qu'ils ayent cherché tout le mal qu'ils ont peu trouuer contre luy, & luy ayent reproché. La cause qui m'a meü de parler de ce bruit & de le reprendre, a esté pour soubsvn si cler exemple de chasser toutes telles rumeurs fausses & mensongeres, & à fin de prier ceux entre les mains desquels tombera le discours de nostre soucy & presente curiosité, qu'ils ne preferent les choses diuulguees incroyables, & receuës avec affection, à celles qui sont vrayes, & qui (pour auoir esté corrompuës) ne sont tombees en miracle. Au surplus ainsi que Tibere louioit son fils deuant les Rostres, le Senat & le peuple (plus toutesfois par faintise & dissimulation, que d'un franc vouloir) prenoient les visages & les voix de gens tristes & faschez: estans au surplus bien ioyeux en leur cuer dont la maison de Germanicus se remettoit au dessus. Mais ce commencement de faueur, & la mere Agrippina qui mal dissimuloit ses esperances, fut cau-

LE IIII. LIVRE DES ANNALES

se d'auancer la ruine & destruction de ceste maison. Car quand Seianus veit que l'on laissoit la mort de Drusus impunie, & sans vengeance: & aussi qu'il n'estoit point ploré du peuple: voyât dy-ie cest homme cruel en ces meschâtes entreprises, qu'il auoit eu bône yssue des premieres: cōmença à chercher en soymesmes les moyens de ruiner les enfans de Germanicus, lesquels sans aucune doute venoient à la succession. Or il n'estoit possible de les empoisonner tous trois, tant pour la fidelité de leurs gardes, que pour l'innocible chasteté d'Agrippina. Parquoy il commença à blasmer sa fierté & inobedience, à rallumer l'inimitié ancienne que luy portoit l'Imperatrix, & à exagiter la conscience de Liuia, luy remettant au deuant le cas nouvellement perpetré: à fin que toutes deux accusassent Agrippina deuâr Tibere, de ce que par son orgueil appuyé sur sa fecondité, elle taschoit avec la faueur du peuple à s'emparer de l'Empire. Ceste mennee fut faicte par accusateurs fins & rusez: entre lesquels il auoit choisi Iulius Posthum⁹, lequel pour entretenir en adultere Mutilia Prisca, estoit des plus fauorisez de l'ayeule, & à ceste cause fort propre pour ses entreprises: pour autant que ceste Prisca pouuant beaucoup enuers l'Imperatrix, rédoit ceste vieille (naturellemēt soucieuse de sa dominiō) du tout estrāge & insociable avec sa bru. Taschoit aussi à gagner les prochains & familiers d'Agrippina, à fin que par leurs meschās propos ils esguillonassent le courage de ceste femme, enflé & hautain de sa nature. Mais Tibere n'entrelaisant aucunemēt le soing qu'il auoit de la

*Iul. Post-
humus.
Mutilia
Prisca.*

de la Republicque, & prenant les affaires à plaisir & passer temps, iugeoit entre les citoyens, & traittoit les requestes des alliez. Et furent à sa persuation donnez arrests au Senat par lesquels fut dit que pour subuenir à Cibra ville d'Asie, & à Egira ville d'Achaye renuersées par vn tremblement de terre, le tribut leur seroit remis pour trois ans. Aussi Vibius Serenus Proconsul de l'Espagne vltérieure, estât condamné pour port d'armes & force publique, fut pour la rigueur du temps enuoyé en exil en l'Isle Amorgos. Carlius prestre, & C. Gracchus accusez d'auoir fourny bleds à Tacfarinas ennemy, furent absous. Ce C. Gracchus estât encores petit auoit esté emporté par son pere Sempronius lors qu'il fut enuoyé en exil, en l'Isle Cercine: & là estât nourry avec gens bannis & ignorans des arts liberaux, tascha peu apres à gagner sa vie par les pays d'Aphrique & de Sicile, traffiquant & changeant quelques marchadises de petite valeur: & toutesfois il ne peut euitier les perils de la grande fortune: tellement que si Elius Lamia, & L. Apronius (qui auoient esté gouuerneurs d'Aphrique) n'eussent deffendu son innocence, il eust esté en danger (à cause de la noblesse de son sang infortuné) d'estre tiré és fortunes & aduersitez paternelles.

En ceste mesme annee vindrent plusieurs Ambassadees des villes de Grece: car les Samiens demandoiēt pour le temple de Iuno, & ceux de Cos pour le temple d'Esculapius, que leur ancien droit de franchise leur fust confirmé. Les Samiens estoient fondez sur le decret des Amphiçtyones, lesquels auoient la prin-

Cibra.
Egira.

Vibius Serenus.

Amorgos
Isle, &
l'une des
Cyclades.
Carlius.
C. Gracchus.
Cercine.

LE IIIII. LIVRE DES ANNALES

cipale cognoissance de toutes matieres au temps que les Grecs edifiants plusieurs villes en Asie, iouissoient de tout le riuage de la mer. L'antiquité qu'allegoient ceux de Cos, n'estoit guieres moindre, & d'auantage le merite du lieu faisoit beaucoup pour eux: car au temps que par le commandemēt de Mithridates l'on tuoit tous les Romains qui estoient es villes d'Asie, ils en auoient sauué plusieurs dedans le temple d'Esculapius.

ofens. Au surplus pource que les Preteurs auoient fait plusieurs plainctes desquelles l'on auoit tenu peu de conte, Cesar finalement vint à mettre au conseil l'immodestie des farceurs, remonstrant qu'en public ils faisoient plusieurs choses qui tēdoient à sedition, & s'efforçoient de faire plusieurs vilainies es maisons priuees: que Ofcus autrefois farceur, & donnāt quelque legiere oblectation au peuple, estoit deuenu si meschāt, & creu en telle puissance, que pour le reprimer il estoit besoing de l'autorité du Senat. Pour ceste cause tous farceurs furent lors chassez d'Italie.

Lucilius Longus. En ceste mesme annee Tibere eut occasion de nouveau dueil, par le trespas de l'vn des deux enfans de Drusus, & nō moins par la mort d'vn autre sien grand amy. Cestuy estoit Lucilius Longus, lequel auoit esté participāt de toutes ses fortunes tāt tristes que ioyeuses, & seul d'entre les Senateurs qui luy auoit tenu compagnie estant à Rhodes. Au moyen dequoy iacōit ce qu'il fut homme de petite race, les Senateurs luy decernerent funerailles comme à vn Censeur: & au surplus ordonnerent qu'aux despens de la Republique:

blique luy seroit dressée vne effigie au marché d'Au-
 guste: car encor lors les Senateurs prenoient cognoi-
 sance de toutes matieres, tellement que Lucilius Ca-
 pito administrateur de l'Asie estant accusé par les ha-
 bitans du pays, fut contraint se deffendre: & en ce-
 ste cause le Prince feit grand serment qu'il ne luy a-
 uoit donné aucune iurisdiction sinon entre les serfs
 & esclaves, & des matieres pecuniaires entre gēs pri-
 ues: qu'au reste s'il festoit vsuré la puissance de Pre-
 tour, festoit aydé de la force des gens d'armes, en ce
 cas il auoit trespasé ses commandemens, & pource
 que les confederes fussent ouys par le Senat en leur
 plaintif. Parquoy estat couaincu, il fut cōdamné. Au
 moyen de laquelle punitiō, & de celle qui auoit esté
 faite l'annee au parauant de C. Syllanus, les villes d'A-
 sie delibererēt de cōstruire vn tēple en l'hōneur de Ti-
 bere, de sa mere, & du Senat: & apres en auoir obtenu
 la permission, le feirēt bastir. Pour ceste cause Nero
 fit vne harēgue pour rēdre grace au Senat & à son
 ayeul: durant laquelle les escoutans se monstrent
 moult ioyeux, & affectionnez enuers luy: & pensoiēt
 en le voyant veoir & ouyr Germanicus, pour estre la
 memoire de luy encor fresche & recente. Ce ieune
 homme auoit en soy vne modestie, & vne face digne
 d'un Prince: lesquelles choses sembloiēt plus plai-
 santes & agreables d'autāt qu'on le scauoit estre en grād
 peril, pour la haine apparēte & cogneue que luy por-
 toit Seianus. Enuiron ce mesme temps l'Empereur
 meit en auant au Senat qu'il falloir substituer vn Fla-
 mine Dial au lieu de Seruius Maluginensis qui estoit

*Lucilius
Capito.*

*Nero fils
de Ger-
manicus.*

*Confar-
ree.
Confar-
ratiō an-
ciennement*

LE IIII. LIVRE DES ANNALES

*estoit une
solennté
gardée es
nopees, à
fin que les
enfants y-
fus du
mariage
peussent
venir à la
dignité
sacerdota-
le.*

trespassé: & par mesme moyen establir vne loy nou-
uelle. Car la coustume anciéne estoit de presenter en-
semble trois des patrices nez de parés Cōfarreez, l'vn
desquels estoit esleu à ceste dignité. Mais maintenant
ils n'estoient en telle quantité qu'au tēps passé, par ce
que la coustume de cōfarréer estoit abolie ou obser-
uee de bien peu de gens. Et alleguoit plusieurs causes
pour lesquelles cecy auoit esté aboly: la principale
desquelles estoit la negligéce des hōmes & des fem-
mes: ioint les difficultez de ceste ceremonie, lesquel-
les on laissoit passer à esciét: car (disoit-il) quand sorti-
roit de la puissāce paternelle celuy qui viēdroit à estre
Flamine, ou celle qu'il prenoit pour femme? Qu'à ce-
ste cause il falloit y remedier par arrest du Senat, ou
par ordonnance: tout ainsi qu'Auguste auoit changé
plusieurs choses de ceste rigoureuse antiquité pour
l'vsage du tēps present. Doncques apres auoir traitté
des religiōs, fut ordōné, que quāt à la maniere de fai-
re du Flamine, il n'y auroit riē de chāgé: mais quant à
la Flaminique *Dia-*, y eut loy par laquelle fut dit,
qu'à cause des sacrifices elle demeureroit en la puissā-
ce de son mary, & au reste se gouuerneroit ne plus ne
moins que les autres fēmes. Consequēment le fils de
Maluginēsis fut subrogé en la place de son pere. Et à
fin que la dignité des prestres fut tousiours augmen-
tee, & qu'ils feussent plus diligens à entretenir les ce-
remonies, l'on dōna L. L. S. X. X. à Cornelia vierge la-
quelle fut prisē au lieu de Scātia: & fut ordōné q̄ tou-
tes & quātes fois que l'Imperatrix entreroit au Thea-
tre, elle auroit sa place entre les sieges des Vestales.

Estans

*Flamini-
que Dia-
le.*

*cestemar-
que (pour-
ueu qu'il
ny ayt
faute au
liure) si-
gnifie xx.
mil petits
sesterces,
qui valēt
cinq cens
escus.
Cornelia.
Scantia.*

Estant Consuls Cornelius Cethegus, & Visellius Varro, comme les Pontifes, & à leur exemple & imitation les autres prestres, eussent entrepris faire vœux & oraisons pour la santé du Prince, ils recommanderēt Nero & Drusus aux mesmes dieux, non tant pour amour qu'ils portassent à ces ieunes enfans, que par vne maniere de flaterie, laquelle en vne telle corruption de meurs n'est moins perilleuse quand elle excède, que quād il n'y en a point du tout. Car iaçoit ce que Tibere ne se fut iamais monstré affectionné à la maison de Germanicus, toutesfois il porta encor plus impatiemment de veoir egaller ses ieunes enfans à sa vieillesse. Parquoy ayant fait appeller les Pontifes, les interrogea s'ils auoiēt pas fait ces choses par les prieres ou menasses d'Agrippina. Et cōbien qu'ils le niasent, si furent ils de luy aucunement taxez: car la plupart d'iceux estoient ses parens & alliez, ou des principaux & plus apparens de la cité. Au reste par vne harangue qu'il feit au Senat, deffendit pour l'aduenir, qu'aucun n'esleuast en orgueil par honneurs trop hastifs & precipitez, les trop muables courages des ieunes gens. Car Seianus poursuiuoit de pres, se plaignant que la cité estoit toute diuisee, ne plus ne moins que par les guerres ciuiles, & mesmes qu'il y en auoit qui se disoiēt du party d'Agrippina, le nombre desquels estoit en danger de croistre si l'on n'y pourueoit d'heure. Qu'il n'y auoit autre moyen d'appaïser vne discorde qui ainsi s'augmētoit, sinon qu'on en despeschast deux ou trois des plus prompts & diligens. Et pour ceste cause s'attacha à C. Silius, & Ti-

C. Silius.

LE IIII. LIVRE DES ANNALES

Titius Sabinus. titus Sabinus, auxquels fut dōmageable & pernicieuse l'amitié qu'ils auoient eue avec Germanicus. La ruine de Silius (qui auoit par l'espace de sept ans esté chef d'une grosse armee, & merité de triompher en Germanie, pour la victoire qu'il auoit eue de Sacrovir) d'autant en espouuenta plusieurs, que de plus haut elle tomboit. Aucuns ont creu que la haine & mescontentemēt qu'auoit Tibere contre luy, estoiet augmentez, par son immodestie, en ce qu'il se vātoit par trop, que ses soldats estoient demourez en leur deuoir iusques à la fin, estans les autres tombez en plusieurs seditions: & aussique Tibere eut esté en danger de perdre son Empire, si ses legions eussent aussi bien affecté choses nouuelles comme les autres. Tibere croyoit par cecy sa fortune estre amoindrie, & réduite insuffisante pour satisfaire à tel merite. Or la nature des biensfaits est telle, qu'ils sont trouuez bons tant qu'à celuy qui les reçoit, est laissé le moyen de les pouuoir recompenser: mais quand ils sont si grands qu'ils surpassent toute recompense, au lieu de grace & recognoissance de plaisir, l'on en reçoit le plus souuent vne haine & malueillance.

Sofia Gallia. Silius auoit sa femme nommee Sofia Galla, laquelle estoit aussi assez mal voulue de Tibere, pour l'amitié qu'elle auoit avec Agrippina. Pour ceste cause il fut arresté qu'on s'attacheroit à eux deux, & qu'on laisseroit là Sabinus pour quelque temps. Varro, qui estoit Consul, fut attilré pour cest affaire: lequel se couurant de ie ne sçay quelles inimitiez qui auoient esté entre son pere & Silius, taschoit (à son grand deshonneur)

honneur) de gratifier & complaire à la haine de Seianus. Et comme l'accusé requiſt qu'on luy donnaſt delay de reſpondre, iuſques à ce que le temps du Cōſulat de ſon accuſateur fut expiré, Tibere luy refuſa: diſant que ce n'eſtoit de maintenant que les Magiſtrats auoient acouſtumé d'accuſer les perſonnes priuees, & que ce n'eſtoit raiſon de priuier le Conſul de ce droit, par le ſoing & vigilâce duquel eſtoit pourueu qu'à la Republique ne fut fait quelque tort ou dommage.

Or Tibere auoit cela propre & peculier, qu'il deſguifoit touſiours ſouz termes & mots anciens les meſchancetez nouuellement controuuees. Parquoy avec grande affirmation (comme ſi cela eut eſté ſelon les loix proceder contre Silius, ou Varro fut Cōſul, ou cecy la Republique) le Senat fut aſſemblé, ſe raiſant l'accuſé: ou ſi quelque fois il commençoit ſes deffences, ne diſſimulant point par la haine de qui il eſtoit ainſi mal mené. Les obiets qu'on luy faiſoit, eſtoient, qu'il ſentendoit avec ceux qui auoiēt entrepris la guerre, & auoit long-temps diſſimulé que Sacrouir en fut, & que par ſon auarice il'auoit ſouillé ſa victoire. Finablement on luy reprochoit ſa femme Soſia. Et ſans faute ils vacilloient quant au crime de concuſſion, mais tout fut ramené & pourſuiuy ſouz la queſtion du crime de leſe Maieſté. Parquoy Silius preuint par mort volontaire, ſa prochaine condemnation. Toutesfois l'on ſe rua ſur les biens, non point pour les rendre à ceux qu'on diſoit auoit eſté

LE IIII. LIVRE DES ANNALES

par luy fraudez de leurs gages : car pas vn d'eux ne les demandoit. Et fut par ce moyen la liberalité d'Auguste abolie: par ce qu'on paya au fisc par le menu toutes les choses qui luy estoient adiugees. Voila la premiere fois que Tibere s'estoit monstré aspre & diligent apres l'argent d'autrui. Sofia fut enuoyee en exil, suiuant l'aduis d'Asinius Gallus: lequel aussi auoit esté d'opinion que l'on deuoit cōfisque vne partie de ses biës, & laisser l'autre partie à ses enfans . Mais au contraire Lepidus vouloit que suiuant la necessité, & dispositiō de la loy, la quarte partie fust adiugee aux accusateurs & la reste aux enfans.

M. Lepid. Je trouue donc que ce Lepidus fut en ce temps vn tresgraue & tressage personnage. Car il réuerçoit plusieurs flatteries des autres , & les faisoit tourner en meilleure part. Quoy faisant ne luy estoit toutesfois besoing de se moderer ou contenir, pour ce qu'il n'auoit moins la grace & faueur de Tibere, que son authorité estoit grande . Parquoy ie suis contraint de douter si (comme en toutes autres choses) les destinees ou le sort de la natiuité sont cause que l'inclination & grace d'un Prince se tourne sur les vns, & sur les autres sa malueillance: ou sil y a quelque chose en noz conseils & entreprises qui en soit cause, tellement qu'il soit possible trouuer quelque chemin exempt & d'ambition & de danger, qui soit entre hautaineté de cuer, & deshonneste flatterie.

Mais Messalinus Cotta estant descendu de non moins noble maison (toutesfois de nature diuerse) fut

fut d'aduis, que par arrest de Senat l'on deuoit ordôner, que les Magistratz & gouuerneurs des prouinces ne fussent moins puniz des fautes & maluersations qui se commettoient en icelles par leur femmes, que si eux mesmes les auoyent commises, iâçoit ce qu'ils n'y eussent aucune coulpe, & en fussent innocens.

Après cela fut deliberé de Calpurnius Piso, homme noble, fier & audacieux. Cestuy (comme i'ay dit cy dessus) auoit crié en plain Senat, qu'il se deliberoit d'abandonner la cité pour les factions & menees des accusateurs; & sans faire compte ou auoir esgard à la puissance de l'Imperatrix, auoit esté si hardy que d'appeller en iugement Vrgulanie, & la tirer hors de la maison du Prince. Ce que pour lors Tibere ne print en trop mauuaise part: mais comme il rememoraist ce courroux en son esprit, iâçoit ce que l'impetuosité de telle offense fut en partie assopie, toutesfois prenoit force par la memoire, Parquoy il accusa griefuement Piso d'auoir tenu propos secrets & fort offensifs de la maiesté: adioustant qu'il auoit du venin tout prest en sa maiso, & entroit au Senat l'espee à son costé. On laissa passer cecy comme incroyable: tant on le trouua estrange & cruel. Toutesfois il fut receu comme coupable de plusieurs autres cas qu'on luy mettoit sus: desquels neantmoins il ne fut atteint ou conuaincu, à cause de la mort, qui à bonne heure le preuint. On delibera pareillement de Cassius Seuerus banny, lequel estant de pauvre maison, malfaisant, & de vie reprochable (mais au reste grand orateur) auoit tant fait d'ennemis, que par sentence du Senat iuré, il fut transporté en l'isle de Crete: & là ne se desistant de faire

Calpurnius Piso.

Cassius Seuerus. Senat iuré, c'est qui a fait serment de iuger selon les loix.

LE IIII. LIVRE DES ANNALES

comme au parauant, tourna sur-foy tant les vielles que nouuelles inimitiez : au moyen dequoy ses biens estans confisquez, & luy banny, passa la reste de sa vie à la roche de Seriphe.

*Seriphe,
c'est vne
des isles
Sperades
en la mer
Egee.
Plautus.
Sylvanus.*

En ce mesme temps Plautius Sylvanus auoit (& ne sçait l'on pourquoy) precipité sa femme Apronia du haut en bas. Et comme il fut accusé deuant Tibere par L. Apronius son beau pere, ayant l'esprit tout troublé, feit vne responce, comme si luy estant endormy, & à son desceu, sa femme se fust elle mesme tuée. Tibere sans autre dilation se transporta en la maison, & reuifita le chābre en laquelle se pouuoient encor apperceuoir les marques & enseignes tesmoignans la force faicte à ceste femme, & la deffence en laquelle elle s'estoit mise. Au moyen dequoy il en feit son rapport au Senat. Et comme l'on eust delegué iuges à Sylvanus pour luy faire son proces, Virgulia son ayeulle luy enuoya vn poignard. Et croit-on que cela auoit esté fait par l'admonition de Tibere à cause de la grande amitié qui estoit entre l'Imperatrix & Virgulia. L'accusé ayant par plusieursfois en vain tasché à se tuer, finalement se feit couper les veines. Soudain apres comme Numantina la premiere femme eust esté accusée de l'auoir mis hors du sens par charmes & sorcelleries, elle fut declaree innocente.

*Numanti-
na.*

Le peuple Romain finalement en ceste annee fut deliuré de la longue guerre qu'il auoit eue contre Tacfarinas Numidien. Car les premiers capitaines pensans assez auoir faict si leurs actes pouuoient meriter les enseignes du triomphe, laissoient là l'ennemy: tellement
que

que ia y auoit à Rome trois statuës couronnees de laurier, & toutesfois Tacfarinas se trainoit encor par le pays d'Aphrique, r'enforcé de l'ayde des Maures qui s'estoient mutinez, & faisoient la guerre voyans que les affranchiz & serfs du Roy auoient tout le gouuernement du royaume, pource que Ptolemee fils de Iuba en estoit peu soigneux, à cause de sa ieunesse. Le Roy des Garamantes estoit son compagnon à piller, garde & recelleur de son butin, n'ó point qu'il marchast avec vne armee, ny pour donner vne bataille: ains seulement enuoyoit quelques cheualx legers, lesquels de loing l'on r'apportoit estre en plus grand nombre qu'ils n'estoient. Et d'auantage s'il en y auoit quelques vns en la prouince qui fussent souffreteux, ou n'aymassent à viure en paix, ils se rengeroyent facilement de son costé, pour autant que Tibere (voyant que Blesus auoit assez bien besongné) auoit fait retourner la neufiesme legion, comme si en Aphrique n'y eust plus eu aucun ennemy. Mesmement Dolabella Proconsul pour ceste annee n'auoit ausé la retenir, craignant plus de trespasser le commandement du Prince, que l'incertitude de la guerre.

Ayant doncques Tacfarinas fait semer vn bruit que les possessions & terres des Romains estoient aussi pillées & enuahies par d'autres natiōs, & que pour ceste cause peu à peu ils se retiroient du pays d'Aphrique. Que par ce moyen ceux qui y estoient demourez, pourroient aysement estre surpris & environnez, moyennant que ayans leur liberté en plus de recommandation que la seruitude, ils se voulussent diligemment employer.

LE IIII. LIVRE DES ANNALES

Thubuscumville.

Parquoy augmenta les forces, & ayant dressé son camp, mist le siege deuant vne petite ville nommee Thubuscum. Mais Dolabella ayant ramassé tout ce que y restoit de gens d'armes, à la premiere rencontre qu'il feist, leua le siege, tant par la crainte qu'auoyent les ennemis du nom Romain, que pour ce que les Numidiens ne pouuent soustenir la force des gens de pied. Ce faict, il munist & fortifia les lieux plus commodés: & par mesme moyen feit trancher les testes aux Princes des Musulamiens, qui commençoient à eux reuolter. Et pource que par plusieurs guerres faictes contre Tacfarinas l'on auoit experimeté qu'il n'estoit bon de poursuyure cest ennemy (vagabond, & errant çà & là) avec la force de toute l'armee: Dolabella feit venir le Roy Ptolemee avec partie de son peuple, & dressa quatre bataillons, desquels il donna la charge aux Tribuns & Ambassadeurs. Les autres bandes qui estoient pour le pillage, furent conduictes par quelques Maures d'élite: & Dolabella seruoit à tous de cōseil & de conduicte. Les nouuelles vindrent incontinent que les Numidiens s'estoient campez & auoient dressé leurs loges en vn chasteau nommé Auzea, à demy ruiné & abbatu, & auquel ils auoient autresfois mis le feu: & se fioient en la force de ce lieu, pource qu'il estoit tout environné de grandes forests. Là les aïlles & cheualx legers (incertaines en quelle part on les mettoit) furent incontinent conduictes. Et si tost que le iour commença à poindre, sonnanz trompettes & faïfants vn merueilleux bruit, se trouuerent sur ces barbares à demy endormiz, & ayantz leurs cheuaux empestrez ou esgarez çà & là parmy les pasturages. Les Romains

AuZea, chasteau.

mains de leur part feirent ferrer leurs gens de pied, & mettre leurs gens de cheual en bonne ordonnance, & pouruoioient à tout ce qui estoit necessaire pour la bataille. Au contraire les ennemis despourueuz & non aduertiz, se trouuerent sans armes, sans ordre, & sans conseil: & comme bestes se laissoient emmener, prendre, & tuer. Les soldats animez de la souuenance de leurs trauaulx, & ramenant en leur memoire comme ayans eu plusieurs fois enuie d'eux ioindre avec ces rustres icy desquels ils auoyent tant de fois esté mocquez, se foulerent & assouirent & de sang & de vengeance. L'on aduertit de main en main par les manipules & dizaines, que sur tout ils poursuyussent Tacfarinas, à eux assez cogneu par rât de batailles, pour ce que si le chef n'estoit mis à mort, en vain l'on esperoit la fin de ceste guerre. Mais Tacfarinas ayant choyssi les plus gentils compagnons de ceux de sa garde, & voyât son fils lié, & les Romains par tout esbanduz, se iecta au trauers des espees, ou vengeance sa mort sur ses ennemis, eschappa moyennant icelle la capriuité qu'il se voyoit preparee. Par ce moyen fut mise fin à ceste guerre. Et comme pour cecy Dolabella demanda les enseignes du triumphe, Tibere ne luy voulut octroyer, ains les dōna à Seianus: à fin que la memoire de son oncle Blesus ne fust estaincte: & ne fut pour cela Blesus en rien plus estimé: mais l'honneur denyé à Dolabella, luy augmenta sa gloire de beaucoup: car avecq' armee beaucoup moindre il auoit amené plusieurs grands Seigneurs prisonniers, occiz le chef, & rapporté le bruit d'auoir du tout mis fin à ceste guerre. En ce triumphe suyuoient les Ambassadeurs des Garaman-

*Mort de
Tacfarinas.*

LE III. LIVRE DES ANNALES

*Presens
faits à
Ptolemee.*

tes lesquels s'estoient peu montrez par la ville auparavant: car ceste nation estonnee, sans routesfois se sentir chargee d'aucune coulpe, les auoit enuoyez à Rome, à fin de satisfaire & contenter le peuple Romain. Au surplus apres qu'on eut cogneu le deuoir & affection de Ptolemee en ceste guerre, l'ancienne maniere de faire fut ramenee, & luy enuoya l'õ vn des Senateurs pour luy porter vne baguette d'yuoire, avec vne robe painte (qui estoit le dõ qu'anciennemēt le Senat auoit accoustumé de faire) & aussi pour l'appeller Roy, cõpagnon & amy.

T. Curtius.

En l'esté mesme comme aucuns serfs eussent suscité quelque cõmencemēt de guerre, tout fut appaisé par cas d'aventure. L'auteur de ceste sedition estoit T. Curtius, qui autrefois auoit esté de la bande Pretorienne. Et au commencement faisoit secretes assemblees à Brindes, & autres villes circonuoisines: & ia auoit publié quelques lettres, par lesquelles il inuitoit à liberté tous les serfs rustiques, agrestes, & cruels, qui estoient espanduz parmy ces forests. Lors que (comme par la faueur des dieux) arriuerent là trois biremes pour l'vsage & necessité de ceux qui habitoient en ceste mer. Or Curtius Lupus estoit thresorier & receueur ordinaire de ce pays:

*Curtius
Lupus.*

Staius.

auquel par l'ancienne coustume estoit escheuë la province nommee Calles. Cestuy ayant mis en ordonnance quelque quantité de gens aguerriz sur la mer, auoit rompu l'entreprise de ceste coniuration, qui ne faisoit encor que commencer. Et comme Tibere y eust en grande diligence enuoyé Staius Tribun avec vne puissante armee, il emmena à Rome le Capitaine avec les principaux de ceste sedition: estant ia la ville en
vne

vne merueilleuse crainte pour la multitude des familles & seruiteurs, qui s'augmentoient de iour en iour: ou au contraire se diminueoit le nombre du peuple de fraîche condition

En ce temps aduint vn exemple merueilleux de misere & de cruauté. Le pere (nommé *Q. Vibius Serenus*) estoit l'accusé, & son fils l'accusateur, & ainsi furent tous deux presentz au Senat. Le pere nouvellement retiré de son exil, & encor tout crasseux & plein d'ordure, estoit enchainé lors que son fils plaidoit à l'encontre de luy. Ce ieune homme paré & accoustré mignonnement, & monstrant vn visage gay & deliberé, faisoit l'office d'accusateur & de tesmoing, affirmant quelques embusches auoir esté dressées contre le prince, & quelques gens auoir esté enuoyez en Gaule, pour là susciter vne guerre. Et d'auantage chargeoit & amenoit en ieu *Cecilius Cornutus* autresfois Preteur, luy mettant à sus qu'il auoit fourny argent pour cest affaire, & disant que non pour autre cause sinon qu'ennuyé de trop de soucy, & desesperant de pouuoir sortir de ce danger seur & ineuirable, il s'estoit auancé la mort. Au contraire l'accusé ne se monstroient en rien estonné: & se retournant deuers son fils, faisoit sonner ses chaines, & appelloit les dieux de vengeance, les priant de le faire renuoyer en son exil, & en lieu ou il fust esloigné du pais auquel telle maniere de faire estoit obseruee, & les priant aussi que quelque fois son fils fust puny ainsi qu'il le meritoit. D'auantage il afferma que *Cornutus* estoit innocent de ce cas, & toutesfois que destre chose (encor qu'elle fust faulse) n'auoit laissé de l'espouuenter, ce qu'aisément se pourroit cognoistre si l'on en accu-

*Q. Vibius
Serenus.
Grande
cruauté.*

*Cecilius
Cornutus*

LE IIII. LIVRE DES ANNALES

Cn. Lentulus.
Seius Tuberus.

foit encor quelques autres. Car (disoit-il) il n'est pas à presumer que moy seul avec vn autre i'aye machiné la mort du prince, & entrepris renuerser l'estat de la republique. Lors l'accusateur nomma encor Cn. Lentulus, & Seius Tuberus: dequoy Tibere rougist tout de honte, voyant les principaux de la cité, & les plus grands amys (Lentulus d'extreme vieillesse, & Tuberus ia tout cassé) estre accusez d'auoir voulu troubler la republique, & suscité les ennemis à reuolte. Mais ceux icy furent incontinent absoulz: les seruiteurs du pere furent mis en la question, pour sçauoir la verité du faict: toutesfois ils ne dirent qu'au preiudice de l'accusateur: lequel estant devenu insensé pour son meffaiet, & espouuenté du bruit du peuple (par lequel il estoit menassé d'estre attaché à vn chesne, & lapidé ou puny de la peine des parricides) s'en alla de Rome. Et estant à Rauenne fut ramené pour paracheuer son accusation. En quoy faisant Tibere n'auoit pas enuie de dissimuler l'ancienne malueillance qu'il portoit à l'exillé Serenus. Car apres que Libo eut esté condamné, Serenus auoit enuoyé lettres à Tibere, par lesquelles il luy reprochoit que luy seul n'auoit eu aucune recompense du deuoir qu'il auoit faict, y adioustant autres choses plus arrogantes & audacieuses qu'il n'estoit expedient enuers aureilles si superbes, & qui de peu de chose se sentoient offensees. Cesar vint à luy ramenteuoir cecy huit ans apres, accusant en diuerses sortes le temps qu'il estoit passé entre deux: iagoit ce que le contraire de ce qu'il esperoit fust adueni, pource que les seruiteurs n'auoient rien confessé en la question. Or comme vn chacun eust esté d'avis que Serenus deuoit estre puny

puny à la maniere des anciens, Gallus Asinius pour adoucir la mauuaife estime qu'on en pourroit auoir, pria Tibere que seulement il le feist confiner en l'Isle de Gyare ou de Donuse. Mais Tibere ne le voulut accorder, alleguant que l'une & l'autre de ces Isles estoit sans eauë, & que puis que l'on donnoit la vie à Serenus, qu'il ne luy falloit denier les choses necessaires à icelle. Ainsi Serenus fut renuoyé à Amorgue. Or pour autant que Cornutus s'estoit defait de sa propre main, l'on auoit mis en fait que les accusateurs ne receuroient plus aucun loyer quand celuy qui seroit accusé, auant le iugement donné se defferoit soy-mesme. Et certes chacun estoit de cest auis, si Tibere plus asprement que de coustume, en faueur des accusateurs, ne se fust plaint deuant tout le monde que par ce moyen les loix n'auroient aucun effect, & seroit la Republicque preste de tóber en ruine. Que les droits (disoit-il) soient renuersez s'en dessus desloubz, plustost que les gardes d'iceux. Par ce moyen les delateurs, hommes naiz pour la ruine & dómage public, & qui par cy deuant n'auoiét peu assez estre chastiez, quelque peine qu'on leur eust ordonnee, estoient attraits & suscitez par salaires & grandes recompenses.

A ces choses tant douloureuses & remplies de continuelle tristesse, y entreuint quelque peu de consolation. Car comme C. Cominius Cheualier Romain eust esté attainct & conuaincu d'auoir compóse quelques vers diffamatoires à l'encontre de Tibere, il luy pardonna aux prieres d'un sien frere qui estoit Sena-

*Ce sont
deux des
Isles Cy-
clades.*

*C'est une
des Cyclades.*

*C. Comi-
nius.*

LE IIII. LIVRE DES ANNALES

teur: qui fut cause de plus faire esmerveiller le monde, attendu que iacoit ce qu'il cogneust ce qui estoit meilleur, & le bon bruit qu'on acqueroit par se monstrer clement & debonnaire, il aimoit toutesfois mieux suiure les choses qui causoient tristesse & ennuy. Car quant à luy il ne pechoit point par sa bestise ou faute de sens. Et certes il est aisé à discerner quand vn peuple à la verité, ou bien par vne liesse contrainte & dissimulee se resiouist des faits de ses Princes. Et luy mesmes encor' qu'en toutes autres choses il n'eust fceu rien dire sans le premediter (tellement qu'il sembloit qu'on luy arrachast les paroles du gosier) toutesfois quand il parloit en faueur de quelqu'un, il se môstroît auoir la parole plus prompte & à commandement.

P. Suillius Mais comme P. Suillius (qui autresfois auoit esté thresorier de Germanicus) pour estre conuaincu d'auoir pris argent pour le iugement d'une cause, fust cōdamné à se departir d'Italie, il fut d'opinion qu'on le confinast en vne Isle: & poursuivit cecy avec si grande instance & contention, qu'il l'affirma estre besoing pour le grand profit de la Republicque. Ce qui fut tressmal pris pour lors: mais quelque temps apres luy tourna à louange, estant Silius rappellé, lequel ceux qui vindrent depuis, veirent trespuissant, faisant toutes choses pour argent, & vsant par long temps à souhait (mais non comme il deuoit) de l'amitié de l'Empereur Claudius. La mesme peine fut ordonnee à *Catus Firmus* Sénateur, auquel on imputoit d'auoir fausement accusé sa sœur du crime de Maïesté. C. Catus
(comme

Catus Firmus.

(comme i'ay dit cy dessus) auoit appasté Libo par ses embusches, & depuis par son accusement auoit esté cause de sa ruine. Tibere bien recors de ce seruice (se courrant toutesfois de quelques autres raisons) pria qu'il ne fust enuoyé en exil: toutesfois ne voulut empescher qu'il ne fust déposé du Senat.

Je ne doute point que plusieurs des choses que i'ay dites & diray cy apres, ne semblent assez legeres & nō meritans estre recitees. Mais certes aussi ie croy qu'ils ne feront comparaison de noz Annales avec les liures de ceux qui ont escrit les choses anciennes du peuple Romain. Car ceux avec vn libre discours faisoient recit de grâdes guerres, de villes prises d'assaut, des defaites & prises de Rois: Et si quelquesfois ils venoiēt à parler des choses qui se faisoient en la ville, ils descriuoient librement les discords & partialitez des Tribuns avec les Consuls: les loix Agraires & Frumentaires, & les débats d'entre la commune & les nobles. Mais nostre labeur est astraint, & sans aucune gloire: car au temps duquel nous faisons mention: la paix n'estoit aucunement, ou que bien peu troublee. La ville estoit en tristesse, & le Prince ne se soucioit pas beaucoup d'estendre les limites de son Empire. Toutesfois certes ce ne sera temps du tout perdu, de regarder depres à telles choses qui au commencement semblēt legeres, desquelles neantmoins sourdent bien souuent les troubles & esmotions des choses grandes. Car toutes nations & villes sont gouuernees ou par la commune, ou par les plus apparens, ou par vn seul. Et est beaucoup plus

*Annales
de Corn.
Tacitus.*

LE IIII. LIVRE DES ANNALES

facile de louer vne forme de Republicque bien ordonnée en l'une de ces sortes, que d'en trouver vne: & où il s'en trouue quelquesfois, si est-ce qu'elle n'est de longue duree. Or tout ainsi qu'anciennement (au temps que le peuple estoit en autorité, ou que le Senat gouernoit) il estoit besoing de cognoistre le naturel de la commune, & la maniere de la gaigner avec modestie & discretion: & estoient estimez sages & ayans experience des temps, ceux qui mieux cognoissoient les esprits & inclinations des Senateurs & plus apparens: ainsi estant aujourdhuy cest estat renuersé, & les choses non autrement que si elles'estoient gouernées par vn seul, il ne seruiroit de rien de chercher ou faire mention de telles choses. Car peu de gens scauent par leur prudence discerner les choses honnestes d'auec les mauuaises, ny les viles d'auec les nuisibles, ou toutesfois plusieurs sont faits sages par les fortunes & accidens d'autrui. Au surplus comme ces choses peuuent beaucoup profiter, aussi certes elles donnent peu de passetemps au lecteur: ou au contraire la description d'un pays, la diuersité des batailles, les memorables morts des Capitaines, retiennent & renforcent les esprits des lisans. Mais quant à nous, nous faisons vne meslange de cruels & iniques mandemens, de continuelles accusations, de saintes amitiés, de persecutions & ruines d'innocens, & de causes lesquelles ont vne mesme yssue: tellement que le lecteur a tousiours vne rencontre de choses semblables, qui luy engendrent vne sâtiété. Qui plus est, les anciens escriuans trouuoient peu de gens qui detra-

ctassent

etassent d'eux, ou se souciaissent si l'on auoit loué de meilleur cueur l'armee Romaine, ou celle des Aphricains. Mais les successeurs de ceux qui ont souffert peine ou infamie sous Tibere, vivent encores auourd'huy. Et bien que leurs familles fussent entierement estaintes & abolies, si en trouue l'on qui pensent les malfaits d'autrui leur estre reprochez pour la similitude de meurs qu'ils ont avec eux. Et d'auantage la gloire & la vertu ont des malueillás selon que l'esprit de l'homme ratiocine en soy le contraire de ce dont son naturel approche. Mais il est temps de retourner d'où ie suis sorti.

Durant le Consulat de Cornelius Cossus & Asinius Agrippa, Cremutius Cordus fut accusé d'un crime tout nouveau, & duquel iusques alors l'on n'auoit ouy parler: c'est qu'es Annales mises par luy en lumiere, il auoit loué M. Brutus, & dit que C. Cassius auoit esté le dernier des vrais Romains. Ceux qui l'accusoient, estoient Satrius Secundus, & Pinarius Natta, clients & vassaux de Seianus. Qui fut cause de la ruine de l'accusé, ioint que Tibere avec vn mauuais visage & cruel regard receut sa deffence, laquelle (bien asseuré de sa mort) il commença en ceste sorte:

Peres cōscripts, l'on accuse mes paroles, pour ce que on ne trouue que reprēdre en mes faits: & toutesfois elles ne touchēt ny le Prince ny son pere, en l'endroit desquels seulemēt s'estend la loy de Maiesté. L'on dit que j'ay loué Brutus & Cassius, les gestes desquels (ayans esté escripts par plusieurs) l'on n'en trouue pas vn qui en ait escrit qu'honorablement. Tite-Liue ex-

LE IIII. LIVRE DES ANNALES

cellent entre autres, tant pour son eloquēce, que pour estre veritable, a tant dit de louāges de Pōpee, qu'Auguste auoit accoustumē de l'appeller Pompeian, & toutesfois cela ne diminua en rien leur amitiē. L'on ne trouue point qu'il ait appellē Scipio ny Afranius, ce Cassius ny ce Brutus parricides ou brigands (ainsi qu'auiourd'huy on les appelle) ains en plusieurs endroits en fait mention cōme de gens nobles & vertueux. Les escrits d'Asinius Pollio font honorable mention d'iceux mēmes. Messala Coruinus se vantoit que Cassius estoit son Capitaine. Ce neantmoins & l'un & l'autre a esté esleuē en richesses & dignitez. Que feit autre chose le Dictateur Cesar à M. Cicero pour le liure auquel il extolloit Caton iusques au ciel, sinon y respondre par vne oraison, comme fil eust esté deuant les iuges? Les epistres d'Antonius, les harangues de Brutus portent plusieurs paroles iniurieuses cōtre Auguste, lesquelles ie confesse estre fausses: si est-ce toutesfois qu'elles ne laissent à le taxer & noter bien asprement. On lit les vers de Bibaculus, & de Catulle, tous farciz de paroles outrageuses contre les Césars: toutesfois & Iules Cesar, & Auguste mēme les endurerent, & feirēt semblant de n'en tenir conte: en quoy ie ne puis dire qui fut le plus grand en eux, ou la modestie, ou la prudence: car les choses desquelles l'on ne tient conte s'escoulent & se passent: ou au contraire si l'on s'en fasche & courrouce, il semble que l'on sente & recognoisse en soy sa coulpe. Ie ne parleray point icy des Grecs, desquels non seulement la liberte, mais aussi l'affection mauuaise & desordonnee est demeuree

demeuree impunie: ou si d'auanture quelqu'un s'en est voulu venger, il s'est vengé des paroles, par autres paroles. Quoy que soit, la liberté d'écrire a tousiours esté plus grande, & moins subiette aux detraçteurs, quand l'on n'a fait mention que de ceux lesquels estans morts n'en pouuoient sçauoir ou bon ou mauuais gré. Quoy? concite ie le peuple par harangues & concions (avec Brutus & Cassius en armes, & ja tenâs les champs Philippiques) à mettre sus vne guerre ciuile? Mais ces personages (passez de ceste vie il ya soixante & dix ans) retiennent ils partie de leur memoire par les liures des escriptans, aussi bien qu'ils sont cogneus par leurs statuës & effigies, lesquelles le vainqueur n'a point voulu faire abbatre? La posterité rend à vn chacun la louange qu'il a meritee. Et certes ie pense, si ie suis condamné, qu'il n'y aura faute de gens qui fassent mention non seulement de Cassius & Brutus, mais aussi de moy mesme. Ce dit, Cremutius sortit du Senat, & se laissa mourir de faim. Le Senat ordôna que les Ediles feroient bruller ses liures: toutefois il en demoura quelques vns, tant de ceux qui auoient esté mis en lumiere, que des autres qu'on auoit tenus cachez. Qui me donne plus d'enuie de me mocquer de la bestie de ceux lesquels à cause du grand pouuoir qu'ils ont pour le iourd huy, pensent aussi estaindre la memoire du temps qui viendra apres: car au contraire quand ils se vengent des gens de bon esprit, leur autorité en est plus augmentee: de sorte que ny les Princes estrangers, ny eux qui ont vsé de semblable cruauté, y ont acquis autre chose sinon.

LE IIIII. LIVRE DES ANNALES

deshonneur pour eux: & aux escriuans louange, gloire, & reputation.

Calpurnius Saluianus. Sex. Marius.

Or en ceste apnee les accusations furent si bien continuées, que mêmes durant les feries Latines Calpurnius Saluianus vint à accuser Sex. Marius deuant Drusus preuost de la ville, ainsi qu'il venoit en son auditoire pour y faire sa premiere entree. Ce qu'estant publicquement blasmé par Tibere, fut cause d'enuoyer Saluianus en exil.

Cyziceniens.

Pareillement l'on obiecta publicquement aux Cyziceniens qu'ilstenoiient peu de conte d'observer les ceremonies instituees pour Auguste: & d'auantage qu'ils auoient fait force aux bourgeois de Rome. Au moyen dequoy ils perdirét la liberte par eux meritee pour auoir enduré le siege en la guerre contre Mithridates, & repoussé ce Roy non moins par leur vertu & constance, que par le secours de Lucullus.

Fonteius Capito.

Vibius Sere-nus.

Mais Fonteius Capito, qui auoit esté Proconsul d'Asie, fut absous apres qu'on eut cogneu que les crimes qui luy auoient esté mis à sus par Vibius Sere-nus, estoient cōtrouuez. Serenus pourtāt n'en eut aucune punition: car la haine que luy portoit vn chacū, estoit cause de le faire viure en seureté: pour ce que tant plus vn accusateur estoit aspre & rigoureux, tant plus il estoit tenu comme sacrosancte & inuiolable. Les autres legers accusateurs & de peu de bruit estoient puniz. En ce temps les Espagnes de delà enuoyerent Ambassadeur pour supplier qu'à l'exemple de ceux d'Asie il leur fust permis de bastir vn temple à Tibere & à sa mere. Tibere vsant de ceste occasion
(combien

(combié que sans cela il se monstraſt aſſez ferme à reſuſer les honneurs) & penſant qu'il eſtoit bon de reſpondre à ceux qui luy auoient donné le bruit d'eſtre deuenu ambitieux, feit vne telle harâgue. Le ſçay, Peres cōſcripts, que pluſieurs ont deſiré en moy plus de conſtance, pour n'auoir reſuſé n'a pas long temps ceſte meſme choſe aux villes d'Asie qui la demandoient. Le vous vueil donc maintenant rendre raiſon de mon taire precedent, & declairer ce que i'ay delibéré de faire à l'aduenir. Voyât que feu Auguſte n'auoit empeſché ceux de Pergame d'edifier vn temple à luy & à la ville de Rome: Le (qui garde tous ſes faits & dits ne plus ne moins qu'une loy) me ſuis monſtré plus prompt à enſuyure ceſt exēple ia receu & approuué, attēdu meſmes que la veneration du Senat eſtoit iointe à l'honneur que l'on me faiſoit. Au ſurplus comme il eſt pardonnable d'auoir vne fois accepté ceſt honneur: auſſi de ſouffrir les effigies des dieux eſtre ſacrees par toutes les Prouinces, ſeroit reputé choſe ſuperbe & ambitieufe. Qui plus eſt, en ce faiſant l'honneur d'Auguſte ſabaifſeroit, eſtant ainſi prophané par toutes ſortes de flaterie. Le (Peres cōſcripts) vous appelle à teſmoins, & veux que la poſterité cognoiſſe que ie ſuis mortel, que ie fais les meſmes œuures que font les hommes, & qu'il me ſuffiſt ſi ſeulement ie tiens lieu de Prince. Parquoy ceux qui voudront abondamment auoir ſatisfait à la memoire de moy, croient que ie n'ay point fait de deshonneur à mes predeceſſeurs, que i'ay eſté ſoigneux de voz affaires, conſtant en perils, & n'ay craint la mal-

*Harâgue
de Tibere.*

LE IIII. LIVRE DES ANNALES

ueillance des hōmes, moyennant que ie peusse profiter à la Republique. Ces choses me seruiron de temples dedans voz cœurs, & me seront pour belles & perdurables effigies. Car celles qui sont de pierre, si le iugement des hommes se tourne en haine, ne sont estimees non plus que sepulchres. Et pource ie prie tous les citoyens & cōfederez, tous les dieux & deesses, à sçauoir les dieux qu'ils me donnent iusques à la fin de mes iours vn esprit posé, & ayant intelligence des droits diuin & humain : & aux citoyens & confederez, que toutes & quantes fois que ie seray passé de ce siecle, ils pourluyent mes gestes & la memoire de mon nom avec louange & bōne recordation. Depuis ce temps il perseuera tousiours (mesmes és propos qu'il tenoit en secret) à reietter de soy vne telle veneration : ce qu'aucuns luy tornoient à modestie, les autres à vne defiance qu'il auoit de soy-mesme, & plusieurs à lascheté de cœur. Pource que les meilleurs & plus parfaits entre les hommes ont tousiours aspiré aux choses plus hautes & excellentes. Que par ce moyen Hercules & Bacchus en Grece, & en nostre pays Romulus, auoiēt esté adioustez au nombre des dieux. Qu'Auguste auoit bien mieux fait d'auoir esperé d'y pouuoir paruenir. Que les princes auoient incontinct toutes autres choses en abondance, qu'une seule estoit de laquelle l'on ne se deuoit rassasier, cest de laisser de soy vne bōne renommee : car ou l'on fait peu de conte de la renommee, il est necessaire aussi que les vertus y soient peu estimees.

Mais

Mais Seianus enyuré de ses prosperitez, & outre incité de la conuoitise de Liuia, laquelle le pressoit d'accôplir le mariage promis, feit vne requeste pour presenter à Tibere: car la coustume de ce temps estoit, que quiconque auoit affaire au Prince (encores qu'il fust present) donnoit à entendre son cas par escrit.

Or la teneur de ceste requeste fut telle. Que tant pour la faueur que luy auoit porté Auguste, que depuis par plusieurs tesmoignages que luy en auoit donné Tibere, il auoit accoustumé ne point plustost adresser ses vœus & esperances aux dieux, qu'aux oreilles des Princes. Que iamais il n'auoit demandé grandes dignitez, aymant mieux faire le guet, & traualier comme vn simple soldat pour le salut du Prince. Et toutesfois qu'il auoit gagné le point qui luy sembloit plus honorable, sçauoir qu'il fust estimé digne de l'alliance de l'Empereur. Que de là estoit venu le commencement de ses esperances. Et pour ce qu'autrefois comme Auguste parlast de marier sa fille, il luy auoit ouy tenir propos de quelques Cheualiers Romains: aussi si luy estoit pris pour mary de Liuia, il seroit trouué amy feal, & vsant de la seule gloire d'amitié. Que toutesfois il ne se vouloit exempter des charges qui luy auoient esté donnees, ains se sentoient assez satisfait moyennant que sa maison fust asseuree contre les iniques offenses d'Agrippina, & ce seulement à cause de ses enfans: car de sa part il ne requeroit pl⁹ de temps pour viure que celuy qu'il auoit employé au seruice d'vn tel Prince.

*Requeste
de Seianus à Tibere.*

LE IIIII. LIVRE DES ANNA LSE

*Responce
de Tibere
à Seianus.*

Tibere donnant responce à ceste requeste, apres auoir loué la pieté de Seianus, fait vn petit discours des biens qu'il luy auoit faits, & demandé temps comme pour deliberer tout à loisir sur cest affaire: adiousta encor ces propos. C'est à sçauoir que le conseil des autres hômes s'arreste là ou ils cognoissent leur profit consister: mais que la condition des Princes est d'autre sorte, pource que le principal but de leurs conseils doit tendre à bonne renommee: & pour ce qu'il ne vouloit s'arrester à ce que promptement il eut peu escrire. Au reste que c'estoit à Liuia à deliberer si elle vouloit se remarier, ou s'en abstenir demourant tousiours en vne mesme famille. Qu'elle auoit sa mere & son ayeulle, le cōseil desquelles la touchoit de plus pres. Que de sa part Seianus y procederoit plus simplement si au commencement il ne parloit que des iniinities d'Agrippina, lesquelles s'enflâmeroient beaucoup d'auantage si par le mariage de Liua la maison des Cefars estoit comme en plusieurs parties diuisee. Que de cecy procedoient les enuies & emulations des femmes, & que par ces discordes ses nepueuz estoient renuersez. Quoy? (disoit il) si elle ne veut accepter tel mariage? Certes, Seian, tu es grandement abusé, si ayant deliberé de demourer en l'estat ou tu es à present, tu pèses que Liuia (laquelle a eu C. Cesar premierement, & depuis Drusus, pour matis) soit contente de finer le reste de sa vie avec vn simple Cheualier Romain. Et ores que ie le permette, cuydes tu que ceux le souffrent lesquels ont veu son frere, son pere, & noz predecesseurs constituez

stituez és plus grandes dignitez? Le sçay bien que de ta part tu es content de demeurer au lieu où tu es. Mais ces Magistrats & gēs d'autorité lesquels maugré toy sont exaltez (tellement que toutes choses sont conduites par leur aduis) ne dissimulēt point que, ja long temps a, tu n'ayes excédé le degré des Cheualiers, & monté plus haut qu'il n'estoit licite par l'amitié de mon pere. Qui plus est, pour le mauuais vouloir qu'ils te portent, me blasment aussi. Mais, encores, soit ain- si qu'Auguste ait eu enuie de donner sa fille à vn Cheualier Romain : Se doit on esmerueiller si luy (qui auoit tant de pensees & tant d'affaires en son esprit, & preuoyoit que celuy qu'il auroit exaucé par vne telle alliance, viendroît en vne merueilleuse preeminence & autorité) fait mention en deuisant de C. Proculéius, & quelques autres qui viuoient en paix, & ne sentremelloient en aucune sorte des affaires publiques? Mais si ceste doute d'Auguste nous esmouuoit, combien deurions nous plus estre esmeuz dequoy il la bailla premierement à Agrippa, & depuis à moy? Je ne t'ay point voulu celer cecy, pour l'amitié qui est entre nous deux. Au reste ie ne seray en rien contraire aux entreprises de toy & de Liuia. Pour le present ie ne parleray point de ce que i'ay delibéré de faire, & par quelles alliances ie pretends me ioindre avecques toy. Seulement ie diray qu'il n'y a chose tant haute, que tes vertus & l'affection que tu me porte, ne meritent : ce que i'ay delibéré ne taire, soit au Senat, soit à l'assemblée du peuple, si le temps & l'occasion sy adonnent.

LE IIIII. LIVRE DES ANNALES

De rechef Seianus n'ayant plus tant de soucy de ce mariage, que de crainte des suspicions couuertes de Tibere, & du bruit du peuple, raschoit à se deffendre du blasme duquel il se voyoit estre prochain. Et pour ce qu'il craignoit d'affoiblir sa puissance s'il se deffaisoit des grâdes compagnies qu'il auoit ordinairement en sa maison: & au contraire, s'il les retenoit, de donner occasion à ceux qui luy voudroient mettre quelque chose à sus: il conuertist son estude à trouuer les moyens de mettre en teste à Tibere, qu'il allast demourer en quelques lieux de plaissance qui fussent esloignez de Rome. En quoy il preuoyoit beaucoup de choses. Premièrement qu'un homme ne pourroit parler au Prince sans son moyen: qu'il auroit la cognoissance de la pluspart des lettres, pour ce qu'elles passeroient par les mains des gens d'armes. Aussi que Tibere ja venu sur son vieil aage, & deuenant delicat & paresseux en ces lieux secrets & escartez, laisseroit legerement passer plusieurs des affaires de l'Empire. Et d'auantage preuoyoit que la haine qu'on luy portoit, se pourroit diminuer, apres que l'on ne verroit plus tant de gens à luy faire la cour. Tellement qu'estant despesché de ces choses vaines & de nul effet, il croistroit en vne vraye puissance. Ainsi il commença premièrement peu à peu à blasmer les empeschemens qu'on auoit en la ville, les accours du peuple, & la multitude de ceux qui de toutes parts abordoient le Prince, & loüoit grandement le repos & la solitude, disant que ceux qui les auoient (pour ce qu'ils sont esloignez de tout ennuy & offense) pouuoient aisement delibe-

rer des choses de plus de consequence. Or comme de fortune en ce temps le procez de Votienus Montanus, homme de grand esprit eust esté mis sur le Bureau, Seianus voyant que Tibere faisoit le long à partir de la ville, luy feit à croire qu'il luy estoit besoing d'euter les assemblees du Senat, pour n'ouyr les propos fascheux & molestes, & le plus souuent veritables, qui luy estoient r'amenteus en sa presence. Car comme Emilius homme de guerre (tesmoing produit contre Votienus Montanus 'accusé d'auoir dit paroles vilaines & outrageuses de l'Empereur) racontast de point en point tous les propos de Votienus, pour l'affection qu'il auoit de les prouuer, & s'efforçast de les poursuiure avec grande affirmation, nonobstant le bruit que l'on faisoit autour de luy: Tibere fut contraint d'entendre plusieurs vilainies qui estoient dites de luy en secret: au moyen dequoy il sesmeur de telle sorte, qu'il cria lors, que sur le champ, ou bien durant ce procez il sen vouloit purger: & à grand peine peut estre appaisé par les prieres de ses plus prochains, & par la flatterie d'un chacun. Quant à Votienus il fut puny comme ayant commis crime de Maiesté. Cesar voyant l'occasion luy estre offerte d'vser de cruauté contre les accusez (& pour ce la receuant avec plus d'affection) enuoya en exil Aquilia accusée d'auoir adulteré avecques Varus Ligur, iacoit ce que seulement elle eust esté condamnée suiuant la loy Iulie, par Lentulus Getulicus Consul designé. Aussi il effaçâ Apidius Merula du roolle des Senateurs, pour n'auoir

Votienus
Montanus.

Emilius.

Aquila.
Varus Li-
gur.

Lentulus
Getulicus.
Apidius
Merula.

LE IIII. LIVRE DES ANNALES

voulu faire le serment de garder les ordonnances de
Auguste.

Après cela les Ambassadeurs des Lacedemoniens & Messeniens furent ouys touchant le droit qu'un chacun d'eux pretendoit du temple de Diane Lime-
neride . Les Lacedemoniens' affermoient tant par la memoire des Annales , que par les vers des Poëtes, qu'il auoit esté dedié par leurs predecesseurs, & en leur pays: mais que par armes il leur auoit esté osté par Philippes de Macedoine, contre lequel ils auoient eu guerre . Que depuis il leur auoit esté rendu par la sentence de C. Cesar & de M. Antonius. Au contraire les Messeniens mirent en auant vn partage ancien du Peloponnese fait entre les successeurs d'Hercules, par le moyen duquel le champ & terroir appellé D'enteliates (auquel ce tēple est fondé) estoit escheu en partage à leur Roy, & quel'on en voyoit encore les monumens engrauez en pierres, & en airain tres-ancien: & que sil leur estoit besoing de s'aider du tesmoignage des Poëtes & des Annales, ils en auoient en plus grand nombre que les Lacedemoniens. Quant à Philippes il en auoit ordonné selon le droit, & non selon sa puissance . Que le Roy Antigonus, & le Capitaine Mumius, auoient iugé en la mesme sorte . Que les Milesiens (ayans publicque permission d'en iuger) & finablement Aridius Geminus Preteur d'Achaye, en auoient ainsi ordonné. Par ces moyens les Messeniens gaignerent leur procez. Les Segestains aussi presenterent requeste pour faire rebastir le temple de Venus edifié sur la montagne Erycus, lequel estoit tombé de
vieillesse.

vieillesse. Quoy faisant ils reduirent en memoire plusieurs choses de l'origine de Venus, lesquelles pleurent à Tibere, tellement qu'il en print la charge comme proche parent d'elle.

Lors aussi fut disputé des requestes presentees par les habitans de Marseille, & fut approuué l'exemple de P. Rutilius, lequel ayant esté chassé de Rome suyuant les loix, auoit esté recueilly par ceux de Smyrne & receu pour citoyen de leur ville. Suiuant lequel droit ceux de Marseille auoient aussi receu Vulcatius Moschus bāny, pour l'un de leurs Citoyens, lequel auoit aussi laissé tous ses biens à leur republique, comme à sa patrie.

P. Rutilius

Vulcatius Moschus

En ceste annee allerent de vie à trespas de gens d'apparence Cn. Lentulus, & L. Domitius. Lentulus outre ce qu'il auoit esté Consul, & triomphé des Getuliens, estoit aussi en grande reputation pour s'estre honnestement maintenu en sa pauureté, & pour auoir depuis acquis de grands biens sans faire tort à personne, & en iceux s'estre gouuerné fort modestement. Mais Domitius fut annobly à cause de son pere, lequel durant les guerres ciuiles fut tousiours seigneur de la mer, iusques à ce qu'il se fut mis du party d'Antonius, & depuis de celuy de Cesar. Son ayeul auoit esté tué en la guerre Pharsalique tenant le party des nobles. Quant à luy il auoit esté esleu pour mary d'Antonia fille puisnee d'Octauius. Depuis avec son armee auoit passé outre le fleuve d'Elbe, & entré plus auant en Germanie, que tous ceux qui au parauant y auoient mis le pied: & pour ces causes triompha. En ce temps aussi mourut L. Antonius de race fort noble, mais

Cn. Lentulus. L. Domitius.

Antonia. Suetone dit que ce fut de l'asinee.

L. Antonius.

LE IIIII. LIVRE DES ANNALES

*Iulius
Antonius*

L. Piso.

mal fortunee: car comme son pere Iulius Antonius eust esté puny de mort pour auoir adulteré avecq' Iulia, Auguste voyant cestuy encor ieune enfant, & nepueu de sa leur, l'auoit retiré à Marseille, ou son exil fut couuert sous nom d'estudes. Toutesfois il luy fut fait grand honneur à ses funerailles, & furent ses os par ordonnance du Senat mis au sepulchre des Octauiens. Les mesmes estans Consuls fut perpetree vne grande meschanceté en l'Hespagne de deça par vn païsant Terrestin de nation. Cestuy ayant assailluy en vn chemin au despourueu. L. Piso Preteur de ceste prouince (qui à cause de la paix ne se doutoit de rien) le mist à mort d'vn seul coup. Quoy fait fuyt tant sur vn cheual viste & legier qu'il paruint en vn lieu de forests, ou il laissa ce cheual, & cheminant à pied par lieux desuoyables rompuz & malaisez, feit perdre la trace de ses pas à ceux qui le suyoient. Toutesfois il ne demeura gueres qu'il ne fust cogneu: car estant le cheual pris, & mené par les prochaines bourgades, l'on sceut incontinent le maistre à qui il estoit: & iceluy trouué, & mis en la question pour declarer ses complices, cria à haute voix en son langage, qu'en vain on l'interrogoit, & que ses compagnons assistassent seulement à luy veoir donner la question: car il n'y auoit si grande force de douleur qui le peust contraindre à declarer la verité. Le lendemain comme on le ramenoit à la question, se deffit de ses gardes, & se donna de la teste contre vne pierre avec telle force & vehemence, que soudain apres il mourut. Toutesfois l'on tiert que Piso fut occis par la fraude & conspiration des Terrestins, à cause qu'il estoit aspre à emplir ses bouges de l'argent

l'argent qu'il serroit du public, plus que ces Barbares ne pouuoient endurer.

Estans Cōsuls Lentulus Getulicus, & C. Caluissius le triōphe fut decerné à Poppeus Sabinus pour auoir def-
 fait quelques gens du pays de Thrace, lesquels pource
 qu'ils habitoiēt le haut des montagnes, & viuoyent sans
 aucune police, en estoÿēt plus cruels & sauuages. La cau-
 se de ceste emotiō vint pour ce que ceste gent outre son
 naturel ne pouuoit souffrir que l'on choisist, & refusoiēt
 à bailler, les pl⁹ robustes d'entre eux pour nostre guerre.
 Mesmes n'auoyent accoustumé d'obeyr à leurs Rois si-
 non quād bon leur sembloit. Et si aucunesfois ils nous
 enuoyoiēt quelques secours, ils faisoient les Capi-
 taines d'aucuns d'entre eux: & iamais ne faisoient guerre
 sinon contre leurs voisins. Le bruit estoit lors qu'on se
 deliberoit de les espādre, & mener en diuerſes contrees
 pour les meller parmy les autres nations. Or auant que
 commencer la guerre, ils enuoyèrent Ambassades pour
 remonſtrer qu'ils auoient tousiours esté amis & obeis-
 sans: qu'ils demoureroyent en pareil deuoir, moyennant
 qu'on ne les chargeast point de nouueaux subſides. Mais
 que si l'on se deliberoit les tenir en seruitude comme
 gens vaincuz: qu'ils auoient du fer, des ieunes gens, & vn
 cœur deliberé de mourir, ou de viure en liberté. Ils se
 vantoient aussi de leurs forteresses situees entre grands
 rochers, esquelles ils auoient retirez leurs peres, meres
 & femmes: & nous menassoient d'vne guerre empeſ-
 chante, malaisée, & pleine de sang. Mais Sabinus les en-
 tretenoit de belles paroles iusques à ce qu'il eust assem-
 blé toute ſō armee, attédāt que Pōponius Labeo arriuaſt

*La deu-
 ziesme
 année de
 Tiber.
 Pop. Sabinus.
 Thrasiens.*

*Pōponius
 Labeo.*

LE IIII. LIVRE DES ANNALES

de Mesie avec vne legion & le Roy Rhoemetaces avec le secours des gens du pais qui estoient demeurez en leur fidelité. Tous lesquels assemblez avec les gēs qu'il auoit pour lors, il tira droit à ses ennemis, qui ia s'estoient fortifiez és destroits des forests. Aucuns plus hardis se presentoient au dessus des montagnes, desquels approchant secrettement le Capitaine Romain avec son armee, les repoussa aisement: ou y eut peu de Barbares deffaiets, pour ce qu'ils auoient là aupres, lieux propres pour leur retraicte. Ayant donc ce Capitaine Romain dressé son fort en ce lieu, il alla avec vne bonne troupe de gens pour gaigner la montagne qui auoit la cime estroicte, & egalle, & continuelle iusques à la prochaine forteresse, laquelle estoit gardee par vne grande multitude, toutesfois tresmal ordonnee. Consequemment enuoye l'eslite de ses archers contre les plus braues de ses ennemis, lesquels à la coustume du pays dansoient & trepignoient avec chansons deuant le rempart. Tant que ses archers tirerent de loing, ils en bleferent plusieurs, sans trouuer aucune resistance: iusques à ce que s'approchans plus pres, les ennemis se ruerent sur eux à l'impourueu: & les auoient mis en desordre, sans le secours de la cohorte Sicambrienne, par le moyen duquel se r'allierent. Le Capitaine Romain tenoit ceste cohorte preste non loing de là ou se faisoit l'escarmouche, pour ce qu'elle estoit prompte aux hazards, & non moins espouuentable tant par le bruit de ses chants, que de ses armures. Ce fait on fit marcher le camp iusques aupres des ennemis, & laissa l'on au premier fort les Thraciens, lesquels nous auons dit cy dessus s'estre mis de nostre party. Et leur fut permis

*Cohorte
Sicam-
brienne.*

mis de gaster, blusler, piller, emmener butins, moyen-
nant qu'ils n'y allassent que de iour, & que la nuit ils se
retiraissent au fort pour faire le guet, & pour plus grande
seurété de leurs personnes. Ce qui fut assez bien gardé
pour le commencement: mais depuis se laissans tomber
en dissolution, & transportez d'une affection de se faire
riches, ne se soucierent plus de faire le guet, & par l'abô-
dance des viandes, & surpris ou du vin, ou du sommeil,
se laissoient tomber. Les ennemis s'estans apperceuz de
leur negligence, vont apprestez deux bandes, l'une des-
quelles deuoit aller ruer sur ces pillars, & l'autre assaillir
le fort des Romains, non point en intention de le pren-
dre, mais à fin que par le moyen du bruit & du traict,
ceux de ce fort se trouuassent si empeschez chacun en-
droit soy, qu'ils n'eussent loisir d'entendre le bruit
de l'autre alarme qui se donnoit. Et d'auantage ils
entreprendrent de faire cecy de nuit, à fin de
plus les espouuenter. Quant à ceux qui assailloient le
fort des legions, ils furent aisément repoulsez: mais
les Thraciens venuz à nostre secours, espouuentez de
veoir à l'impourueu tant de gens sur eux, estans les
vns couchez aupres du fort, & les autres dehors au
fourrage, furent tuez sans remission, d'autant plus
qu'ils estoient tenuz pour trahistres, accusez de s'e-
stre renduz aux ennemis, & auoir pris les armes pour
rendre eux & leur patrie en seruitude. Le lendemain
Sabinus se presenta avec son armee en vn lieu ou les
vns n'auoyent plus d'auantage que les autres, pour
veoir si ces Barbares gaiz & deliberez pour la bonne
fortune qu'ils auoient eue la nuit precedente, au-

LE IIIII. LIVRE DES ANNALES

feroyent luy donner la bataille. Mais voyant qu'ils ne sortoyent point de leur forteresse, ny des terres prochaines d'icelle, commença à les assieger avec son camp, lequel lors bien à point il commençoit à fortifier. Depuys ayant fait des tranches tout à l'environ, qui contenoient bien quatre milles de tour, commença à fin de leur oster l'eau & le fourrage) petit à petit à faire ceste closture plus estroite, tellement que la premiere tranchee enuironnoit la derniere faicte. Et ia y auoit vn bouleuert dressé, duquel l' pouuoit ietter pierres, lances, & feux contre les ennemis: tant on en estoit pres. Mais il n'y auoit rien qui plus les greuaist que la soif, ne restant à toute ceste multitude de gens de guerre mal aguerriz, qu'une seule fontaine de laquelle ils peussent vser. Pareillement le bestial enfermé avec eux (à la mode des Barbares) mouroit par faute de fourrage. Aupres estoient les corps des hommes morts tant des playes receuës, que de la soif. Tout estoit corrompu de sang pourry, d'infection, de puanteur, & d'attouchement. Estans leurs affaires ainsi troublees, vne discorde se mist entre eux, pour les acheuer de paindre: car les vns s'appareilloyent pour eux rendre, & les autres à s'entretuer & mourir. Il en y auoit lesquels enuieux de venger leur mort, estoient d'avis de faire vne saillie sur ceux de dehors. Ceux icy n'estoyent gens de petite estoffe, iaçoit ce qu'ils fussent differens en opinion: Mais entre les Capitaines vn nommé Dinis, ia ancien, & qui avec long vsage auoit esprouué la force & la clemence des Romains, conseilloit de mettre bas les armes, & que ce seul remede restoit à leur affliction.

Et le

Discorde.

Dinis.

Et le premier de tous avec sa femme & ses enfans se donna en la puissance des vainqueurs. Les autres des plus aagez, ou de sexe imbecille, & qui auoyent leur vie en plus de recommandation quel'honneur, le suy- uirent. Quant aux ieunes gens ils estoient en doute s'ils deuoyent croire à Tarfa, ou à Turesis: toutesfois & l'un & l'autre se deliberoit de mourir en liberté. Tarfa criant qu'il failloit auancer sa fin, & rompre toute crainte & esperance, donna exemple aux autres se passant l'espee à trauers la poitrine. Il en y eut plusieurs qui firent comme luy. Mais Turesis avec sa compagnie attendoit venir la nuit, dont nostre Capitaine fut aduertý, au moyen dequoy renforça le guet. La nuit estoit ia venue, & faisoit vne merueilleuse pluye. Les ennemis faisoient maintenant vn grand bruit, & tout soudain se tenans coys tenoyent ceux du siege en grande doute: quand Sabinus allant ça & là admonestoit ses gens de ne donner à cognoistre leur accident aux ennemys qui estoient en embusche, pour le son incertain de leurs trompettes, ny pour faindre de se tenir coys, mais qu'un chacun d'eux gardast sa place sans se remuer, & feist son deuoir. Ce temps pendant ces Barbares courans en troupes iettoient dedans le camp tantost pierres avec la main, pieux bruslez par le bout, & chesnes coupezz, tantost ils remplissoyent les tranchees de petits arbrisseaux, de clayes, & de corps morts. Aucuns auoyent faict auparauant expressement des pontz & des eschelles, lesquelles ils lançoient sur les bouleuers: les empoignoyent, taschoyent à en ietter les nostres hors, & de pres cōbaroiēt cōtre ceux qui-

Tarfa.
Turesis.

LE IIII. LIVRE DES ANNALES

les vouloient empescher. Au contraire les nostres les renuersoient avec le traiet, repoulsoient de leurs boucliers, & leur lançoient forces iauelots (que l'on iette des murailles) avec gros monceaux de pierres. Aux nostres le courage estoit augmenté pource que l'esperance de la victoire leur estoit acquise, de sorte que c'eust esté grande lascheté de quitter la place. Les autres pour l'extremité en laquelle ils se voyoient, & pour auoir leurs femmes & leurs meres là presentes, reprenoient cœur par les plaintes & pleurs d'icelles, tellement que l'on frapport à tort & à trauers: & se sentoient l'on blessé sans scauoir d'ou. L'on n'y cognoissoit les siens d'avec les ennemis: & les voix renduës sur le derriere par la repercussion qui se faisoit à cause de la concauité de la montagne, auoient tellement tout brouillé, que les Romains abandonnoient aucuns de leurs forts, pensans qu'ils fussent abbatuz. Et toutesfois n'eschappa des ennemis sinon bien peu: car estans les plus hardis ou deliberez d'entre eux, ou occis, ou naurez: le iour venu les autres furent aisément chassez iusques au haut de leur forteresse, & là finablement ils furent contraints d'eux rendre. Aussi les prochaines places furent renduës du bon gré des ennemis: l'hyuer aspre & hastif prouenant du mont Hemus, garda les autres qu'elles ne fussent prises ou par force, ou par longueur de siege. Mais à Rome estant la maison du prince toute troublee, & à fin que le cours de la future ruine & destruction d'Agrippina prist commencement: Claudia Pulchra, qui estoit sa cousine germaine, fut accusée par Domitius Afer. Cestuy ayant nouuellement esté Preteur, encor peu auancé en dignitez,

*Mont
Hemus.*

*Claudia
Pulchra.
Domitius*

dignitez, & conuoiteux de se faire tost cognoistre par quelque maniere que ce fust, l'accusoit de s'estre forfait, & allegoit pour son adultere Furnius. Pareillemēt luy mettoit à sus qu'elle auoit fait quelques charmes, sorcelleries, & inuocations contre le Prince Agrippina cōme tousiours elle estoit terrible, mais lors principalement enflammee du peril de sa cousine, s'en va droit à Tibere: lequel elle trouua de fortune sacrifiant à son pere. De là prenant occasion de le blasmer, vint à dire que ce n'estoit à faire à vne mesme personne de sacrifier des victimes à Auguste, & de persecuter sa posterité: que l'esprit diuin n'estoit point transfuz en ces images mortes: mais que la vraye image issuë du celeste sang, entendoit bien qu'elle difference il y auoit: parquoy aussi receuroit le triste estat des accusez. En vain (disoit-elle) l'on faiët semblāt de s'attacher à Pulchra, puis que nous mesmes ayestē la seule cause de sa ruine, pource que trop indiscrettement elle auoit choysi d'aymer & honorer Agrippina, ne se souuenant plus de Sosia, qui pour la mesme cause auoit esté affligée. Ces paroles ouyes par Tibere, arracherent de son courage couuert, propos qu'il auoit peu accoustumē de laisser aller: & l'ayant aigrement reprise, l'admonesta par vn vers Grec, qu'elle ne se sentoit pour autre cause offensee, sinon pour ce qu'elle ne regnoit point. Ainsi Pulchra & Furnius furent condamnez, & Afer mis au reng des principaux Orateurs: car son esprit fut diuulgū, & s'en ensuyuit l'attestation de Tibere, lequel du droit qu'il auoit, l'appella eloquent. Tost apres comme il entreprist plusieurs accusations, il eut plus de bruit de bien parler,

Furnius.

D

LE IIIII. LIVRE DES ANNALES

que d'estre homme de bien, iusques sur la fin de son aage, que son eloquence fut beaucoup diminuee, pource que lors ayant l'esprit las & trauaillé, il n'auoit neantmoins la patience de se taire.

Mais Agrippina obstinee en son courroux, & surprise de maladie, ainsi que Tibere la venoit visiter, fut long temps à plorer sans sonner mot: puis soudainement commença à le blasmer, & puis à le prier, qu'il subuint & remediast à sa solitude, & la pourueust d'un mary, attendu qu'elle estoit encor ieune femme, & que la plus grande consolation que pouuoient auoir les gens de bien, estoit en mariage. Qu'il y en auoit en la cité.

Quelque chose defaut en cest endroit.

qu'il luy pleust receuoir la femme de Germanicus, & ses enfans. Mais Tibere cognoissant bien de quelle conséquence en la republique estoit ce qu'elle demandoit (toutesfois à fin qu'il ne donnaist à cognoistre qu'il vouloit fascher Agrippina, ou qu'il la craignoit) la laissa sans aucune response, iacoit ce qu'elle l'en poursuyuist tresinstantamment. Il trouue cecy (dont les elcriuans n'ont fait aucune mention) es commentaires de sa fille Agrippina, laquelle estât mere de Néron, laissa sa vie & ses fortunes à la posterité. Or voyant Seianus Agrippina triste, & sans aucune suspicion, l'estoie encor d'auantage, ayant attiré quelques ges qui sous vmbre d'amitié l'admonestoient qu'on auoit deliberé de l'empoisonner, & pource qu'elle se gardast de manger de ce qui luy seroit serui en la maison de son beau pere. Et elle qui ne pouuoit dissimuler en sorte que ce fust, estant assise aupres de Tibere
ne peut

ne peut estre persuadée par cōtenance ou par paroles de prendre aucune viande, iusques à ce qu'il s'en apperceut, ou par cas d'auenture, ou pource qu'il en auoit esté aduertty. Et à fin d'en auoir plus certaine experience, commença à faire grande estime de quelques pommes qui estoient sur la table, & de sa main les presēta à Agrippina sa bru au moyē de quoy la suspiciō qu'elle auoit auparauāt, fut augmētée, & pource sās en goulster les renuoya aux seruiteurs. Toutesfois Tibere ne tint de cecy aucū propos deuant les gens, mais se tournāt deuers sa mere, dist qu'ō ne se deuoit point esmerueiller s'il auoit ordonnē quelque rigoureuse punition cōtre celle qui l'auoit en estime d'empoisonneur. Depuis le bruit courut qu'ō taschoit à la faire mourir, ce q' l'Empereur n'osoit entreprēdre publiquemēt, mais secrettemēt cerchoit les moyēs de ce faire.

Tibere doncques pour estaindre ce bruit, se trouuoit souuent au Senat. Et comme les ambassadeurs d'Asie fussent en doute en quelle citē ils deuoyent faire bastir leur temple, il leur donna par plusieurs iours audience. Vnze citez en debatoient avec pareille ambition, toutesfois non semblables en puissāce: & racontoit chacune pour soy choses non gueres differentes en temps, comme de l'antiquitē de leur race, & de l'affection qu'ils auoient monstree au peuple Romain durant les guerres contre Perseus, Aristonicus, & autres Rois. Les Hiopeniens & Trallians furent legeremēt passez avec les Laodiciens & Magnesiens, pour n'alleguer chose qui militast. Mesmes à ceux de Troye la grande seruit peu de dire que ceste ville estoit mere de la ville de Rome, sinon quant à la gloire de l'anciennetē.

Hiopeniens Trallians, Laodiciens, Magnesiens, Troye.

LE IIII LIVRE DES ANNALES

Halicarnassiens. L'on s'arresta & feit l'on quelque difficulté sur ce que les Halicarnassiens affermoient que par l'espace de mil deux cens ans n'y auoit eu aucun tremblement en leurs terres, & que les fondemens du temple seroyent bastis sur pierre viue. Aux Pergameniens (qui s'aydoient seulement de ce que ia il y auoit vn temple en leur ville dedié à Auguste) fut respondu qu'ils se deuoyent contenter. Les Ephesiens & Milesiens furent aussi refusez, par ce que les Milesiëns auoyët leur ville assez empeschée apres les ceremonies d'Apollo, & les Ephesiens apres celles de Diane. Ainsi tout le debat demoura entre les Sardiens & Smyrniens. Les Sardiens reciterent le decret des Ethruriens comme proches parens, allegans que Tyrrenus & Lydus enfans du Roy Arty, auoiët diuisé leurs gens pour la trop grande multitude, en sorte que Lydus estoit demouré au pays, & à Tyrrenus fut permis d'aller chercher nouuelles terres pour habiter. Que du nom de ces deux capitaines l'vne & l'autre nation auoit pris le sien, l'vne en Asie, & l'autre en Italie. Que de rechef l'opulence des Lydiens s'estoit augmentee, au moyen dequoy auoyent enuoyé peuples en Grece, qui depuys prindrent leur nom de Pelops. Parreillement rememoroyent les lettres à eux enuoyees par les capitaines & chefs d'armees: les alliances faictes avecq' nous durant la guerre de Macedoine, l'abondance de leurs riuieres, la douceur & temperance de leur air, & les riches pays d'entour eux. Mais les Smyrniens apres auoir fait quelque discours de leur antiquité (fust que de Tantalus fils de Iupiter ils ayent eu leur commencement, ou de Theseus aussi de la lignee des dieux

dieux, ou bien de l'une des Amazones) passerent outre aux choses esquelles ils s'assuroient le plus, comme aux seruices qu'ils auoyent faicts aux Romains, leur ayantourny d'une armee de mer, non seulement pour les guerres qu'ils faisoient es pays estranges, mais aussi quand l'Italie a esté assaillie. Pareillement comme les premiers de tous ils auoyent edifié vn temple à la ville de Rome du temps que M. Porcius estoit Consul, auquel temps la republique de Rome estoit aucunement augmentee, toutesfois non iusques au souverain degre, estant Carthage encor florissante, & plusieurs roys de l'Asie en vigueur. Aussi amenoient le tesmoignage de L. Sylla, sçauoir que cōme il eust esté rapporté à Smyrne en l'assemblée, que nostre armee estoit en grande perplexité, tant pour l'aspre froidure de l'hiver, que par faute de vestemens: ceux qui estoient presens à ouyr cecy, despouillerent leurs habits, & les enuoyerent aux legions Romaines. Ainsi estant le Senat prié d'en donner son aduis, les Smyrniens furent preferrez. Et Vibius Marfus fut d'opiniō que à M. Lepidus (auquel ceste prouince estoit escheuë) l'on deputast encor vn legat outre le nombre accoustumé, pour prendre la charge de ce temple. Et pource que M. Lepidus par modestie empeschoit qu'il n'y fust esleu: le sort estant cheu sur Valerius Naso (qui autrefois auoit esté Preteur) il y fut enuoyé.

M. Porcius

Carthage.

L. Sylla.

Vibius
Marfus.
M. Lepi-
dus.Valerius
Naso.

Sur ces entrefaictes Tibere apres auoir longuement delibéré sur ce qu'il auoit à faire, & retardé plusieurs fois sa deliberation: finablement se retira en Champagne sous couleur de vouloir dedier vn temple à Iupiter

LE IIII. LIVRE DES ANNALES

dedans Capuë, & vn autre à Auguste dedans Nole. Mais à la verité c'estoit pource qu'il auoit arresté de viure loing de Rome. l'ay attribué la cause de son depart aux menées de Seianus, apres plusieurs autres auteurs. Mais pource qu'apres que Seianus fut tué, il demeura encor par l'espace de six ans ainsi secretement & à l'escart, ie suis quelque fois meu de penser qu'il soit plus veritable de l'attribuer à luy mesme, qui auoit accoustumé de chercher lieux secrets pour couvrir l'effect de ses cruautéz & paillardises. Aucuns ont creu qu'estât deuenu vieil, il auoit hôte de la deformité de son corps: car il estoit grâd, graille, & tout courbé: auoit le haut de la teste tout chauue, la face pleine d'vlcères, & bien paincte & distinguee de medicaments. Mesmes à Rhodes il auoit accoustumé d'euer secretement les compagnies, & tenir ses voluptez secretes. L'on tient aussi qu'il s'en alla en partie pour l'orgueil & outrecuidance de sa mere, laquelle il ne vouloit admettre comme compagne de sa domination: & toutesfois ne pouuoit l'en priuer, par ce qu'il l'auoit eue en don d'elle: car Auguste auoit fait doute de cōmettre sur la Republique Romaine Germanicus, petit fils de sa sœur, prisé & loué d'un chacun: & vaincu des prieres de sa femme, auoit adopté Tibere, & Tibere Germanicus: parquoy sa mere luy reprochoit ordinairement cela, & luy redemandoit.

En ce voyage il ne mena grâde compagnie, & n'y auoit qu'un seul Senateur, Cocceius Nerua, qui auoit esté Consul, & estoit fort sçauant és droitz. Pareillemēt n'y auoit aucun Cheualier Romain, fors Seianus:

ny de

*Cocceius
Nerua.
Seianus.*

ny de gēs de nom, que Curtius Atticus. Les autres estoient gēs instruits és sciēces liberales, & Grecs pour la pluspart, qui de leurs propos releuassent de fascherie. Aucuns Astrologues disoient que Tibere estoit sorty de Rome souz telle planette, que iamais n'y retourneroit, qui fut cause de la mort de plusieurs, lesquels par cela cōcluoient & semoiēt par tout q̄ Tibere ne sçauroit plus gueres viure. En quoy fut incontinēt manifesté le peu de differēce qu'il y a entre l'art & ce qui est faux, & cōme les choses vraies sont biē souuēt couuertes souz l'obscurité: car sans cause il n'auoit esté dit qu'il ne retourneroit plus en la ville, pource q̄ sçachāt se passer d'icelle, & non des autres choses, il acheua le reste de sa vie ou en quelque maison des champs là aupres, ou sur quelque riuage de mer, & le plus souuēt és fauxbourgs de la ville. Or cōme d'auēture durāt ces iours Tibere fut tōbé en vn grād peril, cela augmēta ceste vaine renōmee, & luy dōna occasion de plus se fier en l'amytiē & constāce de Seianus: car cōme ils mangeoiēt en vne mestairie nōmee Spelunque, qui est entre la mer Amuclane & les monts Fundains, en vne cauerne naifue: l'entree d'icelle fondit, & accabla aucuns des seruiteurs: ce qui espouuēta tellemēt le reste, que tous ceux qui estoient à ce bâquet, s'enfuyrēt. Seianus se panchant sur Tibere, & ioignāt les genoux, les mains, & son visage avec les siēs, receuoit sur soy ce qui tomboit d'enhaut: & fut trouué en cest estat par les gēsd'armes qui estoient venus au secours. De là il cōmença à deuenir plus grād: & iaçoit qu'il conseillast choses dommageables, si e-

*Curtius
Atticus.*

*Spelun-
que.*

LE IIII. LIVRE DES ANNALES

stoit il creu, pource qu'on pensoit qu'il ne le fist pour son profit, ny pour soing qu'il eust de sa personne. Et mesmement contrefaisoit du iuge contre la lignee de Germanicus, ayant attiré gens pour en estre accusateurs & pour suyure de pres Neron plus prochain à succeder. Car iaoit ce que ce ieune homme fust fort modeste, toutesfois il oublioit bien souuēt les choses qui luy seruoient mieux pour le temps, lors que par ses cliens & affranchiz (ausquels il tardoit de deuenir grands) il estoit incité de dōner à cognoistre qu'il auoit le courage hautain & asseuré, luy faisans entendre que le peuple Romain ne demandoit pas mieux, & que les soldats ne souhaittoient autre chose. Que Seianus n'estoit homme pour l'empescher, lequel maintenant se mocquoit de la patience de ce vieillard, & du peu de courage de ce ieune homme.

Neron.

Oyant Neron tels & semblables propos, il ne meist pourtant aucune mauuaise fantasie en son esprit, toutes fois il laissoit souuent eschapper quelques paroles orgueilleuses & indiscrettes, lesquelles entrēduës, & augmentees & rapportees par ceux qui estoient commis à l'espier, & ne luy estant donné aucun moyen de s'en purger, s'ouuoient autres diuerfes manieres d'ennuyz & de sollicitudes: car les vns craignoient de l'auoir à la rencontre: les autres luy ayans rendu son salut, luy tournoient soudainement le doz: aucuns ayans commencé quelques propos avec luy, le laissoient là: & au contraire ceux qui fauorisoyent à Seianus, insistoient & s'en mocquoient. Or Tibere auoit vn regard de trauers: & fust

& fust qu'il parlaſt, ou ſe teuſt, ſon viſage promettoit touſiours quelque choſe de faux. A ce ieune homme le parler & le taire eſtoient imputez à crime. Meſmes la nuit ne luy eſtoit aſſeuree, pour ce que ſa femme ra- contoit ſes veilles, ſon dormir, & ſes ſouſpirs à ſa me- re Liuia, laquelle deſcouuroit tout à Seianus. Lequel auſſi tira Druſus frere de Neron à ſa cordelle, luy ayât donné eſperance de pouuoir venir à la principauté, ſ'il en pouuoit ietter hors ſon frere ainſné, lequel eſtoit ja fort eſbranlé.

Drufus outre l'enuie qu'il auoit d'eſtre grand, & la haine que l'on voit ſouuent entre les freres, auoit auſſi vn courage felon & outrageux: & d'auantage bruſ- loit dequoy Agrippina ſe monſtroit plus encline en- uers Neron. Mais Seianus ne fauoriſoit tant à Drufus, qu'il ne pourpenſaſt diligemment les commencemēs de ſa future ruine & deſtruction, le cognoiſſant ſuper- be & cruel, & pour ceſte cauſe plus aiſé à deceuoir, & à eſtre ſurpris.

Sur la fin de ceſte annee allerēt de vie à trespas des plus apparens, Afinius Agrippa (la race duquel n'e- ſtoit ſi ancienne que de grande renommee, & n'auoit *Afinius Agrippa. Q. Haterius.* durant ſa vie forligné de ſes anceſtres) & Q. Haterius, lequel eſtoit deſcendu de Senateurs, & fut tant qu'il veſquiſt, en grand bruit à cauſe de ſon eloquen- ce. Mais ſes œures n'ont eſté de longue duree, pour ce que ſa vehemence & impetuofité eſtoient plus eſtimees que les choſes qu'il auoit ſoigneuſe- ment premeditees. Car tout ainſi que le labeur & premeditation des autres, fait que leurs œures

LE IIIII. LIVRE DES ANNALES

sont prisees de la posterité: ainsi ceste resonnance & fluidité de Q. Haterius fut estainte avec sa personne.

L'an treizieme de Tibere. Estans Consuls M. Licinius & L. Calpurnius, il aduint vn accident à l'impourueu, qui feit vne aussi grande boucherie & destruction de gens, comme eut fait vne grosse guerre: mais il eut aussi tost pris fin, que commencement: car comme il y eut vn Amphitheatre commecé à Fidene, vn quidam nommé Attilius, affranchy de condition, voulant exhiber quelque spectacle de gladiateurs, n'auoit fait les fondemens assez solides, ny bien lié & cheuillé ensemble les bois qu'il auoit dressez sur iceux, comme celuy qui n'auoit point entrepris ceste œuvre en abondance d'argent, ny pour se mettre en grace de ses citoyens, ains seulement y pensant faire quelque profit. Gens de tous costez y aborderēt, conuoiteux de veoir telles choses, pource que durant l'Empire de Tibere ils auoient esté recullez de tous plaisirs & passetemps: & y auoit hommes & femmes, ieunes & vieux, qui festoient là assemblez, pource qu'ilsestoient prochains du lieu: au moyen de quoy en fut le dommage beaucoup plus grand, apres que ceste grande mole fut réplie de monde, & puis ruinee, lors que fondant par le dedans, ou tombāt par le dehors, elle tira en bas avec soy ou couurit de bois vne innumerable multitude de personnes, tant de ceux qui regardoient ce spectacle, que d'autres qui estoient dehors. à l'entour. Ceux qui furent là occis tout d'un coup (comme tel estoit leur sort) euerent la longueur du tourment. Et y auoit

*Ruine
d'un am-
phitheatre.
Attilius.*

uoit bien plus grande pitié en ceux lesquels ayans perdu quelque partie de leurs corps, & encor viuans, recognoissoient leurs femmes & enfans de iour avec les yeux, & la nuit par les plaintes & cris qu'ils faisoient. Ceux qui n'estoient venus à ce spectacle, ayās entédu ceste nouuelle, plaingnoïēt l'un son frere, l'autre son cousin, & l'autre ses pere & mere. Mesmes si aucuns s'estoient transportez, non aux ieux, mais en quelque autre part à leurs affaires, l'ō craignoit encor que tels sy fussent trouuez: car pource que l'on n'auoit encor cognoissāce de ceux qui à la verité estoïēt accablez souz ceste ruine, ceste incertitude faisoit craindre qu'il en y eut beaucoup d'auantage. L'on n'eut pas plustost commencé à releuer ce qui estoit tombé, que vous eussiez veu chacun courir & se haster d'embrasser ces gens morts, de sorte que bien souuent s'esmouuoit debat entre eux, quand pour la ressemblance du visage ou de l'aage, ils prenoient les vns pour les autres.

Cinquāte mil furent que tuez que blesez en ceste ruine: au moyen dequoy fut deffendu par arrest du Senat qu'homme n'eut à exhiber d'oresnauant ieux de gladiateurs qui n'eut pour le moins vaillant quatre cens mil, & qu'on ne dressast aucun Amphitheatre sinon en lieu ferme & solide. Attilius fut enuoyé en exil. Au surplus estāt ceste playe encores fraische, les maisons des plus riches furent ouuertes, & aux blesez furēt baillees medecines, & autres choses necessaires. Et iagoit ce que ceux de la ville de Rome fussent pour lors en tristesse & fascherie, si feirent

*Cinquāte
mil tant
tuez, que
blesez
par la rui-
ne d'un
Amphi-
theatre.
Ce sont
dix mil
escus.*

LE IIII. LIVRE DES ANNALES

ils à la mode des anciens , lesquels apres vne grande bataille aidoint les naurez tant de leurs biens que de bon traitement.

Mont Celie. A peine estoit cecy passé, que la violence du feu se mist en la ville, & l'endommagea plus fort que iamais, ayant brulé le mont Celie . Tout le monde disoit que ceste année estoit malheureuse, & qu'en malheure le Prince auoit entrepris s'absenter de la ville, & (commela nature est du vulgaire) tournoient en coulpe les accidens & cas fortuits, si l'Empereur n'y eust donné ordre, distribuant argent à vn chacun selon le dommage qu'il auoit receu . Dequoy les nobles luy rendirent graces au Senar, & le peuple par la renommee, pour ce que sans ambition, ou sans prieres d'amis, il auoit de sa liberalité aidé les inconnus , & ceux que de son franc vouloir il auoit appelez.

Mont Auguste. Outre cecy y eut quelques autres arrests, par lesquels fut dit que le mont Celie seroit d'oresn'auant appelé Mont Auguste, pour ce qu'ayans esté toutes choses d'alentour consommées par le feu, la seule effigie de Tibere qui estoit en la maison de Iunius Senatueur, estoit demouree entiere & inuiolee. Que cela aussi estoit anciennement aduenü à Claudia Quintia, l'effigie de laquelle (eschappée par deux fois de la violence du feu) auoit par les anciens esté consacrée dedans le temple de la mere des dieux. Que les Claudies estoient saints, & fauorisez des dieux: au moyen dequoy falloit croistre les ceremonies du lieu auquel les dieux auoient fait vn si grand honneur au Prince.

Cene

Ce ne sera hors de propos si ie vous raconte icy
 comme ce mont fut autrefois appelé *Querquetulan.*
 pour la quantité des chesnes qui y prouenoient. De-
 puis il fut appelé Celius, à cause de Celes Vibenna, *Celes Vi-
benna.*
 lequel estant Capitaine des Ethruriens, pour auoir a-
 mené le secours qu'il estoit allé querir, obtint ceste
 place pour y faire sa residence, ou de Tarquinius Pri- *Tarqui-
nius Pri-
scus.*
 scus, ou de quelque autre Roy que ç'ait esté: car les
 auteurs ne sont d'accord en cela. Au surplus, il n'y a
 point de doute que ceste grande compagnie qu'il
 auoit amenee, habitoit és lieux plains, & prochains
 du Palais: au moyen dequoy ceste rue fut appel- *Rue Thom-
scane à
Rome.*
 lee Thoscane du nom de ceux qui estoient venuz y
 habiter.

Or pour reuenir à nostre propos, tout ainsi que la
 faueur & bon traictement des riches, & la largesse
 du Prince, auoient donné quelque soulagement con-
 tre ceste aduersé fortune: ainsi la multitude des accu-
 sateurs qui croissoit de iour en iour, & deuenoit pire,
 faisoit infiniz maux, sans donner aucune relasche. *Varus
Quintili-
lius.*
 Varus Quintilius, homme riche, & proche parent de
 l'Empereur, fut accusé par ce Domitius Afer, qui au-
 parauant auoit fait condamner Claudia Pulchra me-
 re dudit Quintilius.

Or l'on ne s'esmerueilloit point de ce qu'apres a-
 uoir esté longuement souffreteux, & abusant de la
 bonne recompense que n'aguieres il auoit receuë, il se
 preparoit à plusieurs autres meschancetez: mais on
 festonnoit, & trouuoit ou quasi comme vn miracle, *P. Dolabella.*
 que P. Dolabella se fust rendu compagnon en ceste

LE IIIII. LIVRE DES ANNALES

accufation, pour ce qu'estant de noble race, & proche parent de Varus, il alloit perdre & son sang & sa noblesse. Toutesfois le Senat ne voulut passer outre en ceste cause: & ordonna qu'on attendroit la venue de l'Empereur: qui estoit le seul eschappatoire & remede pour quelque temps, contre les maux qui pressoient de si pres.

Mais Tibere ayant dedié ses temples en la campagne: iacoit ce qu'il eust deffendu par edict, qu'aucun n'eust à luy interrompre son repos, & eust fait commettre gens d'armes pour empescher que la multitude des gens de ville ne l'approchassent, toutesfois pour ce qu'il se hayoit en toutes villes, colonies, & lieux assis en terre ferme, s'alla cacher en la solitaire Isle de Capree, laquelle est separee des extremitez du promontoire de Surrente par vn bras de mer de trois mille de large. Et croy bien que ceste Isle luy estoit fort agreable pour la solitude, pour ce qu'estant la mer tout autour, n'y auoit port aucun, ny nasselles que bien petites, avec bien peu d'aides, tellement que il estoit impossible d'en aborder, que les gardes n'en fussent incontinent aduertiz. La temperie & disposition de l'air est douce en Hyuer, à cause d'une montagne qui s'oppose, & repousse la force & vehemence des vents. Pour l'Este elle est tournee à l'Occident, & fort plaisante pour estre descouuerte tout à l'entour.

*Capree,
c'est vne
Isle qui est
aupres de
Naples.*

Mont Vesune.

Theleboiens.

Ioint aussi que l'on y voyoit vn plaisant goulfe auant que le feu (qui se prist au mont Vesuuus) eust changé la forme de ce lieu. L'on tient que les Grecs auoient esté seigneurs de ce pays, & que les Theleboiens habitoient

bitoient l'Isle de Capree.

Tibere lors auoit occupé douze grosses mestairies de nom: & d'autant qu'auparauant il s'estoit monstté diligent es affaires publicques, d'autant se tenoit plus couuert en ses superfluitez, estant apparessé en sa pernicieuse oisueté: Car ces suspicions & legereté de croire, luy estoient demourees, lesquelles Seianus auoit accoustumé d'augmenter mesmement au tēps qu'il estoit dedans Rome, & maintenant les esmouuoit encores d'auantage, non point (comme auparauant) par secrettes embusches dressées contre Neron & Agrippina: tellement qu'il y eut des gens d'armes commis pour obseruer & rediger par écrit comme Annales, les messagers, ceux qui entroient à eux, & tout ce qu'ils feroient & diroient, fust en secret, ou en public. Qui plus est, on en attiltra aucuns pour les enhorter qu'ils se retirassent à l'armée de Germanie, ou (lors qu'ils verroient le peuple assemblé en la place) ils allassent embrasser l'effigie d'Auguste, & implorassent le secours du peuple & du Senat. Et combien qu'ils n'eussent tenu conte de telles suasions, toutesfois en estoient chargez comme s'ils se fussent mis en peine de les mettre à execution.

Estans Consuls Iunius Sillanus & Silius Nerua, *L'an 14. de l'Empire de Tibere.* l'annee eut vn tres-vilain commencement, estant Titius Sabinus Cheualier Romain trainé en prison pour l'amitié qu'il auoit portee à Germanicus: car quelque chose qui fust aduenüé, il n'auoit laissé d'honorer la femme & ses enfans, de frequenter en leur maison,

Titius Sabinus.

LE IIII. LIVRE DES ANNALES

& les accompagner en public: & le faisoit seul entre tant de clients: au moyen dequoy estoit prisé des gés de bien, & hay des meschans. Doncques il fut accusé par ^{Lat. Latiaris} Latinius Latiaris, ^{Por. Cato} Porcius Cato, ^{Petit. Rufus} Petrus Rufus, & ^{M. Ofsius} M. Ofsius, tous lesquels auoient esté Preteurs, & pourchassoient le Consulat, auquel ils ne pouuoient paruenir sinon par le moyen de Seianus. Or il n'y auoit ordre de penser gagner Seianus, sinon par meschanceré: au moyen dequoy machinerét entre eux que Latiaris (qui auoit quelque peu hanté Sabinus) dresseroit ceste embusche, & les autres seruiroient de tesmoins. Que ce fait ils comenceroiét leur accusation. Doncques Latiaris commença premierement à ietter quelques propos en l'air, puis à louer la constance de Sabinus, pource que s'estât montré amy d'une maison lors qu'elle florissoit, il ne l'auoit durant l'affliction abandonnée cōme les autres. Pareillement tenoit plusieurs propos honorables de Germanicus deplorant la fortune d'Agrippina. Et apres que Sabinus eut commencé à plorer (cōme sont les courages des hommes tēdres en leurs aduersitez) il vint à y adiouster cōplaintes: & ia plus hardiment chargeoit Seianus, sa cruauté, son orgueil, & le but ou il pretendoit: & mesmes ne se peut abstenir de dire mal de Tibere. Ainsi ces popos tenus d'un costé & d'autre, comme de choses dangereuses & deffendues, donnerent quelque forme d'estroicte amitié. Apres cela Sabinus comença à chercher Latiaris, aller à sa maison, & faire ses doleances comme à celui auquel il se fioit le plus. Or ceux que i'ay cy dessus nommez, delibererent

Lat. Latiaris
Por. Cato
Petit. Rufus
M. Ofsius

delibererent comme ils pourroïent faire que cecy fust entendu de plusieurs: car au lieu où se faisoit l'assemblée, il ne falloit pas que l'on s'apperceust qu'il y eust personne: & craignoient s'ils se fussent tenus derriere la porte, d'estre apperceuz, de faire quelque bruit, ou que ja Sabinus n'eust quelque commencement de suspicion. Doncques ces trois Senateurs se cachent entre le toit & le planché de la maison en vne cachette non moins infame pour eux, que leur fraude estoit detestable: & ainsi mettent leurs oreilles aupres des pertuis & creuasses. Cependant Latiaris ayant trouué Sabinus emmy la place, le tire en sa maison & en sa chambre, comme pour luy conter quelque chose apprise de nouveau: & luy commença vn discours des choses passees & presentes, desquelles il auoit assez matiere de parler, y adioustant aussi nouuelles occasions de crainte. Sabinus luy en respond tout autât: mais avec bien plus long discours: car depuis qu'une personne commence à faire ses plaintes, & à descourir sa tristesse, à grand peine se peut il apres retenir ny se taire. Cela ne fut plustost acheué, qu'il commencerent leur accusation: & escriuans à Tibere, luy descouurirent l'ordre de leurs embusches, & quant & quant leur vilainie. L'on n'auoit iamais veu la cité plus estonnee ny plus en crainte qu'elle fut lors, se desiant vn chacun voire de ses plus prochains. Chacun se gardoit de hanter, ou tenir propos, & se tenoit loing des oreilles tant des cogneuz que des incogneus. Mesmes les choses mutes & sans ame, les toits & les parois, estoient diligemment tout autour reuistees.

LE IIII. LIVRE DES ANNALES

Mais Tibere ayant par vne lettre premierement prié qu'on feist les solennitez accoustumees d'estre faites au commencement de l'annee es Calendes de Ianuier, vint à se tourner contre Sabinus, allegant que il auoit corrompu aucuns de ses affranchiz: & se plaignant d'auoir esté outragé, en demandoit assez appertement la vengeance. Lors sans plus tarder on feit le proces à Sabinus, & estant condamné, ainsi qu'on le tiroit pour le faire mourir, crioit tât qu'il pouoit estât enuelpé de sa robbe, & ayant le gosier estraint & serré: Voila comme l'annee se commence: ces victimes sont sacrifiées à Seianus. Lors quelque part qu'il ietast les yeux, quelque part qu'il adressast sa parole, chacun s'enfuyoit & quittoit la place. Les ruës, & le marché estoient abandonnez. Aucuns y retournoient, & se monstroient de rechef, craignans seulement pour ce qu'on les auoit veuz craindre. Car quel iour pouuoit estre exempt de punition, puis qu'entre les vœux & sacrifices (auquel temps l'on auoit accoustumé de s'abstenir mesmes de propos prophanes) l'on mettoit les gens en prison, & les estrangloit-on? L'on disoit que Tibere n'auoit par ignorance donné vne si mauuaise reputation de soy, ains auoit cherché & exquis les moyens pour donner à cognoistre qu'il n'y auoit rien qui empeschast qu'il ne fust licite aux nouueaux Magistrats de faire ouuerture des prisons comme des temples & autels. Depuis Tibere leur escriuit d'autres lettres, les remerciant dequoy ils auoient fait punition d'un homme ennemy de la Republique: allegant outre, qu'il ne viuoit qu'en crain-

te, &

te, & estoit mal assuré pour les embusches de ses ennemis, sans toutesfois nommer personne. Mais l'on ne doute pas que ces paroles ne s'adressassent à Néro & Agrippina.

Se ie n'auois proposé vōus deduire les choses selon les années qu'elles ont esté faites, i'eusse volontiers preoccupé & parlé maintenant de la fin qu'eurent Latinius, Opsius, & autres auteurs de ceste meschanceté, non seulement apres que C. Cesar Caligula fut venu à l'Empire, mais aussi du viuant de Tibere: lequel tout ainsi qu'il ne vouloit les ministres de ses meschancetez estre chastiez pour autrui, aussi quelquesfois (estant saoulé d'eux, & s'offrans d'autres tous nouueaux pour tel affaire) affligeoit les vieux qui ja luy venoient à contrecueur. Or quand le temps le requerra, nous traicterons de la punition qu'eurent tant ceux icy que plusieurs autres.

Asinius Gallus (des enfans duquel Agrippina estoit tante) fut d'avis qu'on requist le Prince qu'il declarast au Senat quelles gens le tenoient en crainte, à fin de les oster, & l'en despescher: mais Tibere (comme l'on croyoit) entre toutes ses vertus n'en aimoit tant vne que la dissimulatio: & pour ce trouua il beaucoup plus mauuais d'estre contraint descouurir ce qu'il auoit enuie de celer. Toutesfois Seianus adouciſt cecy, non pour aucune amitié qu'il portast à Gallus, mais à fin que les retargements & dilations du Prince fussent descouuertes, estant bien assuré qu'il estoit tardif en ses pensees, & qu'ou il l'entreprenoit vne fois, il faisoit que ses fascheux & tristes propos

*Asinius
Gallus.*

LE IIII. LIVRE DES ANNALES

estoyent accompagnez d'aussi cruels effectz.

*Trimere
Isle.*

En ce temps Iulia petite fille d'Auguste alla de vie à trespas, laquelle conuaincuë d'adultere auoit par luy esté condamnée, & enuoyée en exil en l'Isle Trimere, assez prochaine des riuages d'Apulie, où elle endura son exil par l'espace de vingt ans, n'ayant support aucun que de l'Imperatrix Liuia: laquelle apres auoir secrettement pourchassé la ruine de ses gendres lors qu'ils estoient florissans, faisoit semblât en public d'auoir compassion de leur affliction.

Phrisiens.

En la mesme année les Phrisiens, qui est vne nation au delà du Rhin, rompirent la paix, plus pour nostre auarice que pour impatiēce qu'ils eussent de demeurer en nostre subiection. Drusus les auoit chargez de quelque tribut assez petit, ayāt esgard à leur pauvreté, à sçauoir qu'ils fourniroient pour l'usage des soldats quelque quantité de cuirs de bœuf. Et n'auoit l'on encores eu quelque esgard à la bonté ou grandeur de ces cuirs, iusques à ce qu'Olennius l'un des Primipilaires commis pour le gouuernement des Phrisiens.

Olennius.

choisist des cuirs de quelques bœufs sauuages, pour les contraindre à en fournir de semblables. Cecy encores qu'à toutes autres nations eust esté difficile. à supporter: toutesfois les Germains le portoient encores plus impatiemment, pour ce que iacoit ce que ils ayent leurs forests pleines de grandes bestes sauuages, ont toutesfois peu de gros bestial en leurs maisons: tellement qu'au commencement ils donnoient leurs bœufs mesmes, leurs terres, & finalement les corps de leurs femmes & enfans en seruitude. Delà
vint.

vint leur courroux & grandes plaintes. Et comme le
 plaindre ne leur seruiſt de rien, meirent leur dernier
 reconfort en la guerre, & attacherent à vn gibet les
 gens d'armes qui estoient commis pour receuoir ce
 tribut. Olennius par ſa fuite eſchappa les mains de
 ces gens courroucez, & ſe ſauua en vne forterreſſe nom-^{Fleuum.}
 mee Fleuum, où il y auoit vne bonne compagnie d'ar-
 de Romains que de confederez, en garniſon, qui te-
 noient toute la coſte de l'Ocean en ſubiection. Cecy
 entendu par L. Apronius Propreteur de la baſſe Ger-^{L. Apronius.}
 manie, ſeit venir du pays haut les enſeignes des legiōs
 avec les plus experts des confederez tant à pied qu'à
 cheual: & ayant fait paſſer ces deux armees enſemble
 par le fleuve du Rhin, ſ'e rua ſur les Phriſiens: leſquels
 ayans laiſſé le ſiege du chasteau, ſ'eſtoient retirez pour
 garder leurs biens. Apronius donc ſeit baſtir des pôts
 & chauſſees ſur les prochains bras de mer, pour plus
 aiſément paſſer la groſſe armee: & ayant cependant
 trouué quelques lieux qui ſe pouoient paſſer à gué,^{Cannineſas aile.}
 y ſeit paſſer l'aiſle nommee Cannineſas, & tous les
 Germains qui estoient à noſtre ſoulte, pour aller en-
 clorre les ennemis par le derriere: leſquels ja rangez
 en bataille, repouſſerent les bendes des confederez,
 & les gens de cheual des legions qui leur auoient eſté
 enuoyez pour ſecours. Toſt apres on y enuoya enco-
 res trois autres cohortes de gens armez à la legere, &
 puis deux autres de rechef, & quelque temps apres v-
 ne plus groſſe trouppes de gens de cheual. Et certaine-
 ment ils estoient aſſez forts ſils ſe fuſſent ruez tous
 enſemble, mais arriuans ainſi par bendes ſeparees,

LE IIII. LIVRE DES ANNALES

non seulement ne donnoient courage aux espouuentez, mais aussi estoient eux mesmes transportez de la crainte des fuyans. Quoy voyant Apronius donna la reste des Auxiliaires à Cethecius Labeo Ambassadeur de la cinquiesme legion: lequel se trouuant mal assuré, pour veoir ses gens en bransle, enuoya messagers pour demander secours aux legions. Ceux de la cinquiesme legion y furent plustost que les autres: & ayans chassé les ennemis par vn aspre cōbat qu'ils leur donnerent, rescouirent les ailles & cohortes lasses, rompues, & naurees. Er toutesfois le Capitaine Romain n'alla apres pour en prendre vengeance, & laissa là les corps des occis sans sepulture, jaçoit ce que plusieurs des Tribuns, Preteurs, & Centeniers plus renommez y fussent demourez. Depuis l'on sceut par ceux qui estoient eschappez, qu'il y auoit eu neuf cēs Romains ruez en la forest Baduhēne, & que leur combat auoit duré iusques au lendemain. On sceut pareillement que comme vne autre compagnie de quatre cens eust occupé la mestairie de Cruptorix (qui autresfois auoit esté à la soulte des Romains) s'estoient entretuez pour ce qu'ils craignoient trahison. Par ceste victoire ceux de Phrise furent tousiours renommez entre les Allemans. Tibere dissimula ceste perte, à fin de ne donner à aucun occasion d'entreprendre la guerre. Et d'auantage le Senat ne se soucioit pas beaucoup que les extremitez de l'Empire fussent ainsi diffamees: car la crainte qu'on auoit des choses domesticques, auoit occupé les cueurs, & taschoit on seulement à y remedier par flatterie. Ainsi iacoit ce qu'on eust mis plusieurs

*Victoire
des Phri-
siens.*

*Baduhē-
ne forest.*

Cruptorix

fleurs autres choses en deliberation, il fut seulement
 ordonné qu'on dresseroit vn autel à la clemence, &
 l'autre à amitié, & qu'autour seroient les effigies de
 Tibere & de Seianus, lesquels on pria tresinstammét
 qu'ils donnassent ordre qu'o peust iouyr de leur veuë.
 Toutesfois ny l'un ny l'autre allerent à Rome, ny en
 lieu qui en fust prochain: ains leur sembla qu'ils auoient
 assez fait d'auoir laissé l'Isle, & estre venus en la
 campagne au lieu plus prochain de la ville. Là abor-
 doient Senateurs, Cheualiers, & grâde partie du peu-
 ple, qui auoient tout plein de peine pour Seianus, au-
 quel il estoit si mal-aisé d'auoir accez, que les moyës
 en estoient cherchez par ambition, & par se faire par-
 ticipant de ses conseils. Or il estoit tout certain que
 son arrogance estoit augmentee pour veoir ces gens
 ainsi publicquement abandonnez en vne si abiecte
 & deshonneste seruitude. Car à Rome y a commu-
 nément force gens qui vont par la ville, & ne sçait
 l'on bonnement pour quels affaires vont ceux qu'on
 rencontre, à cause de la grandeur d'icelle. Mais là on
 les voyoit assis emmy vn champ, ou sur le riuage de
 la mer, autant la nuit comme le iour, & tascher à gai-
 gner la grace des portiers, ou endurer patiemment
 leur orgueil & arrogance. Et dura cecy iusques à ce
 qu'on leur feit deffence d'y plus venir: tellement que
 ils retournerent en la ville tous craintifs de quoy non
 seulement il n'auoit tenu conte de parler à eux, mais
 aussi qu'il n'auoit daigné les veoir. Aucuns se mon-
 stroient peu deliberez, desquels les amitez infortu-
 nees promettoient la ruine griefue & prochaine.

LE IIII. LIVRE DES ANNALES

*mariage
d'Agrippina fille
de Germanicus,
or de Cn.
Domitius*

Au surplus comme Tibere eust publicquement donné en mariage sa petite fille Agrippina, fille de Germanicus, à Cn. Domitius, il feit celebrer les nopces dedans la ville. Il auoit esleu Domitius tant pour l'ancienneté de son lignage, que pour la prochaineté de sang qu'il auoit avec les Césars: car Octauia estoit son ayeulle, au moyen dequoy Auguste estoit aussi son grand oncle.

FIN DV QVATRIESME LIVRE
DES ANNALES DE P. CORNILE
TACITE CHEVALIER ROMAIN.

LE CIN-



LE CINQVIESME LIVRE DES ANNALES DE

P. CORNILE TACITE

CHEVALIER ROMAIN.



Vrant le Consulat de Rubel-^{La quin-}
 lius & Fusius Geminiens, l'im-^{zefine}
 peratrix Iulia Augusta en ex-^{année de}
 treme vieillesse alla de vie à ^{Tibere,}
 trespas. Ceste femme fut grā-^{Mort de}
 dement noble, tant pour estre ^{l'impera-}
 yssuë de la maison des Clau-^{trix Lulie}
 diens, que par l'adoption qui
 d'elle auoit esté faicte en celle
 des Liuiens & Iules. En pre-

mieres nopces; elle espousa ce Tibere Nerō, lequel estāt
 fugitif à la guerre de Perouse, finalement reuint à Ro-
 me apres que la paix fut accordee entre Sextus Pompei⁹
 & les Triumuires. Depuis Auguste meu de la grande
 beauté de Iulia (l'on ne sçait si ce fut du consentement
 d'elle) l'osta à son mary, en quoy il se monstra si soudain
 qu'il la retira en sa maison toute grosse, sans luy donner
 le loisir d'accoucher en celle de sondit mary. Depuis elle
 n'eut aucuns enfans, mais estant allice avec le sang d'Au-
 guste par le mariage de Germanicus & Agrippina, ils

Tibere
 Nerō,

LE V. LIVRE DES ANNALES

eurent leurs arrierenepueux communs. Quant à sa maison, elle l'entretint en mesme saincteté que les anciens, estant toutesfois plus courtoise & gracieuse que les femmes du temps passé n'eussent trouué bon, se monstrant mere orgueilleuse & insupportable à son fils, & femme traittable en l'endroit de son mary: estant la dissimulation du fils bië assemblée avec les ruses du mary. Il y eut peu de magnificence à son enterrement, & fut son testament par long temps comme de nul effet & valeur. Elle fut louee deuant les Rostres par C. Cesar son arriere neveu, lequel eut tost apres la souueraineté de toutes choses. Tibere sans pour cela discontinuer ou laisser perdre aucun de ses accoustumez plaisirs, s'excusa par lettres dont il ne s'estoit trouué aux funerailles de sa mere, allegant la grandeur de ses affaires. Mesmes il diminua comme par modestie les honneurs qui en abondance luy auoient esté ordonnez par le Senat, receuant bien peu d'yeux, & deffendant expressement de luy decerner aucunes ceremonies comme aux dieux, pource (disoit-il) qu'ainsi elle l'auoit voulu. Qui plus est, en quelque endroit de ceste epistre il blasma les faueurs & amitez des femmes, taxant obliquement le Consul Fufius. Ce Fufius estoit deuenu puissant par le moyen de l'Imperatrix, & estoit homme fort propre à gaigner le cœur des femmes, grand causeur, & qui tousiours se railloit de Tibere avec rencontre & brocards aigres & poignâs desquels les grands seigneurs ont accoustumé se souuenir long temps apres.

*Fufius
Consul.*

Au surplus, depuis ce temps sa domination commença à estre rigoureuse, dure & pressante: car tant que l'Imper-

peratrix fut en vie, il y auoit encor quelque refuge, pour ce que Tibere auoit inueterée & de long temps enracinée ceste obeissance qu'il portoit à sa mere, & n'osoit Seianus entreprendre sur l'autorité d'une mere. Mais lors ils se laisserent eschapper tout à vn coup, comme si la bride leur eust esté lâchée sur le dos: & furent enuoyées les lettres contre Agrippina & contre Neron, lesquelles le commun peuple croyoit auoir esté enuoyées long temps auparauant, mais qu'elles auoyent esté tenuës cachées par l'Imperatrix, pour ce que incontinent qu'elle fut trespassee, l'on vint à les reciter. En ces lettres y auoit quelques termes exquis en asperité, par lesquels obiectoit à son neveu, non qu'il eust pris les armes contre luy, ou eust intété choses nouuelles, mais son impudicité & ses amours enuers les ieunes enfans. Et n'osant imposer telles choses à sa bru, luy reprochoit seulement son arrogante contenance, & son cœur par trop fier & hautain. Ce pendant le Senat estoit en grande crainte & silence, iusques à ce qu'aucuns (les esperances desquels ne sont fondées sur l'honnesteté, ains cherchent par les dommages publics de se mettre en grace & credit) vindrent à requerir que la chose fust mise en deliberation: en quoy Cotta Messalinus se monstra des plus diligens, donnant vne sentence griefue & rigoureuse. Toutesfois les autres plus apparens, & principalement les magistrats, estoient en crainte, pource qu'encor que Tibere se fust fort asprement courroucé, & eust parlé en cholere, toutesfois il auoit laissé le reste en doute. Or il y auoit entre les Senateurs vn

nômé Iunius Rusticus, lequel auoit esté esleu par Tibere

*Iunius
Rusticus.*

LE V. LIVRE DES ANNALES

pour mettre en ordre les actes & registres du Senat: au moyen dequoy l'on croyoit que ce Iunius eust meilleure cognoissance de ses plus secretes entreprises. Cestuy donc esmeu par ie ne sçay quelle fatale instigation (car iamais auparauant n'auoit donné aucun tesmoignage de sa constance) ou par vne astuce mauuaise & dangereuse (lors qu'il craint les choses incertaines, & oublie celles qui pressent de plus pres) se vient mesler parmy ces gens ainsi douteux & mal asseurez de ce qu'ils deuoient faire, & admonesta les Consuls qu'ils se gardassent de mettre cecy en deliberation, allegât que les choses hautes & esleuees pourroient en vn instant estre renuerseez sans dessus deslous, & qu'il failloit donner quelque interualle, à fin que ce vieillard eust loisir de se repentir.

Tout quant & quant le palais fut enuironné de gens qui portoyent les effigies d'Agrippina & de Nero, lesquels faisans grâde feste pour l'amour de Tibere, & luy souhaitans bonne encontre, crioyent les lettres estre faulces, & que maulgré le Prince l'on taschoit à destruire & ruiner sa maison & famille. A ce moyen n'y eut aucune triste execution pour ce iour. Aussi pour lors furent diuulguees quelques sentences ou arrests contre Seianus, lesquels estoyent controuuez & faits à plaisir, sous le nom de ceux qui auoient esté Consuls. Et à la verité auoyent esté composez par quelques gens qui ont accoustumé d'exercer & descouurir l'affection peruerse de leurs esprits secretement, & pour ceste cause plus eshonteement & en plus grand abandon. Au moyen dequoy l'ire de Seianus en fut plus impetueuse, & eut plus d'occa-

d'occasion d'en mal dire, & de les accuser, disant que l'on n'auoit fait aucune estime du courroux du Prince, que le peuple s'estoit distrait & rendu contraire au Senat: & que ia estoient leuës & ouïes nouuelles concions & arrests du Senat tous nouveaux. Que leur restoit il donc plus sinon de prendre les armes? & eslire pour capitaines & Empereurs, ceux desquels ils auoient suyui les effigies comme enseignes? Parquoy Tibere reiterant les iniures & opprobres contre son petit fils, & contre sa bru, & ayant repris aigrement & menassé le peuple par vn edit, se vint à plaindre au Senat, dequoy la maiesté Imperiale auoit esté vilipendee & mocquee par la fraude d'un des Senateurs. Toutesfois il ne voulut qu'on passast outre, & s'en reserua l'entiere cognoissance: parquoy sans autre deliberation vont non les condamner à la mort (car cela estoit defendu) mais protester qu'estans tous prests d'en faire punition, ils auoient esté destournez par le Prince.

*

En cest endroit desailent beaucoup de choses. Entre autres le bannissement d'Agrippina, & de ses enfans Drusus & Neron: la coniuuration & peine de Seianus, avec la mort de plusieurs de ses amys. & desaut aussi la punition qu'eut Livia femme de Drusus, appelée Liulla par Suetone, lequel dit qu'ayant Tibere cognu que par la fraude d'elle & de Seianus, Drusus estoit mort, il monta en telle cholere & cruauté qu'il n'espargna homme, fust à le faire mourir, ou à luy donner la question.

*

Et ne puis bien discerner lequel est le plus miserable, estre accusé pour l'amitié, ou d'accuser son amy. Je ne vueil faire experience de la cruauté ou clemence d'hom-

*Aucuns
estiment
que ce soit
icy la*

LE V. LIVRE DES ANNALES

*fin &
dernieres
paroles de
Seianus.*

me qui viue: mais libre & approuué de moy mesme, ie preuiendray le danger ou ie suis: vous suppliant que la memoire de moy ne vous soit pluſtoſt cauſe de triſteſſe & faſcherie, que de ioye: & que ie ſoye par vous mis au reng de ceux leſquels par leur noble & courageuſe fin ont euadé les maux publiques. Ce dit il, il employa la plus grande partie du iour à retenir ou donner congé à ceux qui auoyent enuie de là demourer, & luy tenir propos. Et cōme il y euſt encor beaucoup de gēs preſens leſquels voyās ſa face aſſeuree, pēſoient qu'il n'eũſt deliberé de ſi toſt mourir, ſe tua d'vn couſteau qu'il auoit caché dedans ſon ſein. Depuis qu'il fut treſpaſſé, Tibere ne le pourſuyuit ny de crimes ny d'iniures, combien qu'il euſt accuſé Bles⁹ de pluſieurs cas infames & vilains.

*P. Vitellius
Pomp. Sec.
undus.*

Après cela l'on feit le procez de P. Vitellius & de Pōponius Secundus. Ceux qui auoyēt encuſé Vitellius, luy mettoient à ſus qu'il auoit offert les coffres du threſor public (duquel il eſtoit garde) & l'argēt qu'y eſtoit pour la ſoulte des genſ d'armes, à ceux qui brasſoyent choſes nouuelles. Et Conſidius autresfois Preteur, obieſtoit à Pōponius Secūduſ l'amytié qui auoit eſté entre luy &

*Vellius
Gallus.*

Vellius Gallus, lequel après la punitiō de Seianus s'en eſtoit fuy aux iardins de Pōponius, cōme à vn refuge ſeal & aſſeuré. Eſtans en ce danger n'eurent autre ayde que de la conſtāce & fermeté de leurs freres, leſquels ſe feirent pleiges pour eux. Toſt après voyant Vitellius tant de delaiz & prorogations, & eſtant non moins faſché d'eſperance que de crainte, demanda vn caniuet comme pour eſtudier, duquel il ſe donna vn petit coup dedans les veines, & mourut depuis de melancholie & faſcherie
d'ef-

d'esprit. Mais Pomponius qui estoit homme gaillard, de bonne grace, & d'aussi bon esprit, endurant patiemment sa mauuaïse fortune, vesquit en fin plus que Tibere. *Les enfans de Scianus punis*

Depuis il fut arresté que le reste des enfans de Scianus seroyét punis, iacoit ce que l'ire du peuple fust quasi estainte, estàs plusieurs appaisez à cause des premieres punitiōs. Ainsi ces enfans sont portez en prisō. Le fils auoit quelque peu de cognoissāce de ce qu'on luy vouloit faire: mais la ieune fillette en estoit si ignorante, que souuēt elle demandoit en quel lieu on la trainoit ainsi, & pour quel forfait, disāt qu'elle n'y retourneroit plus, & que si elle auoit delinquē, qu'on pouuoit la chastier avec des verges.

Les auteurs de ce temps ont escrit que pource que iamais l'on n'auoit ouy dire qu'une vierge eust esté punie du dernier supplice, qu'elle fut violee par le bourreau aupres de la corde. Ainsi estàs ces ieunes & tēdres corps estranglez furent iectez és Gemonies.

En ce mesme temps l'Asie & l'Achaie eurent vne grande frayeur à cause d'un bruit qui fut beaucoup plus soudain & vehement que de longue duree. Ce bruit estoit que Drusus fils de Germanicus auoit esté veu és isles Cyclades, & depuis en terre ferme: mais à la verité c'estoit un ieune homme qui estoit quasi de l'aage de Drusus, lequel quelques affranchis de l'Empereur faignoient auoir recogneu, & l'accompagnoient pour trōperie, tellement que plusieurs qui ne le cognoissoient, furent attirez par la renommee de ce nom: ioint que les Grecs sont fort enclins aux choses nouuelles, estrāges & admirables. L'on disoit que s'estant ce Drusus defait

Germanicus estoit un lieu à Rome comme une voirie, on l'on traenoit les corps de ceux qui auoient esté executez à mort.

LE V. LIVRE DES ANNALES

de sa garde, talchoit de se retirer à l'armée de son pere. Mesmes aucuns faignoient, & croyoient ensemble, qu'il se deuoit aller ruer sur l'Egypte & la Syrie. Ia tous les ieunes hommes se rengeoient à luy, & ia publiquement estoit soustenu & fauorisé (ioyeux tant des choses presentes que de l'esperance des choses vaines) quand Popp. Sa-
binus. Popp. Sabinus en fut aduerty. Lequel ayant la charge de Macedoine s'entremettoit par mesme moyen des affaires d'Achaie. Cestuy, à fin de donner ordre à ces choses, vrayes ou faulses qu'elles fussent, passant en grand diligence le bras de Torone & de Therme, & laissant derriere soy Eubee isle de la mer Egee: le Piree port d'Attique: le riuage de Corinthe: les destroits d'Isthmos: entra en vne autre mer: par laquelle il arriua à Nicopolis, qui estoit vne Colonie des Romains. Là finablement apres auoir auec grande astuce interrogé ce galland, sceut qui il estoit: car il se dist estre fils de M. Syllanus, & que se voyant abandonné de plusieurs de sa secte, il s'estoit mis sur mer comme faignant de tirer en Italie. Cecy fut es- crit à Tibere, & ne sçauons autre chose de l'origine ou fin de ce cas.

*Trio.
Faut icy
noter que
ces Con-
sulz ne
sont au
Catalogue
des au-
tres,
mais ap-
res la
mort de
Seianus
qui estoit
Consul
auec Tibe-
re pour
cette année
ilz furent
subrogez.*

Sur la fin de l'annee, l'inimitié des Consuls, (laquelle se nourrissoit de l'og temps) se descouurit, & sortit dehors. Car Trio, homme qui peu se soucioit de faire des ennemis, & fort stylé en la plaidoirie, auoit en passant taxé Regulus, comme s'estant monstre negligent & paresseux en l'oppression des ministres de Seianus. Regulus (iaçoit ce qu'il retint tousiours sa modestie & discretion sinon quand il estoit prouoqué) ne fut content d'auoir respondu & rembarré son ennemy: mais outre l'appelloit

loit en iugemēt comme coupable de ceste coniuration. Et combiē que plusieurs des Senateurs les priaissent d'oublier leurs inimitiez, pource quelles leur pourroient causer quelque malencontre, demeurerēt toutesfois ennemys, se menassāt l'un l'autre, iusques à ce que le temps de leur magistrat fut expiré.

La Cn. Domitius & Camillus Scribonianus estoient consulz, lors que Tibere apres auoir passé le destroit qui est entre Surrente & Caprees, costoyoit la Champagne, douteux s'il deuoit entrer dedans Rome, ou faignant d'y vouloir aller, combien qu'il eut proposé le contraire. Et comme par plusieurs fois il eut esté aux lieux prochains d'icelle, & visité les iardins qui estoient le long du Tibre, retourna de rechef en ces rochers & solitude de mer, pour la grande honte te qu'il auoit de ses meschancetez & paillardises: desquelles & si desordonnees il estoit espris qu'à la coutume des Roys il polluoit & violoit la ieune noblesse: & ne s'arrestoit seulement à ceux qui estoient douez de beauté, mais des vns la modeste & bien nee ieunesse, & des autres l'ancienne noblesse seruoit d'un aiguillon à sa paillardise. Lors premieremēt ces termes de Spintries & Sellaires, (au parauant incogneus) furent inuentez, ainsi dits à cause de la vilainie & fallété du lieu, & de ce qu'ils souffroient en plusieurs endroits de leurs corps. Mesmes y auoit des esclauues commis pour les chercher, & les amener par force, lesquels faisoient plusieurs dons à ceux qui sy consentoient, & vsoient de grandes menasses enuers ceux qui y contredisoient. Et si d'aventure les parēs ou les prochains

L'an 18.
de l'Empire de
Tibere
En ceste
annee nous
presumons
leur les
Christ
souffrir
mort en
Iudee sous
Ponce Pilate, administrateur de
ce pays.

Execrable
paillardise de Tibere.

LE V. LIVRE DES ANNALES

les vouloient retenir, ils les rauissoient & prenoient à force, faizans d'eux à leur volonté, comme s'ils fussent esté prisonniers de guerre, ou esclaves.

*Timia fem
me de
Drusus.*

Mais à Rome au commencement de ceste annee se donnoient de griefues & rigoureuses sentences contre Liuia: mesmement contre les effigies & memoire d'elle, comme si ses meschancetez fussent de nouveau venues en cognoissance, & n'eussent esté punyes au parauant comme elles meritoient. Les Scipions mirent en deliberation, que les biens de Seianus ostez du thresor public, deuoyent estre appliquez au fisc. Les Sillans & Cassiens estoient d'auis de la mesme chose, & l'affermoyent en mesmes ou quasi semblables termes: quand à l'impourueu Togonius Gallus, voulant mesler sa basse & ignoble condition, avec ces grands & nobles noms, fut ouy comme par vne mocquerie. Car il prioit le prince de choisir quelques Senateurs, vingt desquels (esleuz par sort, & embastonnez) defendissent son salut toutes & quantes fois qu'il entroit au Senat. Et croy qu'il auoit donné foy à vne epistre, par laquelle Tibere requeroit qu'on luy enuoyast vn des Consuls pour ayde, à fin qu'en asseurance il peust venir de Caprées iusques à Rome. Toutesfois Tibere ayant accoustumé de mesler les mocqueries avec les choses de consequence, remercia les Senateurs de leur bon vouloir: mais (disoit-il) lesquels pourray-ie choisir, ou laisser? Les premiers pris y demeureront ils tousiours, ou s'il les faudra souuent changer? y mettra l'on des ieunes gens, ou de ceux qui ont esté constituez en dignitez? des princes, ou de ceux qui exer-

*Togonius
Gallus.*

cent

cent magistrats ? Mais encor qu'elle grace y aura il de les veoir prendre des bastons à l'entree du Senat ? Certes ie n'ay point ma vie si chere , qu'il faille que ie la gardes par armes. Il dist cecy contre Togonius moderant ses paroles , & ne pourluy uir autrement l'abolition de ceste sentence: mais il reprist aigrement Iunius Gallio, qui auoit esté d'avis que les gensd'armes Pretoriens apres auoir acheué leur temps, eussent droit d'eux asseoirés quatorze ordres : & l'interrogea deuant tout le monde, qui le mouuoit à se mesler de l'affaire des gensd'armes, ausquels il n'estoit loisible d'accepter commandemens, ou dons, sinon de l'Empereur ? Les ministres de Seianus auoyent ils entierement trouué ce qui n'auoit esté possible à Auguste de preueoir, & nō plustost cerché vne discorde & sedition, par lesquelles sous couleur, & nom d'honneur ils donnassent occasion à ces rudes & sourds esprits de corrompre la coustume de la guerre? Gallio pour salaire de sa flaterie precedente, fut desmis du Senat, & chassé d'Italie. Et pource que l'on disoit qu'aisément il porteroit son exil, (ayât choyssi la noble & plaissante isle de Lesbos pour sa demeure) fut ramené à Rome, & gardéés maisons des magistrats.

*Iunius
Gallio.*

Par les mesmes lettres Cesar espouuanta grandement Sestius Pagonianus qui auoit autrefois esté Pretteur: dont les Senateurs furent fort ioyeux, pource que c'estoit vn homme audacieux, malfaisant, & s'enquerant des secrets d'autrui : lequel aussi auoit esté commis par Seianus pour dresser quelques embusches

*Sestius
Pagonianus.*

LE V. LIVRE DES ANNALES

à C. Cesar: laquelle chose cogneüe & descouuerte, se monstrent lors tout à vn coup les haines conceües contre luy, & s'en alloit estre cõdamné à la mort, sinõ qu'il promit d'encuser ses complices.

*Acrius.
Latinus
Latianus.*

Mais quand Acrius accusateur de Latinus Latianus fut entré (pource qu'egallement ils estoient hays) ils donnerent vn plaisant spectacle aux assistants. Latianus (comme i'ay dit) auoit esté principal conducteur de la tromperie qui fut faicte à Titius Sabinus, & maintenāt il est le premier à en receuoir la punition.

*Haterius
Agrippa.*

En ces entrefaictes Haterius Agrippa se vint attacher aux Consuls de l'annee precedente, & demandoit comment ils se faisoient maintenant, ayans au parauant commencé vne accusation l'vn contre l'autre: & disoit que crainte, & leurs consciences coupables, estoient seule cause de ceste alliance, nonobstant laquelle les Senateurs ne se deuoient taire de ce qu'ils auoient

Regulus.

ouy. Regulus respondit, qu'il y auoit encor assez de tẽps pour faire punition, & qu'il cõtinueroit sa poursuite deuant le Prince. Mais Trio dit qu'il valloit mieux que l'enuie & emulation qui estoit entre les collegues, & les paroles (si aucunes auoient esté dictes à la vollee durant leur dissension) fussent mises en oubly. Et comme Agrippa ne cessast pourtant à les poursuyure de pres, Sanquinius le plus grand des Cõsulaires pria les Senateurs de n'augmẽter les sollicitudes du Prince, par aigreur & fâcherie cherchees de toutes pars. Parquoy Regulus fut sauüé, & la mort & ruine de Trio pour quelque temps différé. Or Haterius estoit fort hay & mal voulu, pource qu'estant

Trio.

tout

tout elangouré & flestry, ou de trop dormir, ou de passer les nuits en excès & paillardises, & n'ayant (tant il se fioit en sa lacheté & faute de cœur) aucune crainte de Prince, tant fut il cruel: toutesfois entre ses paillardises & iurongneries ne faisoit que chercher les moyens de ruiner les plus grands & nobles personnages.

Après cela Cotta Messalinus auteur de toute cruelle sentence, & pource hay d'une ancienne hayne & enracinée, fut accusé de plusieurs cas tout aussi tost que l'occasion s'y fut offerte. Entre autres, d'avoir dit que C. Cesar estoit incestueux en ses membres. fut aussi accusé qu'un iour qu'on celebroit le iour de la natiuité de l'Imperatrix, comme il souppoit avec les prestres, avoit appelé ce soupper Nouendial. Et d'avantage que se plaignant de la puissance de M. Lepidus, & de L. Aruntius (avec lesquels il avoit proces pour quelque argent) il avoit dit que quand à eux le Senat les deffendrait, mais que de sa part il seroit soustenu par son petit Tibere, & sur le champ fut conuaincu par les principaux de la ville. Parquoy se voyant de si pres poursuivy, en appella à Tybere.

*Cotta
Messali-
nus.*

*C'est un
sacrifice
qu'on fai-
soit pour
un tref-
passé le
neufiesme
iour apres
son tref-
pas.*

Quelque tēps apres vindrent lettres de Tibere, par lesquelles en forme de deffence, apres avoir remémoré le commencement de l'amitié d'entre luy & Cotta, & les services qu'il luy avoit faits, il prioit que les paroles pirement prises qu'il ne les avoit dites, ou la simplicité des propos ioyeux qui se tiennēt es banquets, ne luy fussent imputez à crime. Le com-

LE V. LIVRE DES ANNALES

mencement de ces lettres de Tibere est fort notable, car il les commença ainsi.

*Suetone
couche ce
commen-
cement
d'epistre
en la mes-
me sorte.*

Que vous escriray-ie, Peres Conscripts? ou comment vous escriray-ie? mais quelle chose ne vous escriray-ie en ce temps? Si i'en sçay rien, ie prie les Dieux & Deesses, qu'ils me perdent pirement, que ie ne me sens perir tous les iours.

Tellement ses vilainies & meschancetez luy estoient tournees en punition. Et certes non sans cause cest excellēt entre les sages, auoit accoustumé d'asfermer, que si les cueurs des tyrans pouuoient estre descouuerts, qu'on y pourroit veoir des playes & blessures: attendu que l'esprit n'est moins deschiré & blessé par cruauté, par meschantes affections, & par mauuais conseils, que le corps par playes & batures. Car certes n'y le lieu solitaire & escarté ou se tenoit Tibere, ny sa fortune le pouuoient garder qu'il ne confessast ses peines, & les tourmens qu'il enduroit en son esprit. Et lors ayant donné pouuoir au Senat d'ordonner ce que bon luy sembleroit du Senateur Cæsilius, lequel auoit accusé Cotta de plusieurs cas, il fut dit qu'il seroit puny de la mesme peine qu'auoiēt eu Aruseius & Sanquinius accusateurs de L. Aruntius. Qui fut le plus grand honneur qu'auoit iamais eu Cotta, lequel estant à la verité de noble race, mais venu en pauureté par sa trop grande despense & prodigalité, estoit toutesfois en dignité de vengeance egallé à la sainte & honneste vie d'Aruntius.

Après cela Q. Serueus, & Minutius Thermus furent presentez. Serueus auoit autrefois esté Preteur & cōpagnon de Germanicus. Minutius estoit descendu
de

de Cheualier, & s'estoit modestement gouuerné en l'amitié de Seianus. Au moyen dequoy il en estoit plaint d'auantage. Mais Tibere blasmant les principaux dont ils ne parloient contre leurs meschancez, admonnesta C. Cestius le pere, de dire en plain Senat ce qu'il luy auoit escrit. Et ainsi Cestius entreprist ceste accusation, chose qui fut tresdommageable en ce tēps la, atendu que les principaux du Senat se mesloïēt d'exercer viles & deshonestes accusatiōs, les vns publicquement, les autres en secret, tellement que l'on ne pouuoit discerner les estrāgers d'avec les parens: les amis d'avec les incogneuz: ny les choses faictes fraischement, d'avec celles qui estoïēt obscures par le laps du tēps. De quelque chose qu'on eut parlē, fut au plaidoyē, ou en banquet, l'on estoit incōtinent accusē, selon que chacun se hastoit de preuenir qu'il ne fust accusē, ou d'accuser autrui: les vns pour se sauuer eux-mesmes, & la plus grand part pour estre infectez de ceste meschaceté comme d'une maladie contagieuse. Minutius & Serueus furent condamnēz, & leurs biens donnez à ceux qui les auoient accusez. Iule African, qui estoit de Xainctes cité de Gaule, & Seius Quadratus furent conduits au mesme peril: & n'en ay peu sçauoir la cause, ny l'origine: aussi ie sçay bien que plusieurs de ceux qui ont escrit, ont omis les dangers & punitions de plusieurs, lors qu'ils se sont faschez de l'abondance & multitude, ou ont crainct que ce qui leur auoit semblé trop, & ennuyeux, ne donnast le mesme ennuy & molestie aux lēcteurs. Toutesfois plusieurs de ces choses di-

LE V. LIVRE DES ANNALES

gnes de memoire nous sont venus en cognoissance: iacôit ce que ceux la n'en ayent fait mention: car au temps que tous autres s'estoient fainctement retirez de l'amytié de Seianus, il y eut vn Cheualier Romain nommé M. Terentius, qui pour ceste cause estoit accusé, lequel osa bien la retenir & aduouer, commençant en ceste maniere sa harangue au Senat.

Harangue de M. Terentius, en laquelle le est mûstree la grande constance de ce personnage.

Il seroit par aduerture plus expedient à ma fortune de nyer ce crime, que de l'aduouer: toutesfois quoy qu'il en doie aduenir, ie confesseray auoir esté amy de Seianus, auoir pourchassé son amitié, & m'estre refioui voyant que ie l'auois acquise. Je l'auois veu colleague & compagnon de mon pere, quand ensemble ils gouernoient les cohortes Pretoriennes, & tost apres exerceans ensemble les charges tant de la ville que de la guerre. Je voyois que les prochains & alliez de Seianus estoient pourueuz des grands estats & dignitez, & que d'autant plus qu'on estoit amy & familier de luy, d'autant pouuoit l'on plus aussi en l'amytié de l'Empereur. Ou au contraire ceux ausquels il vouloit mal, estoient en perpetuelle crainte, pauures & abiets. Je ne veux icy en amener aucun pour exemple: & deffendray par le peril de moy seul, nous tous qui auons esté ignorans de ses derniers conseils: Car, ô Cesar, nous n'honorions pas Seianus comme vn homme Vulsines: mais cōme faisant partie de la famille des Claudiens & Iules, esquelles il s'estoit introduit par alliance & affinité. Nous l'honorions cōme ton gendre, & comme compagnon en ton Consulat. Ce n'est à nous à faire à nous soucier qui sont
ceux

ceux que tu esleues plus que les autres, ny pourquoy. Les dieux t'ont donné le souuerain iugement de toutes choses, & à nous ont laissé la gloire de l'obeissance que nous te rendons. Au reste nous considerons seulement ce que nous voyons deuant noz yeux, sçauoir à qui tu donnes les richesses & les honneurs, & qui est celuy qui a plus de pouuoir de nuire ou aider. Lesquelles choses personne ne niera auoir esté en Seianus.

Mais s'enquerir des pensees couuertes, & secrettes entreprises du Prince, est vne chose illicite, dangereuse, outre ce qu'à la fin l'on n'en peut rien sçauoir. Ne regardez seulement, Peres conscripts, au dernier iour de Seianus, mais considerez aussi les seize anneés de deuant. Nous faisons la court mesmes à Satrius & à Pomponius: & estimoit l'on fort honorable d'estre cogneu de ses affranchiz & portiers. Quoy donc? ceste deffense sera elle generale & indistincte? Plustost soit diuisee en ses iustes limites. Parquoy soient les embusches faites contre la Republicque, & l'entreprise de tuer l'Empereur, punies. Quant à l'amitié & au deuoir, toy Cesar & nous aussi en demourons quittes & absous par la fin d'une personne seule.

La constance de ceste oraison, & pour ce qu'il estoit trouué vn homme qui appertement auoit osé declarer ce que chacun auoit au cuer, eurent tant de pouuoir, que les accusateurs de Terentius (apres qu'on leur eut ramassé leurs forfaits du temps passé) furent tous puniz ou par mort, ou par exil.

Après cela vindrent lettres de la part de Tibere à *Soc.*
l'encontre de Sextus Vestilius autresfois Preteur, le- *Vestil.*

LE V. LIVRE DES ANNALES

quel Drusus frere de Tibere auoit autresfois retiré & fait passer en sa cohorte & compagnie, pour la grande amitié qu'il luy portoit. L'occasion pourquoy il se sentit offensé de Vestilius, fut ou pour ce qu'il auoit composé quelques escripts contre C. Cesar, arguant son impudicité : ou pour ce que luy estans ces escripts faulsemēt attribuez, l'on creut par luy auoir esté faits. Et comme pour ceste cause la table du Prince luy fust interdictē (apres que de sa main foible de vieillesse, il eut en vain tenté de se tuer) se lia les veines : & ayant présenté vne requeste pour supplier le Prince, & receu lettres de luy fascheuses & cruelles, se les coupa.

Annius

Pollio. Appius Sillanus.

Scaurus Mamercus.

Cal. Sabinus. Vicinianus. Pollio.

Celsus.

Femmes cōdānees pour auoir pleuré

Depuis cela Anniius Pollio, Appiius Sillanus, Scaurus Mamercus, & Sabinus Caluissius, furent tous pessellemelle accusez de Maicsté. Vicinianus estoit mis en ieu avec son pere Pollio, gens de noble rae, de laquelle aucuns auoient esté constituez és plus grandes dignitez. Parquoy tous les Senateurs estoient en vne merueilleuse crainte (car qui estoit celuy d'entr'eux qui n'eust amitié ou alliance avec aucuns de tant de nobles & excellens personages?) sans Celsus Tribun de la cohorte de la ville, & l'un des encuseurs, qui vint à descharger Appius, & Caluissius. Cesar différa le iugemēt de la cause de Pollio, de Vicinianus, & de Scaurus, à fin d'en cognoistre avec le Senat, ayant toutesfois donné quelques tristes signes demonstrans le mauuais vouloir qu'il portoit à Scaurus. Qui plus est, les femmes ne furent exemptes de danger: & pource qu'elles ne pouuoient estre attaintes d'auoir voulu occuper

cuper la Republicque, elles estoient accusees pour leurs larmes. Entre autres Vitia mere de Fufius Geminus, femme fort aagee, fut mise à mort pour auoir ploré celle de son fils. Voila d'oc ce qui se faisoit pour lors au Senat. Et ne s'en faisoit moins au lieu où estoit le Prince: Car Vescularius Atticus, & Iulius Marinus, qui estoient des plus anciens familiers du Prince, qui l'auoient suiuy à Rhodes, & n'auoient bougé d'aupres de luy tant qu'il fut à Capree, furent occis. Vescularius estoit le trucheman par lequel Tibere entendoit toutes nouuelles, lors qu'on dressoit les embusches cōtre Libo, & Marinus estoit ioint avec Seianus, quād par luy Curtius Atticus fut opprimé. Au moyen dequoy le monde en fut plus ioyeux, voyant les exemples estre tombees sur le chef de ceux qui en auoient donné le conseil.

*Vitia.**Vescularius Atticus. Iulius Marinus.*

En ce mesme temps L. Piso Pontife mourut de sa mort naturelle, chose peu commune à gens cōstituez en si grande dignité. Cestuy n'auoit iamais de son gré esté autheur de faire donner aucune sentence seruile ou abiecte: & mesmes quand quelquesfois il y estoit contraint, il se moderoit fort sagement. Son pere, comme i'ay dit cy dessus, auoit esté Censeur, & vesquit iusques à l'aage de quatre vingts ans, ayant merité en Thrace l'honneur du triomphe. Toutesfois il n'acquist iamais plus grande gloire que lors qu'estant nouuellement fait Preuost de la ville, il exercea en merueilleuse modestie ceste continuelle puissance, de sa nature facheuse & intolerable, pour n'auoir

LE V. LIVRE DES ANNALES

*Preuost
de ville à
Rome.*

*Denter
Roma-
lius.
Numa
Marcius.
Spurius
Lucretius*

*Cillinius
Mecenas.
Messala
Corvinus*

*Statilius
Taurus.*

accoustumé d'estre en l'obeyssance d'vne autre . Car anciennement quand les Rois alloient hors du pays, & depuis eux les Magistrats, on auoit accoustumé (à fin que la ville ne demourast sans gouuernemēt) d'eslire quelque personnage pour certain temps qui rendist le droit à vn chacun, & donnast ordre aux accidēs soudains . Et dit l'on que Denter Romulius fut ainsi commis par Rōmulus: & depuis Numa Marcius par Tullus Hostilius, & consequemment Spurius Lucretius par Tarquinius Superbus.

Depuis ce Preuost fut esleu par les Consuls , & en demeure encores aujourd'huy la semblance, toutes & quantes fois qu'à cause des feries Latines on en ordonne vn qui vsurpe les charges du Consul. Au reste durant les guerres ciuiles, Auguste feit Preuost de toute Rome & Italie Cillinius Mecenas, qui estoit de la cōpagnie des hommes d'armes. Mais incontinent apres ayant Auguste la souueraineté de toutes choses , & voyant la multitude du peuple, & l'aide des loix estre long & tardif, il prist aucuns de ceux qui auoient esté Cōsuls, pour reprimer les serfs & esclauēs, & les troubles qui se font quelques fois par l'audace des citoyēs fils ne craignoient plus forts qu'eux. Le premier qui fut pourueu de ceste puissance, fut Messala Corvinus: en laquelle il demeura peu, comme incapable de l'exercer. Depuis Statilius Taurus sy maintint fort honorablement, iaoit ce qu'il fust fort aagé. Consequemment Pisoy dura par l'espace de vingt ans., au grand contentement de tout le mōde. Lequel par decret du Senat fut honoré de funerailles publicques.

Après

Apres cela Quintilianus Tribun du peuple mist en
 deliberation au Senat de ce qu'on deuoit faire du li- *Quintilia*
 ure de la Sibylle, lequel Caninius Gallus Quindecim- *nus Tribu*
 uir auoit requis estre receu entre les autres liures de ce *du peuple.*
 ste prophetesse, & en auoit demandé arrest du Senat: *Caninius*
 lequel estant donné par discession, Cesar enuoya let- *Gallus.*
 tres par lesquelles apres auoir legerement reprins le
 Tribu (pour ce qu'à cause de sa ieunesse il estoit igno- *Par disces*
 rant des anciennes coustumes) se tourna à Gallus, & *son. Il y a*
 le reprist aigrement, attendu qu'encore qu'il eust des *uoit anci-*
 sa ieunesse esté nourry en ceste science & ceremonies, *ennement*
 toutesfois auoit mis en deliberation au Senat (iceluy *deux*
 estant en petit nombre) quelques vers l'auteur des- *manieres*
 quels estoit incertain, & ce auant que ceux du colle- *de donner*
 ge en eussent donné leur aduis, & sans que preallable- *les arrests.*
 ment les Maistres les eussent diligemment leuz & pe- *L'une*
 sez, ainsi que la coustume le requeroit. Par mesme *estoit*
 moyen il remōstra qu'Auguste (pour ce que plusieurs *quand*
 choses vaines & legeres se mettoient en lumiere souz *chacun*
 le nom de personnages de renom) auoit ordonné *donnoit so-*
 iour dedans lequel tels escrits deuoient estre portez *aduis, &*
 par deuers le Preteur de la ville, deffendant aux gens *l'autre*
 priuez de les auoir en leur possession. Ce qu'aussi a- *quand on*
 uoit esté ordonné par les predecesseurs, lors qu'a- *passoit*
 pres le Capitole brulé durant la guerre Sociale, ils *seulemēt*
 feirent chercher par Samos, Ilium, par les Erithrees, *du costé de*
 Affricque, Sicile, & toutes les Colonies d'Italie, les li- *celuy dōr*
 ures qui se peurent recouurer de la Sibylle, (soit qu'un *on approu-*
 ne seule ait esté, ou plusieurs) donnant charge aux *uoit l'opi-*
 prestres de iuger les vrais d'auēc les faux, selon qu'il *nion. Et*
ceste ma-
niere est ap-
pellée par
discession.
Liures de
la Sibylle.

LE V. LIVRE DES ANNALES

leur estoit possible comme hommes . Ainsi deslors les Quindecimuires eurent la cognoissance de ce liure.

Estans les mesmes Consuls , il y sourdit quasi vne sedition pour la cherté des viures : & demanda l'on dedans le Theatre plus de choses par plus de fois , & en plus grande licence auoit accoustumé de demander au Prince: dequoy estant courroucé blasma le Senat & les Magistrats de ce qu'ils n'auoient par l'autorité publique chastié le peuple , remonstrant par mesme moyē comme il faisoit amener plus de bleds, & de plus de Prouinces que n'auoit iamais fait Auguste . Parquoy pour chastier le peuple , le Senat feit vn edict composé selon l'ancienne seuerité. Et ne se mōstrerent les Consuls moins diligens à le publier. Tibere ne s'en mella aucunement, & toutesfois cela ne luy fut tourné à courtoisie (ainsi qu'il sy attendoit)ains à vn orgueil & arrogance.

*Gemi. Cel
sus.*

*Pompeius
Iul. Cel.
sus.*

*Rubrius
Fabatus.*

Sur la fin de ceste annee Geminus Celsus & Pompeius Cheualiers Romains chargez du crime de coniuuration, furent puniz de mort. Entre lesquels Geminus aimé de Seianus pour sa prodigalité & vie trop delicate , n'estoit point homme pour faire quelque bon exploit. Pareillement Iulius Celsus Tribun, estât enchainé, allongeant la chaisne de laquelle il estoit enuironné, s'en rompit la teste.

Mais l'on donna gardes à Rubrius Fabatus, & luy meit on à sus, q̄ de desesperant des affaires des Romains, il s'estoit allé rendre soubz la misericorde des Parthes. Cestuy ayant esté trouué tout sain és estroits de Sicile, &

le, & ramené par vn Cétenier, n'allegoit aucunes choses vraysemblables de son voyage & si longue absence: toutesfois il demeura sans auoir mal, plustost pour ce qu'il fut oublié, que par clemence.

Estans Consuls Ser. Galba & L. Sylla, Tibere apres *L'an dix-neufiesme de Tibere.* auoir longuement cherché à qui il deuoit donner ses niepces en mariage, & voyant ces vierges en aage de marier, choisit L. Cassius & M. Vinicius. Les ancestres de Vinicius estoient habitans de villes: luy estoit natif de Calles: & auoient son pere & ayeul esté Cōsuls: le surplus de ses predecesseurs n'estoient que Cheualiers. Cest homme estoit d'esprit fort paisible, & auoit la parole eloquente & bien aornee. Les ancestres de Cassius estoient du commun peuple de Rome: toutes-*L. Cassius* fois de race ancienne; & fort honoree: & cōbien qu'il eust esté nourry sous la seule discipline de son pere, estoit toutesfois plustost renommé & estimé pour sa facilité & courtoisie, que pour son industrie. Donc à Cassius, il donna Drusilla, & à Vinicius Iulia, toutes deux filles de Germanicus. Et de cecy escriuit lettres au Senat, esquelles il honoroit assez legerement ces deux ieunes hommes: & consequemment ayant rendu quelques causes de son absence fort impertinetes, se tourna à faire mention de choses plus griesues, & de la malueillance qu'on luy portoit à cause de la Republicque. Parquoy requeroit que le Prefect Macro avec quelque petit nombre de Tribuns & Centeniers l'accompagnassent routes & quantesfois qu'il entreiroit au Senat. Et comme là dessus fust interuenue vn arrest plus ample encor qu'il ne le demandoit, & sans

LE V. LIVRE DES ANNALES

distinction d'estats, ny de nombre de gens: tant s'en faut qu'il assistast aux conseils publics, qu'il ne vint mesmes iusqu'en la ville, tournoyât autour du pays par chemins desuoyables, & s'en destournant le plus qu'il pouuoit. Ce temps pendant s'esmeut vne grosse troupe d'accusateurs cōtre ceux qui prestoient à vsure, mesprisans la loy faite par le Dictateur Cesar, laq̃lle traite de la maniere de prester, & auoir des possessions en Italie. Elle auoit autresfois esté laissée, pour ce que on a accoustumé de plus aimer son profit particulier, que le bien public. Certes ce mal des vsures a esté de toute ancienneté en la Republicque, & n'y a eu chose qui ait plus souuent causé des discordes & seditions: au moyen dequoy elle estoit cohibee par les mœurs antiques & moins corrompuz. Car au cōmencement fut deffendu par les loix des douze tables, qu'homme n'eust à exercer vsure qui fust plus qu'vnciaire, iagoit ce qu'au commecemēt elle fust exercee à l'appetit des riches. Depuis par vne loy du Tribun du peuple elle fut faite Semunciaire. Finablement fut entierement deffendu de prester à interest, & donna l'on ordre par plusieurs ordonnances du peuple à tant de fraudes, lesquelles ayant tant de fois esté reprimées, estoient de rechef remises sus par merueilleuses trōperies. Mais le Preteur Gracchus, auquel lors escheut la charge de informer & s'enquerir d'eux, contraint de la multitude de ceux qui estoient en ce danger, en fait son rapport au Senat. Au moyen dequoy les Senateurs estonnez (car à peine en trouuoit l'on vn exempt de ce crime) prièrent le Prince de leur pardonner.

Quoy

*vsuriers
accuséz.*

*C'est à vn
pour cent.*

*C'est la
moitié
moins.*

Quoy fait, on leur bailla pour l'auenir vn an & six mois, dedans lesquels, suyuant l'ordonnance de ladite loy, chacun donnaist ordre à ses comptes & affaires domestiques. De la vint qu'il y eut fort grand disette d'argent, tant pource que les debtes d'un chacun furent remuees tout à vn coup, que pource qu'en y ayant tant de condamnez, & leurs biens venduz, tout l'argent monnoyé s'en estoit allé au fisc, ou au thresor public.

Outre cela le Senat auoit ordonné que les deux parts de l'vsure seroient assignees par vn chacun sur les terres qu'il auoit en Italie. Mais les crediturs demandoyent tout entierement: & n'estoit hōneste à ceux qui estoient conuenuz, de fauser leur foy & promesse. Ainsi au commencement y eut plusieurs alces & venuës, & plusieurs prieres: & de là vindrent à faire vn bruit autour du Tribunal du Preteur. Et les choses qui auoyent esté trouuees pour dernier remede, comme vendition & achapt, tournerent en contraire effet, pource que les vsuriers auoyent mis tout l'argent en reserue pour acheter les terres. Or pource que les heritages estoient venus à vil pris, pour la grand' multitude des vendeurs, d'autant qu'un homme estoit plus endebté, d'autant védoit il plus à regret. Et y en auoit plusieurs qui estoient entierement destruits de tous leurs biens, lesquels perduz, la dignité & bonne renommee s'en alloit aussi à val l'eau, iusques à ce que Cesar ayant mis mil fois sesterces par les bâques, permist à vn chacun d'en emprunter sans payer aucune vsure par l'espace de trois ans, moyennant que le debteur eust terres qui peussent respondre de deux fois autant, & fussent hypothequees pour la debte. Ainsi la foy & le

*Ce sont
deux mil
liens cinq
cens mil
escaez.*

LE V. LIVRE DES ANNALES

credit furent remis sus, & peu à peu l'on comēça à trouuer des crediturs particuliers. Or l'achapt des terres ne fut fait selō la forme & teneur de l'arrest du Senat, pour ce que telles choses au commencement sont executees en diligence, & tost apres l'on n'en tient plus de conte.

Apres cela retournerent les premieres craintes, & fut

*Confidius
Proculus.*

Confidius Proculus accusé de maiesté, lequel ainsi qu'il celebroit le iour de sa natiuité, sans qu'il doutast d'aucune chose, fut rauy au Senat, & sur le champ condamné & mis à mort. Sa sœur Sancia fut aussi bannie, & en

Sancia.

Q. Pomponius.

estoit accusateur Q. Pomponius, lequel ne se pouuant à la verité tenir à repos, s'excusoit toutesfois, & disoit cecy estre par luy fait, à fin qu'ayant gaigné la grace du Prince, il peust donner quelque remede aux dangers de

*Pompeia
Macrina.*

son frere Pomponius Secundus. Pompeia Macrina fut aussi bannie. Son mary & son beaupere (l'un natif d'Arges, & l'autre Lacedemonien) auoient tous deux esté affligez par Tibere. Mesmes son pere, illustre cheualier Romain, & son frere qui estoit Pretorien, voyans leur condamnation prochaine, se tuerent eux mesmes. On leur mettoit à sus pour erime que Cn. Pompeius Magnus auoit eu leur bisayeul Theophanes Mitylenien entre ses plus grands amis, & qu'apres sa mort la flateresse Grece luy auoit fait honneurs diuins.

*Theophanes
Mitylenien.*

Sex. Marius.

Apres ceux icy Sex. Marius, qui estoit le plus riche de toute l'Espagne, fut accusé d'auoir en compagnie incestueuse avec sa fille, au moyen dequoy fut precipité du haut en bas de la roche Tarpeie. Et à fin que l'on ne doutast que ses grandes richesses auoyent esté cause de son mal, Tibere se reserua ses minieres d'or, iacōit ce qu'elle;

les fussent cōfisquees. Et estât irrité de tant de gens qu'il auoit fait mourir, feit encor tuer tous ceux qui estoient en prison accusez d'auoir eu quelque frequentation avec Seianus. Lors y eut vne merueilleuse boucherie de gens de tout sexe, & de tout aage, nobles, non nobles, espars ou amassez. Mesmes n'estoit permis à leurs parens & amis de les assister, plorer leur fortune, ny mesmes de les veoir sinon bien peu de temps: & y auoit gardes tout autour, & espies pour veoir & considerer le dueil qu'un chacun feroit, lesquels couuroient & suiuoient ces corps morts & putrifiez, iusques à ce qu'ils fussent iettez dedans le Tibre. Et si quelque fois ils venoient sur l'eau, ou à bord, l'on n'osoit les brasser, ny mesmes les toucher: & estoit lors perduë toute societé & deuoir d'humanité, à cause de la crainte, tellement que d'autant que la cruauté s'augmentoit, d'autant la misericorde & compassion estoit reculee.

En ce mesme temps C. Cesar tenant compagnie à son ayeul qui partoit de Caprees, fut mariee avec Claudia fille de M. Sillanus, cachant son courage cruel sous vne feinte & cauteleuse modestie: car iamais il ne dist vn seul mot voyant la condamnation de sa mere, & le bannissement de ses freres: & vsoit de pareils accoustremens que Tibere selon le iour: mesmes vsoit des propos qui estoient quasi semblables. Au moyen dequoy le beau dit de l'orateur Passienus fut incontinent diuulgué, assçauoir, que iamais ne fut veu vn meilleur seruiteur que luy, ny vn pire seigneur.

*C. Cesar
Caligula.
Claudia.*

*Passienus
orateur.*

Le ne vueil laisser passer icy le presage de Tibere touchant Ser. Galba lors Consul: car l'ayant appelle à soy,

Ser. Galb.

LE V. LIVRE DES ANNALES

*Thrasyllus
e crime
tém l'art
des Chal-
deens.*

& luy ayant tenu plusieurs propos pour le tenter, finalement il luy dist ceste sentence en termes Grecs : Et toy Galba quelquefois gousteras de l'Empire : signifiant que sa puissance viendrait bien tard, & seroit de peu de durée. Ce qu'il cognoissoit au moyen de la science des Chaldeens, pour laquelle apprendre il s'estoit retiré à Rhodes, & eut pour maistre Thrasyllus, le sçavoir duquel il experimenta en la maniere qui s'ensuit. Toutes & quantesfois qu'il vouloit deliberer de quelque affaire, il se retiroit au plus haut lieu de sa maison, & ne se descouuroit qu'à vn de ses affranchiz. Cestuy ignorant de toutes lettres, & puissant de corps, alloit par rochers desrompuz & desuoyables (car la maison de Tibere regardoit sur ces rochers) marchant deuant celuy duquel Tibere vouloit experimenter le sçavoir : & si à son retour il trouuoit en luy quelque vanité, ou suspicion de tromperie, il le precipitoit en la mer qui batoit au pied du rocher, à fin qu'il n'y eust qui peust descouurir son secret.

Doncques Thrasyllus estant conduit par les mesmes rochers, auoit esmeu Tibere qui l'interrogeoit, en luy ouurant par grande subtilité les choses futures, & comme il seroit quelque iour Empereur. Parquoy de rechef il l'interrogea, si aussi il cognoissoit l'heure de sa natiuité & ce qu'à luy mesme deuoit aduenir en ceste année, & mesmement en ce iour.

Doncques Thrasyllus considerât l'affiette des estoilles, & mesurant les espaces, commença à douter, & puis à auoir paour : & d'autant qu'il y regardoit plus, tant plus il estoit plain de merueilles & de crainte. Finalement il s'escria

s'escria qu'il estoit prochain du plus douteux & dernier peril. Lors Tibere l'embrassant, & luy disant qu'il estoit fort ioyeux de ce qu'il auoit la prescience de ses dangers & estoit sain & sauf: & prenant tout ce qu'il auoit dit, pour Oracle, le tint depuis au nombre de ses plus grâds amys.

Mais quand i'oy telles & semblables choses, ie ne puis certainement iuger si les affaires des hommes ont leurs tours & reuolutions par vne destinee & necessité immuable, ou bien par accident & cas d'auenture. Car tu trouueras les plus sages des anciens, & ceux qui ont depuis esté imitateurs de leur secte, estre d'opinions diuerses: tellement que plusieurs pensent les dieux n'auoir aucun soing de nostre commencement, de nostre fin, ny mesmes des hommes. Qu'à ce moyen nous voyons aux bons n'auenir pour la pluspart qu'ennuiz & fascheries, & aux meschants tout venir à souhait. Au contraire les autres pensent que les destinees s'accordēt avec les choses, & non point par le moyen des estoilles errātes, mais à cause des commencemens & liaisons des causes naturelles. Et toutesfois ceux icy nous laissent l'election de nostre forme de viure, laquelle choisie & constituee, il y a vn certain ordre des choses qui nous doiuent aduenir: & disent que les maux ou les biens ne sont ceux que le vulgaire pense: pource que plusieurs sont heureux, lesquels on pense estre affliges d'aduersitez: & plusieurs tresmisérables, en grande abondance de biens: moyennant que ceux la portent constamment leur mauuaise fortune, & que ceux icy vsent sans raison de leur prosperité. Au reste qu'il y a plusieurs hommes auxquels

LE V. LIVRE DES ANNALES

nonobstant ce que dessus, on peut predestiner les choses à aduenir des le commencement de leur natiuité, & neantmoins qu'aucunes d'icelles aduiennent autrement qu'elles n'ont esté predites, par les tromperies de ceux qui disent choses qu'ils ignorent: & ainsi est corrompüë la foy de ceste science, les enseignemens de laquelle ont esté receuz & par l'aage antique, & approuuez de nostre temps: Car nous dirons cy apres en temps & lieu (à fin que ie ne m'esloigne maintenant trop de mon propos) comme le fils de ce mesme Thrasyllus, predist l'Empire de Neron.

*Mort d'A
finius
Gallus.*

Estans les mesmes Consuls, les nouuelles vindrent de la mort d'Asinius Gallus, lequel l'on ne doute point estre mort de faim, & est incertain si ce fut par necessité, ou de son gré. Et comme l'on demandast à Tibere s'il permettoit quil fust enseuely, il n'eut point de honte de le permettre, accusant les accidens qui luy auoient osté ce criminel, au parauant qu'il peust estre conuaincu: cōme si durant trois ans qui auoient esté entredeux, il y eust eu faute de temps à faire le proces d'un vieillard Consulaire, & parent de tant de Consulaires.

*Mort de
Drusus
fils de
Germanicus.*

Depuis Drusus alla de vie à trespas, s'estant au parauât entretenu l'espace de neuf iours de miserable nourriture en mangeant la bourre de son liët.

Aucuns ont escrit que Macro auoit charge, si d'aduenture Scianus y vouloit proceder par armes, de tirer ce ieune homme de la prison (car il estoit prisonnier au Palays) & le faire capitaine de la commune. Soudain apres, pource que le bruit auoit esté que Tibere se vouloit reconcilier avec sa bru. & son petit
fils,

fils, il ayma mieux vser de cruauté, que monstrier qu'il se
 repentist de ce qu'il auoit fait. Qui plus est, iniuriant le
 defunct, luy reprochoit la vilenie de son corps, le dom-
 mage qu'il portoit aux siens, & le mauuais vouloir qu'il
 porroit à la Republique: & d'auantage feist reciter ce qu'il
 auoit fait mettre de iour en iour par escrit, tant de ses pa-
 roles que de ses faicts. Chose qui sembla plus estrange
 & cruelle, que toutes autres: d'auoir attiré gens par tant
 d'annees qui espiaissent & missent par escrit sa contenan-
 ce, ses plaintes, & ses secrets murmures. Et à peine eust
 on creu qu'un ayeul eust enduré d'escouter cecy, de le li-
 re, & de le publier: n'eust esté que les lettres du Cénenier *Actius*.
 Actius & de l'affranchy Didymus portoyent les noms des *Didymus*
 seruiteurs, selon qu'ils auoient frappé, ou fait peur à Dru-
 sus. Mesmes le Centenier y auoit (côme pour chose di-
 gne de louange) adiousté les paroles pleines de cruauté,
 desquelles il auoit vſé enuers Drusus, & celles que Dru-
 sus luy auoit responduës: lors qu'il tiroit à la fin: lequel
 au commencement faignant estre deuenu hors du sens,
 prioit (comme par follie) que mal peust aduenir à Tibe-
 re. Et depuis voyant qu'il n'auoit plus d'esperance de vi-
 ure, le maudissoit avec imprecations exquisés & preme-
 ditées, priant les dieux que tout ainsi qu'il auoit occis sa
 bru, le fils de son frere, & ses neueux, & remply sa maiſo-
 de sang & de tueries, ainsi il en payast la peine au nom, à
 la lignee, & à la posterité de ses ancestres. Les Senateurs
 faisoient quelque bruit, comme s'ils eussent eu cecy en
 detestation: mais ils n'estoient moins estonnez, qu'es-
 merueillez, voyans cest homme au parauant caut, & se-
 cret à tenir ses meschancetez couuettes, estre venu en.

LE V. LIVRE DES ANNALES

vne telle confidence, qu'il ne craignoit monstrier euidement (comme si les paroyz eussent esté abbatuës) son petit fils au pouuoir du fouët d'un Centenier, entre les coups & batures des esclauës, en vain demander le dernier aliment de sa vie.

*Mort d'Agrippina
femme de
Germanicus.*

Le deuil n'estoit encor passé, qu'on oynt le bruit d'Agrippina, laquelle ie croy depuis la mort de Seianus iusques icy auoir esté nourrie d'esperance, & que en fin se laissa mourir, voyant qu'elle n'estoit moins cruellement traictee, qu'au parauant. Si d'auenture l'on ne faignoit qu'elle se fust laissée mourir d'elle-mesmes apres l'auoir laissée mourir de faim: Car Tibere en dist depuis moult de vilennies & meschancetez, l'accusant de paillardise, & allegant Asinius Gallus pour son adultere, apres la mort duquel elle s'estoit ennuyee de viure. Mais certes Agrippina, femme qui ne se contentoit de raison, conuoiteuse de dominer, & entreprenant plus qu'il n'est requis à vne femme, s'estoit despouillée de tous ces autres vices feminins. Elle mourut au pareil iour que Seianus auoit esté puny deux ans au parauant: ce que Tibere voulut aussi estre mis en memoire, & se tournoit à louange dequoy elle n'auoit esté estranglée ny gettee és Gemonies. Pour lesquelles choses graces luy furent renduës au Senat, & fut ordonné que dorefnauant par chacune annee, au iour que tous deux estoient allez de vie à trespas, (qui fut le quinzième des Calendes du mois de Nouëbre) l'on consacrerait vn don à Iupiter.

*Cocceius
Nerua.*

Peu de temps apres Cocceius Nerua qui tousiours estoit au costé du Prince, expert en tout droit diuin & humain, encor que tous ses estats fussent entiers, & luy sain

sain de corps, delibera de se laisser mourir. Ce qu'entend du par Tibere, se tenoit aupres de luy, luy demandant la cause d'une si estrange deliberation, le priant, & luy remonstrant, que ce seroit vne grande playe à sa conscience, & à sa renommee, si l'on voyoit l'un de ses amys hayr ainsi la vie sans auoir occasion de souhaitter la mort. Mais Nerua faisant peu de conte de ses paroles, ne voulut plus prendre aucune viande. Ceux qui mieux entendoient les pensees de Nerua, disoient que cognoissant de plus pres les maux à aduenir à la Republique, il auoit par crainte & par courroux souhaitté vne mort honneste, tandis qu'il estoit encor en son entier, & qu'on n'auoit encor rien attenté contre sa personne.

Au surplus la ruine d'Agrippina (chose à peine croyable) y attira aussi Plancina. Ceste auoit esté femme de Cn. Piso, & s'estoit publiquement resiouye de la mort de Germanicus: & lors que Piso fut occis, auoit esté sauuee, nō moins par l'inimitié que l'on portoit à Agrippina, que par les prieres de l'Imperatrix: mais cessans le courroux & la faueur, le droit eut lieu. Et estant accusée de crimes à tous cogneuz, receut par sa main propre punition, qui ne fut si hastiue qu'elle estoit meritee. A tant d'ennuiz & fascheries aduint encor vn autre ducil: car Iulia fille de Drusus, & autresfois femme de Neron, fut mariee en la maison de Rubellius Blandus, l'ayeul de quel plusieurs auoyent cogneu estre de la ville de Tybur, & seulement cheualier Romain.

Sur la fin de ceste annee, la mort de Elius Lamia fut honoree de mesmes funerailles qu'on faisoit aux Censeurs. Cestuy deschargé de l'administration de Syrie,

*Plancina
femme de
Piso.*

*Iulia fille
de Drus.*

*Rubellius
Blandus.*

*Elius La-
mia.*

LE V. LIVRE DES ANNALES

(laquelle il auoit seulemēt de nō) fut fait gouuerneur de la ville de Rome. Il estoit descendu de noble race, & auoit vne vieilleſſe viue & verde: & la Prouince qui luy auoit eſté denyee, luy auoit augmenté ſa dignité.

Pōp Flacc

Depuis cōme Flaccus Pōponius propreteur de Syrie, fut allé de vie à trespas, les lettres de Cesar furent recitees, par lesquelles il ſe plaignoit dōt les plus nobles, & apres à auoir la charge des armees, la reſuſoiēt: & q̄ par ceste neceſſité il estoit preſſé de faire requestes, à fin qu'aucūs de ceux qui auoiēt eſté Cōſuls, fuſſent cōtraints de prēdre la charge & adminiſtration des Prouinces, ne ſe ſouuenant qu'Aruntius estoit detenu iay auoit dix ans, à fin qu'il n'allast en Eſpagne.

*mort de
M. Lepi-
dus.*

Auſſi en ceste annee M. Lepidus mourut, de la mo-
deſtie & prudence duquel nous auōs aſſez parlé és au-
tres liures: & n'eſt beſoing auſſi de tenir grāds propos
pour faire preuue de ſa nobleſſe: car la race des Emi-
liēs a touſiours eſté feconde & abondāte de bons ci-
toyēs: & iāçoit ce qu'aucūs de ceste famille ayent eſté
de meurs corrompus, ils ont neātmoins touſiours en-
tretienue leur illuſtre fortune. Durāt le Cōſular de Pau-
lus Fabius & L. Vitellius, apres pluſieurs ſiecles reuo-
lus il y vint vn Phœnix en Egypte, qui dōna aſſez ma-
tiere de diſputer ſur ce miracle aux hōmes doctes tāt
de ce pays, que du païs de Grece. I'ay enuie de vous eſ-
crire icy les choſes dōt ils ſ'accordēt, & pluſieurs dont
ils doutēt, leſquelles toutesſois ne ſont indignes d'e-
ſtre cogneuēs. Tous ceux qui ont eſcrit de ceſt ani-
mal, cōſentent qu'il eſt ſacré au Soleil, & different aux
autres oyſeaux du bec, & des aiſſes. Quāt eſt du nōbre

*L'an 20
de Tibere.
Vng Phœ-
nix veu
en Egypte*

de

de ses ans, on en escrit diuersemēt. La plus commune opinion est, qu'il vit cinq cēs ans. Aucuns affermēt de mil quatre cens soixante & vn an: & que les premiers oyseaux de ceste espee, accōpaignez de plusieurs autres oyseaux, qui s'esmerueilloient de ceste nouuelle forme, vindrēt en la citē de Heliopolis, premieremēt au temps de Sesostris: depuis au temps d'Amasis: & consequemment au temps de Ptolemee, qui regna le tiers des Macedoniens. Mais certes l'antiquitē est fort obscure. Or entre Ptolemee & Tibere à peine y eut il deux cens cinquante ans. Au moyen de quoy aucuns ont creu ce Phœnix n'estre vray Phœnix, ny venu des terres des Arabes: & qu'il n'auoit rien en luy des choses lesquelles la memoire ancienne a confermē estre és autres: car ayant acheué le nombre de ses ans, & voyāt sa mort approcher, il se fait vn nid en son pays, auquel il depart & espend la vertu generatiue, dont en est produit & engendré vn autre, lequel auāt toute autre chose, prend le soing d'enseuelir son pere, & ce nō sans mystere: car ayant pris vn fardeau de Myrrhe, experimente sa force, le portant par assez long chemin. Et apres qu'il se cognoist suffisant pour le porter, & pour faire le voyage, il prend le corps de son pere, & le porte à l'autel q̄ est edifié au Soleil, & là le bruste & sacrifie. Ces choses sont incertaines, & augmentees par les fables. Au reste, il n'y a point de doute que l'on voit aucunes fois cest oiseau en Egypte.

Mais à Rome continuans les meurdres, Pomponius Laeco, lequel nous auons dit auoir eu l'administraction de Mesie, ayant rôpu ses veines, laissa perdre son

C'est une ville d'Egypte, laquelle des Grecs est appelée Thebes, selon Diod. Sicul. Faux Phœnix.

Pomp. Laeco.

LE V. LIVRE DES ANNALES

Paxia.

fang. Sa femme Paxea en feit tout autant: car la crainte du Bourreau estoit cause qu'ainfi facilemēt l'on se tuoit, pource que les biens de ceux qui attendoient leur condemnation, estoient confisqueez, & estoit defendu d'enfeuelir leurs corps. Quant à ceux qui se donnoient la mort, leurs corps estoient inhumez, leurs testamens sortissoient effect: & voyla qu'ils gaignoyent à eux hastier. Mais Tibere ayant enuoyé lettres au Senat, remonstra que la coustume des anciens estoit: toutes & quantes fois qu'ils vouloyent renoncer à l'amitié de quelcun, de luy defendre leur maison: & là estoit la fin de leur amitié. Qu'il auoit vſé de ceste maniere de faire en l'endroit de Labeo, lequel pressé des fautes qu'il auoit commises en l'administratiō de sa prouince, & autres crimes: auoit voulu cacher sa coulpe par le blafme d'autrui, ayāt pour neant espouuēté sa femme, laquelle encor qu'elle n'eust esté innocente, estoit toutesfois exempte du danger.

Mamercus Scaurus.

Cela fait, Mamercus Scaurus fut de rechef accusé, Cest homme estoit de tresnoble maison, & excellent à plaider causes, mais de vie infame & deshonneste. L'amitié de Seianus ne luy porta aucun dommage, mais bien l'inimitié de Macro, laquelle n'auoit moins de force pour ruiner les personnes, pource qu'il faisoit les mesmes menees de Seianus, toutesfois plus occultement. Or il auoit rapporté à Tibere l'argument d'une tragedie composee par Scaurus, & y auoit adiousté quelques vers qui se pouuoient interpreter contre Tibere. Mais ses accusateurs Seruius & Cornelius, luy obiectoient qu'il auoit adulteré avec Liuia, & fait des sacrifices de magie. Scaurus (ainſi qu'il estoit conuenable à vn

Macro.

venu

venu des anciens Emiliens) preuint son accusation par l'enhortement de sa femme Sexitia, laquelle fut incitatrice & compagne de sa mort. Or toutesfois les accusateurs (quand l'occasion s'y adonnoit) estoient punis: car Seruilius & Cornelius estans venus en bruit par la ruine de Scaurus (pource qu'ils auoient pris argent de Varius Ligor, à fin d'eux defiliter de leur accusation) furent bannis & confinez en certaines isles. Aussi Abudius Ruso ainsi qu'il taschoit de mettre en peine Lentulus Getulicus (sous lequel il auoit eu charge d'une legion) & l'accusoit d'auoir deliberé de donner son fils pour gendre à Seianus, fut luy mesme condamné sans estre accusé, & chassé hors de la cité. En ce temps Getulicus auoit charge des legions de la haute Allemagne, & estoit merueilleusement ayiné pour sa grande clemence, & son peu de seuerité. Mesmes n'estoit trop mal voulu de l'autre armée prochaine, par le moyen de son beaupere L. Apronius. Au moyen dequoy y eut vn bruit assez constant & assuré, qu'il auoit ausé escrire lettres à Tibere, par lesquelles il luy remonstroit que non de son gré, mais à la suscitation de luy, il auoit fait commencement d'alliance avec Seianus, disant qu'il pouoit aussi bien estre trôpé que luy, & que le mesme erreur ne deuoit excuser luy seul, & estre cause de la ruine des autres. Que de sa part il auoit sa foy entiere, laquelle luy demurerait moyennant qu'on ne luy dressast point d'ëbusches. Au reste qu'il ne receuroit aucun successeur en son estat non plus que la sentence de sa mort. Et pource, si Tibere le trouuoit bon, qu'ils feissent

yy iij

LE V. LIVRE DES ANNALES

vne alliée, par laquelle le Prince fut seigneur de toutes autres choses, & que l'administratiō de sa Prouince luy demourast. Combien que cecy soit fort estrange & esmerueillable, toutesfois l'on y donna foy, pource que seul entre les alliez & affins de Seianus, il estoit demeuré sans danger, & en grace & credit, considerāt Tibere en soy mesme, qu'il estoit hay du peuple, ia fort sur l'aage, & que sa puissance estoit plus entretenue par la renommee, que par sa force.

*L'an 12.
de Tibere.
Les autres
Historiographes
disent ces
Consulz
estre nommez
l'un
P. Gallus
Camerinus,
&
l'autre
Q. Neruanus.*

Araces.

Estans Consuls C. Celsus & M. Seruilius, quelques nobles du pays de Parthe vindrent en la ville de Rome, sans aucunemēt le faire sçauoir à leur Roy Artabanus. Ce Roy pour la crainte de Germanicus estoit au parauant monstre amy feal aux Romains: & modeste & raisonnable enuers ses subiets. Et tout soudain se monstra orgueilleux contre nous, & cruel contre les siens: se confiant en la fortune qu'il auoit eue prospere & fauorable es guerres par luy faictes cōtre les nations circōuoisines, & mesprisant la vieillesse de Tibere, comme imbecille & incapable des armes. Estoit aussi conuoiteux du Royaume d'Armenie, duquel apres la mort d'Artaxias il auoit fait gouuerneur le plus ancien de ses enfans nommé Arfaces, les outrageant au surplus de paroles, & contumelies: & ayant enuoyé gens en Syrie & Cilicie pour redemander les richesses que Vonones y auoit laissee, se vantoit & menassoit de se ruer sur les anciens limites des Perces & Macedoniens, enuahir tout ce qu'auoit possédé Cyrus, & depuis luy Alexandre.

Or qui fut principal autheur aux Parthes d'enuoyer
messagers

messagers secrets, fut Sinnaces, lequel estoit de noble *Sinnaces.*
 & tref-riche lignee: & avec luy Abdus le chastré: car *Abdus.*
 cela ne fait mespriser les hommes en Parthe, & sont
 les chastrez constituez aussi bien que les autres hom-
 mes és estats & plus grandes dignitez.

Donques ces deux apres auoir attilré avec eux
 quelques autres des plus apparens du pays, & voyans
 qu'ils n'auoient personne de la lignée des Arsacides,
 lequel ils peussent faire Seigneur du Royaume, es-
 tants la pluspart occis par Artabanus, & les autres
 non en aage suffisant: demandoient Phaates fils du *Phraates.*
 du Roy Phaates, lequel estoit à Rome disants qu'en
 cecy il n'estoit besoing que d'un nō & d'un auteur,
 c'est à dire que cela se feir par l'autorité de Cesar, &
 qu'un de la lignée de Arsaces se monstraist seulement
 sur le riuage d'Euphrates.

Tibere trouua cecy fort bon, & mit Phraates en
 equipage pour se saisir & mettre en possession du
 Royaume paternel, retenant ses deliberations en son
 cœur, c'est à sçauoir, que les choses estrangeres s'en-
 treprennent mieux par finesse & astuce, & estoit
 beaucoup meilleur auoir la guerre loing de son pays,
 que pres.

Ayant ce temps pendant Artabanus descouuert
 les embusches, tantost brusloit d'enuie qu'il auoit
 de se venger, & tantost en estoit retardé par crainte.
 Or aux Barbares toute cunctation & retardement
 semble chose seruile: ou au cōtraire est chose Royal-
 le executer incontinent ce qu'on a entrepris. Tou-
 tesfois l'vtilité l'emporta, & proposa d'empoisonner

LE V. LIVRE DES ANNALES

*Tirida-
tes.*

*Hiberus
Mithri-
dates.*

*Pharas-
manes.
L. Petel-
lus.*

Abdus d'une poison lente, l'inuitant pour ceste cause à vn banquet, souz couleur d'amitié: & outre de retarder Sinnaces par dissimulation & dons, luy donnât au surplus des affaires. Mais Phraates ainsi qu'il veut laisser la maniere de viure des Romains, laquelle il auoit de long temps accoustumée, pour prendre celle des Parthes, & se trouuant trop foible pour icelle exercer, print vne maladie au pays de Surie, de laquelle il mourut. Toutesfois Tibere ne se desista de son entreprise, & esleut Tiridates, qui estoit de la mesme race, & ennemy d'Artabanus: & pareillement Hiberus Mithridates pour recouurer l'Armenie, le reconciliant avec son frere Pharasmanes, qui auoit le gouvernement de ceste nation: & donnant charge à L. Vitellius de tout ce qui se preparoit contre l'Orient. Je n'ignore point que ce personnage n'ait eu mauuais bruit à Rome, & qu'on n'aye dit plusieurs choses infames de luy: toutesfois au reste il n'a esté moins vertueux en l'administration des Prouinces, que les anciens. Depuis estant de retour d'icelles, & deuenu seif & abiect pour la crainte de C. Cesar Caligula, & par la familiarité qu'il auoit avec Claudius, fut exēplaire à la posterité d'infame & deshoneste flaterie, tellement que ses actes premiers quitterent la place aux derniers, & furent les bonnes choses faictes durant sa ieunesse, effacees par sa hôteuse & deshoneste vieillesse.

Mais Mithridates principal des gouuerneurs contrainct Pharasmanes de donner & par force & par finesse, ayde à ses entreprises: & trouuerent des corrupteurs,

pteurs, qui par force d'argent feirent consentir les ministres d'Arfaces à faire meschanceté: & par mesme moyen les Hiberiens avec grosse armee entrerent dedans Armenie, & gaignerent la ville Artaxata. Ce que entendu par Artabanus, feit equipper son fils ^{Orodes} ~~filz~~ ^{d'Ar-} ~~tabanus.~~ pour se venger, luy donnant l'armee des Parthes avec quelques auxiliaires qu'il souldoit. Au contraire Pharasmanes auoit attiré à soy les Albanois & les Sarmates, les Princes desquels faisoient pour toutes les deux parties, & auoient prins dons d'une part & d'autre, à la coustume du pays. Les Hiberiens s'estans emparez des lieux, enuoyerent incontinent les Sarmates sur les Armeniens par la voye Caspie. Mais ceux qui venoient du costé des Parthes, estoient aisément repoussez, pour ce que l'ennemy auoit clos tous les passages, fors vn, qui est entre la mer & la fin des monts d'Albanie, lequel estoit empesché à cause de l'Esté: car par le soufflement des vents Etesiens, les guez se remplissent: ou ^{Vent d'E-} ~~tesiens.~~ quand vient sur l'Hyuer, le vent de Midy retourne les flots: & ayant repoussé la mer au dedans, descouure les guez qui sont sur le riuage.

Ce temps pendant Pharasmanes renforcé de secours, appelloit à la bataille Orodes, qui estoit destitué d'alliez. S'il reculloit, il le poursuioit, faisant escarmouches autour de son camp, gastant les viures, & souuentefois l'environnant comme s'il l'eust tenu assiéger: iusques à ce que les Parthes non accoustumez à endurer tels outrages, se régerent autour de luy, & vindrent à demâder la bataille. Or leur force ne gist que

LE V. LIVRE DES ANNALES

en leur gendarmerie: mais Pharasmanes outre la force de la sienne, estoit aussi fort de gens de pied. Car les Hiberiens & Albanois habitans en pays de montagnes, estoient plus endurcis & accoustumez au travail: & se disent estre descendus des Thessaliens, au temps que Iason apres auoir emmené Medee, & d'elle eu quelques enfans, retourna au Palais vuide d'Eeta, & en l'Isle deserte de Colchos. D'auantage ils font grand'estime de son nom, & celebrent l'Oracle de *Phryxus*. Qui plus est, ils n'osent sacrifier de moutons, pour ce qu'ils croyent que Phryxus fut porté par vn mouton: soit que ce mouton ait esté vn animal, ou bien l'enseigne d'vn nauire.

Donques estans d'vn costé & d'autre les batailles reugees, le Parthe remōstroit à ses gens l'Empire d'Orient, & la vertu des Arsacides: disant au contraire que les Hiberiens estoient ignobles de condition, & n'auoient que gens d'armes mercenaires. Pharasmanes remonstroit d'autre part à ses gens, que par ceste victoire ils seroient hors de la domination des Parthes: & que d'autant qu'ils entreprenoient chose plus haute & difficile, d'autant ils y auroient plus grand honneur estans vainqueurs: où ils tournoient le doz, ils n'emporteroient que deshonneur, & mettroiēt leurs personnes en danger. Pareillement remonstroit son armee espouuētable à veoir, & d'autre costé les troupes des Mediens toutes peintes & rehuisantes d'or. De son costé monstroit hommes vertueux, & de l'autre part la proye.

Or entre les Sarmates le Capitaine ne parloit seulement,

lement, mais s'incitoient les vns les autres de ne combattre avec le trait, disans qu'il falloit preuenir les ennemis, se ruant sur eux impetueusement, & combattant de pres. Là y eut diuerſes manieres de combats, les Parthes accoustumez par vne mesme ruse à fuir ou poursuiure l'ennemy, separant les bandes, cherchoiēt espace pour faire place aux coups & au trait. Les Sarmates laissoient là leurs arcs (desquels ils ne se peuuēt longuement aider) pour eux ruer sur les ennemis avec leurs bastons & espees, tantost à la mode d'un combat de gens de cheual, faisoient vne fois la pointe, & vne autrefois le derriere: aucunes fois se ramassans & heurtans du corps & des armes, repouſsoient leurs ennemis, ou estoient repouſsez. Et ja les Albanois & Hiberniens empoignoient leurs ennemis, les renuerſoiēt, & faisoient trouuer la bataille douteuse de leur costé, au dessus desquels les gens de cheual & les gens de pied s'approchans de plus pres, s'entrefaisoient plusieurs playes. En ces entrefaittes Pharasmanes & Orodes aidans aux mieux faisans, ou subuenàs à ceux qui estoient empeschez, se monstroient par dessus tous les autres. Au moyen de quoy festans entrecogneus, avec grand cry, & les lances baissées laissent courir leurs cheuaux l'un contre l'autre. Pharasmanes adressa mieux son coup, car il luy passa à trauers le heaume: toutes fois il ne peut redoubler, pour ce qu'il fut emporté de son cheual, & que le bleſſé fut rescoux & sauué par les plus forts de ses satellites. Ce neantmoins les Parthes croyans faulſement qu'il fust mort, & pour ceste cause espouuentez, se laisserent vaincre aisément.

LE V. LIVRE DES ANNALES

Soudain apres Artabanus se delibera d'assembler toute la puisſace de ſon dernier Royaume, diſant que les Hiberiens n'auoient gaigné la bataille que pour auoir meilleure cognoiſſance des lieux. Et combien qu'il euſt eſté vaincu, ne vouloit quitter le Royaume, ſi Vitellius (ayât amasſé les legions, & faiſant courir vn bruit qu'il vouloit aller enuahir Macedoine, ne luy euſt donné crainte de la guerre des Romains. Parquoy lors Artabanus abandonna l'armee, & fut ſa puisſance renuerſee: pour ce que Vitellius perſuadoit aux ſuiets de laiſſer là ce Roy, cruel en temps de paix, & à eux dommageable & pernicieux pour eſtre infortuné en guerre. Quoy voyant Sinnaces (lequel i'ay dit cy deſſus auoir porté grande haine à Artabanus) ſe retira à ſon pere Abdageſes, & autres participans de ce conſeil: & lors par continuelles tueries attira à ſoy les plus prompts à reuolte: ſe retirans peu à ſon party ceux qui ſ'eſtoient rédus obeyſſans à Artabanus, plus par force que par amitié: auſquels eſtoit creu le courage voyans qu'ils auoient des chefs & Capitaines.

Lors Artabanus n'eut autre recours ſinon à quelques eſtrangers qu'il auoit pour la garde de ſon corps: gens bannis de leurs pays, & ſans aucune intelligence de bien, ou ſoucy de mal faire: leſquels entretenuz à gages ont accouſtumé de ſe rendre miniſtres de toutes meſchancetez.

Eſtant donc accompagné de tels ruſtres, ſ'enfuit en pays loingtain iuſques aux lieux voiſins de Scythie, eſperant là trouuer ſecours, pour ce qu'il eſtoit lié par affinité

affinité avec les Hyrcaniens & Carmaniens : & ayant esperance que cependât les Parthes, amateurs de ceux qui sont absents, & de courage muable enuers ceux qu'ils voyent presens, pourroient changer de vouloir. Mais Vitellius voyant qu'Artabanus s'en estoit fuy, & que le peuple estoit affectionné à son nouveau Roy : apres auoir enhorté Tiridates de prendre ce qui luy estoit appareillé, conduist toute la force des legions & des confederez sur le riuage d'Euphrates.

Et comme eux sacrifians, l'un eust donné pour les ieux Tauriles, vn porc & vne brebis, à la maniere des Romains : & l'autre esquipé & orné vn cheual, pour appaiser ce fleue : les gens du pays leur vindrent annoncer que ce fleue s'estoit de soymesme enflé, & sans aucune abondance de pluyes merueilleusement accru : tellement que l'escume blanche faisoit des ronds en forme de couronnes & diademes : chose qui signifioit que ce passage seroit heureux & prospere. Les autres l'interpretoient plus sagement, disans que le commencement de ceste entreprise seroit prospere, mais qu'elle ne dureroit long temps : car (disoient ils) les choses qui sont signifiees par le ciel ou par la terre, ont accoustumé d'estre certaines : mais la nature des fleues est instable & inconstante : & en vn moment emportent quant & eux les signes qu'ils ont monstrez. Or doncques ayans fait vn pont avec des bateaux, & passé l'armee, le premier qui vint au camp, fut Ornospadès, avec vn grand nombre de gens de cheual. Cestuy auoit autresfois esté banny du pays, & n'auoit porté peu d'aide à Tibere en la guerre Dalma-

Ornospa-
dès.

LE V. LIVRE DES ANNALES

rique, & pour ce auoit eu droit de bourgeoisie à Rome. Depuis l'ayant le Roy repris en amitié, il luy fait grand honneur, & luy commist le gouuernement du pays: lequel pour estre enuironné de deux nobles fleues, Euphrates & Tigris, est appellé Mesopotamie. Tost apres Sinnaces se ioignant à ceste armee, l'augmenta: & y adiousta Abdagases les richesses & appareil du Roy, qui estoit l'appuy & le fondement de ceux de ceste ligue. Vitellius pensant assez auoir exploicté d'auoir fait monstre des armes des Romains, vint à admonnester Tiridates, & les principaux de Parthe, sçauoir Tiridates qu'il eust souuenance de son ayeul Phraates, & de Cesar, qui l'auoit nourry & esleué: qui estoient deux choses à priser: enhortant aussi les autres qu'ils obeissent à leur Roy, eussent les Romains en reuerence, & qu'un chacun d'eux gardast son honneur & sa foy. Cefait, Vitellius sen retourna en Syrie avec les legions.

J'ay parlé conioinctement de ces choses faites en deux annees, à fin que mon esprit prist quelque repos des maux & facheries domesticques: car Tibere (iaçoit ce qu'il y eust ja trois ans que Seianus estoit mort) ne se moderoit ny pour le temps, ny par prieres, ny par satieté: ains punissoit les crimes incertains & ja abolis, comme les tres-enormes, & fraichement commis. Fulcinius Trio espouuété de cecy, & ne pouuant porter l'accusation que de bref s'alloit faite contre luy, composa par ses dernieres tables plusieurs

*Fulcinius
Trio.*

seurs choses griéues & picquantes à l'encontre de Macro, & des principaux affranchiz de Tibere: disant de Tibere qu'à cause de sa vieillesse il n'auoit point l'entendement bien ferme ny rassis: & luy reprochant sa continuelle absence pour exil. Et comme ces choses eussent esté cachees par les heritiers, Tibere commanda qu'elles fussent recitees deuant tout le monde, voulant monstrier la patience qu'il auoit de la liberté d'autrui, ou bien faisant peu de cõte de son infamie & deshonneur: ou aussi pour ce queluy ayans les meschancetez de Seianus long temps esté incogneuës, il vouloit lors ses propos estre diuulguez, en quelque maniere que ce fust, & auoir cognoissance de la verité (à la cognoissance de laquelle flatterie n'üst & empesche beaucoup) à tout le moins par les iniures qui seroient dittes contre luy.

En ces mesmes iours estant Grauius Martianus Senateur accusé de Maïesté par C. Gracchus, le tua de sa main. Et Tatiüs Gratianus qui autresfois auoit esté Preteur, par la mesme løy fut condamné au dernier supplice. Les fins de Trebellienus Rufus, & Sex. Pacionianus ne furent gueres dissemblables: car Trebellienus l'occist de sa main, & Pacionianus fut estranglé en la prison, pour y auoir composé quelques vers au desauantage du Prince. Tibere ne receuoit point lors ces nouuelles par messages de loing, ny estant separé d'Italie par la mer qui estoit entre-deux: ains assez pres de Rome, tellement que dès le iour mesmes ou le lendemain il pouuoit rendre responce aux

*Granius
Martianus.*

*Tatiüs
Gratianus.
Treb. Rufus.
Sex.
Pacionianus.*

LE V. LIVRE DES ANNALES

Consuls, comme s'il eust peuveoir du lieu où il estoit, les mains des bourreaux, & les maisons regorgeantes & pleines de sang.

*Poppens
Sabinus.*

Sur la fin de ceste année, Poppens Sabinus alla de vie à trespas. Il estoit yssu d'assez petite race, mais par l'amitié & faueur des Princes auoit esté fait Consul. Il auoit aussi triomphé, & gouuerné les plus grâdes Provinces par l'espace de vingt quatre ans, non point que il eust quelque chose en luy plus que les autres, mais pour ce qu'il estoit suffisant pour tels affaires, & rien plus.

*L'an 22.
de Tebere.*

L'année suiuaute Q. Plautius & Sext. Papinius furent faits Consuls. En cest an l'on ne trouua estrange ou cruel, qu'eux & L. Aruseius eussent esté

*L. Aru-
seius*

mis à mort, pour l'accoustumance que ja on auoit de veoir telles meschancetez. Mais bien l'on festonna

*Vibulen-
agrippa.*

fort de ce que Vibulenus Agrippa, ainsi que ses accusateurs acheuoient leur accusation, ayant en plain Senat tiré du poison de son sein, & iceluy auallé, il fut neantmoins pris par les sergens & licteurs (encore qu'il se fust laissé cheoir, & fust prest à rendre l'ame) & hastiuemēt mené en prison: ou tout mort qu'il estoit, on luy serra le gosier avec la corde. Mesmes le nom de

Tigranes.

Roy ne peut sauuer Tigranes autresfois Roy d'Arménie (& lors accusé) qu'il n'eust les mesmes peines & supplices que les simples citoyens.

*C. Galba.
Blesiens.*

Mais C. Galba autresfois Consul, & les deux Blesiens moururent de mort volontaire: Galba pour ce qu'il luy fut deffendu par les facheuses lettres du Prince, de tirer au sort pour la Prouince: & les Blesiens pour ce

pource que les prestres qui leur auoient esté destinees lors que leur maison estoit encor entiere, leur furēt differees apres qu'elle fut renuersee, & pour lors Tibere les donna à d'autres, comme si personne n'eust resté de ceste maison, & eust esté vuyde. Ce qu'ils cogneurent estre signe de leur mort, au moyen de quoy l'executerēt eux mesmes.

Aussi Emilia Lepida (laquelle j'ay dit auoir esté mariee avec le ieune Drusus, & auoir pourfuyui son mary de plusieurs crimes) iagoit ce qu'elle fust meschante & detestable, toutesfois demouroit impunie tant que son pere Lepidus vesquit. Depuis elle fut encusée par les delateurs d'auoir commis adultere avec vn sien serf: ce qui estoit tout asseuré. Parquoy laissant là toute defense, elle se delibera de mourir.

*Emilia
Lepida.*

Au mesme temps les Cites nation de Cappadocie, subiette à Archelaus, pource qu'ils estoient contrains de bailler leurs denombrements, & payer les tribuz selon nostre mode, se retirerent à la cyme du mont Taurus, & par l'assiette de ce lieu se defendoient contre l'armee foible & peu belliqueuse de ce Roy, iusques à ce que M. Trebellius Ambassadeur y estant enuoyé par Vitellius avec quatre mil legionaires, & quelques auxiliaires d'eslite, enuironna d'engins & instrumens de guerre deux montagnes que ces Barbares auoient occupees (la plus petire s'appelle Cadra, & l'autre Dauara) & les contrainit à eux rendre: les vns (sçauoir ceux qui oserent sortir) par armes, & les autres par faute d'èue.

*Cites, ou
Clites.*

*M. Tre-
bellius.*

*Cadra,
Dauara.*

Mais Tiridates, à ce luy aydans volontairement les Parthes, retourna à Nicephorie, Anthemusiade, & au-

Tiridates

LE V. LIVRE DES ANNALES

clesiens.
 tres villes lesquelles situees en Macedoine, vsurpent toutesfois noms Grecs. Pareillement recouura Hale & Artemite, villes de Parthe, se resiouyflans les Parthes à qui mieux mieux : pource qu'ils auoient Artabanus en hayne pour sa cruauté, & pour auoir esté nourry entre les Scytes: & esperans que Tiridates auroit le courage courtoys & debonnaire, pour auoir ainsi esté institué des Romains. Les Seleuciens vsèrent de grande flatterie. Ceste ville est fort puissante, bien enuironnee de murailles, & n'est corrompue des coustumes Barbares, mais retient celles de son fondateur Seleucus. Or les Seleuciens ont accoustumé d'en choisir trois cens, soit pour leur richesse ou sagesse, & d'iceux font comme vn Senat. Le peuple ne laisse pourtant à retenir son autorité: tellement que toutes & quantes fois qu'ils s'accordent entre eux, ils ne craignent pas beaucoup les Parthes. Mais quand ils viennent à entrer en discord, & que chacun de sa part va chercher secours contre emuleurs: celui qui est appelé pour l'une des parties, se renforce & fortifie contre l'une & contre l'autre. Cela estoit nagueres aduenü durant le regne d'Artabanus: lequel suyuant ce que luy estoit plus profitable, mist le peuple sous la puissance des plus apparens: car l'autorité du peuple approche plus de la liberté, & la domination de peu de gens s'accorde plus au vouloir & affection des Roys. Or quand Tiridates arriua entre eux, ils l'honorèrent des honneurs qu'on faisoit anciennement aux Roys, & de ceux qui nouuellement & en plus grande abondance auoient esté inuentez: & disoient plusieurs vilennies contre Artabanus, allegans que bien qu'il fust de la lignee des Ar-
faci-

facides, du costé maternel : toutefois quant au reste il forlignoit. Ainsi Tiridates remist le gouuernement entre les mains du peuple. Tost apres comme il deliberaست du iour auquel il deuoit se faire couronner & prendre les solennitez du Royaume, il receut lettres de Phraates & de Hiero, qui auoient la charge des deux plus puissantes prefectures, par lesquelles ils le prioient d'attendre encor quelque peu de temps. Et fut arresté qu'on attendroit ces grands personnages. Ce pendant il se retira à Ctesiphon ville capitale du Royaume. Mais voyant que de iour en iour ils delayoient, Surena en la presence de plusieurs qui approuuoient cest acte, lia le chef de Tiridates à la maniere du pays de l'enseigne Royale. Et si deslors il fut entré dedans le Royaume, & és autres pays, sans point de faute la doute & difficulté de ceux qui faisoient les longs, eust esté opprimee, & tous se fussent accordez à vn seul. Mais seiournant en vn chasteau, auquel Artabanus auoit retiré ses richesses & ses concubines, il leur donna loisir d'eux repentir de leur promesse & conuention : car Phraates, & Hiero, & autres qui attendans que le iour fust prefix, n'auoient assisté au couronnement, aucuns par crainte, & les autres pour l'enuie qu'ils portoient à Abdagasés, (qui seul estoit en credit, & iouyssoit de ce nouveau Roy) se tournerent du party d'Artabanus, lequel fut trouué en Hyrcanie tout souillé, & mal en ordre, & viuant de ce qu'il pouuoit tuer avec son arc. Au commencement il fut estonné, craignant qu'on luy brast quelque tróperie: mais apres qu'on luy eut iuré que l'on venoit pour le remettre en son royaume, il commença à elleuer

LE V. LIVRE DES ANNALES

son courage, & demander qu'elle soudaine mutation il y auoit eüe. Lors Hiero commença à blasmer la ieunesse de Tiridates, disant que le royaume n'estoit entre les mains d'un des Arsacides, ains que cest homme de peu d'effet, & nourry delicatement entre les estrangers, en auoit seulement le nom: au reste que la force & puissance estoit en la maison d'Abdagases. Cest homme accoustumé de regner, sentit incontinent que ceux qui ont esté deceuz en leur amitié, hayēt aussi sans feinte ou dissimulation. Parquoy ne faisant plus de seiour qu'il luy estoit besoin pour amasser secours des Scythes, marcha en grande diligence preuenant les ruses de ses ennemis, & la repentance que pourroient auoir ses amis. Mesmes n'auoit nettoyé l'ordure qu'il auoit autour de son corps, à fin de destourner le peuple par la compassion qu'il auroit de luy. Il ne laissa en arriere ny fraudes, ny prieres, ny autres choses pour gagner ceux qui estoient en suspens, & pour consermer ceux qui estoient prompts & appareillez pour luy. Et ia avec grosse armee approchoit de Seleucie, quand Tiridates estonné de la renommee & de la personne d'Artabanus, estoit en grande doute s'il luy deuoit aller au deuant, ou bien prolonger & retarder la bataille. Ceux qui vouloient qu'on luy donnast la bataille, & ausquels plaisoient les choses hastiuemēt excecutees, remonstroient que les ennemis estoient espars, las & rompus du long chemin: & mesmes qu'ils n'estoient encor bien consermez en l'obeyssance d'Artabanus, & que n'agueres ils auoient esté trahistres & ennemis de celuy le quel maintenant ils soustenoient. Mais Abdagases estoit d'opinion qu'il falloit retourner
en

en Mesopotamie, à fin qu'à cause de la riuere qui seroit entre deux, ils eussent loisir d'appeller les Armeniens, Emiliens, & autres de là derriere: & qu'estant leur armee augmentee du secours des alliez, & de celuy que leur enuoyeroit le capitaine des Romains, ils peussent à moins de danger tenter la fortune. Ceste opinion l'emporta, car l'autorité d'Abdagases estoit fort grande, & n'estoit Tiridates fort expérimenté aux dâgers. Mais sous vmbre de fuyr chascun se retira: & ayans les Arabes commencé, les autres se retirerent en leurs maisons, ou au camp d'Artabanus, ou ils demourerent iusques à ce que Tiridates retourné en Syrie avec peu de gens, les deschargea tous du blasme de trahison.

En la mesme annee y eut vn grand feu à Rome, qui brussa la partie du Cirque qui est contigue du mont Auentin, & mesmes iceluy Auentin. Mais Tibere tourna ce dommage à sa gloire, r'emboursant les propriétaires des maisons du pris qu'elles pouuoient valloir. Il y eut mille fois sesterces employees en ceste munificence & liberalité: ce que le peuple trouua meilleur d'autant qu'il n'auoit accoustumé de beaucoup despendre autour de ses bastimens priuez. Mesmes n'auoit iamais fait que deux edifices publiques, sçauoir, vn temple à Auguste, & l'eschauffaut du Theatre, lequel acheué il ne dedia point, ou pource qu'il n'estoit point ambitieux, ou à cause de sa vieillesse. Les quatre gendres de Tibere, Cn. Domitius, Cassius Longinus, M. Vicinius, & Rubellius Blandus, furent deputez pour estimer le dommage que pouuoit auoir receu vn chacun: & eurent pour adioint

*Ce sont
deux mil.
liens cinq
cens mil
esuz.*

*Cn. Domitius.
Cassius
Longinus.
M. Vicinius.
Rubellius Blandus.*

LE V. LIVRE DES ANNALES

P. Petronius. P. Petronius, qui fut nommé par les Consuls. Ainsi l'on delibera des honneurs au Prince, selon que chacun pour son esprit les pouuoit inuenter: & ne sçayt on de ces honneurs lesquels il receut ou refusa, pource que sa mort fut prochaine.

L'an 23. et dernier de Tibere. Puissance de Macro. Car incontinent apres, les derniers Consuls du temps de Tibere, c'est à sçauoir Cn. Acerronius & C. Pontius comencerent leur magistrat, estant Macro ia deuenue en trop grande puissance, lequel taschoit de plus en plus à s'entretenir en la grace de C. Cesar, iagoit ce que iamais il n'en eust esté paresseux. Et apres la mort de Claudia (laquelle i'ay dit auoir esté mariee avec iceluy C. Cesar) luy enuoyoit sa femme Ennia, luy persuadant de l'attirer à son amour, & luy faire promettre mariage.

Or C. Cesar ne refusoit rien, & promettoit tout ce qu'on luy demandoit, apres qu'il seroit venu à l'Empire: car iagoit ce qu'il fust cholere, & facile à esmouuoir, toutesfois il auoit appris au sein de son ayeul à dissimuler, & vser de faux semblant. Le Prince cognoissoit biē cela: au moyen dequoy fut en doute à qui de ses neueux il laisseroit la Republique. L'un desquels estat fils de Drusus, luy estoit beaucoup plus prochain & de sang & d'amytie: toutesfois il n'estoit encor hors d'enfance. Et le fils de Germanicus estoit en la force de sa ieunesse, & fort bien voulu du peuple: qui estoit cause de la haine & mauuais vouloir que luy portoit son ayeul.

Claudius Cesar. Aussi comme il delibera de Claudius (pource qu'il estoit d'age assez meur, & aymoient les bonnes sciences) il en fut destourné, pource qu'il n'auoit pas le cerueau bien rassis. Au contraire s'il cherchoit vn successeur hors de

de sa maison, il craignoit que le nom des Césars ne fust tourné à iniure & contumelie: car il n'estoit point tant foucieux d'acquérir la grace de ceux de son temps, qu'àbitieux enuers la posterité.

Incontinent apres estant douteux en son esprit, & ayant le corps las & trauaillé, laissa aux destinees ceste deliberation, de laquelle il ne se sentoit suffisant, ayant toutesfois tenu auparauint quelques propos par lesquels l'on pouuoit bien entédre qu'il preuoyoit les choses futures: car il reprocha apertement à Macro qu'il auoit abádóné l'occident pour se tourner deuers l'Oriēt.

Et comme sur quelque propos C. César se mocquast de L. Sylla, il luy predist qu'ayant tous les vices de Sylla, il n'auroit pas vne de ses vertus. Ce dit, avec plusieurs larmes va embrasser le plus ieune de ses neveux: & comme l'aurre le regardast furieusement: Tu tueras (luy dist il) cestuy cy, & vn autre t'occira.

C'est à dire qu'il auoit laiffé le vieil Prince pour se tourner deuers le ieune.

Or combien que sa maladie se rengregeast, ne laissoit rien toutesfois de ses paillardises accoustumees: contrefaisant du fort en endurant: & auoit coustume de se-mocquer de l'art des medecins, & de ceux lesquels apres-trente ans auoient besoin de conseil d'autrui, pour entendre ce qui estoit nuisible ou profitable à leur corps.

Ce temps pendant à Rome l'on voyoit ia vn commencement des meurdres qui se commettroient apres la mort de Tibere. Lelius Balbus auoit accusé de maiesté Acutia autrefois femme de P. Vitellius, laquelle condamnée, comme on decernast vn pris à l'accusateur Iunius Otho Tribú du peuple, s'y vint opposer. Au moyē dequoy sourdint entre eux deux vne hayne, & fut Otho

Lelius Balbus. Acutia. Iunius Otho.

LE V. LIVRE DES ANNALES

Albucilla enuoyé en Exil. Depuis Albucilla, fort renommee pour s'estre abandonnee à plusieurs amoureux, & laquelle auoit esté autrefois mariee avec Satrius Secundus (qui auoit descouuert la coniuration) fut accusée d'impieté enuers le Prince: & avec elle Cn. Domitius, Vibius Marfus, & L. Aruntius, comme coupable de ce cas, & aduulteres d'elle. J'ay parlé cy dessus de la noblesse de Cn. Domitius. Marfus aussi estoit de race honoree de toute ancienneté, & excellent en ses études. Les memoires & & breuets enuoyez au Senat monstroient que Macro auoit presidé à l'interrogation des tesmoins, & à la question des seruiteurs: & ne voyoit l'on par les lettres de Tibere qu'il eust aucune mauuaise suspicion d'eux, ou pource qu'il estoit debile, ou paraenture ignorant de cecy: & y auoit plusieurs choses feintes & supposees pour les inimitiez toutes vulgaires qui estoient entre Macro & Aruntius. Doncques Domitius ainsi qu'il premeditoit sa defence, & Marfus ayant deliberé de mourir de faim, prolongerent leur vie. Mais comme les amis d'Aruntius l'enhortassent d'attendre & differer sa mort, il leur respondit que toutes choses n'estoient indifferement bien seantes à vn chacun, & que de sa part il auoit assez vecu: & ne se repentoit d'autre chose, sinon qu'il auoit prolongé sa vieillesse chagrine & soucieuse entre tant de moqueries & dangers, ayant esté auparauant mal voulu de Seianus, maintenât de Macro, & tousiours de quelqu'un des plus puissans: non point par sa faute, mais pource qu'il ne pouuoit souffrir leurs meschancetez. Certes (disoit-il) il sera bien possible de se garder durant les briebs & derniers iours de ce prince: mais

com-

comment sera il possible de se sauuer de la ieunesse de celuy qui viendra apres? Est il possible que Tibere apres si longue experience des choses ait esté ainsi mué & changé par la force de la domination, & que C. Cesar estant à peine fortý d'enfance, ignorant de toutes choses, & nourry és plus meschantes, preigne la meilleure voye estant conduict par Macro^s lequel esleu comme le plus meschant pour opprimer Seianus, a tourmenté la Republique par plus de meschâcetez? Je preuoy (disoit il) vne seruitude bien plus rigoureuse: & pource ie me veux despescher des choses passees, & de celles qui sont de brief à aduenir. Cela disant, comme s'il eust esté diuin ou Prophete, se couppa les veines. Les choses qui suyront cy apres, monstreront qu'Aruntius ne feit iamais mieux que de se faire mourir.

*Predictio
d'Aruntius*

Albucilla s'estant blessée d'un coup qui n'eut point d'effect, fut portée en prison. Grasidius Sacerdos autrefois Preteur, & Pontius Fregellanus, ministres des paillardises d'Albucilla, furent condamnez, sçauoir Grasidius à estre confiné en vne isle, & Fregellanus à estre desmis du Senat. Les mesmes peines furent ordonnées à Lelius Balbus, dequoy les iuges se reisiouyssoient, pource que cest homme vsoit de son eloquence en toute cruauté, & se monstroit fort prompt & diligent contre les innocens.

*Grasidius
Sacerdos,
Pontius
Fregellanus.*

*Lelius
Balbus.*

En ces mesmes iours Sex. Papinius yssu de famille Consulaire, esleut vne mort subite qui estoit laide & vilaine, precipitant son corps du hault en bas. L'on mettoit à sus à sa mere qu'elle en auoit esté cause,

Sex. Papinius.

LE V. LIVRE DES ANNALES

pource qu'estant de long temps repudiee de son mary, elle auoit par ses flateries & superfluitez mis en teste à ce ieune homme de faire choses desquelles il ne se pouuoit sauuer sinon par sa mort. Estant donc accusé au Senat, iaçoit ce qu'elle se iettast aux pieds des Senateurs, & remonstrast longuement son dueil commun, & comme en tels cas les femmes ont le courage beaucoup plus infirme & imbecille, & plusieurs autres choses tristes & fort pitoyables concernans la mesme douleur: toutes-fois elle ne peut tant faire qu'elle ne fust bannie de Rome pour dix ans, & iusques à ce que son fils puisné eust passé l'instabilité de sa ieunesse.

*Dis-
simu-
lation de
Tibere.*

Or ia le corps & les forces de Tibere commençoient à le laisser: toutes-fois sa dissimulation ne l'abandonnoit point. Il auoit la mesme force de courage, & vehemence au parler, & au regard; mesmes par vne gayeté contrainte & affectee, vouloit cacher la manifeste defaillance & diminution de ses forces: & ayant par plusieurs fois changé de place, finablement s'arresta au promontoire de Misene en vne mestairie qui auoit autrefois esté à L. Lucullus: & là on cogneut qu'il approchoit de sa fin, par la maniere qui s'ensuit. Il y auoit vn medecin excellent en son art, nommé Charicles, lequel n'auoit point accoustumé de gouuerner le Prince en ses maladies, toutes-fois il luy aydoit de son conseil. Cestuy faignât vouloir aller quelque part à ses affaires, & embrassant la main Tibere sous ombre de deuoir & honneur, vint à luy taster le poux. Mais il ne sceut tant faire que Tibere ne s'en aperceust: car apres (l'on ne sçait s'il s'en sentoit offense, & que pource il en dissimulast d'auantage son

*Charicles
medecin.*

cour-

courroux) il feit appareiller des viandes plus que les autres fois, & s'assit à table outre sa coustume, comme s'il eust fait cela pour l'honneur de son amy qui se departoit d'auec luy. Toutesfois Charicles afferma à Macro que l'esprit luy defailloit, & qu'il ne pouuoit viure plus de deux iours. Depuis cecy les propos commencerent entre ceux qui estoient là presens, & despeschoit on mesfagers vers les Ambassadeurs & vers les armées.

Le dixseptiesme des Calendes d'Auril on le tint pour mort, pource que plus il ne respiroit. Et ia C. Cesar sortoit pour faire l'entree en son Empire, & venoient plusieurs gens au deuant pour luy gratifier, quand soudainement il fut aduertý que Tibere auoit recouuert la parole, & la veuë, & qu'il appelloit gens pour luy donner de la viande, à fin de luy faire reuenir le cœur. Lors vous ne veistes iamais gens plus estonnez : ils s'escartoient çà & là, & faignoient tous d'estre tristes, ou ignorans de tout cecy. C. Cesar pensif & taciturne, au lieu de sa haute esperance, n'attendoit que sa mort. Mais Macro n'estant aucunement estonné, commanda qu'on estouffast ce vieillard à force de robbes & de couuerture, & que chacun se retirast d'aupres de la porte.

Ainsi mourut Tibere estant aagé de soixante & dix-huit ans. Il fut fils de Neró, & extrait de la race des Claudiens des deux costez: iagoit ce que sa mere ayt esté adoptee en la famille des Liuiens, & depuis en la famille des Iules. En sa ieunesse il eut diuerses fortunes: car estant banny il suyuit son pere qui estoit proscript. Depuis estant entré en la maison d'Auguste comme fils de sa femme: il eut plusieurs enuieux qui le tormenterēt tant

*Mort de
Tibere.
Race de
Tibere.*

*Proscript
c'est un
homme,
la vie du*

LE V. LIVRE DES ANNALES

*quel est
abandon-
née au
premier
qui le
suera:*

*Meurs de
Tibere.*

que Marcellus & Agrippa, Caius & Iulius Césars vesquirent. Pareillement son frere Drusus estoit plus que luy aymé du peuple. Mais il vesquit encor moins asseuré apres qu'il eut espousé Iulia: & fut contraint d'édurer l'impudicité de sa femme, ou de s'abséter. Depuis retourné derhodes demeura l'espace de douze ans en la maison du Prince, laquelle estoit vuyde d'enfans, & tost apres obtint la souveraineté de la Republique Romaine par l'espace de vingt & trois ans. Qui plus est, ses meurs & maniere de faire furent diuerses, & se changerent selon les temps. Il entretint vne vie honorable, & eut bon bruit tant qu'il fut priué, ou eut charges & gouuernemens dessous Auguste. Il fut secret & cauteleux à contrefaire le vertueux, tant que Germanicus & Drusus vesquirent. Depuis tant que sa mere fut enuie, il fut entremeslé de bien & de mal. Tant qu'il ayma ou craignit Seianus, il fut detestable en cruauté: toutesfois secret en ses paillardises. Finalement s'abandonna à toute vilennie & meschanceté, apres qu'ayant despouillé toute honte & crainte, il commença à se gouuerner selon son esprit & fantasie.

FIN DV CINQVIESME LIVRE
DES ANNALES DE P. CORNILE TACITE
CHEVALIER ROMAIN.



XI. XII. XIII. XIIIII. XV.

ET SEIZIESME LIVRES

des Annalles de P. Cornille Tacite
cheualier Romain, nouvelle-
ment mis en François.


A PARIS,

Pour Abel l'Angelier, tenant sa boutique au premier
pillier de la grand' salle du Palais.

M. D. LXXXI

AVEC PRIVILEGE DV ROY.







LE TRANSLATEVR

AV LECTEUR.

AN T de gens ont le bruit de mettre en François les Annales & Histoires de Tactite, & leur travail est attendu de si grande affection, que iamais il ne sera publié assez tost, au gré de ceux qui ne les peuuent entendre en son vray langage. C'est pourquoy aiant retrouué six de ses liures, long temps à par moy trāslatez, ie ne les ay plus voulu tenir serrez en mon estude, esperant donner enuie à quelqu'autre plus hardy que moy, de communiquer à la France tout le reste de cet auteur. Je les eusse encores volontiers accompagnez de cinq liures ladis imprimez en François (aucuns desquels ont aussi esté par moy ou tourneZ ou corrigez) & de tout le reste qui suit, que i'ay semblablement mis en ceste langue: n'eust esté que l'ancienne translation se trouue fautive en plusieurs endroits; pour n'auoir esté faite sus des exemplaires assez corrects: & que ie n'ay pas entierement poli comme ie desire, les cinq ou six liures qui restent soient des Annales, ou des Histoires, ainsi que les voudrez baptizer. Outre cela i'ay pensé qu'il n'y auroit pas grand interest, de publier ceste partie toute seule, puis qu'aussi bien la barbare cruauté du temps & de l'ignorance, l'a retranchée des deux autres: avec telle solution de continuié, (pour parler comme les Chirurgiens) qu'il n'y a si

EPISTRE.

expérimenté d'entre eux qui puisse les rassembler, sans y laisser venue par trop laide cicatrice. Quant à moy ayant voué tout mon travail au public, & principalement des hommes d'honneur, qui se trouueront n'auoir aucune cognoissance de la langue Romaine, i'ay estimé que cecy pourroit tellement quellement appaiser leur ardent desir: & par sa malle façon estre cause de faire sortir le reste, de quelque part que ce puisse estre. Vous asseurant ce pendant, que ceux à qui i'ay communiqué ce que maintenant ie vous baille de nouveau, & les quels ne sont pas ne flatteurs, ne ignorans de la langue Latine: l'ont trouué assez passable & approchant du sens de l'auteur. Car qui est cestuy-là si hardi, ou plustost temeraire, qui s'ose promettre non pas représenter, mais approcher de la grauité & moileuse briefueté de Tacite. Lequel ie ne pense point auoir esté si mal accoustre, en la guerre que luy & tant d'autres excellēs Grecs & Latins, ont eue contre la Barbarie, sinon pource qu'estant redouté des ignorans, on l'a tenu d'autant plus estroictement enfermé parmy la poudre; ou il est presque du tout pourry. Si est-ce que tel que nous l'auons (par maniere de dire) sans bras, sans iambes, & ulceré en plusieurs endroits, vous le trouuerez digne d'auoir lieu entre les grans Conseillers d'estat. Qui est la cause pour laquelle à mon iugement, il y a moyen de s'aider de chacune de ses trois restes. Ioinct aussi que ie ne cuide pas qu'une troisieme, & quatriesme translation de mes pareils, soit suffisante pour monstres les forces, d'un auteur plain de sentences si briefues & si propres: lequel pour franchement parler, non pas moy (que l'on dira le faire pour gagner le deuant d'une excuse) mais tous hommes de grand sçauoir, estiment impossible de pouuoir représenter en Francois. Pourquoi donc (dira quelqu'un) es tu monté si haut, pour si laidement

te pre-

te precipiter? Assure toy (lecteur) que ie n'ay encores tant perdu d'esprit, que quand ie fis l'entreprise, ie presumasse en venir à chef mieux que nul autre : mais ayant desir d'en apprendre vne partie, & m'en seruir à quelque besoing, i'aduisay que c'estoit le moyen de tirer au but ou ie tendois : ne pensant rien moins qu'à le publier, ny en cela plaire à autre qu'à moy. Iusques à ce que vaincu des prieres, de ceux qui s'en pensoient seruir (par faulte d'autre comme ie croy) i'en ay laché au vent vne partie à fin de les contenter. Et pource ie prie ceux qui entendent bien la langue Latine, ne mettre le nez icy dedans, puis que ie n'ay escrit pour eux : ou s'ils le font, ne vouloir iuger de l'œuvre entiere par plusieurs mots, qu'ils pourroient mieux & plus naïfvement tourner : ains eux mesmes essayer (pour un ou deux liures) ce tant penible & peu honorable travail. Lors s'ils ne m'excusent, ie les condamne (eu sur ce conseil à sages) d'acheuer le reste, ou plus tost entreprendre le total. A fin d'aquerir ceste gloire en vain tant souhaitée de plusieurs, d'auoir acheué ce que depuis xxxij. ans (que les cinq premiers liures furent publiez en nostre langue) à esté delaisé par impossibilité au iugement de nos François, & tellemēt poursuiuy en autre langue, que pas vne vulgaire ne se peut vanter, d'auoir atteint à ceste grandeur de stile incōparable & inimitable. Il y a donc grande apparence que les plus ruzez se garderent de sortir de l'ombrage de leurs estudes, pour endurer la tempeste des repreneurs, ou de ceux qui a tort & a droit, ne cessent de blasmer les translations : & qu'ils ne voudrōt y employer la peine, ou le temps qui est requis pour bien faire : & encores moins hazarder leur reputation au danger de si perilleux examen. De maniere qu'il te faudra passer, de ce qui est ia en lumiere (si ie ne continué à folier, ou quelque autre avec moy) plustost

qu'esperer aucun soulagement de ces grands, grands sçauans; qui aiment mieux estre cogneuz par leurs propres inuentions: ou gardent ce qu'ils ont fait comme vn secret ~~Et~~ particulier thesor. Ce neantmoins Plutarque, Herodian, Casar, Tite Liue, & autres tournez en François par des hommes meurs, leur ont acquis grande reputation de sçauoir: soulagé ceux qui m'entendoient assez les langues estrangeres: & donné plaisir à d'autres qui totalement les ignoroient. Voire si les plus doctes veulent confesser verité, ils peuuent leur auoir serui de Dictionnaires: quand aucuns par desdain, ou (s'ils sont plus modestes) pour trop longuement ne refuser à la queste d'un mot propre, ont recours à vn translateur: empruntans aussi orgueilleusement ce qui luy a cousté bien cher à trouuer, que feroit quelque riche seigneur les fleurs, ou fruits hastifs, du iardin de son petit voisin.

Je ne pensois plus auoir autre chose à te remonstrer, quand le Libraire m'a aduerti qu'il falloit partir Tacite en chapitres: pour satisfaire à la plus part de la ieunesse, si delicate qu'elle ne peut endurer le trauail d'une longue lecture: & conuenoit la retenir par telle nyaiserie. Qu'eusse-je fait? I'auoi lasché ma trāslation, i'estoi pressé de tenir ma promesse: finalement ma coppie estoit ia hors de ma puissance. Ha miserable Tacite, qui au sortir de mes mains, es tombé entre celles d'un aussi m'au-piteux Imprimeur. N'auoy-je assez temerairement fait, de te publier en François? Encores si ie me fusse adressé à vn autheur Grec, ie n'auois à craindre le chastiment que de vingt ou trente au plus, qui sont iuges competans de telles matieres. Mais d'autant que c'est vn Latin, i'ay peur d'estre happé de quelque magister. Que diront la dessus les hommes de sçauoir? Mais y prendront-il gardé? seront-ils si hors du sens que de lire Tacite en François: ou perdre de bonnes heures à si maigre passe-temps? Ne lairrôt-il pas iouer

aux noix:escrimer avec des bastons, & penader des cheuau-
mallets aux enfans? Car il n'ya guiere à dire entre ceux-cy, &
ceux qui ne sçachans lire que des translations, cuident par-
celles entendre la force de l'eloquence des auteurs premiers.
En quoy ils sont tous de mesme contentez, que ceux-là sont
saoullez, qui sans goustier les bonnes viandes, cuident
se repaistre de la fumee qui en sort: ou satendent de sentir l'o-
deur des roses, les voyant peintes. Fuyez donc vous qui sçau-
ez les langues Greque ou Latine, fuyez dis-ie les espineux halliers
d'une translation pareille à la mienne: & les laissez brouter à
ceux qui ont des leures propres à telles laiëtues. Toutesfois si
voulez amender mes fautes, i'acorde que me donniez cinq cens
coups de bec: sans d'auantage vous enquerir qui ie suis, ne de
mon nom: lequel tout expres i'ay teu, comme celuy qui le pre-
mier a condamné mon ouurage, & me tien caché pour en escou-
ter le iugement avec moins de honte, & en intention de corriger
ce qui sera besoing. Car ce liure est si profitable, que ie ne suis pas
deliberé s'il plaist à ceux pour qui ie l'ay publié, de le laisser im-
parfait ne me retirer (comme l'on dit communement) sus ma
perte: si ie ne voy meilleur & plus suffisant champion que
moy. En atendant lequel, & iusques à ce que sa diligence
ayt mieux appris nostre François à Tacite, oyez-le begaier ce
langage que ie luy ay enseigné.

FIN.



TABLE DES CHAPITRES DES

XI. XII. XIII. XIII. XV. ET

seiziesme liures des Annales de P.

Cornile Tacite, nouuellement
traduits en François.

L'VNZIESME LIVRE.

Accusation de Valere Asiatic, mort de Popee & du-
dit Asiatic chap. 1. fol. 1.

Les Petra Cheualiers Romains, accusez & rui-
nez pour un songe: discours pour & contre les Aduocats.
chap. 2. fo. 2.

Mithridates Roy d'Armenie recouure son royaume à la
faveur de l'Empereur Claude: guerres entre Gotarzes & Bar-
danes, pour le royaume de Parthe. chap. 111. fol. 4.

Jeux seculaires, l'Imperatrice Messaline amoureuse de Silius
Bestize de Claude. Inuention des caracteres pour escrire.
chap. 1111. fol. 6.

Les Cherusciens viennent à Rome demander Italus pour es-
tre leur Roy: & les aduentures que ce prince eut. chap. 5. fo. 8.

Les Cauciens conduits par Gannasc Caninefate, courans
la basse Germanie & riuage de la mer Gauloise, sont repoussez
par Corbulon Capitaine Romain. La seuer discipline dont le-
dit Corbulon vsou en ses armées chap. 6. fol. 9.

Enquoy les Capitaines Romains occupoient les soldats hors
la guerre: qui fut Curtius Ruffus. Constance de Gn. Nouius
Cheualier Romain. Creation de l'office de Questeur. ch. 7. fo. 10.

Les principaux seigneurs de la Gaule cheueluë faicts Senä-
teurs

teurs de Rome: & les raisons qui meurent l'Empereur à ce faire. Le moyen qu'il tint pour nettoyer le Senat des hommes viti-
cieux ou pauvres. chap. 8. fol. 12.

Folles amours de l'Imperatrice Messaline: & le mariage
d'elle & Silius. cha. 9. fol. 14.

Narcisse affranchy de Claude l'aduerit de ce mariage: &
l'achette dudit Empereur. chap. 10. fol. 16

Punitiō de Silius & autres ses complices, ou putiers de Mes-
saline: & la mort d'elle mesme. chap. 11. fol. 17.

LE DOVZIESME LIVRE.

La dispute des trois affranchis de Claude pour luy donner
une femme. Menees de Vitelius pour luy faire espouser Agrip-
pine. chap. 1. fol. 20.

Consulat de C. Pompee: & L. Veran, harengue de Vitelius
au Senat, pour faire trouuer bon le mariage des oncles & niep-
ces. Complexions d'Agrippine, mariage d'elle & de Claude,
mort de Sillan. chap. 2. fol. 21.

Fiançailles de Domice fils d'Agrippine avec Octaue fille de
Claude, Agrippine fait r'appeller d'exil Senecque: & la ruze
dont elle usa pour faire espouser à Domice son fils, Octaue fil-
le de l'Empereur. Les Parthes demandent au Senat Meherda-
tes pour estre leur Roy, le mesme Meherdates mené en Parthe
par Cassius lieutenant de Syrie. chap. 3. fo. 23.

Gotarzes Roy de Parthe ayant vaincu Meherdates, &
iceluy prins en bataille, luy fait couper le nez & oreilles. Mi-
thridates ayant usurpé le royaume de Bosphore en chasse Cotis
chap. 4. fo. 23.

Mithridates abandonné de Zorzines Roy des Soraques, se
rend à Eunones Roy des Adorfes: allié des Romains: & ayant
fait sa paix il vient à Rome. cha. 5. fol. 27.

T A B L E.

Consulat de C. Antistius & M. Silius, Claude adopte Domice fils d'Agrippine; laquelle donna aussi son nom à une vil le des Vbiens, aujourdhuy nommee Collongne. Les Cathes a- yans couru le pays des Romains sont tellement batus par L. Pomponne, qu'ils enuoyerent ostages à Rome. Vannius chassé de son royaume; se retire vers les Romains. ch.7.fol.39.

Ostorius gouverneur de la grand Bretagne, gaigne une ba- taille sur les Icenies, la Colonie de Calmalodun est edifiee, Ostorius vainc & prent en bataille Caraëtac Roy de Breta- gne, & l'enuoye à Rome, guerre des Romains contre les Silu- ces, mort d'Ostorius lieutenant general des Romains.

chap.8.fol.31.

Consulat de T. Claude, & Sergius Cornile Orphitus, Ne- ron fils d'Agrippine preferé à Britannic fils de Claude: & les aproches d'Agrippine pour paruenir à son intention.

chap.9.fol.36.

La guerre commencee entre les Romains & les Parthes : pour la meschanceté de Pharasmenes Roy des Hiberiens, & de Radamiste son fils.

ch.10.fol.37:

Consulat de Fauste Sille & Silius Othon: mort de Furius Scribonion. Arrest contre les Mathematiciens: discord de Cu- man & Fœlix gouverneurs de Iudee, guerre contre les Clites peuple de Cilicie: passetemps de combats de galleres & d'escri- meurs donnez sur le lac Fucin.

chap.11.fol.41.

Consulat de D. Iunius, mariage de Neron avec Octaue; mort de Statilie Taur tresnoble Seigneur de Rome. Origine de la iurisdiction des receueurs. Ceux de Co affranchis de subsi- des en faueur de Xenophon Medecin de Claude. Exemption de Byssance, & commodité de l'assiette de ladicte ville.

Chap.12.fol.44.

Con-

Consulat de *Asinius & Acilius*. Prodiges, occasion pourquoy *Agrippine* delibera faire mourir *Claude* son mari & *Domitie Lepide* sa cousine. Le medecin *Xenophon* empoisonne *Claude*, & la mort dudit Empereur. cha. 13. fol. 46.

LE TREIZIEME LIVRE.

Agrippine mere de *Neron* fait mourir *Iunius Silan* gentilhomme Romain & *Narcisse* affranchy: les obseques de l'Empereur *Claude*. Le beau commencement de l'Empire de *Neron*. chap. 1. fol. 49.

Preparatifs de *Neron* pour deffendre le royaume d'*Armenie* contre les *Parthes* & la reputation de *Corbulon*. ch. 11. fo. 51.

Consulat de *Neron & L. Antistius*. Continuation du bon gouvernement de *Neron*, & commencement de la haine qu'il print contre sa mere. cha. 3. fo. 53.

Neron fait empoisonner *Britannic* son frere & chasse de sa maison *Agrippine* sa mere. cha. 4. fo. 55.

De faueur d'elle mesme accusée à la suscitation de *Iunie Silane* de conspirer contre *Neron* son fils, Pugnition de ladite *Silane* & autres accusateurs, accusation de *Pallas & Burrus*.

Chap. 5. fo. 57.

Consulat de *C. Volusius & P. Scipion*, folies de *Neron* & commencement de sa desbauche, dispute contre & pour la liberte des affranchis, Paris Histrion déclaré de Franche condition, reglement de la iurisdiction d'aucuns magistrats de la ville de Rome. ch. 6. fo. 60.

Second Consulat de *Neron* avecques *L. Pison*. Quelles choses il faut escrire dans les Annales, Deffences aux magistrats & receueurs des provinces de faire des jeux pour le plaisir du peuple. cha. 7. fol. 63.

T A B L E.

Consulat troisieme de Neron avec Valere Messala. Liberalisé de Neron à l'endroit d'aucuns pauvres Seigneurs de noble maison: renouvellement de la guerre d'Armenie. Tiridates est contraint vuidier le royaume par la bõne conduite de Corbulon.
cha 8.fo. 64.

Corbulon ayant pris les chasteaux forts d'Armenie destruit Artaxate principale ville du pays.
chap. 9.fo. 67.

Suillius emputeur est confiné son arrogance. Octauius Tribun du Peuple par vn despit tue son amie.
chap. 10.fo. 69.

Qualitez de Sabine Popee femme d'Oton, qui par ses mignardises gaigna le cœur de Neron, tellement qu'il l'osta à son mary. confinement de Silla.
cha. 11.fo. 71.

Nerõ voulāt leuer 10^e les subsidies, est empesché de ce faire par le Senat. Reiglement contre les fermiers publics & autres ordonnances de police. Le lieutenant Aelius Gracilis empesché de faire vn canal, pour nauiger de la riuiere de Saone en celle de Moselle: & les Frisons voulant habiter le pays de Hollande, sont chassez par les Romains: feux merueilleux sortās de terre, estains à coups de pierre & de bastons & par des habillemens sales.
chap. 12. fol. 74.

LE QVATORZIEME LIVRE.

Neron abuse par Popee, conclud de faire mourir Agrippine sa mere & l'impudiccié de ladite Agrippine, pour maintenir sa grandeur.
chap. 1.

Anicet general des galleres de Mesene trouue l'inuention de faire perillier Agrippine dans la mer.
ch. 2.fo. 80.

Anicet fait tuer Agrippine.
chap. 3. fol. 82.

Estonnement & crainte de Neron apres la mort de sa mere: ses excuses au Senat avec la flaterie des Seigneurs & du peuple & son retour à Rome.
cha. 4.fo. 83.

Plaisirs & exercices de Neron: desbauche de la ieunesse Ro-

maine qu'il fit basteler et farcer. Luy mesme ioué sur l'echaffaut en plain Theatre: la compagnie des *Augustans*. chap. 5. fo. 85.

Sedition des habitans de *Nocerre* & de *Pompeies*: la plainte des *Cyreniens* contre *Strabon* commissaire. Le trespas de *Domice Affricain* & *M. Seruil*. chap. 6. fol. 87.

Ieux Grecs quinquennaux establis: en quel temps furent bastis à Rome les Theatres pour demeurer: & s'il est bon de faire ordinairement des ieux pour entretenir le peuple: le pris desdits ieux Grecs donné à *Neron*. chap. 7. fol. 88.

Bannissement de *Plaute*, & maladie de *Neron* estimee punition diuine. chap. 8. fo. 89.

Corbullen lieutenant general de *Neron*: conquist *Armenie*, en laquelle *Neron* enuoye *Triganes* pour en estre Roy.

chap. 9. fol. 90.

Tremblement de terre en la ville de *Laodicee*. Comme les Colonies se peuploient au temps passé. Et le reglement pour les appellations des iugemens du Senat. *Vibius Cresp*u condamné pour concussion. chap. 10. fo. 92.

Guerre en la grand' Bretagne, *Suetone Paulin* conquist l'isle *Mone* voisine dudit pays. L'auarice & cruauté des Romains: cause de faire rebeller les Bretons, avec les outrages faicts à la Royne *Boudicee*. Les presages qui aduindrent auant la destruction de *Camalodum*: & la deffaicte d'une legion Romaine.

chap. 11. fo. 93.

Les Bretons que conduisoit la Royne *Boudicee* vaincus en bataille par *Suetonius*. Le grand cœur de ladite Royne & sa mort. *Penius Posthume* se tué de despit. Et le credit que *Policlete* affranchy auoit aupres de *Neron*. cha. 12. fo. 96.

Domice Balbe Senateur, puny pour fausseté, avec autres ses complices. Et pourquoy quatre cens esclaves furent tous execu-

T A B L E.

tez. Tarquĩ Prisc cõdãné pour cõcussiõ, la descriptiõ du senat faite en Gaule, & la mort de Regulus hõme trefestimé. c. 3. fo. 98.

La liberté de Trasæa & pugnition d'aucuns qui auoyent cõposé libelles diffamatoires. Et de Veienton qnirvendoit les graces & faueurs de Neron ch. 14. fo. 101.

La mort de Burrus capitaine des gardes & quelles gens furẽt Ruffus & Tigellin ses successeurs, l'affoiblissement du credit de Seneque, & la harangue qu'il fit à Neron, pour estre deschargé de biens, avec la responce de l'Empereur. cha. 15. fo. 112.

Puissance de Tigelin, qui fut cause de faire tuer Plante & Silla. chap. 16. fol. 016.

Neron chasse sa femme Octauiæ & espouse Popæe. La faueur que le peuple portoit à ladite Octauiæ & les plaintes q̃ fit Popæe à Nerõ pour luy persuader de faire mourir Octauiæ. ch. 17. f. 108

Anicet à suscitation de Nerõ confesse faussement auoir eu la cõpagnie d'Octa. et la mort d'elle avec celle dudit Ani. c. 18. f. 109

LE QVINZIESME LIVRE.

Vologeses Roy de Parthe couronne son frere Tyridates Roy d'Armenie, lequel empesché d'en iouyr par Corbulon fut chassé de Tygrannocerte. ch. 1. fol. 111.

Petus successeur de Corbulon meine son armee au pays d'Armenie, & les mauuaises qualitez dudit Pet^o pour vn lieutenant general, le Roy Vologeses force le pas du mont Taurus & estoñnement de Petus. ch. 2. fo. 114.

Corbulõ part de Syrie pour secourir Pet^o assiegé, leq̃l ce pẽdant fait vn traité honteux avec le Roy Vologeses ch. 3. fo. 117.

Lascheté de Petus & de son armee. La diligence de Corbulõ pour deliurer Petus: le traité que Corbulon fit avec le Roy de Parthe. Ordonnances cõtre les faintes adoptiõs. cha. 4. fo. 118.

Trasæa est cause d'ordonner q̃ les magistrats enuoyez aux provinces ne seroiẽt poĩt remercier publiquemẽt, le Gymnase bruslé

T A B L E.

par le tōnerre & la ville de Pōpeies abatuë par tremblement de terre. ch. 5. fo. 120.

Cōsulat de Mēm̃ius Regul. & Virgini⁹ Ruffus: naiffāce de la fille de Neron & de Popee, flaterie du Senat enuers Neron, la mort de ceste fille. Neron r'enuoye les ambassadeurs de Parthe sans rien leur accorder faisant Corbulon lieutenant general de la guerre qu'il conuenoit auoir entr'eux. ch. 6. fo. 121.

Abouchement de Tiridates frere du Roy de Parthe & de Corbulō lieutenant general de Nerō, Tiridates vient au cāp des Romāis poser le diadēme Royal d'Arme. Nerō dōne le droit de bourgeoisie aux natiōs des Alpes voisines de la mer & separe la scēce des cheualiers d'avec celle du peuple dās le Theat. c. 7. f. 124

Consulat de C. Lucain, & M. Licin. Nerō chāte premiere-
mēt sus l'echaffaut du Theatre de Naples, Cheute dudit Theatre incōtinent apres sans faire mal à personne. Neron fait accuser Torquat, Sillā & sa mort. Nerō saint vouloir faire vn voyage en Egypte & ses excuses, banquet dessolu de Tigellin & mariage de Neron & Pithagoras. chap. 8. fo. 126.

La plus grād partie de la ville de Ro. bruslee par fortune ou malice de Nerō, quels quartiers furent bruslez. cha. 9. fo. 128.

Nerō bastit vne tres-sūptueuse maisō dās Rom. & vent faire cauer vne trāchee depuis le lac Lucrin iusq̃ dās le Tybre, L'ordre qui fut mis pour le restablissēmēt des maisons nouuellement edifiees à Rome, Nerō ayant fait croire q̃ les Chrestiens auoient mis le feu en la ville: les feit punir. chap. 10. fol. 130.

Neron leue des deniers de tous costez & pille les temples: perte de plusieurs vaisseaux en mer, prodiges diuers, &c. c. 11. f. 132

Consulat de Syllius. Nerna & Attic Vestin. la grande coniuration faicte contre Neron par plusieurs Seigneurs de Rome fauorisans L. Pison. cha. 12. fo. 133

Ordre de la coniuration, comme elle fut descouuerte par Mil.

T A B L E.

lich affranchy de Seuin: la constance de Epichare & la scheté d'aucuns seigneurs participans de la coniuratiō. cha. 13. fol. 136.

Continuation des procédures contre les defferez, Pison ne veut prendre les armes, nonobstant les remonstrances qui luy sont faictes, la mort de Pison dudit Lateran nommé Consul, de Senegue, & la constance d'iceluy. cha. 14. fol. 138.

Punitiō des gēs de guerre qui se trouuerēt de la cōiuratiō. Mort de Feni⁹ Ruffus prefect du pretoire. Cōstāce de Flaue Subri⁹ & Sulpice Affer & la sage respōce qu'ils firent à Neron. Mort de Vestin consul, encores qu'il ne fut de l'entreprise. ch. 15. fol. 142.

Mort de Lucain, Senecion, Quintian & de plusieurs autres seigneurs. Liberalité faicte par Neron aux soldats. Qui fut Nimphidius, flateries du Senat enuers Neron. ch. 16. fol. 144.

LE SEIZIEME LIVRE.

Neron croyant aux paroles de Cefel Bassus qui auoit songé d'auoir veu un thresor caché, despendit follement ce qu'il auoit. La mort dudit Bassus, & comme Neron entra sur la Scene du Theatre pour gaigner le pris du ieu de cistre, contraignant chacun d'assister aux ieux chap. 1. fol. 147.

Neron tuë Popee sa femme, d'un coup de pied qu'il luy donna par cholere. Cassius, Sillan & Lepide sont bannis, & depuis Syllā occis. Mort de L. Vetus, de sa mere, & de sa fille veufue de Plaute. cha. 2. fol. 149.

Mort d'Antei⁹s, d'Ostori⁹s, Scapula, & plusieurs autres seigneurs que Neron contraignit de se tuer par soupçon qu'il auoit d'eux, ou pour auoir leur bien.. cha. 3. fol. 153.

Cōstāte mort de C. Petroni⁹ & qūlle vie il menoit. c. 4. fol. 155

La haine de Nerō alencōtre de Trafea. Petus. ch. 5. fol. 156.


Accusation dudit Trafea & sa mort. ch. 6. fol. 159.

Accusation de Barea Soran. La miserable harengue de sa fille au Senat. Mort dudit Soran. chap. 7. fol. 160.



VNZIESME LIVRE

DES ANNALES DE P. COR-
NILE TACITE CHEVALIER Ro-
main des choses aduenues en l'empire
de Rome depuis la mort d'Auguste.



LE COMMENCEMENT DE CE
liure, ne se trouue point en
Latin, non-plus que les six,
sept, huit, neuf, & dixiesme
tous entiers: comprenás les
faits de l'empereur Caius Ca-
ligula, & le cōmencemēt de
l'empire de Claude, qui font
en tout le temps de dix Cō-
sulats ou annees: mais à fin
de ne faire vne entree si brusque que celle de ce liure,
qui a quasi le chef coupé: pour mieux entendre l'Au-
teur, il est à sçauoir qu'à Caius Caligula Empereur,
succeda Claude son oncle homme hebeté, se laissant
manier par ses varlets & sa femme Messaline: la plus
impudicque Princesse (voire putain) qu'il fut iamais.
Laquelle tant par avarice, que haine qu'elle portoit
à Asiatic, & Lolliia grande & noble dame Romaine,

XI. LIVRE DES ANNALES

delibera de les faire mourir, comme l'on peult veoir en Dion, & Suetone, ainsi que ie declareray aux passages necessaires. Pource que cest auteur qui est difficile, & encores mehaigné en plusieurs endroits & membres: a besoin d'estre secouru par quelque petit commentaire.

Accusation de Valere Asiatic, mort de Popee & dudit Asiatic. CHAPITRE PREMIER.



AR son opinion estoit, que Valere Asiatic par deux fois consul, auoit iadis esté son adultere, & beant semblablement apres les iardins qu'il acheta de Lucullus, (lesquels il esleuoit en bien grande magnificence) Suilius fut mis auant, pour les accuser l'un & l'autre. Sosibius gouverneur de Britannic estoit aussi de la partie: à fin que sous couleur de bien-vueillance il aduertist Claude: se donner garde des hommes riches & puissans ennemis des princes. Qu'Asiatic principal autheur du meutre de Caius Cesar, n'auoit eu crainte de l'aduouër en pleine assemblee du peuple Romain, & demander ouuertement l'honneur d'un tel forfait. Qu'ayant acquis pour cela un grand renom par la ville, le bruit s'espandoit iusques aux prouinces, qu'il s'apprestoient d'aller vers les garnisons de Germanie: pource qu'estant nay à Vienne, & appuyé de beaucoup de puissantes alliances, il pouuoit facilement esmouuoir les peuples de sa nation. Or Claude sans d'auantage s'enquerir, despescha

pescha Crespin capitaine des gardes de son palais, avec de vistes & disposez soldats: comme pour assoupir vne guerre, lequel trouuant Asiatic à Baie l'enleua, l'amenant lié & garrotté en la ville: ou sans luy donner moyen d'estre présenté au Senat, il fut ouy dans la chambre *de l'Empereur*, en la presence de Messaline. Là Suilius le chargeoit d'auoir practiqué les gens de guerre: lesquels par argent, & paillardises, il tenoit obliger pour executer toutes meschancetez. Puis il luy reprochoit l'adultere de Popee, & finalement l'impudicité de sa personne. Surquoy l'accusé ne se pouuant plus taire dict ces mots. Demande-le Suillius à tes enfans: ils confesseront que ie suis malfait. Apres cela entrant en ses deffenses il esmeut Claude extremement, & fit aussi venir les larmes à Messaline: laquelle sortant de la chambre pour les essuyer, admonnesta Vitellius ne laisser eschapper ce criminel: & de sa part elle se hastes pour ruiner Popee, attirant des gens qui par craincte & horreur d'une prison, la poussassent à choisir yne mort volontaire. Et ce tellement au desceu de Cesar, que peu de iours apres il demanda à son mary Scipion (mangeant lors avec luy) pourquoy il s'estoit assis sans sa femme: qu'il fit responce qu'elle estoit morte. Claude donc prenant aduis sur l'absolution d'Asiatic: Vitellius ayant conté en pleurant, l'ancienne amitié d'eux deux: & cōme ils auoient esté cōpagnons à la suite d'Anthonie mere du Prince: & puis courât par dessus les seruices qu'Asiatic auoit faits à la Republique: & nouuellement au voyage de la grand Bretagne: avec autres choses qui pou-

XI. LIVRE DES ANNALES

uoient seruir pour l'attirer à misericorde. Il luy permit par son aduis, choisir telle mort qu'il voudroit. En quoy il fut suiuy de Claude avecques parolles tendantes à mesme douceur. Depuis cela Asiatic estant conseillé par aucuns de ne plus manger, & se laisser mourir peu à peu, leur respondit; qu'il renonçoit à telle grace. Et ayant vsé de ses exercices accoustumez, laué son corps & souppé ioyeusement (apres auoir dict qu'il fut mort plus honnestement par la ruse & finesse de Tybere, ou par l'impetuosité de Caius, que la tromperie d'une femme, & l'impudicque bouche de Vitellius) il se fait couper les veines: ayant premierement veu le tas de bois (*sur lequel deuoit estre bruslé son corps mort*) & commandé le transporter en autre lieu: à fin que l'ombrage des arbres ne fut diminué par la chaleur du feu: tant il eut d'assurance, mesme au dernier point de sa vie.

*Les Petra Cheualiers Romains, accusez & ruinez pour
un songe, discours pour & contre les Aduocats.*

CHAPITRE II.



PRES cela, les Senateurs sont appellez: & Suilius poursuivant, adioustâ au rang des criminels, deux cheualiers Romains de grande estime, surnommez Petra. Or la cause de leur mort procéda de ce qu'ils auoient presté leur maison, aux entrêueues & assignations de Mnester & Popeo: Toutesfois on chargea l'un,

l'un comme si la nuit en reposant, il eust veu Claude couronné d'un chapeau de brins de bled, les espics tournez derriere: & predict ceste vision signifier cherté de bleds. Autres ont escrit que le chapeau par luy veu, estoit fait de bourgeons de vigne, ayas les fueilles blaffardes: & que l'interpretant il auoit dit cela monstrier la mort du prince, deuoir aduenir sur la fin d'Automne. Il n'y a aucune doute, que luy & son frere furent mis à mort, pour vn songe, quel qu'il peult estre. Quinze Sestertium,* avec les marques de Preteur, sont ordonnez par arrest du Senat à Crespin: Vitellius par son aduis, adiousta dix Sestertium* pour Sosibius: à cause qu'il seruoit de Precepteur à Britannic, & de Conseiller à Claude. Mais quand l'on demanda l'aduis à Scipion, il dict: puis que ie iuge & pense des fautes commises par Popee, ce que tous pensent: estimes aussi que i'en dy, ce que tous disent. Qui fut vn gentil moyen, pour sauuer l'amour portee à la femme, & la necessité d'opiner comme Senateur. Dés lors Suilius, se monstra ordinaire, & cruel accusateur des criminels: comme aussi firent d'autres qui suiuoient son audace. Car le Prince ayant euocqué à soy & entrepris toute la puissance & charge des loix, & Magistrats, donna matiere au brigandage: de sorte qu'il n'y auoit en la ville, marchandise publique de si bonne vente, que la desloyauté des Aduocats. Tellement que Samius, notable Cheualier Romain, ayant baillé à Suilius, quatre cens mil Nummes,* cognoissant depuis estre vendu par luy, se laissa tomber sur la poincte de son espee, en la maison mesme de

XI. LIVRE DES ANNALES

Suilius. Au moyen dequoy Caius Sillius nommé pour estre Consul (de la faueur & piteuse fin duquel ie parleray quand il sera temps) cōmençant le premier, les autres Senateurs se leuerēt: demandans auec grāde instance, l'entretienemēt de la loy Cincia: par laquelle il est deffendu d'ancienneté, que nul ait à prendre argēt ou presens, pour plaider vne cause. Mais d'autāt que ceux à qui l'on aprestoit ceste hôte faisoïēt bruit: Sillius contrariant à Suillius, s'efforça bien viuement pour la publication de la loy: allegant les exēples des anciens Orateurs, qui auoient pensē la renōmee qu'ils acquerroient enuers la posterité, deuoir estre le plus beau loyer de leur eloquence. Autrement que la princesse des arts, & bōnes sciences, seroit souillee, par seruices mechaniques: oultre ce que la loyauté ne demeure pas volontiers entiere quant on n'a autre but que le grād gain. Mais s'ils soustenoïēt les causes d'autrui sans aucū salaire, il y en auroit moins. Là ou main tenāt les rancunes, accusations, inimitiez, & outrages, se nourrissoient: à celle fin que tout ainsi que la multitude de des maladies augmente le gain des medecins: aussi la peste des plaids apporte de l'argent aux aduocats. Qu'ils se souuinssent de C. Asinius & Messala: & des plus nouueaux Aruntius & Eferuin: auancez aux plus hauts degrez d'honneur, par leur bōne vie, & entiere eloquence. Ces paroles ayans esté dites par le Consul nōmé, & approuuees des autres: On alloit dresser vn arrest du Senat par lequel tels aduocats estoïēt coupables de deniers mal pris. Quād Suilius & Cossutian, & autres qui ne craignoient pas le iugement (estant leur

faulte

faulte toute euidéte), mais voioiét la peine qu'on leur preparoit: enuirônerent Cefar, le priât n'estre point recherché pour les choses passées. Lequel leur ayât (sans parler) fait signe de la teste qu'il le vouloit bien: ils commencerét à dire: Qui estoit cestui-là plain de telle outrecuidance, d'oser esperer sa renommée deuoit estre éternelle: Que le beau parler, estoitvn secours appresté pour en vser cōmunemēt en toutes affaires qui se presentoient: à fin que par faute d'aduocats, aucun ne fut subiet à la merci des plus puissans & riches. Et neantmoins que l'eloquēce ne l'acqueroit pour neant. Car on en delaissoit les affaires de sa maison pour bender son esprit, & se rēdre soigneux aux negoces d'autrui. Que plusieurs passoiēt & gaignoiēt leur vie à la guerre, les autres à labourer la terre: Et toute fois aucun ne souhaittoit chose, de laquelle il n'eust preueu le fruit. Qu'Asinius & Messala, furent bien facilement remplis du butin venant des guerres qu'Antoine & Auguste eurent l'un contre l'autre. Et les Esernins, & Aruntes, heritiers de grandes & riches maisons, peurent fort aysement s'armer d'un grand courage. Mais qu'ils pouuoient promptement monstrier par exemple, pour quel grand & estrange pris, P. Claude, ou C. Curion, souloient haranguer deuant le peuple. Quant à eux ils estoient de mediocres Senateurs qui ne demandoient tirer de la Republicque, autres profits que ceux qui viennent de la paix. Que le simple peuple, talchoit bien de s'aduancer aux honneurs & changer de Robbe. Mais en ostant les recompenses & loyers des honnestes exercices:

XI. LIVRE DES ANNALES

Les mesmes exercices, se perdroient quant & quant: comme occupations peu honorables. Le prince pensant que leur dire, ne fut sans raison: arresta à dix Sesterrium, la somme d'argent, que l'on pourroit prendre: laquelle si aucuns surpassoient, ils estoient coupables comme de deniers mal pris.

Mitridates Roy d'Armenie recouure son Royaume à la faveur de l'empereur Claude: guerres entre Gotarzes & Bardanes, pour le royaume de Parthe.

CHAPITRE III.



EN VIRON ce temps, Mitridates (que ie vous ay dit auoir commandé aux Armeniens, & esté présenté à C. Cesar) retourna par le conseil de Claude en son royaume: fafleurant en la puissance de Pharasmanes. Cestui cy qui estoit Roy des Hiberiës, & frere dudit Mitridates luy donnoit aduis: que les Parthes estoient en discord, & la couronne en brâle: Mais que lon ne se dōnoit aucune peine des moindres affaires. Car durant plusieurs actes cruels de Gotarzes (qui auoit essayé de faire mourir son frere Artaban, sa femme & son fils, (dont les autres s'estoient effrayez) ils appellerent Bardanes: lequel comme prompt à executer de haultes entreprises, enuahit en deux iours trois mille stades * de pays: chasse Gotarzes tout estonné, & qui ne scauoit rien de sa venue: & sans marchander plus longuement, saisit les prochains gouuernemens:

mens : ne trouuant que les Seleuciens seuls, qui refusassent de luy obeir. Contre lesquels s'estant courroucé plus aigrement, que l'estat present de ses affaires ne requeroit (à cause qu'ils auoient aussi abandonné son pere) il alla s'opiniastres au siege d'une tresforte ville, bien assuree pour vne riuere qui la deffendoit : & garnie de bonnes murailles, & munitions necessaires. Ce pendant Gotarzes, renforcé de la puissance des Dahes, & Hircaniens, renouuelle la guerre : & Bardanes contrainst laisser pour l'heure le siege de Seleucie, vient camper deuant luy, en la pleine de Baetres. Alors estant la puissance de Leuant partie & bandee : pource qu'il estoit incertain de quel costé elle inclineroit, l'occasion & aduanture, d'occuper l'Armenie se presenta à Mitridates : qui employa l'effort des soldats Romains, à raser les chasteaux plus difficiles à prédre, pendant que l'armée des Hiberiens couroit & trauegeoit la campagne. Car les Armeniens ne firent aucune resistance, apres que le gouuerneur nommé Demonactes. (qui s'osa presenter à la bataille) eut esté mis en route. Cotis Roy de la petite Armenie, apporta quelque peu de retardement, s'estans tournez aucuns seigneurs de ce party. Mais il fut depuis retenu, par des lettres de Cesar, & toutes choses se rendirent, & vinrent à souhait à Mitridates : plus outrageux & rude qu'il ne falloit à vn Royaume nouuellement conquis. Or comme les Rois Parthes s'apprestoient à la bataille, ils traiterent tout soudain vn accord : congnouissans les embusches de leurs subiects & peuple, que Gotarzes auoit descouuertes à son frere. Et ayas

XI. LIVRE DES ANNALES

du commencement, fait difficulté de s'entrevoir: depuis touchans en la main l'un de l'autre: ils promirent sur les Autels des Dieux, chastier la trahison de leurs ennemis, & que pour leur regard ils s'entretiendroient en * amitié. Bardanes sembla pl⁹ suffisant pour demourer en possession du Royaume: & Gotarzes à fin d'oster toute ialouzie s'en alla demourer bien avant * en Hircanie. Au retour de Bardanes, Silencie se rendit sept ans apres sa rebellion: non sans le deshonneur des Parthes: desquels vne seule ville, festoit mocquée tant longuement. Apres cela, il se iecte sur les plus fortes prouinces, essayant de recouurer l'Armenie, si n'eust esté retenu par Vibius Marfus Gouverneur de Syrie qui le menaça de luy faire la guerre. Mais ce pendant Gotarzes se repentant d'auoir quicté le Royaume: & voyant que la noblesse (qui est plus subiecte durant la paix) le rappelloit: assemble des forces. On va au deuant de luy, iusquès sur la riuere Erinde: au passage de laquelle ayant esté longuement combattu, la victoire en demoura à Bardanes: lequel apres plusieurs batailles & rencontres heureuses, conquist toutes les nations d'entre ladicte riuere, & celle de Ginde; qui separe les Dahes, & Aries. Là fut arrestee sa bonne fortune: car nonobstant que les Parthes fussent victorieux, ils refusoient d'aller en guerre si loingtaine. A ceste cause Bardanes ayant basti des marques & enseignes pour tesmoigner de ses puissance & grandeur: & comme nul des Arsacides auoit deuant luy, leué tribut de ces peuples là: retourna plain de gloire; & pour ce plus farouche & insupportable à ses subiects.

subiets. Lesquels ayans de longue-main, dressé vne trahison contre luy sans qu'il s'en donnast garde, & ne songeant à autre chose qu'à la chasse, le tuerent; estant encores en sa premiere ieunesse: mais aussi renommé, que pas vn des anciens Rois: s'il eût autant cherché l'amour des siens que d'estre craint, & redouté de ses ennemis. Le meurdre de Bardanes troubla les affaires des Parthes, ce pendant qu'entr'eux ils sont incertains, lequel ils doiuent receuoir pour leur Roy. Beaucoup enclinoient au party de Gotarzes, & aucuns à celuy de Meherdates, de la race de Phrahates, qu'on nous auoit donné pour ostage. Depuis Gotarzes fut le plus fort, lequel s'estant fait maistre du siege Royal: contraignit les Parthes pour sa cruauté, & vie dissoluë, enuoyer prier secrettement le Prince Romain, laisser aller Meherdates: pour venir prendre l'estat & dignité de son pere.

*Ieux seculaires, l'Imperatrice Messaline amoureuse de Sil-
lius. Bestize de Claude. Inuention des caracteres pour
escrire.* CHAPITRE IIII.



Es ieux seculaires furent veuz sous les mesmes Consuls: l'an huitcentiesme de la fondation de Rome, & soixante quatriesme apres ceux qu'Auguste auoit faits: Je laisse à dire les raisons, qui meurent l'un & l'autre Prince, comme ayans esté assez declarees, dans les liures que j'ay composez des faits de l'Empereur Domitian: Car il fit aussi veoir des ieux seculaires, & ausquels j'assistay d'autant plus

XI. LIVRE DES ANNALES

soigneusement, que j'estois lors l'un des quinze hommes prestres; & encores Preteur. Cè que ie ne dy par venterie: ains pour ce qu'anciennement, ceste charge appartenoit à la compagnie des quinze hommes: & que les Magistrats sur tous autres, faisoient l'office & accomplissoient les principales ceremonies. Estant Claude assis au ieu du Cirque: comme les enfans des nobles maisons, se fussent presentez à cheual, pour cōmencer ceste plaisante meslee qu'on appelle Troye & entre iceux Britannic fils de l'Empereur, & L. Domitius (depuis par adoption appellé à l'Empire, & surnommé Neron) la faueur que le peuple monstra porter à Domitius, plus qu'à l'autre, fut lors prise, pour vn presage de sa grâdeur à venir. Aussi faisoit on courir le bruiet, qu'en son enfance, des dragons s'estoient trouuez pres de luy; comme pour garde: chose mensongere, & controuuee sur les merueilles estrangeres: car luy mesme qui n'auoit pas accoustumé d'amoindrir, ce qui estoit de son aduantage, souloit conter qu'on auoit veu dans sa chambre vne couleure seulement. Mais ceste faueur de peuple, estoit vn reste qu'il auoit de la souuenance de Germanic, duquel Domitius estoit demouré seul enfant male: & la pitié qu'on auoit d'Agripine sa mere, saugmentoit, à cause de la cruauté de Messaline: qui luy ayant tousiours esté contraire, & pour lors encores plus esmeuë, n'estoit empeschée de luy dresser quelques crimes & accusateurs, sinon pour ce qu'elle se trouuoit retenue d'un amour nouueau & presque forcené. Car elle s'estoit tellement eschauffee, apres C. Sillius, le plus beau de tous les ieunes

nes gentilshommes Romains: qu'elle luy fit chasser sa femme Iunie Sillane, bien noble dame: à fin qu'estant cest adultere hors du lien de mariage, elle en iouyst entierement. Et toutesfois Sillius sçauoit bien le mal qu'il faisoit: & le danger où il se mettoit: mais se tenant mort asseurement fil la refusoit; & ayant quelque esperance de pouuoir eschapper: ce luy estoit vn reconfort, attendre les choses aduenir auecques grande recompence & quant& quant iouyr du bon temps qui se presentoit. Quant à elle, elle venoit souuent en la maison de Sillius, non pas en cachette, ains en grande compagnie: ne bougeant de ses costez quant il fortoit, luy donnant des biens & honneurs en abondance. Finalement, comme si la fortune & dignité d'Empereur, eust esté ja transportee d'une maison à l'autre: on voyoit les esclaves, les affranchis, tout l'appareil & equippage du Prince chez l'adultere. D'autre costé Claude, ignorant l'estat de son mesnage, & toutesfois vsant de la charge de Censeur: reprit auecques de bien rigoureux edicts, les folies que le peuple faisoit au Theatre: pour ce qu'il auoit mesdit de P. Pomponne, autresfois Consul (cestuy-cy seruoit de fatiste aux ieux) & d'aucunes femmes de grande maison. Et par vneloy (qu'il publia) retraignit la cruauté des creanciers: leur deffendant de prester aux fils de famille argent à interest, en attendant la mort des peres. Encore il fit venir en la ville des eauës, conduictes depuis les costaux Simbruines. Il adiousta aussi à l'Alphabet & proposa en public, aucunes nouuelles figures de lettres: estant acertené, que mesme celuy des

XI. LIVRE DES ANNALES

Grecs, n'auoit pas esté tout à vn coup commencé, & accompli. Les Egyptiens, tous premiers représentoient les conceptions de leur esprit, par figures d'animaux: & les plus vieilles marques & enseignemens de la memoire humaine, se voyoient emprainctes en des pierres. Aussi afferment ils estre les inuenteurs des lettres. De là les Pheniciés (pour ce qu'ils estoient lors les plus puissans sur la mer) les apporterent en Grece: & receurent l'honneur (cōme inuenteurs) d'une chose qu'ils auoient apprise d'autrui. Car le cōmun bruit est, que Cadmus arriuant sur des vaisseaux Pheniciés, enseigna cest art aux Grecs encores grossiers. Aucuns ont escrit que Cecrops Athenien, ou Linus Thebain, & du tēps de la guerre Troyenne Palamedes Argien, inuenterent les traictés de seize lettres: & puis d'autres (le principal desquels fut Simonides) trouuerent le reste: mais en Italie les Toscans les apprirēt de Demerate Corinthiē, & les Aborigenes d'Euāder Arcadien: Aussi voit-on q̄ les lettres Latines, ont la forme des plus anciēnes Grecques: & nous mēmes en auions peu du cōmencemēt: Mais les autres ont esté adioustees: ce qui seruit d'exēple à Claudius: pour y en mettre encore trois. Lesquelles ayās esté en vsage durant son Empire, & depuis delaissees: se voyent encores auiourd'huy grauees aux tables decuiure: attachees par les fors, & tēples pour faire cognoistre à chacun, les ordōnances du peuple. Il proposa aussi au Senat, le fait de la cōpagnie des deuins appelez Aruspices: pour dōner ordre, q̄ l'vsage de la plus ancienne discipline d'Italie, ne faneāt par nōchalāce: puis q̄ souuēt durāt les aduersitez de la Republique, on auoit

auoit fait venir des gés, par l'aduis desquels les ceremonies (remises en leur entier) auoient esté depuis mieux gardees. Tellemēt que les principaux de Thoscane, de leur propre volōté ou par l'enhortemēt des Senateurs, auoiēt retenu la sciēce, & icelle prouignee en leurs familles: mais à cest heure pl⁹ froidemēt, par vn certain mespris cōmun, des arts & bōnes sciēces: & à cause que les superstitions estrāgeres, prenoient force de iour en iour. Qu'à la verité, toutes choses alloiēt bien, & à souhaict pour le present: mais qu'il en falloit rēdre graces à la bōté des Dieux, & dōner ordre que les sainctes ceremonies honorees durāt les affaires douteuses, ne s'oubliaissent en prosperité. Cela dōna occasiō de faire vn arrest du Senat par lequel il fut dict, que les Pontifes auiseroient ce qui estoit bon de retenir, & garder à l'aduenir: touchant le faict des Aruspices.

Les Cherusciens viennent à Rome demander Italus pour estre leur Roy: & les aduantures que ce Prince eut.

CHAPITRE V.



ESTE mesme annee la natiō des Cherusciēs, vint à Rome demāder vn Roy: ayāt perdu toute leur noblesse en guerres ciuiles, & ne restant plus qu'un seul du sang Royal nōmé Italus: gardé en la ville. Son pere s'appelloit Flaue frere d'Arminius & sa mere fut fille de Catimer Prince des Cates. Quant à luy c'estoit vn fort bel homme: bien duiēt aux armes, & à picquer cheuaux, à la maniere de son pays, & du nostre: Parquoy Cesar l'ayant renforcé d'ar-

XI. LIVRE DES ANNALES

gent, & encores de gens pour sa garde: l'admonnesta recevoir de grand courage, l'honneur appartenant à sa maison. En premier lieu qu'il estoit nay à Rome: & que non pas comme ostage, ains comme citoyen Romain, il alloit pour commander à vn Royaume estranger. De fait sa venue du commencement fut agreable aux Germains. D'autant plus que n'ayât esté abreuvé d'aucune discorde: il auoit esgalle affection enuers vn chacun. Tous le louoient & honoroient, aussi v-
soit-il aucunes fois de courtoisie, & tēperance, que per-
sonne ne trouuoit mauuaises: & le plus souuēt se lais-
soit aller à l'iuuēgerie, & autres appetits desordōnez,
agreables aux Barbares. Ia il auoit acquis reputation
enuers ses plus prochains voisins, & à l'endroict d'au-
tres plus esloignez: quant ceux qui auoient eu la vo-
gue durant les seditions, ayans sa puissance pour fort
suspecte, se retirerent aux peuples voisins: & declarēt
ouuertement, que l'ancienne franchise de Germanie,
leur estoit ostee, & la puissance des Romains s'aggran-
dissoit, s'il estoit ainsi qu'on ne peut trouuer aucun na-
tif en leur pays, digne de tenir le lieu, & degré de Prin-
ce: si la race de l'espion Flavius, n'estoit esleuee par des-
sus tout chacun. Qu'en vain l'on faidoit du nom d'Ar-
menius, (le fils mesme duquel esleué & nourry en pays
ennemy) venant à la couronne: ils pourroient (neant-
moins) redouter: comme ayant esté souillé, & gaste
par la nourriture, seruage, habits, & façon de faire,
toutes estranges. Mais si Italus auoit pareille volonté
& courage que son pere, il ne se trouueroit aucun a-
uoir faict plus forte guerre, au pays de sa naissance, &
dieux

Dieux domestiques, que ses pere & mere. Sur telles ou semblables remonstrances, ils assemblerent de grandes forces: & Italus n'estoit pas suiuy de moindre compagnie: car les Germains disoient & racontotent, qu'il ne s'estoit pas fourré parmy eux contre leur vouloir, ains qu'ils l'estoient allé chercher eux mesmes: & puis qu'il surpassoit les autres en noblesse, ils firent encore preuve de sa vaillance: à fin de veoir, s'il se montreroit digne d'auoir pour oncle Arminius, & Cathimer pour ayeul. Aussi que son pere ne luy faisoit point de honte de n'auoir iamais fauslé la foy; que par la volonté des Germains, il auoit promise aux Romains: Et qu'à fausses enseignes ceux-là se couuroient du nom de liberté, lesquels forlignans, en particulier, & estans dommageables au publicq, n'auoient esperance que sur les troubles & discordes. Le commun tout gaillard bruyoit à l'entour de luy: & de fait ce Roy victorieux, d'une grosse bataille donnée entre les Barbares: se laissant tost apres (à cause de sa bonne fortune) tomber en outrecuidance, fut chassé de son Royaume: & depuis ayant esté remis sus, par le moyen des Lombards, en gaignant & en perdant, trauailloit l'estat des Cheruscien.

Les Cauciens conduicts par Gannasc Caninefate, courans la basse Germanie & riuage de la mer Gauloise, sont repoussez par Corbulon Capitaine Romain: la seuer discipline dont ledict Corbulon vsoit en ses armées.

CHAPITRE VI.

D

XI. LIVRE DES ANNALES



V M E S M E temps, les Cauciens n'ayans aucun trouble chez eux: & se trouuans plus deliberez, à cause de la mort de Sanquinius, pendant que de iour à autre on attend Corbulon (qui venoit tenir sa place) coururent la basse Germanie sous la conduite de Gannasc, Caninesate de nation. Lequel ayant esté longuement au seruice des Romains, entre les gens de secours, & depuis s'estant retiré du party de l'ennemy: avecques des vaisseaux legers, gastoit (sur toutes autres) la coste marine des Gaulois: sçachant bien qu'ils estoient riches, & mal aguerris. Mais Corbulon entré en sa prouince: premierement avecques grand soing, & depuis avecques grand honneur (veu que ce furent ses premieres armes) iette des galleres sur la riuere de Rhin: & les autres nauires selon qu'elles se trouuerent propres, par les bras & trenchees qui sont au long de la marine. Puis ayant enfoncé les petits vaisseaux, & chassé Gannasc: après auoir mis les choses en bon estat pour le present: il r'amena à la discipline ancienne les legions, qui ne sçauoient que c'estoit de faire ouurages, & trauailler: mais qui s'esioiissoient seulement de piller, & courir le pays: deffendant que nul se desbandast, ny allast à la guerre sans commandement: quant aux gardes, escoutes & couruees de nuit, ou de iour, elles se faisoient en armes. Et dict on qu'il fit mourir deux soldats, pour ce que l'un sans espee, & l'autre n'ayant seulement que son poignard, leuoient la palissade & tranchee: lesquelles punitions trop grandes

(& possible faussement publiques) ont toutesfois pris fondement, sur la feuerité du capitaine: que vous pouuez iuger auoir esté roide, & inexorable en grandes fautes, puis qu'on auoit opinion, qu'il vſast de telle rigueur en choses legeres. Au demeurant ceste crainte, toucha diuerſement le cueur de noz soldats, & des ennemis: car nous augmentasmes nostre vertu, & les Barbares en perdirent leur grand fierté: mesmes la nation des Frizons qui (apres sa rebellion commencee par la deffaiſte de C. Apronius) ſeſtoit declaree ennemie; ou peu fidelle à nostre party, ayant donné oſtages, vint habiter les terres aſſignees, & departies par Corbulon. Lequel ſemblablement eſtabliſt à ce peuple vn Senat, des Magistrats, & des loix. Et à fin qu'ils ne peussent contredire à ſes commandemens, il fortifia vn lieu pour ſeruir de garniſon: enuoyant des gens ſolliciter les plus grands Cauciens à ſe rendre, & auſſi pour ſurprendre finement Gannaſc. Ceste menace ne fut ſans effect, ou eſtimee laſche contre vn trahiſtre, qui ſeſtoit retiré vers les ennemis, & auoit fauſſé ſa foy. Toutesfois ſa mort eſmeut les Cauciens: & Corbulon (luy meſme) iettoit entr'eux vne ſemence de rebellion: laquelle plaifant à beaucoup, eſtoit auſſi priſe d'autres en mauuaife part. Car pourquoy eſmouuoit il l'ennemy? les choses mauuaifes (diſoient-ils) tourneront au dommage de la Republique: & ſil fait bien, vn homme vaillant & de reputation comme luy, eſt à craindre en temps de paix, & inſupportable à vn Prince couard. Auſſi tant ſ'en faut que Claude voulut faire aucun nouuel effort, & entrepriſe en Germanie: qu'il

XI. LIVRE DES ANNALES

commanda r'amener les garnisons deçà le Rhin: & de faiçt des lettres de telle substance furent apportees à Corbulon, comme ja il commençoit à remuer terre, pour camper au pays des ennemis. Mais oyant vn si soudain commandement: combien que plusieurs choses se presentassent deuant ses yeux: la crainte qu'il auoit de l'Empereur, le mespris auquel les Barbares l'auroient: la moquerie qu'en feroient les allies, n'ayât dict autre chose, sinon, ô que d'aucuns Capitaines Romains ont esté heureux! il donna le signal pour se retirer.

En quoy les Capitaines Romains occupoient les soldats hors la guerre: Qui fut Curtius Ruffus. Constance de Gn. Nouius Cheualier Romain. Creation de l'office de Questeur. CHAPITRE VII.



OVTESFOIS, à fin q̃ le soldat ne demourast sans rien faire; il tira entre les riuieres de Meuze & de Rhin, vn fossé long de vingt trois mille: pour euitier les auantures incertaines de la mer Occéane: ce neantmoins, Cesar luy octroya les marques, & enseignes de triomphe, iaçoit qu'il luy eut deffendu de faire la guerre. Bien peu de temps apres, Curtius Ruffus obtint pareil honneur: lequel auoit decouuert des Minieres d'argent au pays Mariac: dont il vint peu de proffit, & qui ne dura guerres. Or pource que oultre le dommage, c'estoit peine aux legions, de cauer des trenchées afin d'esgouter les eaves, & faire soubz terre, ce qui est difficile d'entreprendre

prendre dessus en plain champ : les soldatz foullez de telles couruees, & endurâs assez de semblables choses en diuerſes prouinces: composent en cachete, des lettres au nom des garnisons : par lesquelles ilz prioient l'Empereur, qu'à ceux à qui il donneroit la charge de ses armées, il octroiaſt au parauant, les enseignes & marques de triumphe. Pour le regard de l'origine, & race de Curtius Ruffus, (lequel aucuns ont eſcrit auoir eſté filz d'un gladiateur) ie ne vouldroy mettre en auât les choses qu'on en dit : auſſi iay honte, d'en declairer la verité. Apres qu'il fut paruenü en aage d'adoleſcence, ayant ſuiuy le queſteur à qui Affricque eſtoit eſcheuë, cōme vn iour en la ville Adrumetum, il ſe promenoit ſeul, fantaſiant ſur le midy, lors que les * porches ſont vuides de gens: Il ſe preſenta à luy, la ſemblance d'une femme, plus grâde que le naturel: & fut ouye vne voix, diſant: c'eſt toy Ruffus, qui viendras comme Procōſul, en ceſte Prouince. Ce preſage luy ayant enflé le cueur d'eſperâce, il retourna à Rome: où tât par la lareſſe de ſes amis, que ſon viſ eſprit, il fut Quelteur: & incōtinēt apres, briguât cōtre d'autres de bonne maiſon, il emporta la Preteure, par la voix & ſupport du Prince Tibere: ayât couuert la baſſeur de ſa lignee, avec ces meſmes parolles, Curtius Ruffus, me ſemble eſtre de ſoy nay: * Depuis par le moyen de ſa longue vieilleſſe, faſcheuſe & mal plaifante flatterie, à l'endroiçt des plus grands: & ſe monſtrant arrogant, enuers ceux qui eſtoient plus petits que luy; mal accoſtable entre ſes pareils: il obtint le Conſulat, les enseignes de triumphe, & finalement le gouuernement d'Affrique.

XI. LIVRE DES ANNALES

là où mourant, il accomplit la destinee de son presage. Cependant Gn. Nouius notable Cheualier Romain, est trouué l'espee ceinte, parmy ceux qui saluoient le Prince: sans que lors, ne depuis, on ait peu descouurir la cause. Car estant deschiré en la gehenne, il se chargea bien soy-mesme: & ne nomma aucuns de ses alliez: estant incertain s'il les voulut celer. Soubs les mesmes consuls, il fut arresté suiuant l'aduis de P. Dollabelle, que d'ores en auant le passerétemps des Gladiateurs se donneroit tous les ans, aux despens de ceux qui paruiendroient à l'estat de Questeur. Du temps des anciens, ceste charge estoit vne recompence de la vertu. Et pouuoit lors chacun citoyen qui fasseuroit de sa preud'homme, & merites: demander des charges & Magistrats. Et si encores, on n'auoit tellement esgard à l'aage, que dés la premiere ieunesse on ne pout entrer aux Consulats, & Dictatures. Or pour le regard des Questeurs: ils furent establiz mesme durant la seigneurie des Rois: ce que monstre la loy, qui se faisoit avecques l'assemblée des Curies, renouuелlee par L. Brutus. Et la puissance d'en eslire, demoura aux Consuls: iusques à ce que le peuple, voulut aussi pourueoir à ceste dignité: & les premiers esleuz par le peuple, se nommoient Valere Potus, & Æmil Mamerc: qui furent establiz pour le faict de la guerre: vingt-trois ans apres les Tarquins chassez. Depuis venans les negoces, & affaires de la Republique à croistre peu à peu, on en adiousta deux pour faire la charge de Rome: incontinent le nombre fut double, estant ja l'Italie taillable, pour la soulde des gens de guerre: & quant outre cela,

il

il fallut receuoir les aides & impositions des Prouinces. Apres par vne loy de Sulla, vingt furent creez: pour remplir le Senat, auquel il auoit donné la charge de iuger. Et combien que les Cheualiers eussent recouuré l'autorité de iuger: Toutesfois la Questure estoit accordée sans despence, selon la reputation des hommes qui la briguoient: facilité, ou courtoisie de ceux qui la donnoient, Iusques à ce que par l'aduis de Dolabelle, elle fut comme exposée en vente.

*Les principaux Seigneurs de la Gaule cheueluë, faicts
Senateurs de Rome: & les raisons qui meurent l'Em-
pereur à ce faire. Le moyen qu'il tint pour net-
toyer le Senat des hommes vitieux ou
pauures. CHAP. VIII.*



SOVS le Consulat d'Aulus Vitellius, & L. Vipsanius: estât questiō de r'emplir le Senat, pour ce que les principaux de la Gaule appelée cheueluë (qui dès long temps auparauant, auoient esté accueilliz en l'alliance, & bourgeoisie Romaine) desiroient auoir le droit de pouuoir tenir les estats, & dignitez dans la ville mesme: il en courut vn grand & diuers bruiet: & si l'affaire se debattoit deuant le Prince, par brigues & affections contraires. Soustenans les vns: que l'Italie n'estoit point si au bas, qu'elle ne peut fournir de gens, pour r'emplir le Senat de sa ville: Que les naturels habitans auoient iadis esté bien suffisans, à remplir les peuples

XI. LIVRE DES ANNALES.

de leur parenté, & l'on ne se deuoit repentir, de suiure la façon monstree par l'ancienne Republicque. Qui plus est on remarquoit encore des actes genereux, sortans du courage, & bon naturel des Romains du iour-d'huy: se ressentans de la vertu & gloire de leurs anciens predecesseurs. Estoit-ce peu, que ceux d'aupres Padouë, & Milan se fussent iettez en la Cour: si l'on n'amenoit de rechef vne assemblée, & trouppes d'estrangers, comme pour les tenir en captiuité? Quelle dignité & Magistrat, pourroient d'ores en auant tenir le reste des nobles, ou quelque autre pauvre Senateur Latin? tout sera remply de ces riches homes, les ayeulx & bisayeulx desquels, estans capitaines des natiōs ennemies, ont mis au fil de l'espee, ou deffaiēt noz armees: assiegé le diuin Iulle deuant Allaize. Cela est de fresche memoire: & q̄ sera ce si l'on viēt à r'amenteuoir ceux qui bruslerēt la ville, & de leurs mains abatirēt le Capitole, & l'autel de Rome? biē qu'ils iouysset du nô, & fussent reputez bourgeois: mais quant à la marque des Senateurs, l'hōneur des Magistrats, qu'ils ne les redissent point si communs. Le Prince n'ayant esté esmeu par ces parolles, ny autres semblables, fit encores sur le champ vne remonstrance au contraire: & quant le Senat fut appellé, il commença en telle sorte. Mes
 „ ancestres (le plus ancien desquels Clausus, prit son ori-
 „ gine des Sabins, & fut tout ensemble faiēt bourgeois
 „ de la ville de Rome, & receu entre les familles Patri-
 „ ciennes) m'admonnestant de gouuerner la Republi-
 „ que, par mesmes conseils & moyens qu'eux: transpor-
 „ tant icy tout ce qui est de beau, & de bon, quelque
 part

part qu'il se puisse trouuer. Car ie ne fay doute: que les Iules furent appelez d'Alba: les Coruncans de Camerin: les Portiens de Tusculum: & à fin de ne chercher soigneusement les choses plus anciennes, on a de Toscane, & Basilicate, & aussi de toute Italie, appelé des gens pour estre mis au Senat. Finalement la ville fest aduancee iusques aux Alpes: A fin que non pas quelques particuliers seuls, ny vn à vn: mais les pays, terres, peuples, & nations, prinslent mesme nom, & creussent quant & quant nous. Alors eusmes nous paix asseuree en la ville, & brauasmes les estrangers, quant ceux de delà le Po, furēt receuz en la bourgeoisie Romaine. Et quant soubs couleur de mener des legions par tout le monde, en adioustant à nostre corps, les plus riches & puissans hommes des Prouinces, n^o soulageasmes l'Empire, las de porter si grand fardeau. Se repent on que les Balbes d'Espaigne, & d'autres seigneurs non moins remarquables, soient passez de la Gaule Narbonnoise, pour venir demourer par deçà: leurs descédās durēt encore, & n'aimēt pas moins ceste Patrie & ville, que nous. Quelle autre chose fut cause de la ruine des Lacedemoniens, & Atheniens (combien qu'ils se trouuassent puissans en armes) sinon que ils deboutoient comme estrangers, ceux qu'ils auoiet vaincus. Au contraire Romulus nostre fondateur, se monstra si sage & aduisé: qu'il eut plusieurs peuples en mesme iour ennemis, & puis ses citoyens. Les estrangers ont regné sur nous; & ce n'est pas du iourd'huy (comme plusieurs qui s'abusent pensent) que les Magistrats ont esté donnez aux fils des serfs affranchis: car

XI. LIVRE DES ANNALES

il a esté maintefois practiqué, par nostre premier peuple. Mais nous auôs cōbatu cōtre les Senonois: & c'est à sçauoir, si les Volsques, & Eques ne se trouuerent iamais rengez contre nous en bataille. Nous auons esté pris par les Gaullois: aussi auons nous donné ostages aux Thoscans, & passé soubs le ioug des Sannites. Et toutesfois si vous racontez toutes les guerres: il n'y en a aucune, qui ait esté plustost mise à fin que cōtre les Gaullois: depuis ce temps, la paix a esté continuelle, & gardee fidelllement. Maintenant qu'avecques vne semblance de mœurs, arts, sciences, & alliances; ils sont meslez parmy nous: qu'ils nous apportent, & facent part de leur or, & richesses: plustost que nous les en laissions iouyr seuls à part. Toutes choses (peres Conscrips) que l'on estime maintenant tref-vieilles, furent iadis nouuelles. Les Magistrats populaires, ont esté creez apres les Patriciens: les Latins, apres les Populaires: & apres ceux des Latins tous ceux des autres peuples, & gens d'Italie. * Cecy mesmes que nous faisons vieillira, & ce qu'aujourd'huy nous deffendôs par exemples, seruira aussi d'exemple le temps aduenir. L'arrest du Senat, ayant esté dressé suiuant la harangue du Prince: les Autunois tous premiers, obtindrent le droit de pouuoir estre Senateurs, en la ville de Rome. On leur fit ceste faueur en cōsideration de l'anciēne alliance, & pour ce que seuls d'entre les Gaullois: ils se donēt le nō de freres du peuple Romain. Ces mesmes iours Cesar appella au nōbre des Patrices, les plus anciēs du Senat, ou ceux de qui les peres auoiēt tenu des estats, grāds & honorables: restās desia peu de maisons qui

qui fussent de celles que Romulus auoit appellé les grands, & L. Brutus les petits gentils-hommes. Et encores estans faillies, semblablement, celles que le Dictateur Cesar choisit par la loy Cassia, & le Prince Auguste par la loy Senia. Toutes ces courtoisies agreables au peuple Romain: s'executoient avec grand ioye du Censeur * [*qui estoit l'Empereur*] lequel se trouuant en soucy comme il mettroit hors du Senat, ceux qui estoient descriez pour leurs vices, vſa d'vne certaine facon nouuellement trouuee: & qui sentoit (neâtmoins) son ancienne rigueur: admonestât chacun d'examiner & esplucher soymesme sa vie: & demâder cōgé, de renôcer à son estat de Senateur. Que le cōgé seroit facile à donner: car il publieroit en mesme roolle, les nōs des chassez, & des excusez. A celle fin, q̄, & le iugemēt des Censeurs, & la honte modeste de ceux qui vouloient renoncer à l'ordre, meslez ensemble, adoucit le blafme & diffame qu'ils pourroiet encourir. Pour ces choses Vipsanius Cōsul, proposa que Claude deuoit estre appellé pere du Senat. Car estant le nom de pere de la patrie, desia trop cōmun, les nouueaux biensfaits & merites, enuers la Republicque, deuoiet estre honnorez de mots non encores practiquez. Mais Claude luy mesme fit taire le Cōsul, cōme le flattât trop: & arresta la reueuē, ou roolle des citoyens appellé Lustrum. Lesquels se trouuerēt en nombre de cinq millions, huit cens quatre vingts quatre mil soixante & douze: & là prist fin, l'ignorāce qu'il auoit des affaires de sa maison estant contrainct peu apres, de cognoistre, & punir les meschancetez de sa femme, pour incontinent brusler

XI. LIVRE DES ANNALES
du desir d'un mariage incestueux

*Folles amours de l'Imperatrice Messaline: & le mariage
d'elle & Sillius.* CHAPITRE IX.



ESIA Messaline, quasi comme desgoustee, de pouuoir si aisément trouuer, & iouyr de tant d'adulteres; se laissoit ouuertement emporter, à des affections & paillardises estranges, & incogneuës: Quāt Sillius mesme, soit par vne fatale sotie (ou qu'il estimast que le remede des presens dangers, fut de se precipiter soy-mesme) la pressa, n'yser plus de dissimulation. Car ils n'en estoiet pas venus là; qu'il fallut attēdre l'issuē de la vieillesse du Prince. Que ceux qui n'ont point mal faict, ne reçoient aucun dommage de leurs conseils & entreprises. Mais aussi que les meschancetez estās descouuertes, il falloit auoir recours à la hardiesse, Qu'ils auoient en main des gens coupables de mesme faute qu'eux, & craignans pareille punition: quāt à luy qu'il estoit sans femme, sans enfans, prest de l'espouser, & adopter Britannic: quoy faisant Messaline demouroit en sa mesme puissance & autorité: ioint l'asseurance qu'ils sedōneroiēt; preuenās Claude hōme aussi facile à se laisser surprendre, que soudain & prompt à se courroucer. Elle ne tint pas grand conte de ses parolles, non pour amitié qu'elle portast à son mary; ains de peur que Syllius estant paruenu à l'Empire, la mesprisast comme vne adultere: & vint à estimer à son iuste pris, & valeur, la meschancerē que pour se mettre
hors

hors de danger, & de peine: Il auoit trouuee bonne
 de executer. Toutesfois, elle desira bien que le tout fut
 couuert du nom de mariage: pour cacher la grandeur
 de l'Infamie: daultant que c'est le dernier plaisir & cō-
 tentement, qu'ayent les gens habendōnez. Sans donc
 attendre plus longuement, que iusques à ce que Clau-
 de fut allé à Hostie, faire vn Sacrificē: Elle accomplit
 toutes les solemnitez des nopces. Je ne fay doubte;
 qu'on tiendra pour vne fable: qu'en plaine ville, qui
 descouure toutes choses, & ne cele rien: Il se soit peu
 trouuer des hommes, si asseurez (& encores le Consul
 nommé) qui à iour assigné: ayant assemblé gens, pour
 souſcrire, & sceler le contract de mariage, qu'il faisoit
 avec la femme du Prince, à fin d'en auoir des enfans:
 & qu'elle mesme, ait ouy les parolles des Auspices, i-
 celles prononcees apres eux: Sacrifie aux dieux: Qu'ils
 se soient assis entre ceux qui estoient semondz au ban-
 quet, qu'ils se soient baisez, & accollez: & finallemēt
 qu'ils ayent passé la nuit ensemble, en toute liberté
 de mariage. Ce neantmoins il n'y a rien de controuué,
 pour rendre le cas estrange & merueilleux: ains ie re-
 citeray seulement ce que i'ay ouy dire & qui a esté es-
 cript par les anciens. Cela donc horriblement effroia
 la maison du Prince, & ceulx principalement, qui e-
 stoient lors en plus grand credit, & deuoient auoir
 crainte si les choses changeoient, n'en parloient plus
 en secret (comme deuant) ains murmuroient ouuer-
 temēt. Disans, pendant que les adulteres se cachent
 par subtilité, en la chambre du Prince; qu'à la verité on
 l'auoit deshonoré: mais que lors il estoit esloigné de

XI. LIVRE DES ANNALES

dâger. Maintenât qu'un ieune homme, respecté pour son excelléte beauté; pour sa ieunesse & prochain Cōsulat: saprestoit à de plus grâdes entreprises. Car ce qui restoit à faire apres tel mariage, ne pouuoit estre caché. Sans doubte vne craincte leur entroit en l'esprit, considerans la bestise de Claude, & comme il estoit subiect à sa femme: & que par le commandement de Messaline, plusieurs executions de mort auoient esté faictes. Au contraire, le naturel de l'Empereur facile à manier leur donnoit assurance; que filz se pouuoient rendre les plus forts, en faisant le crime bien grand, & outrageux: qu'elle pourroit estre accablee, & condânee, auant que sapercevoir d'estre criminelle. Mais qu'en cela gisoit le hazard si elle venoit à estre ouye en ses deffences: car il falloit faire en telle sorte que les oreilles de l'Empereur, se trouuassent bouchées quand bien elle confesseroit sa faulte. Et premierement Caliste (duquel i'ay faict mention en parlant de la mort de C. Césâr) puis Narcisse (qui pourchassa le meurdre d'Apus) & Pallas (lors le plus grand mignon) debattirent entre eux: si par secretes menasses, ils deuoient destourner Messaline de l'amour de Silius: dissimulâs, & passans par dessus tout, le reste. Mais depuis craignans de se ruiner eux mesmes: Ils s'en desisterent; Pallas par lascheté: Et Caliste pource qu'il auoit aussi cogneu l'estat de la cour precedente; & sçauoit bien que la faueur se gardoit bien mieux par prudents, que violents conseils. Mais Narcisse demeura ferme en son aduis, changeant seulement ce poinct: qu'il se donna garde de l'aduertir par quelque parolle, de-
quoy,

quoy, & par qui, elle pouuoit estre accusee.

*Narcisse affranchy de Claude l'aduertit de ce mariage:
& l'achette dudit Empereur. CHAP. X.*



INSI donc Narcisse espiaint soigneusement les occasions durant la longue demeure de Cesar à Hostie. contrainit deux concubines (desquelles l'Empereur se seruoit plus volontiers) d'entreprendre la denonciation: leur faisant plusieurs promesses & remonstrât que la femme de l'Empereur chassée, elles auroiēt plus de faueur & autorité. Apres cela Calpurnie (ainsi l'appelloit l'une d'elles) si tost qu'elle eut trouué Cesar seul à part, se iettant à ses pieds, s'escria que Messaline estoit mariee à Sillius: & demandant aussi à l'autre nommee Cleopatre (là presente & attendant la mesme chose) si elle en sçauoit la verité: ceste-cy luy ayant faict signe de la teste, que ouy: elle demâde qu'on appellast Narcisse. Lequel requerant pardon des choses passees; & de ce qu'il luy auoit dissimulé ce qui s'estoit faict entre Messaline, & Vectius, entre elle mesme & Plautius: il dict qu'il ne luy reprocheroit point encores maintenant ses paillardises, & adulteres: & n'estre pas d'aduis de demander à Sillius, la maison, les esclaves, ne les autres aornemens, & richesses Imperialles. Mais bien au contraire, qu'il en iouyst à son aise: pourueu qu'il luy rendit sa femme, & rompit le contract de son mariage. Auez vous cogneu (dict-il) que fussiez separé d'a-

XI. LIVRE DES ANNALES

uec vostre femme? Car le peuple, le Senat & les gens de guerre; ont veu faire le mariage de Sillius: tellemēt que si vous ne vous hastez, le nouveau marié est Seigneur de la ville. Alors Claude appelle les principaux de ses amis: & demande premierement à Tutranus (commis pour la police des bledz) puis à Lusius Geta Capitaine des gardes du Palais; ce qu'ils en sçauoient, & eux le confessant: Incontinent tous les autres, à qui mieux mieux l'environnerent: criers apres luy qu'il allast au fort des Soldats: qu'il encourageast les Cohortes des gardes, & pensast de son assurance, premier que de se venger. Il est bien certain que Claude fut esbloüy, & saisi de telle fraieur: qu'il demanda plusieurs fois, si l'ioüissoit de l'Empire: & si Sillius n'estoit pas hōme priué, sans estat & charge publicque: D'autre part Messaline, plus que iamais dissoluë en ses plaisirs, & debordemens: estant l'Autonne fort auancé, faisoit en sa maison avec bien grande compagnie; vne mascarade de vendenges: car on serroit le pressoir, les cuues & la met coulloient, & les femmes ceintes de peaux, sauteloient comme des Baches: sacrifiāns, ou faifans les enragees. Elle avec les cheveux espars, & branlant vn iauelot entortillé de branches de vigne, auoit à ses costez Sillius couuert de lierre; avec de haults patins aux pieds, & secōtiānt la teste: pendant qu'à l'entour d'eux, vne dance d'eshontez & follastres, trepignoit menānt grand bruiēt. On diēt que Vectius Vallens ayant par gaillardise grimpé sur vn arbre bien fort hault, estant interrogé quelle chose il regardoit: respondit, vne tempeste venāt du costé d'Hostie: soit qu'il

qu'il y en eut apparence, ou que telle parolle iectée & l'adventure se tourna depuis en presage. Ce pendant non pas le bruiet, mais des messagers, accouroient de toutes parts: les aduertir que Claude sçauoit leur fait, & venoit pour en faire incontinent la punition. A ceste cause Messaline se retire aux iardins Luculliens: Et Sillius pour dissimuler sa crainte, s'en alla au For, * cōme pour faire le deuoir de son estat. Ainsi que les autres compagnons s'eschapoient de tous costez, voicy des Centeniers qui les empoignēt, & lient: selon qu'ils les trouuoient dehors par les rues, ou en leurs c'aches. Messaline toutesfois, combien que ses aduersitez luy ostassent le moyen de prendre conseil, & aduiser à son affaire, se mit en grand deuoir d'aller au deuant, & d'estre veue de son mary: sçachant bien que cela luy auoit maintefois aydé. Et commanda que Britannic, & Oëtaue, fussent vistemēt enuoyez pour saluer, & estre embrassez de leur pere. Elle pria aussi Vibidie la plus ancienne des Vestalles; aller parler au grand Pontife, & le supplier se monstrier doux enuers elle. Ce pendant ayant passé à pied le trauers de la ville, accompagnée de trois personnes seulement (tant elle se trouua soudainement abandonnée) montant en vn chariot, dans lequel on emporte les vuidanges des iardins: elle prent le chemin d Hostie, sans que personne en eut pitié: pource que l'horreur de ses meschancetez, surpassoit toute misericorde. Ce neantmoins Cesar trembloit, d'autant qu'il ne se fioit pas trop à Geta Capitaine des gardes de son Palais: qui se changeoit aussi legerement à bien,

XI. LIVRE DES ANNALES

qu'à mal. Et pour ce, Narcisse accompagnée de ceux qui auoient pareille crainte que luy: asséura Cesar, que il ne luy restoit autre esperance de sauuer sa vie, s'il ne transportoit pour ce iour seul, la charge des gens de guerre, à quelqu'un de ses affrâchis: s'offrant de la prendre luy mesme. Encores à fin que ce pédant, que l'Empereur est conduict en la ville, L. Vitellius & P. Largus Cecinna ne luy fissent changer d'aduis; il demande, & prent place au mesme chariot, ou littiere de l'Empereur. Il fut depuis assez grâd bruiet: qu'entre plusieurs & diuerfes parolles du Prince; qui blasmoit tantost la meschanceté de sa femme, & quelquefois aussi venoit à se souuenir de son mariage, & du bas aage de ses enfans: que Vitellius ne diét autres parolles, sinôn: ô le cas estrâge: ô la meschâceté: & toutesfois Narcisse le pressoit de parler frâchemēt: & descouurir ce qu'il pēsoit. Ce neantmoins il ne peut gaigner sur luy, qu'il n'vlast tousiours de mots à deux entêtes, & qu'ô pourroit interpreter apres, ainsi qu'ô les voudroit prendre: de sorte que Largus Cecinna à son exemple fit le semblable.

Punition de Sillius & autres ses complices, ou punitiers de Messaline: & la mort d'elle mesme.

CHAPITRE XI.



EST À Messaline pouuoit estre veüe, & crioit incessamment qu'il ouyt la mere d'Octauia, & de Britannic: pendant que d'autre costé l'accusateur faisoit grand bruiet, r'amenteuant Sillius, & son maria-

ge. Quant & quant il baille des cahiers, contenans ses paillardises: pour destourner ailleurs la veüe de Cesar. Peu de temps apres, comme l'Empereur entroit dans la ville; on alloit luy presenter les enfans qu'il auoit de Messaline : Si Narcissen'eust commandé les destourner. Il ne peut chasser Vibidie: laquelle malgré luy, & avec parolles fort piquantes * requeroit instamment, qu'il n'eut à faire mourir sa femme, sans l'ouyr en ses deffenses. Quoy voyant Narcisse, luy respondit: que le Prince l'oïroit, & auroit moyen de se purger, & lauer des crimes à elle imposez: ce pendant qu'elle (qui estoit religieuse) se retirast & messast de ses sacrifices. Durant cela, c'estoit chose estrange, que du silence de Claude. Quand à Vitellius, il sembloit plus qu'autrement, ignorer ce qu'on vouloit faire: tout obeissoit à l'affranchy: lequel commada d'ouurer la maison de l'adultere; & y mener l'Empereur. Là premieremēt à l'entree, il monstra l'image du pere de Sillius, arrachee de son lieu par arrest du Senat. Apres cela il disoit que tout ce que les Nerons, & Druses eurent iamais de cher, & precieux: auoit esté baillé à Sillius, en recōpence de la honte, & outrage qu'il luy auoit faicte. Puis quād il vit Claude eschauffé, & cōmençant à menasser. Il le fait porter dans le fort de la garnison: là où trouuāt les soldats apprestez pour l'ouyr haranguer: Narcisse l'ayant admōnesté de parler à eux; il leur dict peu de parolles: car quelque iuste que fust sa douleur, la vergōgne l'empeschoit de parler. Incontinēt toutes les bādes s'escriēt d'une voix; demādans instammēt les noms, & la punition des criminels. Et mesme Sillius estāt approché du


XI. LIVRE DES ANNALES.

rechercher qu'une mort honorable. Toutesfois en ce cueur, corrompu de paillardises, il ne restoit vn seul point d'honnesteté: & les larmes & plainctes, ne luy seruoient plus de rien: Ains prolongeoit le temps en pleurs & larmes inutiles. Surce les Soldats venans de rendon: poussent les huis dedans. * Le Capitaine se presenta à elle, sans dire mot: Mais l'affranchy luy reprocha plusieurs hōtes & villainies, qui se disent entre varlets. Alors elle cogneut iusques au dedans, son estat miserable: & prist vn cousteau; lequel ayant en vain (pource qu'elle trembloit)ap proche de son gosier & de son estomach; le Capitaine, la perça de part en part tout d'un coup: le corps fut laissé à sa mere. Ce faict, on vint rapporter à Claude (qui banquetoit) que Messaline estoit morte: sans distinguer si ç'auoit esté de sa main, ou de celle d'autrui: aussi il ne s'en enquit point, & demanda à boire: faisant tout ce qu'il auoit accoustumé en son repas. Encores les iours ensuyuans, il en môstra semblant de haine, ioye, courroux, tristesse, ou autre signe d'affection humaine: nō pas mesmes quāt il voyoit les accusateurs ioyeux: non pas quāt ses enfans estoient marris, & esplomez. Le Senat ayda à luy faire oublier sa femme; arrestant que le nom & image d'elle, seroient ostez de tous lieux publics & priuez. Les marques & enseignēs de Questeur, sont ordonnees à Narcisse. Ce qui fut le moins de sa grandeur, veu qu'il estoit le premier, & plus grand apres Pallas, & Caliste. C'estoit (à la verité) chose honneste, & bien seante de l'hōnorer: mais cela causoit de tresgrans maux, pource que ses autres meschacētez n'estoient point chastices: *



DOVZIESME LIVRE
DES ANNALLES DE P.
CORNILIE TACITE

La dispute des trois affranchis de Claude, pour luy donner vne femme. Menées de Vitelius pour luy faire espouser Agripine. CHAPITRE PREMIER.



LE MEVRDRE DE MES-
saline, mit sans dessus des-
sous la maison du Prince
s'estant esleué debat entre
les affranchiz, qui seroit ce-
luy qui choisiroit vne fem-
me à Claude, criant haut a-
pres ceux qui viuoient sans
femme, & subiect à estre
maistrisé par celles qu'il a-
uoit espousees. Les Dames n'estoient pas moins es-
chauffees, apres telle brigue: opposans l'une à l'autre
leur noblesse, beauté, richesse: & faisans paroistre tout
ce qui estoit en elles digne d'un si grád party. Toutes-
fois la principale doute estoit entre Lolie Pauline fil-
le de M. Lolius Consulaire: & Iulie Agrippine fille de
Germanic: A ceste cy fauorisoit Pallas, & Calliste à
l'autre. Quant à Ælie Pætine de la maison des Tube-

XII. LIVRE DES ANNALES

rons, elle estoit supportee de Narcisse. Or Claude facile à emporter tantost deçà tantost delà, selon qu'il venoit d'ouyr parler quelqu'un de ceux qui le persua-
doient, appelé au conseil ces gens contraires en opi-
nions: leur commandant de declarer leur aduis, & y
adiouster les raisons. Narcisse luy discouroit de son
mariage ancien, de leur fille commune (car il auoit eu
Anthonie de Petina) & qu'il n'y auroit aucune nou-
ueauté en sa maison, si sa femme accoustumee y re-
tournoit, laquelle aussi ne regarderoit point d'un œil
de marastre, Britannic & Octauię appartenans de si
pres à ses enfans. Caliste remonstroit: qu'ayant esté re-
butée par vne longue separation, si elle estoit prise de
rechef, cela mesme la rendroit orgueilleuse: & valloit
bien mieus recepuoir Lollie: puis que n'ayant iamais
eu d'enfans, elle ne porteroit enuie, & seruiroit de
mere à ceux de son mary. Mais Pallas trouuoit c'est ad-
uantage en Agripine qu'elle attiroit quant & soy le
petit fils de Germanic; digne en tout & par tout de la
grandeur imperialle: qui ioindroit sa race tant noble
& ses descendans, avec la famille des Claudięs: de peur
que ceste Dame ayant fait preuue de sa fecondité, en
la fleur de sa ieunesse: ne portast l'excellence & renom
des Cefars, en vne autre maison. Ces raisons eurent
plus de force estans accompagnées des attraićts de
mignardise d'Agripine: laquelle souz couleur de pa-
renté venant souuent visiter son oncle, l'amadoua si
bien; qu'estant seulement preferée aux autres, & non
pas encorę espousée: elle vsoit ia de l'autorité &
puissance de femme: Car quant elle se sentit asséeuree
de son

de son mariage, elle feit desseing de plus grandes choses: brasse les nopces de Domice son fils qu'elle auoit eu de Gn. Enobarbe, & d'Octauie fille de Cesar: ce qui ne pouuoit estre accomply sans meschanceté: D'autât que Cesar auoit fiancé Octauie à L. Sillan. Et octroyât à ce ieune Seigneur (fort estimé d'ailleurs) de porter la marque pareille à ceux qui auoient triomphé; & faire de magnificques jeux de Gladiateurs: Il luy auoit donné occasion de se monstrier, pour acquerir la faueur & bien-veillance du peuple. Mais rien n'estoit difficile à ce Prince qui n'auoit volonté, iugement, ny haine; que celle qu'on luy mettoit en teste, ou commandoit d'auoir. Parquoy Vitellius cachant soubz le nom de Censeur ses ruses seruilles: & descourant de loing ceux qui estoient pour bien tost commander: A fin d'acquerir la grace d'Agripine se mesloit de ses affaires: semoit de mauuais bruits de Sillan: la sœur duquel nommee Iunie Caluine (belle dame à la verité, toutesfois hardie & affectée) auoit peu au parauant esté bru de Vitellius. Ce fut de là que commença l'accusasion: la diffamēt non pas d'inceste avec son frere, mais de ce que indiscretement ils faymoient. * Et Cesar mesme prestoit l'oreille aux soupçons semmez contre son gendre: d'autant plus volontiers qu'il portoit vne fort grande affection à sa fille. Or Sillan ne se doubant de telles embusches; & qui d'auenture estoit ceste annee Preteur, se trouua tout soudain par ordonnance de Vitellius, chassé du rang des Senateurs: combien qu'il y eût long temps que le Senat eut esté choisi; & la reueüe dictē Lustrum

XII. LIVRE DES ANNALES

faicte & arrestee. Quant & quant Claude rompit son alliance, & Syllan est contrainct renoncer au serment de son Magistrat: estant le reste du temps de sa Preture octroyé à Eprius Marcel.

Consulat de C. Pompee & L. Veran, harangue de Vitellius au Senat, pour faire trouuer bon le mariage des oncles & niepces. Complexions d'Agripine, mariage d'elle & de Claude: mort de Sillan.

CHAPITRE II.

S O V B s le Consulat de C. Pompee & L. Veran: le mariage d'entre Claude & Agripine se traiecta & accorda. Mais combien qu'il fut tenu pour asseuré tant par le bruiet cōmun, que par vn amour illicite: si n'osoient ils encores accomplir les solemnitez des nopces: ne se trouuāt par exemple qu'un oncle eut iamais espousé la fille de son frere: aussi que c'estoit vn inceste, lequel venant à estre reprouué & mesprisé, on craignoit qu'il n'en sortit de l'inconuenient au public. De faicet ceste doute ne fut laissée, iusques à ce que Vitellius se chargea d'en venir à chef, pour vn tour de son mestier. Car ayant demādé à Cesar s'il ne vouloit pas obeyr aux cōmandemens du peuple; s'il ne vouloit pas ceder à l'authorité du Senat: Apres qu'il eut respondu n'estre qu'un des citoyens, & trop foible pour resister à leur accord & cōsentement: Vitelli⁹ le fait attēdre dās le Palais: & de ce pas entre en la cour. Là où protestant qu'il auoit à dire qlque chose de tresgrande importāce pour l'estat, il requiert luy estre

estre permis de parler auât tout autre; & cōmença dire: Que les peines& grâds trauaux que le Prince souffroit au gouuernemēt de tout le monde: auoient besoin de support: afin qu'estant deliuré du soucy de ses affaires domestiques, il pourueut plus libremēt aux communes & publicques. Mais à la verité, quel plus honnestesoulagement sçauroit auoir l'esprit du Censeur, que prendre vne femme; pour estre sa compagne en toutes bonnes & dangereuses aduētures: à laquelle il peut communiquer ses plus secrettres pensees, à laquelle il peut donner en garde ses petits enfans: principalement luy non accoustumé à ses plaisirs ou voluptez: & qui dés sa premiere ieunesse s'estoit rendu obeissant aux loix. Apres qu'il eut ietté comme pour vne entree, ces belles & fauorables paroles: & les veit estre suiuiues d'une grande humilité & flatterie des Senateurs: en reprenāt son propos cōmécé il dit. Puis que tous estoiet d'aduis de marier le Prince il cōuenoit choisir vne femme remarquable en noblesse, couches d'ēfans & bōne vie. Et ne falloit faire plus longue enqueste, pour mōstrer qu'Agripine passoit toutes autres en excellēte noblesse de race. Que ja elle auoit fait preuue de sa fecundité: à quoy se rapportoit & accordoit bien sa façon de viure bonne & hōneste: Encores estoit ce belle chose, qu'estant (par la preuoyance des Dieux) veufue on la pouuoit allier au Prince, qui n'auoit iamais essayé d'espouser autres fēmes, que celles qu'il pouuoit auoir par raison. Qu'ils auoient ouy dire à leurs peres, & eux mesmes auoiet veu raur les femmes mariees, selō qu'il plaisoit aux Césars: chose biē esloignee de la modestie

XII. LIVRE DES ANNALES

du tēps present. Car au cōtraire il falloit monstrier par exemple comme l'Empereur deuoit prendre femme. Mais ce nous est chose nouuelle d'espouser les filles de noz freres : Toutesfois cela est ordinaire entre les autres peuples, & n'est deffendu par aucune loy. Aussi le mariage avec les cousines Germaines, ayant esté longuement incogneu; s'est depuis avec le temps practiqué par tout: car on se sert des coustumes & façons de faire, ainsi qu'elles sont profitables: De maniere que ceste sorte de mariage sera semblablement en vsage cy apres. Il n'y eut faute de gēs; qu'à l'enuy l'un de l'autre sortissent de la cour: iurans & declarans ouuertement, que si Cesar tardoit à s'en resoudre, ils vseroient de force. Avec eux se ioignit vne multitude d'hommes de toutes pieces: crians que le peuple Romain requeroit le semblable. Et Claude mesme sans plus attendre se presenta au For, deuant ceux qui se resioüissoient de ce mariage. Puis entrant au Senat: Il demanda qu'on fit vne ordonnance par laquelle il fut dit; que les mariages d'entre les oncles & niepees filles de freres, fussent estimez bons & vallables: mesmes pour l'aduenir. Et toutesfois il ne se trouua iamais qu'un seul, desirant tel mariage: nommé Tite Allide Seuer Cheualier Romain: que beaucoup disoiēt auoir esté pouffé à ce faire, pour cōplaire & gagner la bōne grace d'Agripine. La ville dès ceste heure là fut changee, & tout obeyssoit à vne femme: qui ne se ioüoit pas de l'estat Romain par debordemēs ou follastries, ainsi que Messaline: Mais c'estoit quasi avec aussi grāde subiection, que si l'on y eust esté cōdamné par iustice: * & encores
pour

pour seruir à vn homme. En public vous n'eussiez remarqué en elle qu'une seuerité & grauité: & bien souuent vne hautesse: en sa maison, rien d'impudicque: sinon entant qu'il estoit expedient pour commâder: Et sa desmesuree conuoitise d'amasser deniers, auoit vne couuerture, qu'elle mettoit à part vn fonds, pour s'en aider à maintenir l'estat. Le propre iour des nopces Sil-lan se donna la mort; soit que iusques là, il eut allongé l'esperance de sauuer sa vie: ou qu'il eut choisi ce iour, pour rendre le faiçt plus desaggreable & digne de haine: quant à sa sœur Caluine elle fut chassée d'Italie: Claude adiousta, que des sacrifices seroient faits selon les loix & ceremonies du Roy Tullus: & que les Pontifes donneroient des pardons en la Touffe du bois de Diane: mais chacun se mocquoit de ce qu'en ce temps là, on cherchoit à faire des punitions & purgations d'inceste.

Fiançailles de Domice fils d'Agripine avec Octauiæ fille de Claude, Agripine faiçt r'appeller d'exil Senecque: & la rusé dont elle usa pour faire espouser à Domice, son fils, Octauiæ fille de l'Empereur. Les Parthes demandent au Senat Meherdates pour estre leur Roy. Le mesme Meherdates mené en Parthe, par Cassius Lieutenant de Syrie. CHAP. III.



R Agripine ne voulât pas aquerir bruit, & estre cogneuë seulemēt par mauuais actes: obtī vn r'appel de bâ pour Anne^o Senecq̃, & quant & quāt la Preteure: estimant que

XII. LIVRE DES ANNALES.

le commun s'en resiouiroit; à cause de la grande renommée de son sçauoir: & aussi à fin que l'enfance de Domice, peut croistre iusques en l'adolescence, sous vn tel maistre: & elle vser de son conseil, pour paruenir à la grandeur de commander qu'elle esperoit. Car on auoit opinion, que Senecque seroit fidelle à Agripine, pour la souuenance du bien receu d'elle: Et vouloit mal à Claude: se ressentant du tort à luy fait. Par apres il fut aduisé de n'attendre point d'auantage: mais avec tresgrandes promesses ils poussent Memmius Pollion Consul arresté, proposer (comme par forme d'aduis) que Claude debuoit estre admonesté de fiancer Octaue à Domice. Ce qui n'estoit hors de raison, veu l'aage de tous deux: & pouuoit seruir d'ouverture à choses plus grandes. Ainsi Pollion vsant de presque semblables parolles que n'agueres Vitelius; conclud à ces fiançailles: & suyuant son aduis Octaue est accordée. Par ce moyen Domice estant (outre l'alliance premiere) desia fiancé de la fille; & puis gendre de l'Empereur, venoit à estre rendu esgal à Britannic par les brigues & menées de sa mere, & ruse de ceux qui ayans accusé Messaline, craignoient la vengeance que son fils en eut peu faire. Enuiron ce temps les Ambassadeurs des Parthes enuoyez comme i'ay dict pour demander Meherdates, entrèrent au Senat; & commencēt à dire leur charge en ceste façon: qu'ils estoient là venus, non par ignorance du traité passé, entre les Romains & eux: ne comme ayans quicté la foy & obéissance due à la maison des Arsacides; ains pour querre le fils de Vonones, le petit fils de Phrahates: à

fin de

fin de les deffendre cõtre la rude seigneurie de Gotarzes : autant insupportable à la noblesse qu'au peuple. Qu'estans ia mis à mort ses freres, ia ses plus proches patens, ia les plus esloignez depeschez: on y adioustoit les femmes grosses, & les petits enfans: pendant que luy que n'est qu'un fetard, casanier & malheureux en guerre, couure sa lacheté par cruauté. Qu'ils auoiẽt avec nous amitié ancienne, confirmee par traitté public: & falloit ayder aux alliez concurrents en puissance: & qui ne leur cedoient que par honnesteté. Que les enfans des Roys estoient pource baillez en ostage au Senat; à fin que venans à s'ennuyer de celuy qui cõmanderoit au pays, ils eussent recours au Prince & Senateurs, pour apeller & faire venir un meilleur Roy: par eux nourry & accoustumé à leur façon & maniere de viure. Apres qu'ils eurent discouru tels ou semblables propos: Cesar commença vne harangue; de la hauteſſe & magnificence Romaine, des bons offices receuz des Parthes: s'esgallant en cest endroit au diuin Auguste: & racontant comme iadis on luy estoit venu pareillement demãder un Roy: sans faire mention de Tibere, combien qu'il en eut semblablement enuoyé: Outre cela il donna aucunes instructions à Meherdates qui estoit là present: l'admonestant ne mettre pas en sa fantasie, d'estre un maistre commandant à des esclaves: ains un gouuerneur; & les autres ses cytoiens. Embrassant la clemence & Iustice, qui seroient plus agreables & supportables aux barbares, d'autant qu'ils ne ſçauoient quelles vertus c'estoient. Et sur ce point se tournant vers les

XII. LIVRE DES ANNALES

Ambassadeurs; il haut loüa la nourrisson de la ville: la modestie & discretion duquel, auoit esté experimenter iusques là: & toutesfois qu'il falloit endurer des complexions des Roys, aussi que les mutations frequentes ne sont profitables. Que l'estat Romain festoit ia tellement assouuy d'honneur & de gloire, qu'il desiroit le repos mesmes des nations estranges. Apres cela il commâde à C. Cassius gouuerneur de Sirie, cōduire ce ieune Prince iusques à la riue d'Eufrates. En ce temps là Cassius passoit tous les autres en la science des loix: Car l'art de la guerre est incogneu durant le repos, & la paix tient les vaillants & couards en egalle reputation. Toutesfois il remettoit en vsage la discipline ancienne, tant quel'abstinence de guerre le pouuoit porter: exerçoit les Legions: se monstroit aussi soigneux & pouruoiant, que si l'ennemy eut esté prest d'entrer sur luy: Car il pensoit que c'estoit chose digne de ses Ancestres & de la maison Cassienne; qui estoit mesme renommee entre ces peuples là. Ainsi donc estans semons de venir, ceux du consentement desquels le Roy auoit esté enuoyé demander à Rome, & le camp logé pres de la ville de Zeugma (qui est l'endroit ou la riuiere se peut le plus aysement passer) Cassius voyant que les principaux seigneurs Parthes & Abgarus Roy d'Arabie, estoient arriuez: remonstre à Meherdates, que les gaillardes bouttees des Barbares se refroidissoient en delaiant; ou se tournoient en trahison: à ceste cause qu'il poursuyuit viuement les choses commencees. Mais cela fut mesprisé par la fraude & malice d'Agbarus: qui arresta plusieurs iours en la ville

ville d'Edesse, ce ieune Roy peu experimété: & lequel pensoit que l'heur des grands Princes gist à se donner du bon temps. Et quand Carrhenes les aduertit de venir, monstrant que leurs affaires estoient prestes, & en bon estat; fils marchoiert habillement: au lieu d'entrer droit par Mesopotamie, ils prennent le tour d'Armenie; mal propre en telle saison: d'autant que l'hyuer commençoit. Puis apres s'estre lassez & trauaillez parmy les neiges & montagnes; approchans de la plaine ils se ioignirent avec les forces de Carrhenes. Et ayans passé la riuere de Tigre ils entrent au pays des Adiabeniens: le Roy desquels nommé Iuliates, s'estoit déclaré ouuertement allié de Meherdates, combien que sous main & avec plus grande fidelité il enclinaist au party de Gotarzes.

Gotarzes Roy de Parthe ayant vaincu Meherdates, & iceluy pris en bataille; luy faict couper le nez & oreilles. Les Mithridates ayant vsurpé le Royaume de Bosphore en chaste Coris. CHAP. IIII



NEANTMOINS Meherdates prit en passant la ville de Niniue; le plus anciē siege du Royaume d'Assirie: & vn chasteau fort renommé, à cause que la pres se donna la derniere bataille entre Daire & Alexandre: En laquelle fut du tout ruinee la puissance des Perfes. Cependant Gotarzes estant en la montagne Sambulon, faisoit des vœus & prieres, au dieux du lieu, le plus reueré desquels est Hercules: qui a certain temps ordonné, admoneste les Prestres en dormant, tenir pres

H

XII. LIVRE DES ANNALES

le temple des cheuaux enharnachez, pour seruir à la chasse. Quand ces cheuaux fût chargez de carquois plains de fleches, ils vaguent par les bois: & la nuict retournent les carquois vuides bien fort halletans. Lors de rechef le Dieu declare en songe; en quel bois ils ont couru, & l'on trouue çà & là des bestes gifans mortes. Au demourant Gotarzes n'ayant encores assez fortee armee, se seruit de la riuere de Corme, comme d'un rampart. Et combien qu'il fut semons tant par moqueries, que messagers; de venir au combat: Il dilayoit tousiours; changeoit de logis; enuoyant gens pour corrompre & gagner par argent ses ennemis. Entre lesquels Ezeates Adiabienien, puis Agbarus Roy des Arabes, s'en vont avec leur armee: suiuant la legereté accoustumee entre ceux de leur nation. Et pource aussi que l'on a congneu par experience, que les Barbares aiment bien mieux venir à Rome chercher vn Roy, que le laisser commander en leur pays. Or Meherdartes denué de si grand & puissant secours, se doutant d'estre trahy par ceux qui restoient; voyant qu'il ne pouuoit faire autre chose, delibere mettre son fait en hazard, & essayer la bataille. Gotarzes aussi ne refusa le combat, estant enfiery par l'affoiblissement des ennemis. La rencontre fut fort sanglante & l'euénement douteux: iusques à ce que Carhenes ayant mis en route ceux qu'il auoit en teste & s'estant trop elloigné, fut enclos par derriere & tué par vn hot de gens frais. Alors toute esperance perdue, Meherdartes se fiant aux promesses de Phrahates vassal de son pere, fut par sa meschaceté & trahison fait prisonnier: & liuré au Roy victorieux:

etorieux. Lequel luy reprochant amèrement, qu'il n'estoit pas son parent ne de la race d'Arfaces; ains estrange & Romain; le laissa viure luy ayant faict couper les oreilles: pour dōner à cognoistre sa douceur & faire honte à nostre nation. Apres cela Gotarzes mourut de maladie: & Vonones lors gouuerneur de Mede fut appellé au Royaume. Cestuy-cy n'eut, ny bōnes ny mauuaises aduētures, pour faire parler de luy: car il tint le Royaume peu de temps, & sans grand hōneur: & la seigneurie des Parthes fut transportee à son fils Vologeses. Mais Mirhridates de Bosphore, qui apres auoir tout perdu vagoit çà & là, estant aduertty que Didius chef des Romains, & la principale force de l'armee s'estoit retiree: & qu'en ce nouveau Royaume auoient esté laissez Cotis (encores apprenty en telles affaires, à cause de sa ieunesse) & quelque peu de compagnies sous la charge de Iulie Aquile Cheualier Romain; mesprisant l'un & l'autre esmeut les nations: attire gens à son party: & finalement ayant assemblé vne armee, chasse le Roy des Dandarides, & se faict maistre de son Royaume: Ce qu'ayant esté descouuert (pour ce que d'heure à autre on pēsoit qu'il vint assaillir le Bosphore) Aquile & Cotis se deffians de leurs propres forces (car Zorzines le Roy des Soraces s'estoit déclaré ennemy comme deuant) cherchent aussi la faueur & support des estrangers: enuoyans des Ambassadeurs vers Eunones, qui estoit le plus estimé d'entre le peuple des Adorfes. L'alliance ne fut pas malaisée à traicter: ayans monstré qu'elle estoit la puissance des Romains, au pris de celle du re-

XII. LIVRE DES ANNALES

belle Mithridates . Parquoy ils accorderent que Eunnones auroit la charge de la cauallerie, quād il faudroit combattre, & les Romains d'assieger les villes. Lors ayans dressé l'ordre de leur armee, ils marchoiēt en telle façon: que les Adorces auoiēt l'auant & arriere-garde: & les cohortes Romaines avec les Bosphoriens (armez à nostre façon) tenoiēt la bataille: par ce moyen fut l'ennemy repoussé: & l'on vint iusques à Soze ville de Dandarie, laquelle abandonnee par Mithridates, l'on aduisa de la garder, y laissant garnison: pour ce que l'on doutoit de la fidelité des habitās. Depuis ils s'ache minēt vers les Soraques: & passans la riuiera Pāda enuironnerēt la ville d'Vspe, assize en lieu haut fortiffiee de murs & fossez: excepté que les murs n'estans de pierre, ains de clayes ou pieces de bois iointes ensemble avec de la terre entre deux, estoient trop foibles pour resister à la force des assaillans. Aussi quād l'on eut approché les tours plus hautes que ses murailles: les Romains estans dedans, avec flambeaux & lōg bois, mettoient les assiegez en desordre: tellemēt que si la nuit n'eut separé la meslee, la ville eut esté assaillie & prise en mesme iour. Le lendemain les assiegez enuoyerent gens demander pardon pour les hommes de franche condition. Ils offroient aussi dix mille esclaves; que les victorieux refuserent: car c'eust esté cruauté de les tuer festans rendus: & grāde difficulté de garder telle multitude: Et pour ce il valloit mieux qu'ils mourussent pour le droict de la guerre. A ceste cause le signal de tuer tout, fut donné aux soldats: qui auoiēt eschellé les murailles.

Mithridates

*Mithridates abandonné de Zorzines Roy des Soraques,
se rend à Eunones Roy des Adorfes: allié des Romains:
Et ayant faict sa paix il vint à Rome:*

CHAPITRE V.



A destruction des Vpsaces donna crainte au reste, qui pésa n'yauoir rié d'asseuré, puis que les armes, rampars, les lieux malaisez & hauts: les villes & riuieres estoïent forcées, & trauersees de mesme impetuosité. Parquoy Zorzines ayant lôguement pesé & consideré, sil deuoit plustost pouruoir ou à l'extreme necessité de Mithridates; ou à son Royaume paternel: Apres q̄ l'vtilité de son peuple l'eut emporté; ayât dōné ostages se vint ietter deuât l'image de Cesar: avec grād hōneur & gloire de l'armee Romaine: laquelle sans meurdre des siés & victorieuse, approcha (ainsi que tous sont d'accord) à trois iournees pres la riuiere de Tanais. Mais au retour, la fortune ne fut pareille. Car aucunes nauires qui venoiēt par mer, estans portees en la coste des Tauriens, furent surprinses des Barbares: qui tuerent le Prefect d'une cohorte, & bonne partie des Centeniers. Cependant Mithridates ne trouuant aucun support aux armes: delibere de qui il doit esprouuer la misericorde. Il craignoit Cotis son frere lequel autresfois l'auoit trahy, & maintenant estoit son ennemy. Quant aux Romains il n'y auoit aucun en l'armee de si grande autorité, que l'on deust beaucoup estimer sa parolle. En fin il s'adressa à Eunones son ennemy particuliers: mais qui au moyen de l'amitié tout nouuellemēt cōtractée

XII. LIVRE DES ANNALES

avec nous, auoir plus de credit. Ainsi donc ayant pris
 l'habillement & visage, le plus conuenable à sa fortune
 presentée, il entre au palais Royal : & s'estant ietté à
 ses genoux. Voicy (dit-il) Mitridates, que les Ro-
 mains ont cherché tant d'annees par mer & par terre,
 qui se presente à vous de son bon gré: faictes ce q̄ vou-
 drez d'un homme descendu de la race du grand Ache-
 mentes, qui est tout ce que les ennemis ne m'ont sceu
 oster. Mais Eunones esmeu à pitié, par la grandeur de
 l'homme, la mutation de sa fortune, & sa priere qui
 ne sentoit son cueur bas, releue ce suppliant: & le louë
 de ce que pour obtenir pardon, il auoit choisi le peu-
 ple des Adorles & sa foy & loyauté. Quant & quant il
 enuoye des Ambassadeurs à Cesar: avec lettres de telle
 substance. Que la premiere occasion d'alliance & ami-
 tié des Empereurs du peuple Romain, avec les Roys
 des autres grandes nations, venoit d'une equalité de
 grandeur: mais que celle de luy & de Claude proce-
 doit, a cause d'une victoire acquise en commun. Que
 les issues de guerre, estoient excellentes: toutesfois &
 quantes l'accord se faisoit en pardonnant. Que suyuant
 cela aucune chose n'auoit esté ostée à Zorzines vaincu.
 Au regard de Mitridates, puis qu'il meritoit d'a-
 uoir pis: Il me demandoit pour luy, ne puissance ne
 Royaume. Ains seulement qu'il ne fust point mené en
 triomphe, ne puny de mort. Or encores que Claude
 fut doux enuers la noblesse estrangere; il fit neantmoins
 quelque difficulté: si seroit meilleur de recepuoir ce
 prisonnier, à condition d'auoir la vie sauue; ou si le
 redemanderoit par armes. D'un costé le creue-cueur
des

des torts & iniures receues; & le desir de s'en venger le pouſſoient: mais on diſcouroit au contraire; qu'il faudroit aller faire vne guerre, par des chemins deuoyéz: en mer qui n'a point de ports: Et encores contre des fiers Roys, peuples vagabons: & en terre ou il ne croiſt guerre de fruiçts ne de bleds. Et puis la longueur ap- porteroit de l'ennuy & ſe haſtant y auroit du dâger: & peu d'honneur pour les victorieux: mais beaucoup de honte ſils eſtoient repouſſez. Que n'embrassoit il donc ces offres: & gardoit ce banny; lequel eſtant pauvre, d'autant plus qu'il viuroit longuement, endureroit pluſ-grande punition. Ces raiſons l'ayant eſmeu: Il eſcriuit à Eunon: que certainement Mitridates meritoit telle punition, qu'elle peut ſeruir d'exemple. Et n'auoit (quand à luy) faute de puissance pour exécuter ſa volonté. Toutesfois que les anciens Romains auoient trouué bon; vſer d'auffi grande opiniſtreté & perſeuerence, contre leurs ennemis; que de courtoisie & de bonnaireté à l'endroit de ceux qui ſe rendoient à leur mercy: car les triomphes ſaqueroient des peuples & Royaumes entierement vaincuz. Apres cela Mitridates eſt liuré: & ayant eſté mené a Rome. par Iunius Colon Procurateur du pays de Pont: il parla (comme l'on dit) plus brauement à Ceſar que ne requeroit ſa fortune. Et fut raporté au peuple, le langage qu'il tint en telles parolles: l'on ne m'a enuoyé vers toy: mais i'y ſuis retourné de mon gré: & ſi tu ne le crois laiſſe moy aller, & puis vien me chercher. Encores il n'aparut en ſon viſage; aucun ſigne de crainte; quand entourné de ſes gardes, on le monſtra au peuple; loignant les

XII. LIVRE DES ANNALES

esperons des nauires appelez Rostres. Pour ces choses, les marques & enseignes consulaires furent ordonnées à Collô : & celle de Preteur à Aquile. Sous les mesmes Cōsuls Agripine cruelle enuers ceux qu'elle haïssoit : & ennemie de Lolia, pour auoir contre elle debatù pour le mariage du Prince, luy prepara des crimes, & vn accusateur qui luy mettoit sus qu'elle croyoit aux deuins Caldees & auoit interrogé l'image d'Apollon Clarien; touchant le mariage de l'Empereur. Apres cela Claude sans ouyr ceste criminelle, ayant en plain Senat, dit beaucoup de choses de sa noblesse : & qu'elle estoit fille de la soeur de L. Volusius : que Cotta Messalin estoit son grand oncle paternel : & qu'autre fois elle auoit espousé Memmius Regulus (car il teut expressement son mariage avec C. Cesar) il adiousta qu'elle se mesloit d'entreprises dangereuses pour la Republique : & qu'il falloit oster tout subiect & matiere de mal faire. Qu'elle eut à vuidier d'Italie; & que ses biens fussent confisquez. Par ce moyen il ne demeura à ceste bannie, que cinquante mil Sesteres, * de ses biens grands à merueille. Calpurnie femme de tres-noble maison, fut semblablement detruicte, pour ce que le Prince auoit loué sa beauté: non par affectiō amoureuse, ains par vn propos d'auenture, qui fut la cause que Agripine ne passa outre, iusques à luy faire du pis qu'elle eut peu. Quant à Lolia, on luy enuoya vn Tribut pour la contraindre de mourir. Cadius Rufus accusé par les Biriniens, fut aussi condanné pour deniers mal pris : & en cōsideration de la grāde reuerēce que les habitās de la Gaule Narbonoise, portoiēt
au Senat

au Senat: il fut permis aux Senateurs de ceste prouince, q̄ sans demander cōgé à l'Empereur, ils pourroient aller voir leurs biens; par mesme priuilege que ceux de la prouince de Sicile. Les Itureans & Iuifs apres la mort de leurs Roys, Soheme, & Agrippe furent ioints à la prouince de Sirie. L'on conclud au Senat que l'augure de Salut, delaisié par vingt cinq ans: seroit remis sus à cōtinué à l'aduenir. Et l'éeinte de Rome appelée Pommerium, fut augmentée par Cesar suyuant la coustume ancienne: qui donne puissance à ceux qui ont agrandy l'Empire, auācer aussi les bornes & limites de la ville. Ce que toutes fois les Capitaines Romains, encores qu'ils eussent vaincu de puissantes nations n'auoient entrepris faire: hors L. Silla, & le diuin Auguste. Pour le regard des Roys il est incertain s'ils l'ont fait par conuoitise d'honneur, ou par gloire vrayement acquise, d'autant que l'on en a escript diuersement. Mais ce ne sera chose impertinente (comme ie croy) de scauoir ou cōmança de bastir, & quelle enceinte Romulus donna premieremēt à Rome. Ainsi donc depuis le marché aux bœufz, auquel nous voyons l'image d'un taureau d'airain (car c'est vn animal propre à la charue) fut commencé le rayon pour aligner & marquer la ville, de sorte qu'il comprenoit dedans soy, le grand autel d'Hercules. De la à certains espaces furent mises & entreiettees des pierres, par le bas de la montaigne Palatine: iusques à l'autel de Confus: apres aux vieilles Curies: & puis à la chappelle des Lares. Car l'on pense que la place nommée le For Romain & le Capitole; n'ont pas esté ioincts à la

XII. LIVRE DES ANNALES

ville par Romulus ains par Tullius. Depuis l'enceinte de Rome s'est augmentee selon les richesses & bonne fortune de la ville. Quant aux bornes que Claude planta lors, elles sont aisees à cognoistre: & se trouuent escriptes dans les iournaux publics.

*Cōsulat de C. Antistius & M. Silius, Claude adopte Domice
fils d'Agripine: laquelle donna aussi son nom à vne ville
des Ubien, aujourdhuy nomme Collogne. Les Ca-
thes ayans couru le pays des Romains sont telle-
ment battus par L. Pompon; qu'ils enuoye-
rent ostages à Rome. Vannius chassé
de son Royaume se retira vers
les Romains. CHP. VII.*



STANS Consuls C. Antistius & M. Silius: l'adoption de Domice, fut haïee par l'autorité & credit de Pal las. Lequel suiuant du tout le party d'Agripine (cōme ayāt esté moyen- neur de son mariage; & depuis enco- res se tenant plus vny avec elle pour la iouyssance qu'il en auoit eüe) pressoit Claude de pourueoir à la Repu- blique: enuironner l'enfance de Britannic de force & puissance: qu'en telle façon florirent iadis pres Auguste les fils de sa femme: encore qu'il fut appuyé des enfans de ses enfans: & que Tybere outre les siens propres & nez de son corps, auoit adopté Germanic: partant qu'il s'armast aussi de ce ieune homme: lequel prendroit sur soy vne partie des affaires. Ainsi Claude vaincu de ses raisons

raisons, fit passer deuant son fils, Domice plusaagé seulement de deux ans: apres qu'il eut prononcé au Senat; vne harangue en la façõ qu'il l'auoit receuë de son affranchy. Les sçauãs remarquoient qu'il ne se trouuoit aucune adoption, auoir esté faicte auparauant, en la famille Patricienne des Claudiës. Et qu'ils auoient tousiours succédé les vns aux autres, depuis Attus Clausus. Au reste l'on remercia le Prince avec tres-exquises flatteries à l'endroiẽt de Domice: & encores le peuple fut requis d'accorder vne loy: par laquelle il estoit receu en la famille Claudienne & pouuoit prédre le nom de Nerõ. Agripinẽ aussi est honnoree & magnifiée du surnom d'Auguste. Ces choses accõplies, il n'y eut hõme si peu misericordieux qui ne fut atteint de douleur, voyãt l'estat auquel se trouuoit Britannic. Et puis estant peu à peu abandonné mesmes de ses officiers serfs, * lesquels caressoient plus que de raison sa belle mere; il apperceut bien qu'on se mocquoit de luy: ayant descouuerte leur faux semblãt. Car on dit qu'il n'auoit point lourd esprit, soit que laverité fut telle, ou que sa mauuaise fortune l'ayãt fait estimer il en ait acquis le bruit: sans l'auoir monstré par experience. Or Agripine, pour faire semblablement cognoistre aux alliez, son pouuoir & autorité; cõmanda mener en vne ville des Vbiens (où elle auoit pris naissance) de vieils soldats, & vne peuplade de gens: laquelle fut appelée de son nom. Encores il estoit escheu d'auanture, que quãt ceste natiõ passa le Rhin, son ayeul Agrippe la receut en sauuegarde & fidelité. Au mesme temps, il y eut quelque effroy en la haute Allemaigne, pour la venuë des Cathes, faisans

XII. LIVRE DES ANNALES

des courſes. A cauſe dequoy, L. Pōpone Lieutenāt ad-
uertit le ſecours de ceux de Vormes, & Spire, avec les
gēs de cheual alliez, deuācer ces pillarts: ou ſils eſtoiet
eſcoulez, les enclorre ſans qu'ils ſ'en apperceuſſent.
L'habillētē des ſoldats ſeconda l'entreprinſe & conſeil
de leur capitainē: car ſ'eſtans diuiſez en deux troupes
ceux qui eſtoiet allez par le chemī gauche, ſurprirēt les
ennemis retournez fraiſchemēt de la courſe, ayās mal
uſē de leur buttin: & appesantis de ſommeil. La ioye de
ceſte rencontre en fut plus grande, pour ce qu'ils reti-
rerent de ſeruitude, aucuns de leurs gens quarante ans
apres qu'ils auoient eſtē pris, en la deſſaiētē de Varus.
Mais ceux qui eſtoiet allez par les dextres & plus cour-
tes addreſſes, rencōtrans l'ennemy en teſte qui oſa biē
venir aux mains, firent plus grand carnage: & chargez
de butin, & d'honneur, retournerent au mōt Taunus,
où Pompone avec les legions, attendoit ſi les Cathes
deſirans venger leur perte, dōneroient occaſion de ve-
nir à la bataille. Mais eux craignans que d'un coſtē les
Romains, & d'autre les Cheruſces (avec leſquels ils
ſont en perpetuel diſcord & inimitié) les aſſaillirent de
toutes parts, enuoyerent des Ambaſſadeurs & oſtages
iuſques à Rome: où l'honneur de triomphe fut ordōné
à Pompone: qui eſt le moins de la renōmee par luy ac-
quiſe, enuers ceux qui ſont venuz apres luy: eſtāt plus
eſtimé par la gloire & louānge de ſa poēſie. En meſme
tēps auſſi, Vannius que Drulius auoit fait Roy des Sue-
ues, eſt chaffē de ſon Royaume; iācoit que du cōmēce-
mēt de ſon regne il eut eſtē fort priſē, & agreable à ſō
peuple: mais depuis ſa lōgue ſeigneurie l'ayant fait de-
uenir

uenir orgueilleux il fut trahy: tāt pour s'estre faiēt hayr de ses voisins, que la partialité de ceux de sa maison. Les chefs de la menee furēt Iubillius Roy des Hermūdures Vannio & Sidon enfans de la sœur de Vannius. Claude mesme encores qu'il en fut souuent prié, ne voulut entremettre ses forces, durāt que les Barbares se guerroyerēt: promettant à Vānius vne seure retraicte s'il estoit chassē. Et escriuit à P. Atili⁹ Hister gouuerneur de Pānonie, loger sus le riuage de la Dunoē vne legiō, & les cōpagnies leuees en la mesme prouince, pour aider aux vaincus, & dōner crainte aux victorieux: de peur qu'en flez de leur bōne aduantage, ils ne troublassent encores nostre repos. Car vne puissance infinie, de gens nōmez Liges; & autre nations, s'approchoiēt: esmeuēs de la renommee du riche Royaume, que Vannius durant trente ans auoit accru par larcins & impositions. Les forces de Vannius consistoient en gens de pied ses subiects: ceux de cheual, estoient Sarmates Iaziges, trop foibles: pour le grand nombre des ennemis. Qui estoit la cause pourquoy, il auoit deliberé se tenir dans ses forts: & tirer la guerre en longueur: mais les Iaziges, n'ayans la patience d'endurer les incommoditez des sieges: vagans par la campagne, contraignirent Vannius de venir par necessité au combat, pour ce que les Liges & Hermundures se presentoient pour entrer de ce costé. Ainsi donc Vannius sortant de ses forts, perdit la bataille. Et toutesfois il acquit l'honneur en ce malheur: ayant faiēt preuue de sa personne en combattant: & receu des playes par deuant. Au reste il se sauua en des vaisseaux qui l'attendoiēt sus la Dunoē

XII. LIVRE DES ANNALES.

& ses partisans ou vassaux qui le suyurent puis apres, ayans receu des terres pour habiter, furent logez en Pannonie. Quât à son Royaume Vangion & Sidon le partagerent entre eux: se monstrans tref-fidelles en nostre endroit: toutesfois soit pour leurs complexiôs, ou le naturel de ceux qu'on tient en seruage; leurs subiets les ayans aymez & cheriez grandement, pendant qu'ils paruindrent au Royaume, les prirent en plus forte haine, apres qu'ils en furent iouissans.

Ostorius gouverneur de la grand Bretagne gaigne vne bataille sur les Icenies, la Colonie de Camalodum est edifiee, Ostorius vainquit & prit en bataille Caractac Roy de Bretagne, & l'enuoye a Rome, guerre des Romains contre les Siluces. Mort d'Ostorius lieutenant general des Romains.

CHAPITRE VII.



A V T R E costé P. Ostorius Propreteur arriué en Angleterre, trouua l'estat du pays troublé: pource que les ennemis s'estoient d'autant plus fort espandus par la campagne des alliez, qu'ils pensoiēt que ce nouveau chef, ne cognoissant encores son armee, ne voudroit si tost apres la venue (& encores à l'entree de l'hiuer) se mettre aux champs pour les empescher. Mais luy sçachant bien que les premiers euenemens, ont accoustumé de donner cœur ou apporter crainte; iette vitement ses compagnies aux champs: & ayant taillé en picce ceux qui luy firent teste, poursuiuit ceux qui estoient desbandez

bandez, de crainte qu'ils ne se ralliaffent. Et à fin q̄ sous ombre d'une paix fourree, ils ne luy donnassent soucy, & peine à ses soldats, il desarma ceux qui luy estoient suspectz: & les ayât environnez de chasteaux & garnisons, il sapresta pour les garder de passer outre les rivières de Sabrine & Antone. Ce que tous premiers ne voulurent souffrir les Icenien: puissante nation qui n'auoit point encores esté trauaillée de guerre, d'autât qu'elle s'estoit volontairement rengee à nostre alliance. A la suscitation de ceux cy, tous les peuples voisins choisirent vn lieu pour le combat: clos d'une iettée de terre, telle qu'il s'en trouue par les champs: & ayant l'aduenue estroite pour garder les gens de cheual d'y entrer. Combien que le Capitaine Romain n'eut avec luy le gros des legions, ains seulement des gens de secours: Il sapresta neantmoins pour forcer ces deffences. Et ayant ordonné ses cohortes, il met aussi en point les troupes de cheual, pour faire ce qui estoit necessaire. Le signal donné ils rompent incontinent le rampart: & mirent en desordre les ennemis embarassez dans leur enclos mesme: lesquels se sentans coupables de rebellion, & les passages de leurs retraicte bouche, firēt de grans & beaux faict d'armes. En ce cōbat M. Ostorius fils du lieutenant general, acquit l'hōneur d'auoir sauué la vie à vn citoyen Romain. Au demeurant la deffaicte des Icenien: tindr cois ceux, qui doutoient de faire paix ou guerre. Et l'armee fut conduite contre les Canges, leur compagnie gastee & pillée par tout: pource que les ennemis n'osoient se presenter à la bataille, ou si par surprise (quelle fois) ils pen-

XII. LIVRE DES ANNALES

soiēt attrapper aucun de la suyte & ataq̃uer l'armee des Romains; ils auoient esté chastiez de leurs ruses. Ia l'armee Romaine, approchoit non gueries loing du riuage de la mer regardant Irlande, quand les troubles qui s'emurent entre les Brigantes, firent retourner le Lieutenant general: resolu de ne faire nouuelle entreprise, qu'il n'eust assurees les premieres. Quant aux Brigantes, apres la mort d'un peu d'entre eux qui commençoient à prendre les armes, voyans qu'on auoit pardonné au reste ils s'apaiserent. Le peuple des Silures ne peut estre gardé de faire la guerre; pour cruauté ne pour clemence: & le fallut tenir en subiection avec garnisons de legionnaires, pourquoy faire plus aisement & promptement, vne Colonie ou peuplade d'un bon nombre, de viels gens d'armes, nommee Camalodum fut menée au pays conquis, pour seruir de renfort contre les rebelles & accoustumer les alliez à viure selon les loix. De la on marcha contre les Silures lesquels outre leurs naturel farouche, se tenoient forts sous l'appuy de Caratact: que plusieurs bonnes, plusieurs mauuaises aduentures auoient auancé & faict estimer par dessus tous autres Capitaines Bretons. Mais nonobstant qu'en ruse & cognoissance du pays il eut l'aduantage; se trouuant lors toutesfois le plus foible de gens, il destourne la guerre en Ordouuic. *Et ayant ioint ceux qui redoutoient la paix, que nous leur donnerions, resolut essayer vne derniere aduenture: choisissant vn lieu pour la bataille: l'entree & l'issüe duquel nous estoit fort malaisée & plus aduantageuse pour les siens. Lors sus les plus hautes montagnes & aux lieux

qu'on

qu'on pouuoit approcher aisément, ils mirent des pierres comme pour vne closture ou pallis, deuant couroit vn ruisseau, les guez duquel estoient mal assurez, & si encores il tenoit pres de ses deffences, vne bonne troupe de ses * meilleurs soldats. Outre cela les Capitaines & chefs des nations tournoient leurs troupes: les encourageoient, les assureoient, & leur ostoient la crainte: donnans esperance de victoire, & faisans autres viues remonstrances, dont l'on vse à la guerre. Et encores Caractac courant çà & là protestoit: que ce iour là, & ceste bataille deuoit estre le commencement du recouremēt de leur frâchise, ou seruice perpetuel. Il appelloit aussi en son aide ses predecesseurs qui chasserēt hors de l'Isle le Dictateur Cesar, la vertu desquels les ayant exēptez, de la subiectiō des haches, & tribus des Romains, ils iouissoiēt frâchemēt de leurs fēmes & enfans, sans qu'ils eussent esté outragez en leurs personnes. Le peuple luyoyāt dire telles ou semblables paroles, menoit grād bruit à l'étour de luy. Et s'obligea chacun, par la foy q̄ il deuoit à ses dieux, qu'il ne reculleroit pour armes ne pour blessures. Ceste allegresse estōna le chef des Romains: quāt & quāt la riuiera qu'il auoit de uāt soy, outre cela le rāpart & les mōtagnes qui cōmādoient à son armee, ne voyāt riē qui ne fut effroyable & plain de gēs de deffence, l'espouuētoiēt. Mais le soldat Romain demādoit la bataille; crioit que toutes choses pouuoient estre forcees par vaillance: & les Prefets & Tribūs, faisans mesme discours renforçoiēt l'ardeur & le bō courage de l'armee. Lors Ostorio ayant cōsidéré ce q̄ estoit impossible, & ce q̄ estoit aisé à gagner, mene

XII. LIVRE DES ANNALES

cōtre les ennemis, ces gēs courroucez & entalétez de bien faire: lesquels aussi avec peu de difficulté trauerferent la riuere. Al'abborder du rampart & tant que l'on cōbatit avec le traiçt, il y eut plus de noz gēs blesez & beaucoup de tuez. Mais depuis qu'ayans fait vne voute de leurs escus ilz eurent tiré çà & là, les pierres du rampart, bruttes & mal ioinctes: & que les bataillōs vindrent à se trouuer l'un pres de l'autre sans aduantage, alors les ennemis se retirerent au sommet des montaignes. Toutesfois les gens de traiçt armez à la legere appelez Ferentaires, & les corcelets dōnerent iusques à eux; les vns les assaillans roidement à coups de traiçt, & les autres marchās ferrez, trouuerēt au contraire les rangs des Bretons ia desordonnez: lesquels n'estans couuers de cuirasses ny fallades, resistoient aux gens de secours à coups d'espees & armes de long bois. Ceste victoire fut grande & remarquable: & la femme & la fille de Caractac ayans esté prises, ses freres se rendirent à nostre mercy. Quand à luy suyuant l'ordinaire des malheureux (qui ne trouuēt pas volontiers seure retraicte) ayant eu recours à la fidelité de Cartimande Royne des Brigantes, il fut arresté prisonnier & liuré aux victorieux: neuf ans apres la guerre cōmencee en la *grand* Bretaigne. Que fut la cause, pourquoy sare nōmee ayant passé iusques aux Isles, & couru par les provinces voisines, le fit aussi prisoner en Italie. Et plusieurs desiroient sçauoir qui estoit cest homme, qui par tant d'annees auoit mesprisé noz forces. De sorte que dans Rome mesmes, Caractac n'estoit pas peu estimé. Aussi Cesar, voulant agrandir l'honneur de soy-mesme aug-
menta

menta la gloire du vaincu. Car le peuple fut appelé pour le voir comme chose remarquable les: Cohortes de la garde imperiale, furēt reengees en armes, au chāp qui est deuāt le fort de la garnison, & lors apres que l'ō eut fait passer les moindres vassaux du roy, l'on fit porter les bardes & caparassons de ses cheuaux: ses Carquans & coliers, & tout ce qu'il auoit cōquis en guerre sus les estrangers: puis ses freres, la femme, & la fille, finalement luy mēme fut monstré. Les prieres des autres ne sentirent point la noblesse de leur maison; tant ils se mōstrerent craintifs. Mais Caractac sans auoir ou le visage baissé, ou que par ses parolles, il requist qu'on eust pitié de luy: quand il se trouua pres du tribunal parla debout en ceste façon. Si tout aussi grande que fut la noblesse de ma maison & mon bō heur, telle eut esté ma discretion au meilleur de mes prosperitez; ie fusse plustost venu en ceste ville comme amy & allié, que prisonnier: & tu n'eusses desdaigné receuoir avec traitté de paix, vn Roy descēdu destresnobles ancestres, & cōmandement à plusieurs natiōs. Or tout ainsi que l'estat auquel ie me trouue à present est hôteux pour moy, aussi est il magnifique & honnorable pour toy. I'ay eu autrefois des cheuaux, des hommes, des armes, & des moyens: quelle merueille est-ce si ie les ay perduz enuys. Car si vous autres voulez commander à tout le monde, il sensuit que tous deuiennent voz subiects. Si m'estant incontinent rendu, i'eusse esté mis entre tes mains; ne ma fortune, ne ta gloire feroient pour cela plus remarquables à l'aduenir: & vne oubliance suyuroit mon execution: là où au con-

XII. LIVRE DES ANNALES

traire si tu me laisse la vie, ie seray pour iamais vn exemple de ta debonnaireté. Là dessus Cesar luy pardonna, & a sa femme, & à ses freres. Lesquels ayans esté dechainez allerét aussi deuant Agripine (que l'on voioit la pres, haut montee sus vn autre eschaffaut) luy faire la reuerence : & la remercier avec mesmes loüanges que l'Empereur. Chose nouuelle à la verité, & contre la coustume & façon de faire des anciens: de voir vne femme assise entre les estandarts & enseignes Romaines : mais elle se maintenoit estre compagne de l'Empire, aquis par ses predecesseurs. Apres cela les Senateurs estâs appelez, firét de longs & magnifiques discours sus la captiuité de Caractac: laquelle ils disoient estre non moins digne de memoire: que quâd Siphax par P. Scpion & Perfes par Paulus: ou quelques autres Capitaines, monstrenrét iadis au peuple Romain des Roys vaincus. Les ornements de triomphe sont ordonnez à Ostorius, auquel la fortune auoit esté iusques la fauorable & heureuse: & tout incontînêt apres incertaine & douteuse: soit que Caractac ny estât plus: noz gens menassent la guerre plus lachement, comme s'ils l'eussent tenue pour acheuee: ou que les ennemis ayâs pitié d'vn si grâd Roy, se fussent plus aigremēt eschauffez pour la vengeance. Car ils enuironnerét le prefeët de camp, & les cohortes legionnaires laissees, pour bastir des forts au pays des Silures. Et si ceux qui estoiet aux villages & garnisons voisines, ne fussent bien tost venuz au secours; il ne fut rechappé vn seul de l'armee. Toutesfois le Prefeët, huiët, ceteiniers, & tous les plus vaillans & hardis Manipules y demeurerét. Encores peu apres ils mirent en route noz gés qui fourageo iët

& meſmes les compagnies de cheual, qu'on leur auoit baillees pour eſcorté. Lors Oſtorius ietta habillement au châps aucunes cohortes deſchargees de bagage : & neâtmoins il ne pouuoit arreſter la fuite; ſi les legions n'euffent ſouſtenues la charge: la force & vertu deſquel les rēdit le cōbat egal: & puis les noſtres eurēt du meilleur. Auſſi les ennemis ſē fuirēt avec peu de perte, pour q̄ le Soleil ſ'abaiſſoit. Deſlors en auant il y eut pluſieurs rencontres, reſemblans plus ſouuēt à courſes de bandoulliers, pource que c'eſtoit par les bois & mareſts, ainſi que la fortune ou leur vaillāce en donnoit occaſion. Quelque fois auſſi remerciemēt & ſans y auoir pēſé, maintenāt par colere & autrefois pour gagner, quelquefois par le cōmandement, d'autres ſans le ſceu de leurs chefs. Enquoy l'opiniaſtreté des Silures apparriſſoit d'auātage, eſtās irritez pour vne parole de l'Empereur Romain, qui couroit entre le peuple: à ſçauoir q̄ tout aīſi q̄ les Sycābriēs furēt deſtruits & trāſportez en Gaule; il falloit totalemēt eſtindre le nō des Silures. Ainſi dōc, ils ſurpirēt deux cohortes de gēs de ſecours q̄ par auarice de leurs Capitaines, fourrageoiēt trop indiſcretemēt. Deſquelles ayās donnē les deſpouilles & les priſonniers ils faiſoiēt auſſi rebeller le reſte des nations. Quād ſus ce point Oſtorius trauaillē d'ēnuy, vint à mourir, dōt les ennemis furēt bien fort reſiouys, cōme ſi ce Capitaine aſſez renōmé, eut eſté emportē ſinō en bataille; a tout le moins par le moyē de leur guerre. Mais Ceſar aduertiy de la mort de ſon lieutenant; à fin q̄ la province ne fut ſās gouuerneur, mit en ſa place A. Didius, le quel ayāt deſpeſché chemin, ne trouua pour cela les choſes en leur entier : ayant ce pendant la

XII. LIVRE DES ANNALES

legion que Manlius Valens conduisoit, perdu vne bataille: de laquelle les ennemis faisoient courir le bruit plus grand qu'il n'estoit: pour estonner ce Lieutenant qui venoit. Et encores luy mesme l'augmentoit, à fin d'auoir plus d'honneur les appaisant: où fils perseu-
 reroient, qu'il en fut plus iustement excusé. les Silures nous auoient faict encores ce dōmage; & voltigeoiēt en beaucoup d'endroiĉs: iusques à ce que Didius estāt vistement accouru au deuant d'eux, ils furent repou-
 sez. Or apres Caractac prisonnier, le meilleur capitai-
 ne qui se trouuaſt entre les ennemis, se nommoit Ve-
 nutius, de la cité de Iuganres; ainsi que i'ay diĉ cy des-
 sus, longuement fidelle aux Romains; & deſſendu par
 leur puissance, durant qu'il eut en mariage la Royne
 Cartimande: mais ſeſtant entr'eux eſmeuē diſſention
 & puis la guerre, il auoit auſſi pris les armes cōtre nous.
 Toutesſois, ils ne combattoient du commencement
 qu'entr'eux, & Cartimande ſurprit finement les freres
 & proches parens des Venutins. Les ennemis eſchauf-
 fez pour celā & picquez de hōte, craignans d'eſtre cō-
 mandez par vne femme, enuahiffent ſon Royaume a-
 uec vne puiſſante armee de ieunes hommes choiſis en-
 tre les autres. Ce qu'eſtant preueu de noz gens, les co-
 hortés Romaines enuoyees pour ſon ſecours, donne-
 rent vne bien aſpre bataille: laquelle ayant le commē-
 cement douteux, eut meilleure & plus ioyeuſe yſſue.
 La legion où Ceſius Naſica commandoit; combattit
 auſſi avec preſque ſemblable euenement: car Didius
 peſant de vieilleſſe, & beaucoup honoré d'ailleurs, ſe
 contentoit de faire ſa charge: & repouſſer l'ennemy
par

par l'entremise d'autrui. Ces choses encores qu'elles ayent esté faiçtes en plusieurs annees, par deux Propretures Ostorius & Didius, ont esté par moy ioinctes ensemble: de peur que les separant elles ne fussent pas si bien retenues.

Consulat de T. Claude, & Sergius Cornile Orphitus. Neron fils d' Agripine preferé à Britannic fils de Claude: & les approches d' Agripine pour paruenir à son intention.

CHAPITRE IX.



MAINTENANT ie retourne à suiure l'ordre du temps, T. Claude pour la cinquième fois & Sergius Cornile Orphitus estās Consuls; l'on se hesta de donner la robbe d'homme à Neron: à fin qu'il semblaist capable d'entrer au gouuernement de la Republique. Et Cesar mesme, se laissa volontiers aller à la flatterie du Senat: demandant que Neron peut receuoir le Cōsulat au vingtiesme an de son aage: & ce pendant qu'il l'estoit arresté, il eut hors la ville la puissance de Consul: & fut appellé Prince de la ieunesse. Outre cela, on fit en son nom vn don aux soldats: & vne largesse lors appellee Congiarum au peuple: & aux ieux du Cirque qui se faisoient pour acquerir la faueur du peuple, Britannic vestu de sa pretexte, & Nerō d'vne robbe triomphale passerent, à fin que le peuple veit cestuy-cy vestu en magnificence d'Empereur, & cestuy-là en habille-ment d'enfant: & par là preiugeast quel deuoit estre à l'aduenir, l'estat de l'vn & l'autre. Quant & quant ceux

XII. LIVRE DES ANNALES.

des Centeniers & Tribuns qui auoient pitié de la fortune & cōdition de Britānic, furent ostez de leur charge: les vns pour causes faulses: & les autres sous couleur de les honorer. Et quant aux affranchiz, s'il s'en trouua aucun d'entiere fidelité, il fut chassé. Là dessus ces deux Princes s'estans rencontrez, Neron salua Britannic par son nom: & cestuy-cy luy rendit son salut l'appellant Domicē. Ce qu'Agripine prenant pour vn commencement de discorde, elle se vint plaindre bien fort à son mary, disant que certainement l'adoption se mesprieoit: & ce qui auoit esté ordonné par les Senateurs, cōmādē par le peuple, estoit cessé & aboly dās sa propre maison. Tellement que si la malice de ceux, qui enseignoiēt à Britannic vser de telles parolles peu amiables, n'estoit chastiee: il en pourroit soudre du mal pour le public. Claude courroucé de cecy, comme de quelque crime commis, bannit ou fit mourir tous les meilleurs gouuerneurs de son fils: & le mit en la garde de ceux, que sa marastre auoit donnez. Toutesfois Agripine n'osoit encores mettre en auant le haut poinct au quel elle tendoit; si Lufius Geta & Ruffus Crespin n'estoient deschargez de la capitainerie des gardes du Palais. Lesquels elle pensoit estre souuenans des biens-faicts receuz de Messaline: & en consequence tenuz & obligez à ses enfans. Ainsi par l'aduis d'une femme qui asseuroit que les cohortes s'entretenoient en partialité, au moyen des brigues & l'ambition de ces deux capitaines: & que la discipline seroit plus roide, si les soldats estoient commandez d'un seul; la charge des gardes de l'Empereur, est baillee à Burre Afranie fort estimé

mé au faict de la guerre. Mais qui neantmoins sçauoit bien, par le vouloir & faueur de qui il estoit aduancé. Encores Agripine haussioit de plus en plus la grâdeur de son estat: & pour ce qu'elle entroit au Capitole dâs vn chariot (ce qui n'estoit permis anciennement que aux prestres & choses sacrees) cela augmentoit l'honneur & reuerce qu'on portoit à ceste femme: laquelle est seule iusques au iourd'huy, qui estant fille d'Empereur, se soit aussi trouuee sœur, femme, & mere d'un qui ayt tenu l'Empire. En ces entrefaictes, son principal bouclier & champion Vitellius, nonobstant son tresgrand credit & vieillesse extreme (tant est l'estat des grands incertain, fut mis au rang des accusez, à la denonciation de Iunius Lupus Sénateur, il luy mettoit sus des crimes de leze Maiesté, & qu'il desiroit paruenir à l'Empire. De faict Cesar y eut presté l'oreille, si par menaces d'Agripine plustost que par ses prieres, il n'eut changé d'aduis & confiné l'accusateur: * Car c'estoit toute la punition que Vitellius en auoit voulu estre faicte. Beaucoup de prodiges aduindrent ceste annee, aucuns oiseaux malencontreux s'arrestèrent & percherent au Capitole: & des tremblements de terre venans coup sus coup abatirent des maisons: & cependant que la crainte s'en estant plus auant, les foibles & imbecilles personnes furent escachees en l'effray du peuple. La faute de bleds & la famine qui s'ensuyuit estoient semblablement prises comme prodiges, & si la plaincte n'en estoit pas seulement secrette. Car ainsi que


Lib. 1. c. 11. Tacitus Historiarum. L. 1. c. 11.

XII. LIVRE DES ANNALES

Claude tenoit l'audience de la iustice, aucuns l'environnerent crians apres luy comme mutinez: & l'ayans chassé iusques en la derniete partie du For le poursuirent, tant qu'il fut contrainct avec vne trouppes de soldats de sa garde, fendre la presse de ces gens qui le faschoient. Il est certain, qu'il n'y auoit lors à Rome, des viures que pour quinze iours au plus, mais par la grande bonté des Dieux, & douceur de l'hyuer * *qui ne ferma point la mer*; la ville fut secourüe en son extreme necessité. Si est-ce que iadis l'on portoit des conrees d'Italie, des viures en autres prouinces esloignees. Et nous n'endurons point à present la famine par sterilité; mais nous mettons en valeur, & labourons plu-
stost l'Affricque & l'Egypte: & la vie du peuple Romain, est chargée en des nauires, à l'aduanture & mercy des hazards de la mer.

*La guerre commence entre les Romains & les Parthes:
pour la meschanceté de Pharasmenes Roy des Hiberiens: & de Radamiste son fils.*

CHAPITRE X.

 ESTE mesme annee la guerre qui sourdit entre les Armeniens & Hiberiens, fut aussi cause de grands troubles entre les Parthes & Romains. Vologeses commandoit à la nation des Parthes; lequel venant du costé de sa mere d'une cōcubine Grecque, estoit paruenue au Royaume

me du consentement de ses freres. Pharasmanes estoit dés long temps en possession du pays des Hiberiens: & Mithridates son frere, tenoit celuy des Armeniens par nostre moyen & puissance. Pharasmanes auoit vn fils nommé Radamiste, remarquable pour sa belle taille & force de son corps, il estoit façonné aux ruses de son pere; & bien renommé entre ses voisins. Ce ieune seigneur ne pouuant celer son intétion, se plaignoit trop fierement & souuent; qu'vn si petit Royaume que celuy d'Hiberie, luy estoit trop légèrement gardé par son pere vieillard. A ceste cause, Pharasmanes le voyant conuoiteux de regner bien tost, & redoutant (à cause de sa vieillesse) la faueur que les gés de son pays monstroient porter à son fils; s'aduisa de le repaistre d'une autre esperance, & luy montrer l'Armenie; qu'il disoit auoir luy mesme dōnée à Mithridates: quant les Parthes en furent chasséz: toutesfois que il falloit differer d'y aller par force, & que la fraude seruiroit d'auantage, à fin qu'ils le peussent accabler quāt il ne s'en dōneroit garde. Ainsi Radamiste feignāt d'estre courroucé contre son pere (comme ne pouuāt endurer la malueillāce de sa marastre) se retire deuers son oncle: duquel estant recueilly humainement ainsi que l'vn de ses enfans, il pratique cepédant les principaux seigneurs d'Armenie, pour remuer l'estat, sans le sceu de Mithridates, qui encores outre la bonne chere, l'honoroit. Radamiste prenant couuerture d'estre r'apointé, retournant chez son pere, l'aduertit que tout ce qui pouuoit estre fait par subtilité, estoit prest & falloit acheuer le reste par armes. Ce pendāt Pharasmanes fain

XII. LIVRE DES ANNALES

des occasions d'esmouuoir la guerre: à ſçauoir que quāt il eut guerre cōtre les Rois d'Albanie & qu'il demādoit ſecours aux Romāis, ſon frere luy auoit eſté cōtraire: & qu'il viēdroit vēger ceſte iniure en le deſtruiſāt du tout. Quāt & quāt il dōna vne groſſe armee à ſon fils, lequel ayant par vne ſoudaine entree eſtōné & chaſſé Mithridates de la cāpagne, le cōtraignit ſoy retirer dās le chaſteau Gorneas fort d'aſſiette, & biē garny de ſoldats Romains, que cōduiſoit Celius Pollion Prefect; Caſperius Cētenier. Il n'y a riē à quoy les Barbares ſe cognoiſſent moins qu'aux engins, ruſes & ſubtilitez dōt l'on ſe ſert en ſieges de villes. Cōme au contraire nous entendons fort biē ceſte partie de la guerre. Ainſi Radamiſte ayāt eſſayé en vain, ou à ſon dōmage approcher les deſſēces, cōmença le ſiege: & voyāt que les ennemis ne redoutèrent aucunemēt ſes forces: cognoiſſant l'auarice du Prefect Romain marchāda avec luy: nonobſtāt que Caſperius proteſtaſt qu'un Roy alliē, que l'Armenie à luy dōnee par le peuple Romain, ne deuoient eſtre ainſi venduz, par argent & meſchanceté. Finalemēt pour ce que Pollion faiſoit ſemblant de craindre le grand nombre des ennemis: & Radamiſte auoir charge de ſon pere de ne bouger de là: Caſperius apres auoir accordé trefues ſortit: en intētion que ſ'il ne deſtournoit Pharaſmanes de faire la guerre à Mithridates, il aduertiroit T. Viuidius Quadrat gouuerneur de la Syrie, de l'eſtat auquel ſe trouuoieēt les Armenis. Le Cētenier party, le Prefect deſchargé de celuy qui le veilleoit & tenoit cōme en priſon; admōneſte Mithridates, de traićter la paix: luy rāmēteuant l'vnion qui doit eſtre entre freres, q̄ Pharaſmanes eſtoit ſon aiſné ioinćt les autres degrez de leur alliance

alliance, car il auoit espouſé la fille de Pharaſmanes; & luy meſme eſtoit beau-pere de Radamiſte. Que les Hiberiens ne reſuſoiēt la paix, cōbien que pōur l'heureils fuſſent les pl^o forts. Que la deſſoyauté des Armeniēs eſtoit aſſez cogneuë: & n'auoit pl^o autre retraicte & deſſeſſe, que ce chasteau deſnué de munitiōs. Parſtāt qu'il ne fit difficulté de receuoir des cōditiōs paiſibles, & ſās effuſiō de ſang: pluſtoſt qu'experimēter le hazard de la guerre: pēdāt que Mithridates faiēt le lōg à ſe ſeſoudre là deſſus, tenāt pour ſuſpect le cōſeil du Prefect (pource qu'il auoit honny vne de ſes cōcubines royales, & le cognoiſſoit ſubiect à faire pour argent toutes choſes à l'appetit d'autrui) Caſperius viēt trouuer Pharaſmanes: & requiert inſtāmēt q̄ les Hiberiēs leuēt le ſiege de deuāt Gorneas. Mais le Roy luy faiſant en public des reſpōces incertaines, & ſouuentesſois luy dōnāt de bōnes parolles: aduertit par ſecrets meſſagers Radamiſte ſon fils de haſter la conqueſte du chasteau par tous moyēs qu'il pourroit. Sus cela le pris de la trahiſon eſt hauſſé: & Pollion par vne ſourde menee pouſſa les ſoldats à demander la paix, & menaſſer d'abandonner la forteſſe. Laquelle neceſſité ayant contrainct Mithridates d'accepter iour & lieu pour traiēter de la paix: il ſort du chasteau, Radamiſte d'arriuee le courut embraffer, faiēt ſemblant de luy porter honneur, & l'appelle ſon beau-pere, & ſon pere. Outre cela il luy faiēt ſerment qu'il ne le fera mourir par fer, ny par poiſon. Quant & quant il le preſſe d'aller en vne touſſe de bois, de haute fuſtaye voiſine de là, où il diſoit auoir faiēt appareiller le ſacrifice, demandé à fin

XII. LIVRE DES ANNALES

d'arrester la paix en presence des dieux. La coustume des Roys de ce pays là, est quand ils traictent amitié, toucher en la main l'un de l'autre ; d'entremesler leurs mains dextre, lier leurs poulces & les estraindre d'un neud: puis quand le sang est coullé au bout, ils le font sortir par un petit coup, & le lechent l'un à l'autre, Ceste alliance est la plus secrette & estroite: comme ayant esté sacree par effusion de leur sang: mais à l'heure celuy qui devoit mettre ces liens, faisant semblant qu'ils luy estoient tombez, saisit Mithridates aux genoux, le renuerse à terre, & puis d'autres en plus grand nombre accoururent qui l'enchainent, & luy mettent des fers aux pieds: chose que les barbares estimēt bien laide & deshonneste. Encores apres cela, le peuple qu'il auoit traicté rudement, l'iniurioit & menassoit de frapper. Et toutefois il s'en trouuoit aussi d'autres, qui au contraire auoient pitié d'un si grand changement d'estat: & sa femme qui le suiuoit avec ses petis enfans, remplissoit l'air de plaintes. A ceste cause on les fourra en chariots differens & couuers: pendant qu'on enuoye sçauoir la volonté de Pharasmanes. Mais luy qui faisoit plus de cas de la conqueste d'un Royaume, que de son frere, ne de sa fille: & qui de son naturel estoit prompt à commettre des meschacetez, ne les voulut voir: toutesfois donnant ordre qu'ils ne fussent occis en sa presence. Et Radamiste aussi comme ayant souuenance du serment par luy faict n'vsa de poison, ny de fer contre sa soeur, ne contre son oncle, mais estans couchez par terre il les estouffe de force hardes, & pesans vestemens qu'on getta dessus eux.

Les enfans

Les enfans de Mithridates furent semblablement tuez, pource qu'ils auoient pleuré le meurdre de leurs pere & mere. Or Quadrat aduertie que Mithridates auoit esté trahy, & son Royaume occupé par les meurdriers, assëmbra le conseil : remonstre tout ce qui estoit aduenü, mettant en deliberation sil en deuoit faire la vengeance. Il s'en trouua peu qui se souciaissent de l'honneur public: les autres en plus grand nōbre discourroient sus ce qui estoit le plus seur: mais tous estoient bien d'aduis, que l'on se deuoit resiouir de la meschance-té commise entre des estrangers. Qu'il falloit encores getter vne semence d'inimitié entre eux; ainsi que iadis les princes Romains, qui s'estoient aydez de l'Armenie, pour sous vne couleur de liberalité, aprestier aux barbares occasion de s'entrequereller. Que Radamiste iouist de son mauuais acquest, pourueu que ce pendant il demourast hay & infame: puis que cela estoit plus à l'aduantage des Romains, que si avec honneur il y fut paruenü. Ceste opiniō fut suiue: toutefois à fin de monstrer que l'on n'auoit aprouué telle meschaceté, & de peur que Cesar ne vint à commander le contraire; l'on depescha messagers vers Pharasmanes: pour luy enioindre vider des limites d'Armenie: & d'icelle retirer son fils. Iulius Pelignus estoit lors Procureur de Capadoce, hōme de cœur lache & encores mesprisable pour la deformité de son corps, qui le rendoit subiet à moquerie: au reste fort familier de Claude, quand iadis il estoit curieux de hanter les compagnies priuees: & q̄ cestuicy luy faisoit ioieusement, passer le temps de ceste lasche vie qu'il menoit. Ce Pe-

XII. LIVRE DES ANNALES

lignus, ayant assemblé le secours des provinces voisines, entra en Armenie comme pour la reconquerir: mais pendât qu'il s'amusa à piller les allies, plustost que les ennemis: estant abandonné des siens & assailly des barbares; denué de forces il vint deuers Radamiste, qui le gaigna tellement par presens; que sans en estre requis, il le poussa luy mesme, à prendre les marques Royales: luy assista & comme autheur & fatalite il se trouue à sa coronation. Mais quand le bruiet d'un si vilain acte, eut esté publié: à fin qu'on n'eut pareille estime des autres Capitaines Romains, que de ce Pelingnus: le lieutenant Heluydius Priscus fut enuoyé au pays avec vne legion, pour donner ordre à l'effroy, ainsi qu'il voirroit estre necessaire, lequel passe habillement le mont du Taur, auoit ia appointé plus de choses par douceur, que par force: Quand on luy commanda retourner en Sirie; de peur qu'il ne fut cause d'un commencement de guerre contre les Parthes. Car Vologeses pensant auoir occasion d'enuahir l'Armenie (laquelle autrefois tenue par ses predecesseurs, estoit maintenant occupee pour la meschanceté d'un Roy estranger) assembla vne armee: & s'apresta pour faire couronner Tiridates son frere, Roy de ce Royaume, à fin qu'il ny eut aucun de sa maison qui ne tint quelque terre en souueraineté. La seule venue des Parthes, chassa les Hiberiens sans coup frapper. Et Artaxate & Tigronurteite villes d'Armenie, se mirent en leur obeissance. Depuis le froit hyuer, ou les petites prouisions que les Parthes auoient faictes, & la maladie qui s'engendra par l'un & l'autre inconueniens,

contraignirent

contraignirent Vologeses laisser les choses presentes. Et Radamiste se iette de rechef sus l'Armenie, en laquelle il n'y auoit personne: se môstrant plus que de coustume cruel, à l'endroiect des habitans qu'il estimoit trahistres; & estre pour se rebeller quand lo temps soffriroit. Aussi les Armeniens encores qu'ils fussent accoustumez au seruage, perdans neantmoins patience, assiegent avec forces le Palais Royal de si pres, que Radamiste ne trouua autre secours qu'en la vistesse de ses cheuaux; par le moyen desquels il eschappa luy & sa femme. Mais elle qui estoit grosse endura tellement, quellement; la premiere fuitte: tant par crainte des ennemis, que pour l'affection qu'elle portoit à son mary. Puis quant la continuelle course luy eut secoué le ventre, & esbranlé les entrailles, elle pria son mary la vouloir par vne honnelle mort, garantir des outrages d'vne captiuité. Radamiste du commencement l'embrasse, la soulage, luy dōne courage, tātōst s'esmerueillant de son grand cueur, & tātōst fasché craignoit que l'abandonnant quelqu'vn ne iouyst d'elle. Finalement outré d'amour, & n'estant apprêtif de mal faire, il degaine son coutelas: & luy ayant donné vn coup, il la traine au bord de la riuere Araxes, la poussant en l'eau; de peur que son corps ne fut aussi emporté. Quant à luy il fuit grand erre & gaigne l'Iberie; Royaume de son pere. Cependant des pasteurs aduiserent Zenobie (ainsi auoit nom ceste femme), laquelle respirant & plaine de vie, estoit arrestee sus des vuidanges de la riuere, non malaisées d'approcher. Et iugeās par la beauté de son visage honorable, qu'elle n'estoit pas de

XII. LIVRE DES ANNALES

petite maison, luy banderent sa playe: & donnerēt tels remedes qu'ils peurent recouurer aux chāps. Puis ayās fceu à la verité son nom & son aduenture, la portent en la ville Artaxate: d'où par cōmandement & aux despēs du public, elle fut enuoyee à Tiridates, qui la receut humainement & luy donna estat de Rōyne.

Consulat de Fauste Sille & Sillius Othon: Mort de Furius Scribonian: Arrest contre les Mathematiciēs: Discord de Cuman & Felix gouverneur de Iudee, Guerre contre les Clites peuple de Cilicie: Passetemps de combats de galleres & d'escrimeurs donnez sur le lac Fucin. CHAP. XI.



AVSTE. Sille & Sillius Othon estans Cōsulz, Furius Scribonian fut banny, comme si par des Caldees curieusement il senquīt, quand l'Empereur mourroit. A ce crime estoit accrochee Iunia sa mere comme portant impatientement sa fortune première: Car elle estoit aussi cōfinée. Camile pere de Scribonian auoit autre fois esmeu guerre en Dalmace: & pource Cesar faisoit gloire, de laisser de rechef en vie la race de son ennemy. Toutesfoīs ce pauvre banny ne vesquit depuis lōgement, & se trouue qu'il mourut d'auētūre, ou par poison: Ainsi que ceux qui l'ont publié l'ont voulu croire. Lors fut fait vn arrest pour chasser d'Italie les Mathematiciens soit rigoureux, & toutefoīs inutile. Depuis cela le Prince loua en vne harāgue, ceux qui pour leur petit moyen, volontairement renonçoient à l'ordre & qualite de Senateur. Et furent chaffez les autres, qui

M

demeurans

demeurâs accôpagnoiët leur pauureté d'une impudé-
 ce. Cependât l'on met en deliberation au Senat, quelle
 punition deuoit estre faicte, des fêmes qui espousoiët
 les esclâues. Il fut ordôné que celles qui l'auoient faict
 sans le sceu du maistre demeureroiët esclâues. Mais si
 c'estoit du consentemēt d'iceluy, qu'ô les tint pour af-
 franchies, Barea Soran nômé pour estre Cōsul, fut d'a-
 uis que Pallas (lequel Cesar auoit dit estre inuêteur &
 cause de mettre cela en deliberatiō) eut les enseignes de
 Preteur, & cent cinquante Sesteriū: * Scipion Corni-
 le adiousta, qu'on le deuoit remercier publiquement,
 de ce qu'estât descēdu des Roys d'Arcadie, il oubloit
 neantmoins sa noblesse tref-anciēne, pour seruir le pu-
 blic: & souffroit estre mis au nombre des officiers du
 Prince. Claude iura q̄ Pallas se contentât de l'honneur,
 vouloit demeurer en sa premiere pauureté. De fait l'ô
 attachâ en public, vn arrest du Senat; par lequel vn af-
 frâchy riche de trois mille Sestertium, estoit loüé cō-
 me suyuât la frugalité des anciens. Mais son frere sur-
 nômé Fœlix, qui des long tēps au parauant estoit gou-
 uerneur de Iudee, n'vsoit pas de semblable moderatiō:
 pensant auoir permission de faire tous maux sans dan-
 ger; estât apuyé sus vn tel & si grand pouuoir. A la ve-
 rité les Iuifs auoient fait semblât de s'esmouuoir, par
 vne sedition * *

* * n'ayans obey: apres qu'ils
 entendirēt la mort de Caius: ils auoiët encore peur, que
 les autres Princes leur cōmandassent le semblable. Ce
 pendant Fœlix aigriſſoit leurs fautes, y voulant appli-
 quer des remedes hors de saison: estant secondé en si

XII. LIVRE DES ANNALES

mauvais conseil, par Ventidius Cuman gouverneur d'une partie de ladicte province: qui estoit diuisee entre eux de telle sorte, qu'à cestui-cy obeissoit le peuple de Galilee: & à Fœlix les Samaritains, ennemis de longue main: & qui lors querelloiēt encores plus ouvertement, pour le peu de respect qu'ils portoient à leurs gouverneurs. Parquoy ils couroient les vns sus les autres: s'envoient des troupes de brigans: se dressoient embusches: & quelquefois se rencontroiēt en bataille rangee, raportās aux Procureurs le butin & despoilles conquises. De fait ceux cy du commencement s'en resjouirent: mais venant depuis le mal à croistre peu à peu, ayans employé les armes des gens de guerre, pour les demesler: les soldats furent occis; & la province s'en alloit en combustion de guerre, si Quadrat gouverneur de Sirie, ny eut mis ordre. L'on ne fit doute de soudain punir de mort les Juifs, qui auoient esté si hardis de tuer les soldats Romains. Toutefois le fait de Cumā, & Fœlix, apporta quelque remise: d'autāt que Claude ayant entendu les causes de la rebellion, auoit aussi donné puissance de faire des Procureurs cōme il aduiseroit. Mais Quadrat monstra que Fœlix estoit du nombre des Iuges, le souffrant assoir en son Tribunal pres de soy: pour refroidir l'aspreté des accusateurs. Et Cuman ayāt esté condāné seul, pour les meschācetez que deux auoient faictes: la province retourna en son repos accoustumé. Peu apres, les paysans de Cilicie surnommez Clites (qui autrefois & bien souuēt, s'estoiēt esmus) estās à ceste heure conduits par Trosobore, se cāperēt sus des mōtagnes de difficile accez. Et de la courās auāt iusques au riuage de la mer, ou pres des villes,

voloient

loiët les laboureurs & bourgeois: ayàs bié la hardiësse de quelquefois s'adresser aux marchàs & mariniers. La ville d'Anemure fut assiegee, & les gens de cheual (que de Sirie en enuoya au secours,) furët mis en route, avec Curie Seuerè leur Prefect; pource que le pays rude & bossu, propre a gës de pied, ne permettoit pas que la caualerie & y peut combatre. Depuis Antioch Roy de ceste coste; vñant de belles parolles enuers le peuple, & de trôperie cõtre leur Capitaine; apres auoir separé les forces des barbares, & fait mourir Trofobore avec quelq̃ peu des principaux, appaisa les autres par sa douceur. Enuiron ce tẽps, ayät esté coupee vne môtagne qui est entre le lac Fucin & la riuere de Gargilian: à fin que la magnificẽce de l'ouurage, se vit de plusieurs gës; vne bataille de marine fut dressée dans le lac mẽme: tout ainsi que iadis auoit fait Auguste, quand il fit vn estang de la le Tybere: mais avec des vaisseaux legers, & en plus petit nõbre. Claude arma des galleres à trois & quatre rames pour banc: & dixneuf mil hõmes: faisant ceindre & clorre le riuage de radeaux; à fin que les retraictes ne fussët incertaines. Laisant neãtmoins espace pour voguer à l'aise: cognoistre l'art & industrie des maistres Pilotes, les chocs & heurs accoustumez d'estre faits aux cõbats de nauires. Les manipules des cohortes & les troupes de cheual de la garde imperiale, estoiet sus les radeaux; ayàs deuant des deffences & bastiõs; de dessus lesquels des bricolles & arbalestes de passé, pouuoient estre lachees. Le reste du lac estoit tenu par les gens de marine, mis en des vaisseaux couuers: & comme si ç'eust esté vn theatre, le riuage, les coutaux & hault de montagnes, furent

XII. LIVRE DES ANNALES.

rempliz par vne multitude infinie d'hommes, tant des villes voisines, qu'autres venuz de Rome mesme: desirieux de veoir ce passe-temps, ou faire la cour au Prince. Lequel ayant vn riche sayon d'armes, accompagné Agripine qui n'estoit pas loing, vestuë d'un manteau de drap d'or, se trouua assis en lieu apparent. Or combien que ces gens fussent mal-faiçteurs; * ils combattirent neantmoins, aussi courageusement que de vaillās hommes: & apres plusieurs blessures, * on les garda de s'entretuer. Mais le combat acheuë, le passage de l'eau estant ouuert, descouurit la nonchalance & mal façon de l'ouurage: n'ayant le bas & le milieu du lac, esté assez creusé. Pour ceste cause quelque temps apres furēt cauees des fosses plus profondes: & à fin d'assembler encores vn coup le peuple, fut fait vn ieu de Gladiateurs, sus des ponts iettez au trauers du lac: à fin de représenter vne bataille de gēs de pied. D'auantage pour ce que le banquet auoit esté dressé sus le flux & vuidāge du lac, cela donna occasion d'une grāde frayeur à chacun. Car l'abondance de l'eau sortant de force & impetuosité, emportoit ce qui estoit voisin; renuersant & traînant les plus esloignez; où les estonnant du bruiçt & son qu'elle faisoit. Quant & quant Agripine se seruant de la craincte qu'auoit euë le Prince, accusa d'auarice & larcin, Narcisse qui auoit eu la charge del'ouurage. Mais il ne se taisoit pas, blasmant l'orgueil insupportable de ceste femme, & ses trop grands desseins & entreprises.

*Consulat de D. Iunius. Mariage de Neron avec Octaue.
Mort de Statilie Taur tres-noble Seigneur de Rome. Origine de la iurisdiction des receueurs. Ceux de Co affranchis de subsides en faueur de Xenophon Medecin de Claude. Exemption de ceux de Bysance: Et commodité de l'asiette de ladicte ville.* CHAPITRE XII.



Iunius & Q. Haterius estans Consuls, Neron aagé de seize ans espousa Octaue fille de Cesar. Lequel pour se faire paroistre par exercices honnestes, & pour acquerir reputation de bié dire, l'estant chargé de la cause des Iliens; remonstra comme le peuple Romain estoit descendu de Troye, & Æneas tige de la maison des Iules: avec autres choses anciennes, approchás de fables, discourues par luy de si bonne grace, qu'il obtint que les Iliens ses parties seroiét declarez francs de toutes charges publiques. Encores luy plaidant la colonie de Bolongne *la grasse*, *que le feu auoit grandement endommagée, fut secouruë d'une liberalité de cent Sesterrium: & renduë aux Rhodiens la liberté, qui leur auoit esté confirmee & ostee, selon les seruices par eux faicts aux Romains en guerres estrangeres, ou fautes commises en leur ville par sedition. Aussi les Appameans ruinez par tréblemét de terre, furent tenus quictes de tribut pour cinq ans. Or Claude estoit contrainct par les subtilitez de la mesme Agripine, faire ouuertement plusieurs actes de cruauté. Laquelle apres desirant ardamment auoir les iardins de Statilie Taur, renommé pour ses richesses

XII. LIVRE DES ANNALES

les; elle le destruisit: estant accusé par Tarquice Prisc
 Ce Prisc ayant esté Lieutenant de Taur gouverneur
 d'Afrique comme Proconsul: apres qu'ils furent
 de retour, luy mit sus quelque peu de concussion: &
 au surplus qu'il se mesloit de Magie. Mais Taur indi-
 gné de tel traitement; ne pouuant plus longuement
 endurer vn faux accusateur, se fit mourir soy-mesme
 auant le iugement du Senat. Ceneantmoins Tarqui-
 ce fut chassé de la cour: ce' que les Senateurs obtin-
 drent; pour la haine qu'ils luy portoient comme em-
 puteur: nonobstant la brigue d'Agripine. La mesme
 annee on onyt plusieurs fois dire au Prince, que les
 choses iugees par les Procurateurs, deuoient auoir pa-
 reille force, que celles qu'il auoit luy mesme ordonnées.
 Or à fin qu'on ne pensast qu'il eut bronché & dit cecy
 sans y penser: cela fut déclaré par arrest du Senat:& en-
 cores bien plus ouuertement & amplement, qu'il n'a-
 uoit esté entendu par le passé. Car Auguste, permit que
 on peut plaider deuant les Cheualiers qui gouuernoient
 l'Egypte: & auoit commandé que leurs sentences fus-
 sent autant estimees, que si elles eussent esté donnees
 par Magistrats Romains. Et depuis par les autres pro-
 uinces & dans la ville, il fut permis aux Cheualiers, co-
 gnoistre de maintes choses, qui iadis souloient estre de
 la iurisdiction des Preteurs: mais Claude leur bailla tou-
 te la cour & iurisdiction, pour laquelle aduint autres-
 fois tant de seditions & debats: quand par les reques-
 tes Sempronienues, faictes au peuple; les Cheualiers
 estoient mis en possession de iuger: ou que d'autre co-
 sté, les loix Seruiliennes rendoient au Senat la puis-
 sance

fance de tenir la iustice. Aussi fut ce pour cela, que Marius & Silla, principalement combattirent. Mais les estats & compagnies de la ville, estoient lors en partialité: & les victorieux s'en faisoient croire tout ouuertement, ayans la force publicque entre leurs mains. Opius & Cornile Balbe, furent les premiers, qui par la puissance de Cesar, eurent pouuoir de traicter des conditions de paix & manier la guerre. Il ne sera donc point de besoing apres ceux-cy, parler des Mathies & Vediens: & nommer par leurs noms, aucuns puissans Cheualiers Romains; puis que Claude rendit esgaulx à soy & aux loix, les affrâchis qu'il auoit establis au gouuernement du reuenu de sa maison. Apres cela il mit en deliberatiō s'il falloit affrâchir de tribut ceux de Co: allegât plusieurs choses touchât leur antiquité. A sçauoir que les Argiens conduicts par Ceus * & le pere de Latone, auoient esté les premiers habitans de l'Isle: en laquelle depuis Esculape arriuât, y apporta l'art de medecine, fort estimé entre ses successeurs: qu'il nomma l'un apres l'autre; & le temps que chacun d'eux auoit eu la vogue. D'auâtage il dict que Xenophō, duquel il se seruoit pour medecin, estoit de la mesme famille: & qu'ayant esgard à sa priere, il falloit pour l'aduenir descharger de tout tribut ceux de Co: afin qu'ils peussent habiter en ceste Isle sacree, & dediee au seruice de si grand dieu: Il n'y a doute, que l'on pouuoit r'amenteuoir plusieurs grands seruices faits au peuple Romain, & des victoires esquelles ils les auoient accompagnez. Toutesfois Claude suiuant son accoustumee simplicité, n'vsa point d'autre couuerture, pour cacher ce qu'il

XII. LIVRE DES ANNALES.

faisoit en faueur d'un seul personnage. Mais les Bizantins ayans obtenu audience, en requerât au Senat estre deschargez des grandes impositions qu'on leuoit sus eux, reprirent tout le passé. Commençans par l'alliance traitée avec nous, lors que nous fîmes la guerre contre le Roy de Macedone, qui pour sa lascheté ou supposition, fut surnommé faux Philippe. Que depuis cela ils enuoyerent leur armee pour nous, contre Antioch, Perses, Aristonic: & auoient secouru Anthoine en la guerre contre les corsaires: r'amenteuans ce qu'ils auoient offert à Silla, Lucullus, ou Pompee. Et puis leurs nouueaux seruices à l'endroict des Césars, pendant qu'ils festoient trouuez en ce quartier là: qui est un passage fort propre pour les capitaines & armées de terre & de mer: transport d'auitaillement & esquipage necessaire. Car en un destour le plus estroict qui soit entre Europe & Asie; les Grecs planterent Bizance au dernier bout d'Europe: pour ce qu'ayans demandé conseil à Pithius Apollon, où ils pourroient bastir vne ville; l'Oracle respondit qu'ils allassent chercher vne assiette, vis à vis des terres des aueugles. Par ces mots couuerts, estoient monstrez les Chalcedoniens, pour ce qu'estans les premiers arriuez; & ayans peu apperceuoir l'vtilité, ils auoient neantmoins choisie la pire assiette. Car Bizantium est en pays gras, & mer de bonne pesche: à cause que la grande quantité de poissons voulans monter en la mer Maieur, estonnée pour les rochers biaisans sous les eaux, laissent le tour de l'autre riuage, est portée dans les ports de ceste ville.

le. Ce qui fut premierement cause du gain & richesses des habitans, puis de les charger de si grandes impositions, que maintenant ils en demandoient estre quictes du tout, ou de partie. En quoy le Prince leur aida aucunement: remonstrant qu'ayans esté n'aguieres foullez par les guerres faictes en Thrace, & au Bosphore; il les falloit soulager: à ceste cause on les quitta de tribut pour cinq ans.

*Consulat de M. Asinius & M. Acilius. Prodiges.
Occasion pourquoy Agripine delibera faire mourir
Claude son mary: & Domitie Lepide sa cousi-
ne. Le Medecin Xenophon empoisonne
Claude, & la mort dudiect Empe-
reur.* CHAP. XIII.



STANS Consuls M. Asinius & M. Acilius, les prodiges aduenās si drus signifirēt vn chāgemēt des choses en pis. Car les enseignes & tentes de gens de guerre furent bruslees du feu du ciel: & vn essain de mouches à miel, s'arresta au faiste du Capitole. Il y eut aussi des enfentemens de deux especes & formes: & vne truye fit vn cochon qui auoit les ongles d'un oiseau de proye. Encores contoit l'on pour vn prodige, que le nombre des Magistrats se trouuaist amoindry: estans vn Questeur, Edille, Tribun, Preteur, & Consul trespassez en peu de mois. Mais Agripine fut bien plus estonnee, d'une parolle que

XII. LIVRE DES ANNALES

Claude auoit laschee estant yure. Que son destin portoit, d'endurer premierement les meschancetez de ses femmes, & puis d'en faire la punition. Parquoy craignant cela, elle delibera mettre la main à l'œuure, & se haster: apres auoir toute fois destruite Domicie Lepide, pour occasion legere & querelle de femme. Car Lepide estant fille de la puisnee Anthonie & niepce d'Auguste, auoit par ce moyen le degré de cousine germaine sus Agripine. Auec ce, estant sœur de Gneus son mary; elle se pensoit d'aussi noble maison qu'elle: & si il n'y auoit gueres à dire de leurs beauré, aage, & richesse. Encore pource que l'vne & l'autre estoit impudique, mal renommee, & iurongne; elles ne se portoient pas moins de ialousie pour leurs vices semblables, que pour les autres biens & prosperitez, qu'elles auoient receuës de fortune. De faict le plus grand debat estoit, laquelle de la mere ou de la tante paternelle, auroit plus de credit & faueur aupres Neron. Car Lepide par caresses & liberalitez, gaignoit le cœur de ce ieune homme qu'Agripine au contraire traictoit rudement & avec menasles: voulant bien donner l'Empire à son fils, & non pas l'endurer commander. Au demeurant on mit sus a Lepide, qu'elle auoit cherché d'espouser le Prince par charmes & inuocations d'esprits. Et que n'ayant pas bien retenuës & chastices des troupes desclaues, qui festoient eleuez en Calabre; elle troubloit le repos d'Italie. Pour cela on luy commanda de mourir; contre l'aduis de Narcisse; qui l'empeschoit bien fort: & lequel redoutant de plus en plus Agripine, on disoit

on disoit auoir declaré à ses plus prochains & familiers; qu'il estoit assuré de mourir, soit que Britanic ou Neron iouissent de l'Empire. Toutesfois qu'il auoit tant receu de bien; & estoit tellement obligé à Cesar: qu'il vouloit employer sa vie pour son seruice. Que Messaline auoit esté conuaincue & Silius aussi: & de rechef se presentoient semblables causes d'accusation. Si Neron venoit à estre Empereur, laissant Britanic son successeur, il n'en seroit point tenu au Prince son pere. Mais que par les menees de ceste marastre, toute la maison de l'Empereur estoit mise sans dessus dessous: plus vilainement & meschamment, que fil eut celé l'impudicité de sa premiere femme. Combien que la mesme maison, ne fut à l'heure sans impudicité; puis que Pallas entretenoit ceste cy en adultere. A fin qu'aucun ne fit doute, que son honneur, sa pudicité, son corps, & toutes choses ne luy estoient rien, pour auoir le moyen de regner & commander. En disant souvent telles ou semblables parolles, il embrassoit Britanic: prioit qu'il eut bien tost la force & l'aage robuste: & tendant les mains puis aux dieux, puis vers luy; souhaitoit qu'il deuint grand: qu'il chassast les ennemis de son pere, & se vengeast aussi des meurdriers de sa mere. Pendant le soucy de si grandes affaires, Claude tomba malade, & s'achemine vers Sinnesse: pour se renforcer par l'air doux, & bonnes eautés de ce lieu. Lors Agripine resoluë des long-temps, de faire son meschant coup, empoigne vistemment l'occasion presente: & n'ayant faute de gens pour

XII. LIVRE DES ANNALES

l'exécution, consulte seulement de quelle sorte de poison il falloit user. De peur que par vn violent & soudain, la meschanceté fut descouuerte: & si elle choisist vn qui fut tardif, & pour le mettre en langueur, que Claude se voyant approcher de sa fin, & aduertie de la trahison; ne reprist son fils en amitié. Il sembloit donc qu'il falloit trouuer quelque chose de singulier, qui troublast l'esprit & ne le fit si tost mourir. Pour cela fut choisie vne femme ouuriere de telles choses nommée Locuste: laquelle n'aguieres condamnée pour empoisonnement, auoit esté longuement gardée entre autres instrumens du Royaume: * *comme femme de seruite*. Par l'artifice de ceste femme fut apresté le poison, que Halotus le Chastre baila: ayant accoustumé de porter la viande, & d'en faire l'essay. Tout le fait a esté depuis si bien esclarcy, que les escriuains de ce temps là, ont dict que le poison fut mis sus des champignons, que Claude prenoit plaisir de manger: & que l'on n'aperceust si tost la force de la composition; soit par la nonchalance ou l'iurognerie de Claude, avec ce qu'il sembla qu'un flux de ventre, l'eust garenty. A ceste cause Agripine estonnée, & au moyen de la crainte qu'elle auoit de son danger mortel, mesprisant le blâme qu'elle en pourroit encourir: s'ayda du conseil de Xenophon; duquel elle auoit de longue main pratiqué la conscience: lequel comme fil eut aydé Claude s'efforçant de vomir, l'on a opinion qu'il fourra en sa gorge vne plume, enduite de tressoudain poison. N'ignorant

ignorant pas que les tres-grandes meschancetez, se commencent avec danger, & se paracheuent avec recompences. Durant cecy, le Senat estoit appellé: & les Cōsuls & prestres, faisoient des vœux pour la santé du Prince. Combien qu'ayant ia rendu l'esprit, il fut couuert de vestemens & tenu chaud: iusques à ce que les choses saprestassent, pour asseurer l'Empire de Neron. Car tout premierement, Agripine comme vaincue de douleur, & cherchant consolation, tenoit Britanic embrassé: l'appelloit la vraye image, & le portait de son pere: l'arrestant par diuers moyens, de peur qu'il ne sortit de la chambre. Elle retint aussi ses sœurs Antonie & Octaue: & ayant fait estroictement garder tous les passages, publioit par fois que le Prince se portoit de mieux en mieux. A fin que les gens de guerre demeurassent en bonne esperance: & qu'elle peut choisir le temps & point de bon heur, pour commander l'entreprise: selon l'aduis des deuins Chaldees. Lors sus le midy, vnzième iour d'Octobre, les portes du Palays ayans esté soudainement ouuertes, Neron accompagné de Burrus, se presente aux soldats armez qui faisoient la garde. Desquels ayant par l'enhortement du Prefect, esté receu avec cris d'alle-gresse; il fut mis dans vne litiere à bras. L'on dit qu'aucuns en firent doute: regardans & demandâs ou estoit Britanic. Mais voyâs qu'il n'y auoit aucun qui se monstraist pour soutenir le cōtraire; ils suiurent ce qui osoit. Et Neron porté dans le fort de la garnison; ayant fait vne harâgue propre pour le tēps, & promis vne lar-

XII. LIVRE DES ANNALES

gesse comme auoit fait son feu pere, est salué Empereur. L'aduis des gens de guerre fut suiuy & confirmé par arrest du Senat. Et les prouinces n'en firent aucune doute: mesme l'on ordonna que Claude seroit honoré comme les dieux: & que la pompe du conuoy, fut faicte pareille à celle du diuin Auguste. Ne voulant Agripine vser de moindre magnificence, que Liuia sa bisayeulle. Toutesfois le testament de Claude ne fut leu: de crainte que le peuple ne se courrouçast d'enuie & desdain: voyant le fils d'une marastre, par iceluy estre preferé, au naturel & legitime enfant de l'Empereur.

FIN DV DOVZIESME LIVRE
DES ANNALES DE P. COR-
NILE TACITE.



TREIZIESME LIVRE
DES ANNALES DE P.
CORNILIE TACITE
CHEVALIER ROMAIN.

*Agripine mere de Neron faict mourir Iunius Sillan gentil-
homme Romain: & Narcisse affranchy. Les obseques de
l'Empereur Claude: Le beau commencement de l'Empire
de Neron.* **CHAPITRE PREMIER.**



LE PREMIER de qui l'on
brassa la mort à ce nouvel
aduenement de Prince, fut
Iunius Sillan Proconsul d'A-
sie, sans le sceu de Neron: par
l'aguet & malice d'Agripine;
non que son esprit remuant
eut aidé pour aduancer la fin
de sa vie: (car il estoit non-
chalant, & duquel les autres
plus rudes Empereurs, n'auoient tenu conte: de sorte
que Caius Cesar le souloit appeller la brebis d'or) mais
Agripine, ayant esté cause de la mort de L. Sillan son
frère, craignoit qu'il en fust la vengeance: pour ce que
le bruiet estoit grand entre le peuple, qu'il falloit pre-

XIII. LIVRE DES ANNALES

ferer à Neron (à peine sorty d'enfance & ayant attrapé l'Empire par meschanceté) cestuy-cy d'aage meur, homme de bien, de grand lieu: & (qui estoit vne chose à laquelle on prenoit garde pour lors) descendu de la maison des Césars. De vray Sillan estoit en quatriesme degré, arriere fils du diuin Auguste. Et voilà la cause de sa mort: les executeurs furent P. Celerius Cheualier Romain: & Elius affranchy, commis au manienent du bien particulier que le Prince auoit en Asie. Le poison fut par eux donné au Proconsul en vn banquet, trop euidemment pour n'estre point descouuers. Narcisse affranchy de Claude (de la querelle duquel avec Agripine, nous auõs parlé) ne fut pas moins hastiuement cōtraint de mourir; ayant esté mis en tref-estroitte prison: & reduict en extreme necessité mal gré le Prince: aux vices duquel (encores cachez) il s'accordoit merueilleusement, par son auarice & vie prodigue. Et l'on alloit faire vn grand carnage, si Afranius Burrus & Anneus Senecque, ne fussent allez au deuant. Ceux-cy estans gouuerneurs du ieune Empereur, & de bon accord en ceste grandeur pareille & commune; auoient esgalle puissance & autorité, par moyens diuers. Burrus à cause du soing des affaires de la guerre, grauité & seuerité de ses mœurs. Senecque, pour ce qu'avec vne ioyeuse & honneste façon de faire, il enleignoit l'eloquence à Neron, s'entr'aidans ainsi l'un l'autre, à fin que si le Prince, qui estoit en aage de glisser à mal mesprisoit la vertu, ils le retiussent plus facilement luy souffrans vser d'honnestes plaisirs. Tous deux n'auoient autre peine, qu'à rabattre la

fierté d'Agripine : laquelle brulant de toutes les conuoitises, qui se peuuent trouuer en vn mauuais gouuernement, auoit de son party Pallas: pour le conseil de qui, Claude se ruina soy-mesme, faisant le mariage deffendu, & la pernicieuse adoption. Mais Neron n'estoit pas hōme pour se laisser brauer par des varlets: & si Pallas avec vne fascheuse & mal plaisante arrogance, surpassant le degré d'affranchy s'estoit rendu ennuyeux. Toutesfois Cesar honoroit en public sa mere, tant qu'il estoit possible: & vn capitaine luy venant demander le mot du guet suiuant la coustume de la guerre; il donna cestuy-cy: A LA TRES-BONNE MERE. Le Senat aussi ordonna deux licteurs, vne Flaminie nommé Claudialle: & encores que le dueil seroit fait à la maniere de celuy des Censeurs: & incontinent apres la deification. Le iour du cōuoy: le Prince commença l'oraison en sa louange. Or pendant qu'il raconta l'antienneté de la maison du deffunct, les Consulats & triomphes de ses predecesseurs; tant luy que chacun se monstra affectionné. Encores quant il ramenteut l'amour qu'il auoit aux sciences liberales: & que durant son Empire les ennemis n'auoient porté aucun dommage à la Republicque; on le prist en bonne part: mais depuis qu'il changea de propos pour parler de sa preuoyance & sagesse; personne ne se peut garder de rire. Combien que l'oraison composee par Senecque, fut tresbelle & bien ornee: suiuant le naturel de cest homme, qui auoit l'esprit gentil & propre aux oreilles de ce temps là. Les vieillards (qui n'ont autre affaire & plaisir que de comparer les choses pass-

XIII. LIVRE DES ANNALES

sees aux presentes) remarquoient que Neron estoit le premier de ceux qui auoient commandé à Rome, ayant besoing du beau parler d'autrui: car le Dictateur Cesar se pouuoit parangonner aux plus grands Orateurs: & Auguste auoit l'eloquence prompte & coulante: qui seoit bien à vn Prince. Tibere aussi scauoit avec vn artifice peser les mots: outre ce qu'en peu de parolles il disoit beaucoup: ou bien tout à propos il parloit de telle façon, que l'on pouuoit diuersement interpreter ce qu'il disoit. Mesme l'esprit troublé de Caius Cesar, ne gasta point la force de son eloquence: & toutesfois & quantes que Claude discourroit des choses esquelles il eut pensé, vous n'eussiez trouué en ses parolles faute de bonne grace. Mais Neron dès l'age mesme de son enfance, applicqua son vif esprit à autres choses, Comme à grâuer, peindre, chanter ou dresser des cheuaux; & aucunes fois faisant des vers, il monstroît auoir quelque commencement de doctrine. Au reste; quant la monstre du dueil fut acheuée; entrant en la cour; après auoir parlé premierement de l'autorité des Senateurs: de l'accord & consentement des gens de guerre: il mit auât & recita plusieurs beaux desseins & exemples, qu'il auoit deliberé suivre, pour bien gouverner l'Empire. Disant que sa ieunesse n'ayât esté abreueue de guerres ciuiles, ou discords domestiques il n'apportoît aucune haine: & ne se sentoît offencé de personne: n'y auoit desir de se vanger. Puis il donna vn proieât de la maniere du gouvernement à venir: euitant à son pouuoir les choses blasmees tout fraichement. Car il ne seroit (disoit-il) iuge de toutes affaires:

affaires: de peur que les accusateurs & criminels estans enclos en vne maison, quelque peu de fauoris, eussent moyen de brigander. Qu'aucune chose ne se vendroit chez luy: & si la faueur n'y entreroit point: car sa maison & la republique estoient deux choses separees. Que le Senat fit sa charge ancienne: & l'Italie & Prouinces publiques vinsent demander iustice au tribunal des Consuls: & ceux là leur fissent donner audience par le Senat: quant à luy il pouruoyeroit aux armées qui luy seroient baillées en charge. Et de fait il ne faillit à sa promesse. Car plusieurs affaires furent reiglees par l'aduis du Senat: comme entre autres: que nul pour argent ou present eut à vendre sa peine, pour plaider vne cause. Que mesmes les Questeurs nommez, ne fussent tenus par necessité de donner le plaisir de Gladiateurs: qui fut vne chose, que les Senateurs gaignerent sus Agripine l'empeschant; sous ombre qu'elle disoit que en ce faisant on renuersoit les ordonnances de Claude. * Lesquels aussi pour ce estoient appelez au Palais à celle fin que les portes estās fermées, elle y peust assister; separee d'un rideau, qui la garderoit d'estre veüe & ne l'empescheroit d'ouyr. Car mesme vn iour que les Ambassadeurs d'Armenie plaidoient la cause de leur nation deuant Neron, elle s'en alloit monter au siege de l'Empereur pour y presider quant & luy; si Senecque voyās les autres transis de frayeur, ne l'eust aduertie d'aller au deuant de sa mere: & ainsi sous couleur de luy faire la reuerence, il destourna le deshonneur qui s'apprestoient.

XIII. LIVRE DES ANNALES

Preparatifs de Neron pour deffendre le Royaume d'Armenie contre les Parthes, & la reputation de Corbulon.

CHAPITRE II.

SVs la fin de l'annee desnouelles ef-
froyables vindrent; que les Parthes
estoient de rechef sortis de leurs pays
& pilloiēt l'Armenie, apres auoir mis
hors Radamiste. Lequel ayant sou-
uentesfois esté maistre de ce Royau-
me, & puis chassé d'iceluy, auoit pour lors abandonné
ceste guerre. Parquoy les propos ordinaires de la ville
de Rome (où l'on aime à discourir) estoient comme
le ieune Prince, qui à peine auoit passé dix sept ans,
pourroit soustenir si grand faix, ou le repousser: aussi
quel recours il y auoit en vn personnage gouuerné par
vne femme. Demandans si les batailles, sieges de villes
& autres charges de la guerre, se pourroient sembla-
blement executer par l'entremise des maistres & gou-
uerneurs d'enfans. Les autres disoient au contraire,
qu'encores estoient ils mieux, que si Claude affoibly de
vieillesse & nonchalance, eust esté appelé au trauail de
la guerre; puis qu'aussi bien il n'eust rien fait que par
le commandement de ses varlets. Et neantmoins que
Burrus & Senecque, auoient esté esprouuez par le
maniement de maintes affaires. Et que sen falloît il
quel l'Empereur ne fust assez fort & robuste, veu que
Gneus Pompee à dix-huict ans, & Octauius Cesar à
dix-neuf, soustindrent les guerres ciuiles. Que les
grands Princes mettoient à fin plus de choses par bon-
heur

heur & conseil; que par armes & coups de main. Qu'il donneroit clairement à congnoistre, s'il auoit pres de soy des gens d'honneur ou non: si ostant toute malvueillance il choisissoit quelque bon & vaillant chef, plustost qu'un autre riche; ou supporté de la faueur des courtisans. Comme ils faisoient tels & semblables discours, Neron commada que la ieunesse leuee des Provinces voisines, pour r'emplir les legiōs de Leuant; s'approchast. Et que les mesmes legions fussent logees au plus pres d'Armenie. Enioignant aux deux anciens Rois Agrippa & Antioch, de tenir leurs forces prestes, pour encores enuahir le pays des Parthes: Et que semblablement des pôts fussent dressez sus la riuere d'Euphrate. Il donna aussi la petite Armenie à Aristobul: & la prouince Sophene, à Soheme: avec les marques & ornemens Royaux. Encores vint il bien à propos, que Bardanes felleua, querellant le Royaume contre Vologeses son pere: & les Parthes se retirerent d'Armenie: comme s'ils eussent remis la guerre en vne autre saison. Toutesfois les choses furent faictes bien plus grandes au Senat, par l'opinion de ceux qui estoient d'aduis, faire des processions: aux iours desquelles l'Empereur porteroit sa robbe triomphale. Et encores qu'il deuoit entrer en la ville en *petit triomphe* *appellé* Ouation. Et que son effgie de pareille grandeur à celle de Mars Vengeur, fut dressee en mesme temple. Car outre leur flaterie ordinaire, ils estoient ioyeux, de ce qu'il auoit donné à Domice Corbulon, la charge de garder l'Armenie: & leur sembloit que le pas estoit ouuert aux vertueux. Les forces de Leuant furent alors

XIII. LIVRE DES ANNALES

diuifées en telle sorte, que partie des gens de secours & deux legions, demouroient en Syrie avec Vinidius Quadrat qui en estoit lieutenant: Corbulô auoit pour luy autant de legions, composees de citoyës Romains & autant d'alliez: avec les cohortes de pied & cornettes de gens de cheual, qui passoient l'hyuer en Cappadoce. Et fut commandé aux Rois allicz leur obeyr; ainsi que les affaires de la guerre le requerroient. Mais ils fauorisoient plus volontiers Corbulon: qui pour entretenir sa reputation, laquelle au commencement de toutes entreprises donne grand coup) despechant chemin rencontra à Egas (ville de Cilicie) Quadrat, qui festoit aduancé iulques là, de peur que Corbulon entrant en Syrie pour prendre l'armée; ne gaignast le cueur de chacun: d'autant qu'il estoit de belle taille, braue en parolles, & (outre son experience & sagesse) encores plus fauorisé, par vne apparence de choses vaines. Au reste l'un & l'autre admonnestoit par messagers le Roy Vologeses vouloir plustost la paix que la guerre: & en baillant ostages continuer la reuerence, accoustumee d'estre portee par ses predecesseurs au peuple Romain. De faict, soit que Vologeses eut desir d'assembler des forces esgales à celles des Romains: ou bien voulant (sous tiltre d'ostages) chasser d'aupres de soy, ceux qu'il soupçonnoit luy porter enuie & aspirer au Royaume: il liura les principaux de la maison des Arsacides. Hostorius Centenier enuoyé par Vinidius les receut. Lequel d'auanture pour autre occasion precedente, estoit venu trouuer le Roy: dequoy Corbulon aduertý, commande à Arrius Varus Prefect d'v-

ne cohorte de gens de pied, aller recevoir ces ostages. Cela engendra vne querelle entre le Prefect & le Centenier: de laquelle ne voulans plus longuement donner le plaisir aux estrangers, ils accorderent de remettre le iugement aux ostages & deputez, qui les cōduisoient. Lesquels prefererent Corbulon, tant pour sa reputation nouuellement acquise; que par vne certaine inclination que les ennemis mesmes, auoient à sa personne. Dont s'esmeut discorde entre les chefs: pource que Vinidius se plaignoit, que Corbulon luy arrachoit des mains, l'honneur des choses qu'il auoit mises à fin par son aduis & cōseil. Mais il protestoit au cōtraire, que le Roy ne s'estoit rengé à offrir ostages; iusques à ce que ayant esté déclaré chef de ceste guerre; il luy auoit fait changer son esperance en crainte. Neron pour accorder leur different commāda publier; que pour les choses bien & heureusement faictes par Quadrat & Corbulon; du laurier estoit adioulté aux faisceaux des verges, qui se portent deuant l'Empereur. J'ay assemblé cecy, combien qu'il aye esté continué iusques sous le temps d'autres Consuls. Ceste mesme année Cesar demanda au Senat, qu'une image fut faicte à Gneus son pere: & les enseignes Consulaires fussent donnees à Asconius Labeon, qui iadis auoit esté son tuteur. Mais pour son regard il deffendit de faire les Statuës massiues d'argent ou d'or; qu'on luy auoit offertes. Et encorres que les Senateurs eussent ordonné, que l'an commenceroit au mois de Decembre, auquel Neron estoit nay, il garda toutesfois l'ancienne obseruance: commençant l'an au premier iour de Ianuier. Et ne furent

XIII. LIVRE DES ANNALES

receus pour criminels Carinus Celer Sénateur; que son esclau accuſoit: ne Iulius Denſus Cheualier; chargé pour tous crimes de fauoriſer Britannic.

Conſulat de Neron, & L. Antiſtius. Continuation du bon gouuernement de Neron. Et commencement de la haine qu'il priſt contre ſa mere.

CHAPITRE III.



LAUDE Neron & Antiſtius eſtans Conſuls: comme les Magiſtrats fiſſent ſerment de garder les ordonnâces des Princes; l'Empereur empeſcha que ſon compaignon en l'eſtat de Conſul, fit ſerment de tenir les ſiennes, dont il fut grandement loué par les Sénateurs: à fin que le courage de ce ieune Prince, eſſeué par la gloire de choſes legeres, continuast en ce qui ſeroit de plus grande conſequence. Incontinent apres il donna exemple de ſa douceur, à l'endroiçt de Plautius Lateran. Lequel rayé du nombre des Sénateurs, pour l'adultere commis avec Meſſaline il rendit au Senat; ſ'obligeant à continuer ſa clemence par pluſieurs harangues, que Senecque à fin de teſmoigner qu'il luy enſeignoit toutes choſes honneſtes, ou poſſible pour faire monſtre de ſon bon eſprit, publioit par la bouche du Prince. Au demeurant la puiſſance de ſa mere ſe rompit peu à peu; depuis qu'il deuint amoureux d'une affranchie nommee Acte: & eut auſſi faiçt participans du ſecret de ſes amours, Othon & Claude Senecion; ieunes hommes de bonne grace.

L'vn

L'un desquels à sçauoir Othon, estoit de maison Consulaire, & Senecion fils d'un affranchy de Cesar: qui premierement sans le sceu de la mere, & depuis non-obstant les empeschemens, s'estoit coulé bien auant en l'amitié du Prince; par dissolution & certains moyes secrets qui ne valloient guieres: sans estre contrariez des plus grands amis de l'Empereur: lequel ils voyoiēt se contenter de ceste seule femmelette, sans faire tort à autrui. Car par un certain malheur(ou possible pour ce que les choses deffenduës ont plus de puissance & chatouillent d'auantage) il auoit à contrecueur sa femme Octaue de grande maison, recogneuë de chacun pour bien vertueuse dame: & l'on craignoit qu'il ne courut paillarder avec les gétilles femmes de marque, si on le destournoit de ce plaisir. Mais Agripine murmuroit bien fort qu'une affranchie luy fit teste, qu'une seruâte fut sa bru: avec autres choses de mesme substance: ainsi que les femmes ont accoustumé de faire: ne pouuant attendre que son fils s'en repentist; ou qu'il en fut saoul. Aussi tant plus elle luy reprochoit de vilenies plus elle l'enflammoit. Iusques à ce que vaincu & contrainct par force d'amour; il quitta le respect qu'il portoit à sa mere: & se laissa manier du tout à Senecion: l'un des familiers amis duquel nommé Anneus Seren, feignant aimer ceste Acte, auoit seruy de couuerture, pour celer les premieres amours de ce ieune homme: & prestoit son nom, pour donner ouuertement à ceste femmelette ce que l'Empereur luy enuoyoit à la desfrobee. Alors Agripine changeant de ruzes essaya de gagner ce ieune Prince par flatteries:

XIII. LIVRE DES ANNALES

en luy offrant plustost sa chambre, voire les plis de sa robe mesme, pour couvrir tout ce que sa premiere ieunesse & la grandeur sienne, pouuoient desirer. Encores elle cōfessoit auoir sans propos esté trop rude en son endroiect: & luy presentoit l'abondance de ses biés, nō gueres moindres que ceux de l'Empereur. En quoy tout ainsi que n'aguères elle estoit trop aigre à corriger son fils, aussi elle se mōstroit de rechef outrageusement humble & faillie de cuer. Ce changement n'abusa point Neron: & donna occasion de crainte à ses plus priuez amis: qui le prioient se garder des tromperies de ceste femme, tousiours cruelle & encores lors fausse en son cuer. D'auanture Cesar ayant ces iours là veu le cabinet & ioyaux, desquels les femmes & meres des Empereurs festoiēt autrefois parees; y choisit des habits, draps, & pierreries: qu'il enuoya presenter à sa mere fort liberalement, & sans rien espargner. Car ce qu'il luy donnoit de son bon gré, estoit tout le plus beau & meilleur: & qui auoit esté le pl⁹ estimé des autres: mais Agripine se prit à crier qu'elle ne se paroît de telles choses: mais qu'on la gardoit bien d'approcher du reste: & que son fils donnoit & partageoit ce qu'il tenoit d'elle entierement. Il n'y eut faute de gens qui r'apporterent ces parolles, & les firent trouuer plus mauuaises. Parquoy Neron depit cōtre ceux sus qui l'arrogāce de ceste femme s'appuyoît: mit Pallas hors de la charge que luy auoit donē Claude: en laquelle il se portoit comme souuerain maistre & superintendant du Royaume. Et dit on que quant il sortit avec grand suite & cōpagnie, Neron ne rencontra pas mal, disant qu'il alloit * ren-

noncer

nôcer à son estat. A la verité Pallas auoit fait pactiô avec Cesar, qu'il ne luy demâderoit conte d'aucun acte passé: & demourroit quitte du maniement de la Republique. Depuis cela, Agripine ne se sceut plus contenir de dōner frayeur & menacer le Prince: iusques à crier à ses oreilles mesmes, que Britānic estoit ja assez grād & fort, pour receuoir (cōme vray & digne tyge) l'Empire de son pere; q̄ luy seulemēt enté & adoptif, gouuernoit maintenāt par la tromperie & meschāceté de sa mère. Qu'elle n'empeschoit plus que tous les defastres de ceste malheureuse maison, fussent descouuers. Principale mēt l'ocasiō de son mariage; & l'empoisonnemēt que elle mesme auoit fait faire. Encores les dieux, & elle auoiēt biē pourueu à ce seul point: que le fils de son feu mary viuoit. Car elle iroit avec luy aux armées: & lors qu'ō ouyt d'un costé la fille de Germanic, & de l'autre cest hōme de neāt Burrus: ce bāny Senecque: voire dea avec vne main coupee & langue de maistre d'escole, plaidans & debatrans pour le gouuethemēt de tout le mode. En disant cela elle aduāçoit les mains cōtre luy: adioustoit plusieurs iniures: appelloit à son aide le diuin Claude: les esprits infernaux des Sillans: & tant de meschācetez qui ne luy auoient apporté aucun profit. Neron troublé de cecy, & voyāt approcher le iour auquel Britānic accomplissoit le quatorzième an de son aage, remuoit en son cerueau plusieurs choses: cōsiderāt d'un costé la nature violente de sa mère; & d'autre le gentil esprit de Britannic, tout fraischement congneu par experience: & qui encores luy auoit acquis tref-grande faueur. A vn iour des festes de Saturne

XIII. LIVRE DES ANNALES

entre autres passe-temps à quoy ceux de son aage s'esbattoient; il aduint que tirans au sort par ieu, à qui seroit le Roy; le sort escheut à Neron. Lequel ayant commandé aux autres diuerses choses, qui ne leur pouuoient tourner à honte, enioignit à Britannic se leuer, & venir entr'eux commencer vne chanson: esperant qu'on se mocqueroit de cest enfant, qui ne scauoit comme il se falloit gouuerner en compagnie modeste, tant s'en faut qu'il le peut faire entre yurongnes. Britannic commença hardiment vne chanson; par laquelle il donnoit à entendre, qu'on l'auoit faict tomber du siege de son pere: & chassé du gouuernement del'Empire. Ce qui fut cause d'une compassion trop ouuerte, pour ce que la nuit & la gayeté, auoient ostee toute dissimulation.

*Neron faict empoisonner Britannic son frere: &
Chasse de sa maison Agripine sa mere.*

CHAPITRE IIII.



NERON cognoissant le blasme qu'il en receuoit, augmenta sa haine à l'encontre de luy: puis se voyant pressé des menaces d'Agripine, pour ce que il ne la pouuoit charger d'aucun crime, & n'osoit commander ouuertement la mort de son frere, il s'efforça trouuer des moyes secrets. Ainsi donc il commande apprestier du poison, par l'entremise de Iulius Pollion Tribun d'une cohorte des gardes, qui tenoit prisonniere vne nommee Locuste;

Locuste; condamnée pour empoisonnement; & fort
cogneuë par ses meschancetez. Car on auoit pourueu
de longue main de ne tenir aucun pres de Britanic, qui
eut ne foy ne loy. Le premier poison luy fut baillé par
ses gouuerneurs mesmes: lequel n'estant assez violent,
il vuida par vn flux de ventre: possible pour auoir esté
adoucy, à fin de ne monstrier la force tant soudain.
Mais Neron n'ayant la patience d'attendre l'ysue d'un
lent forfait; menassa le Tribun: & commanda faire
mourir l'empoisonneresse, pour ce que pendant qu'ils
ont esgard au bruiet qui en pouuoit courir; & appre-
stent des excuses; ils retardoient sa feurté. Apres qu'ils
luy eurent promis de le faire mourir aussi soudain, que
d'un coup de glaiue: tout aupres de la chambre de Ce-
sar, fut cuite vne forte composition, la soudaine violen-
ce de laquelle, estoit ja cogneuë par poisons experi-
mentez. La coustume estoit, que les enfans des Em-
pereurs assis auec d'autres gentils-hommes de leur aa-
ge; mangeoient vis à vis, de leurs proches parens, en
table à part; & non si bien couuerte. Britannic y banc-
quettant, pour ce que ses viandes & son boire estoient
essayees par vn officier à ce commis: à fin de n'oublier
la ceremonie accoustumee ou que la continuant; la
meschanceté fut descouuerte par la mort de l'un & de
l'autre: on s'aduisa de telle ruse. Vn breuuage treschaud
encores sain & net; duquel l'essay auoit esté fait, fut
présenté à Britannic: & pour ce qu'il le refusa à cause
de sa chaleur, on versa en de l'eau froide du poison: le-
quel saisit & passa si viste par tous ses membres; qu'il
en perdit soudain la parolle & l'halaine. Ceux qui e-

XIII. LIVRE DES ANNALES

estoient assis à l'entour de luy furent fort estonnez : & les autres qui ne se doutoient de rien s'enfuirent . Mais ceux qui auoient le sens meilleur & plus aigu, demourerent fichez : regardans fermement Neron . Lequel renuerse sus son oreiller de table ; & comme ne sçachât rien de la meschanceté : dict que cela luy souloit aduenir, à cause du haut mal auquel Britannic estoit subiet, mesmes dès son enfance : & que peu à peu la veüe & le sentiment luy reuiendroient . Mais Agripine monstra auoir vne si grande frayeur, & vn tel estonnement d'esprit (jaçoit qu'elle essayast de le cacher en son visage) qu'il fut aisé à iuger ; qu'elle sçauoit aussi peu du faict, qu'Octaue sœur de Britannic . Car elle voyoit que son dernier secours & refuge, luy estoit rauy : & cognoissoit bien que c'estoit vn exemple & commencement de parricide . Quant à Octaue, quelque ieune d'ans qu'elle fut : elle auoit appris à cacher ses douleurs, son affection, & toutes autres passions . Ainsi donc apres vn bref silence, la bonne chere du bancquet recōmença . Et vne mesme nuit ioignit le trespas & bruslemēt du corps de Britannic : ayant esté au parauant donné ordre à l'appareil du conuoy ; qui ne fut pas grand . Toutesfois on l'enfeuelit au champ de Mars : durant vne si violente pluye , que la commune eut opinion cela monstrier le courroux, que les dieux auoient pour vne telle meschanceté . Laquelle neantmoins plusieurs pardonnoient à Neron : venans à considerer les maux, anciennement aduenuz par discorde de freres : & comme les Rois n'endurent point de compagnons . Beaucoup de ceux qui ont escrit l'histoire de ce temps là, di-
sent

sent que Neron abuza de ce ieune enfant Britannic, plusieurs iours auant son trespas . De sorte que telle mort ne peut sembler auoir esté trop hastiue ne cruelle, combien que durant la saincte franchise de la table, & sans donner loisir à sa sœur de l'embrasser, elle eut esté commise deuant les yeux de son ennemy: qui honnist le dernier de la race des Claudiens, premierement par paillardise, que par poison . Cesar excusa par edict la soudaineré de ces obseques: remonstrant que c'estoit suiuant l'ordonnance des anciens : qui faisoient en cachette, les douloureux conuois de leurs bien aimez: & ne vouloient amuser les parens à voir des pompes, ou ouyr des oraisons funebres. Au reste qu'ayant pout son regard perdu le support de son frere, toute son esperâce gisoit en la Republique. Et que d'autant plus, le Senat & le peuple, deuoient aimer & cherir le Prince: puis qu'il estoit demouré seul de la famille nec pour tenir le haut degré d'honneur. Apres cela il enrichit par largesses, les principaux de ses amis. Toutesfois il n'y eut faute de gés, qui en blasmerent aucuns: lesquels faisoient professiō de grauité & preud'homie, partageoiēt neātmoins les maisons & possesiōs des cōdamnez, cōme vn butin gaigné sus les ennemis. Autres disoient qu'ils y estoient cōtraints par le Prince, sçachāt bien en sa conscience le mal qu'il faisoit: & pensoit en estre excusé, sil obligeoit les pl⁹ puissans par biēs-faits. Mais le courroux de la mere, ne pouuoit estre adoucy par aucune liberalité. Car elle embrassoit & caressoit Oëtaue: tenoit souuēt des cōseils secrets avec ses plus priuez amis: & outre ce qu'elle estoit naturellement auaricieuse,

XIII. LIVRE DES ANNALES

encores elle attrapoit de tous costez argent, tant qu'elle pouuoit: comme pour s'en aider à quelque besoing. Caressant les Tribuns & Centeniers: honorant les gentilshommes de reputation & vertu; qui estoient en la ville: comme si elle eut cherché vn chef & vn party. Neron s'en apperceut: à ceste cause il luy osta le guet armé, que seule elle auoit lors, comme femme, & encors comme mere d'Empereur. Donnant congé aux Allemans qui (oultre ceste preeminence) estoient destinez pour la garde de son corps. Et à fin qu'elle ne fut hantée, de trop grande compagnie de gens luy venans faire la cour: il faiët deux maisons & enuoye demourer sa mere en celle qui fut à Antonie: menant avec soy vne grande troupe de Centeniers, quant il l'alloit voir: & sortant tout court, apres l'auoir legerement baïsee.

De faueur d'elle mesme, accusée à la suscitation de Iunie Sillane de conspirer contre Neron son fils. Punition de ladicte Sillane & autres accusateurs.

Accusation de Pallas & Burrus.

CHAPITRE V.



L n'y a entre les choses mortelles, riē tant muable & coulant, que le bruiët d'vne puissance & faueur, nō appuyee sus ses forces particulieres. Incontinent apres telle separation, chacun abandonna la porte de la maison d'Agripine: personne ne la cōsoloit: personne

sonne ne la visitoit, fors quelque peu de femmes: encores est il incertain, si c'estoit par amitié, ou par haine. L'une desquelles nommée Iunie Sillane, chassée (comme ie vous ay dict cy dessus) d'auec C. Silius son mary; estoit de grande maison: d'une beauté affectée: & fut longuement & bien fort aimée d'Agripine. Toutesfois il y eut depuis, quelque secret despit entr'elles: pour ce qu'Agripine auoit destourné Sextus Affricain ieune gentilhomme, d'espouser Sillane: disant qu'elle n'estoit femme de bien, & tiroit desia sur l'aage. Non qu'elle voulut reseruer Affricain pour soy: mais de crainte que l'espousant, il ne s'enrichit des biens de Sillane; qui n'auoit point d'enfans. Sillane doncques se presentant l'esperance de s'en venger, fait accuser Agripine par Iturius & Caluissius ses cliens: ne luy reprochant point le passé, & ce dont ja tant de fois on auoit ouy parler: comme le ducil qu'elle faisoit de la mort de Britannic: ou qu'elle publioit les torts faits à Octauié: ains qu'elle auoit delibéré esleuer & aggrādir Rubellius Plaute; qui du costé de sa mere touchoit le diuin Auguste en pareil degré que Neron: pour s'en seruir à nouuelles entreprises contre l'estat. Et par le moyen de son mariage & de l'Empire qu'elle luy mettroit entre les mains: enuahir de rechef la Republique*. Iturius & Caluissius descourirent cecy à Atimet, affranchy de Domitie tante de Neron. Lequel bien ioyeux de telle rencontre (car il y auoit entre Agripine & Domitie, ialousie & inimitié pour leur grandeur) pressa l'histrion, Paris, aussi affranchy de Domitie, aller vistement defferer ce crime; & le faire le plus grand

XIII. LIVRE DES ANNALES

& mauuais qu'il pourroit. La nuit estoit ja fort auancee: & Neron la passoit en yurongnant; quand Paris entra: lequel sans cela auoit coustume de venir à telle heure, renforcer les esbats & passeréps du Prince: mais lors ayât pris vne contenâce triste, & déclaré de point en point ce qu'il auoit entendu; il donna telle frayeur à Neron, qu'il delibera nô seulemēt tuer sa mere & Plaute: mais aussi chasser Burrus de sa capitainetie des gardes: cōme si ayât esté aduacé par Agripine; il luy voulut rendre la pareille. Fabi^o Rustic a laissé par escrit; que l'on enuoya lettres à Cecina: Tusque, pour venir prendre la charge des gardes du Palais: toutesfois que Burrus fut retenu en l'estat, par le moyē de Senecque. Pline & Cluius disent, qu'on ne douta iamais de la fidelité du Capitaine des gardes. De vray il semble que Fabius soit enclin à louer Senecque: l'amitié duquel fut cause de son aduancement. Quant à nous, ayans deliberé de suiure ce que les auteurs ont dict d'un cōmun accord: si il aduiēt qu'ils se cōtrariēt en quelque endroiēt; nous l'escrirons sous leur nom. Neron effrayé, & desirieux de faire tuer sa mere, ne peut estre conseillé d'attendre; sinon iusques à ce que Burrus l'asseura de la faire mourir, si elle se trouuoit cōuaincuē de telle meschâceté. Toutesfois qu'il falloit ouyr qui que ce fut en ses deffences: & à pl^o forte raison vne mere. Joint que les accusateurs n'estoient là presens: & n'y auoit que le rapport d'une seule personne, encores de maison ennemie. Qu'il ne pouuoit approuuer qu'une telle deliberation, se fit durant l'obscurité & la nuit passée en banquetant: & que tout sentiroit plus qu'autrement, sa temerité & indiscretion.

discretion. La crainte du Prince estant appaisée par ce moyen, & le iour venu; on va chez Agripine pour luy faire recognoistre ces accusations: s'en purger: ou souffrir la punition. Burrus auoit la commission de faire le message, en presence de Senecque; y assistans aussi aucuns affranchiz: pour tesmoigner & remarquer les parolles qui seroient dictes. Lequel luy ayant déclaré les chefs de l'accusation & les auteurs, vsa apres de menasses: mais Agripine ne pouuant oublier sa fierté: Je ne m'estonne pas (respondit elle) si Sillane qui iamais n'accoucha d'enfant, ne sçait quelles sont les affections des meres. Car les peres & meres ne changent pas leurs enfans; tout ainsi qu'une ribaude mariee ses adulteres. Et si Iturius & Caluissus apres auoir mangé tout leur bien, s'employent pour vn dernier seruice au faict de la presente accusation, à fin de complaire à cestè vieille là; si ne faut il (toutes fois) que ie sois diffamee de parricide: & qu'il en demeure à Cesar, quelque scrupule sus son cueur, que ie l'aye voulu faire. Encores sçauois ie gré à mon ennemie Domitie, si elle s'efforçoit de me vaincre en amitié, à l'endroiect de mon Neron. Mais maintenant avec le personnage du bredache Atimet; & de l'histrion Paris; il semble qu'elle appreste des ieux pour les représenter sus l'eschaffaut d'un theatre. Elle accoustroit les viuières de ses maisons de Baye (qu'elle aime tant) quand par mon cōseil & moyen, se poursuuioiēt l'adoptiō, le droiect de Procōsul, la nomination pour estre Cōsul; & autres choses pour paruenir à l'Empire. Qu'il se presente dōc quelcun pour ne cōvaincre q' i' aysollicité les co-

XIII. LIVRE DES ANNALES

• hortés des soldats, estans en la ville? essayé de renuerfer
 • la fidelité des prouinces? & finalement prattiqué &
 • corrompu les esclauues & affranchiz, pour faire telle
 • meschanceté? Quoy pouuois-ie demourer viue, Bri-
 • tannic tenant l'Empire? & sçauoir mon si Plaute ou
 • quelque autre vient à obtenir le gouuernement de la
 • Republicque, & la puissance de iuger; * il y aura faute
 • d'accusateurs? Lesquels ne me reprocheront pas des
 • parolles, qui par vne impatience d'amour me soient
 • quelquesfois eschappees; mais de tels crimes, que ie
 • n'en puis estre absoute, si ce n'est comme vne mere par
 • son fils. Les assistans esmeus de ces parolles, & faisans
 ce qui leur estoit possible pour adoucir sa cholere: elle
 demande à parler à son fils: deuant lequel elle n'allega
 aucunes deffences, comme si elle se fust deffice de son
 innocence: ne ses biens faicts, comme les luy voulant
 reprocher: au cōtraire elle obtint punition de ses Em-
 puteurs: & des recompēses pour ses amis & seruiteurs.
 Car la Preuosté des viures fut donnee à Fenius Ruf-
 fus: & la commission des ieux que Cesar s'apprestoist de
 faire, à Aruntius Stella. L'Egypte à C. Balbillus: la Sy-
 rie fut destinee & promise à P. Anteius. Mais apres a-
 uoir esté abusé par plusieurs subtilitez; finalement on
 le retint en la ville. Quant à Sillane elle fut bannie: I-
 turius & Caluissius confinez: & Arimet executé à mort.
 Car Paris à cause des seruices qu'il faisoit au Prince en
 ses plaisirs secrets, luy commandoit trop pour receuoir
 punition: & Plaute fut laissé là, sans parler de luy pour
 l'heure. Apres cela, Pallas & Burrus sont accusez, d'a-
 uoir pris complot de faire appeller à l'Empire Cornile
 Sulla,

Sulla, tant au moyen de la noblesse de sa race, qu'aussi pour l'alliance de Claude; duquel il estoit gendre: ayât espousé Antonie sa fille. L'auteur de ceste accusation fut vn certain Petus, assez congneu par ce qu'il faisoit executer & vëdre les biës des redevables au thresor public: lequel lors se trouua apertement mêteur & vain. Toutesfois l'innocence de Pallas ne fut tant aggreable, que son arrogance insupportable. Car quant on nomma les affranchiz qui estoient consentans, & l'aidoient à conduire ce faiët: il respondit n'auoir iamais rien monstré à faire en sa maison, que par signe de la teste ou de la main. Et quand il y auoit plusieurs choses, il les declaroit par escrit, sans y employer la voix. Burrus encores qu'il fut accusé, ne laissa d'opiner en ceste cause comme l'vn des iuges. L'accusateur fut banny, & les papiers (en vertu desquels il faisoit reuiure, les contes du thresor public) biffez; furent bruslez comme de nul effect & valeur. Sus la fin de l'annee, la compagnie qui souloit demourer au Theatre, comme vn corps de garde, fut leuee; à fin de faire plus grande monstre de liberté: & que le soldat n'estant meslé parmy la licence & desbauche du theatre; fut moins corrompu. Et le populace monstra par experience, si les gardes ostées, il se contiendrait aussi sagement, que quand il y en auoit. Le Prince par le conseil des Aruspices fit vne sainte-reueüe * de la ville: pour ce que les temples de Iupiter & Minerue, auoient esté touchez de foudre.

XIII. LIVRE DES ANNALES

Consulat de C. Volusius & P. Scipion. Folies de Neron & commencement de sa desbauche. Dispute contre & pour la liberté des affranchis. Paris histrion déclaré de franche condition. Reiglement de la iurisdiction d'aucuns Magistrats de la ville de Rome. CHAP. VI.

C. Volusius & P. Scipion estans Consuls: on eut repos avec l'estranger. Mais il se fit en la ville, de bien laids desbordemens: durant lesquels Neron vestu en esclaue à fin d'estre mescognu; rodoit par les bordeaux & cabarets: accompagné de gēs qui rauissoient les marchandises exposées en vente: & bleissoient ceux qu'ils rencontroient & ne les cognoissoient point: de sorte que luy mesme y receut des coups; & en porta la marque au visage. Mais depuis qu'il fut sceu que c'estoit Cesar qui ribloit & couroit: les outrages s'augmenterēt iusques à l'endroiēt des hommes & femmes d'honneur & de reputation: d'autāt que quelques vns avec troupes particulieres, abusans du nom de l'Empereur voient de pareille hardiesse sans estre repris. Tellement que la nuit l'on estoit comme en captiuité. Vn certain Iules Montan Sénateur; qui n'auoit encores tenu aucun estat: s'estant d'auanture aheurté la nuit contrē le Prince, qui le vouloit outrager: pour ce qu'il le repoussa bien rudement; & depuis l'ayant recognu l'auoit prié de luy pardonner, fut contrainēt de mourir: comme s'il luy eust reproché & fait honte de ceste folie. Neron depuis plus craintif, mena des soldats, & plusieurs Gladiateurs: qui du commen-

cement

cement ne se mesloient point des querelles, tant qu'elles estoient legeres; & le laissoiēt faire comme si c'eust esté vne noise de gens de petite estoffe: mais si les offencez faisoient plus forte resistance, alors ils y employoient les armes. Il fit aussi tant par dons & impunité, que les follies qui aduenoient aux ieux; se tournerent quasi en rencontres & batailles. Er que ceux qui particulièrement fauorisoient les histrions, s'eschaufferent iusques là; qu'ils vindrent aux mains: cependant qu'il les regardoit en cachette; & quelquesfois tout publicquement. De sorte que pour appaiser la partialité du 'peuple, & de peur que il n'aduint pis: on ne trouua meilleur remede que chasser les histrions d'Italie: & que les soldats se trouuassent de rechef au theatre. Au mesme temps il fut parlé au Senat des fraudes des affranchiz. Et l'on demanda instamment, que les patrons eussent puissance de reuocquer la franchise, par eux donnee à ceux qui se monstroient ne l'auoir bien meritee: car il n'y auoit faute de gens, qui fussent de cest aduis. Ce nonobstant, les Consuls n'osans mettre cela en deliberation, sans le sceu du Prince; luy escriuirent la volonté commune du Senat: & fil vouloit que telle ordonnance se fit sous son nom; puis qu'il n'y auoit que peu de Senateurs de contraire opinion: & d'auantage qui murmuroient & se plaignoiēt, que l'irreuerence des affranchis, se fut tellement accreuë par le moyen de leur liberté; qu'ils ne se soucioiēt si à tort ou à droict, ils se portoient enuers leurs patrons: à l'aduis desquels ils osoient bien cōtrarier, voire leuer

XIII. LIVRE DES ANNALES

les mains contr'eux: & coudoyer * ceux, qui estoient d'aduis de faire vne loy pour les chastier. Aussi, quelle autre chose estoit permise au patron offensé, sinó que bannir l'affranchy à vingt mil pres de Rome, en la coste de Campanie: car quant au demeurant, ils n'estoiét point plus priuilegez en leurs actiós, l'un que l'autre *. A ceste cause il falloit donner aux patrons de telles armes, qu'elles ne peussent estre mesprisees: & ne deuoient les affranchiz, trouuer mauuais de garder & maintenir leur liberté; par la mesme obeissance qui auoit esté cause de la leur faire acquerir. Et que ceux qui estoient euidemment conuaincus d'ingratitude, pouuoient iustement estre remis en seruitude: à fin de contenir par crainte en leur deuoir, ceux ausquels les biens-faiçts n'auoient sceu changer le naturel. On discouroit au contraire, que la faute de peu, ne deuoit nuire qu'à eux mesmes; sans preiudicier au droict de tous vniuersellement: d'autant que ce corps estoit grand & espars en beaucoup d'endroits. Que maintesfois d'ice-luy auoient esté composees & remplies les Tribus, les dizaines, les ministres des magistrats & des prebstres: l'on en auoit leué dans la ville des cohortes; & plusieurs Cheualiers & beaucoup de Senateurs, ne pouuoient d'ailleurs tirer & prendre leur origine. Si les fils d'affranchiz estoiet separez, on descouuriroit trop le petit nombre des gentilshommes. Que non sans cause, les anciens partissans les bourgeois de Rome, par leurs ordres & degrez de qualité, donnerent communemét à tous, puissance d'affranchir leurs serfs & esclaués*. Et de faiçt aussi, il y auoit deux especes d'affranchissement ordonnez:

ordonnez: à fin qu'il y eut moyen de se repentir ou de rechef vsfer de grace . Ceux que le patron n'auoit affranchiz par deuant les Magistrats, traïsnoient encores leur lien de seruitude. Et pour ce que chacun regardast de pres aux merites; & n'ottroyast legerement, ce que ayant vne fois accordé, ne se pouuoit plus oster. Ceste opinion l'emporta: & Cesar escriuit au Senat; qu'il examinaist les causes des affranchiz, toutesfois & quantes ils seroient particulièrement accusez par leurs patrons: sans toucher aucunement à la communauté. Bien peu de temps apres, Paris fut osté de la puissance de Domitie tante de Neron sa patrone: soubs couleur du droit gardé en la ville & cité de Rome: non sans le blasme du Prince, par le commandement duquel le procès de sa franchise auoit esté iugé. Ce neantmoins encores y auoit il quelque apparence de Republicque . Car sestant esmeu different entre Vibulius Preteur, & Antistius Tribun du peuple; pour ce que le Tribun auoit commandé eslargir des mutins eshontez fauoriseurs d'histrions, mis en prison par ordonnance du Preteur: le Senat approuua le faict du Preteur; blasmant l'audace d'Antistius: & par mesme moyen fut deffendu aux Tribuns, d'entreprendre sus l'autorité des Preteurs & Consuls: ou faire donner assignation deuant eux, aux habitans d'Italie qui pouuoient ester à droit. * L. Pison nommé Consul pour l'annee suiuaute; adiousta qu'ils ne peussent vsfer de l'autorité & puissance de leur Magistrat, dans leurs maisons: & que l'amende par eux adiuee, ne fut enregistree par les Questeurs du thesor public, iusques à quatre mois apres la condamna-

XIII. LIVRE DES ANNALES

tion. Que ce pendant on la peut débattre, & les Consuls eussent puissance d'ordonner de cela. Le pouvoir aussi des Ediles, fut retranché plus court: & arresté iusques à combien les Curulles, & combien les populaires pourroient gager les personnes: & en quelle peine les condamner. Cela donna occasion à Heluidius Prisc Tribun du peuple, de monstrier l'inimitié particuliere, qu'il portoit à Obultronijs Sabin Questeur du thresor public, comme s'il estoit trop rudement, le privilege des executions & vente de biens contre les pauvres gens. Depuis ce temps, le Prince osta aux Questeurs la iurisdiction & cognoissance des dettes publiques: & la donna aux Prefects de la ville. Ceste iurisdiction a esté maniee diuersement: & changee souuentes fois: car Auguste permit au Senat, eslire des Prefects: ce que depuis n'estant trouué bon, à cause de la brigue qui se faisoit pour y paruenir, on commença tirer au sort entre le nombre des Preteurs, ceux qui deuoient auoir telle charge. Encores cela ne dura pas long temps; d'autant que souuent la fortune tomboit indifferemment sur tels qui en estoient peu capables. Et lors Claude y mit de rechef les Questeurs: ausquels pour plus soigneusement & hardiment faire leur estat, sans crainte d'offencer personne, il dóna quelque preeminence d'honneur plus que de coustume. * Toutes-fois pour ce que le respect qu'apporte l'aage, deffailloit à ceux qui en estoient pourueus (d'autant que c'estoit le premier Magistrat que la ieunesse demandoit) cela donna occasion à Neron de les choisir entre ceux
qui

qui auoient esté Prefects de la ville, & cogneus par longue experience. Soubz les mesmes Consuls, Vipsan Lenas fut condamné, pour auoir trop auaricieusement gouuerné la prouince de Sardaigne. Et Sestius Proculus chargé du crime de deniers mal pris, fut absous au moyen du desistement de ses accusateurs. Claude Quirinal Prefect de la chorme qui seiournoit à Rauenné; accusé d'auoir par bombans, luxure, & cruauté; trauaillé l'Italie comme la moindre prouince del'Empire; preuint sa condamnation en prenant du poisson. Aminius Rebius, estimé l'un des premiers hommes de Rome, tant pour la science des loix, que pour la grandeur de ses richesses; eschappa les douleurs de sa vieillesse maladiue, se faisant couper les veines: encores qu'on pensast qu'il n'auroit le cueur, de se donner la mort soy-mesme: tant il auoit le bruiet d'estre effeminé, à cause de ses plaisirs desordonnez. Mais Volusius mourut en bien bonne reputation. Lequel vesquit quatre vingt treize ans, avec de tres-grandes richesses acquises loyaument: sans offencer tant de malicieux Empereurs.

Second Consulat de Neron avecques L. Pison.

Quelles choses il faut escrire dans les Annales. Deffences aux Magistrats &

Receueurs des prouinces, de faire des ieux pour le plaisir du peuple.

CHAP. q. VII.

auo

R. iij.

XIII. LIVRE DES ANNALES



SOUS le Consulat de Neron pour la seconde fois, & de L. Pison; peu de choses aduindrent qui soient dignes de memoire: si quelqu'un ne prêt plaisir d'emplir les liures, de louanges des fonde-
mens & grands sommiers, que Neron employa au bastiment de l'Amphiteatre, qu'il fit dresser au champ de Mars: veu qu'il a esté trouué plus honorable pour le peuple Romain, mettre aux Annales les choses grandes: & celles cy, dans les iournaux de la ville. Au reste les colonies Capouë & Nocerre, furēt renforcees d'habitans: adioustant à leurs corps, de vieils soldats. Et vne liberalité de quarāte deniers, fut distribuee par teste au menu peuple: & quatre cēs mil Sestercium mis dās le thresor public; pour aider le peuple à l'aquit de ses dettes. * L'imposition aussi du vingt & cinquiesme de la vente des esclaves, fut quittée: & leuée en apparence, plustost qu'en verité. Car puis qu'il estoit enioint au vendeur de la payer, cela augmentoit le pris de la chose vendue. Cesar ordonna qu'aucun Magistrat ou Procurateur qui eut charge en Prouince, n'eust à faire ieu de Gladiateurs ou de bestes sauuages: ne tels autres passe-temps. Car au parauant ils ne trauailloiet pas moins leurs subiets par telle liberalité, que quād ils rapinoiet leurs biens & deniers. D'autant qu'ils couuroient les fautes commises par volonte desordonnee, avec la brigue & faueur que le peuple leur portoit pour tels tēps. Il fut aussi faict vn arrest au Senat, bon pour chastier des esclaves & s'en asseurer: par lequel estoit ordonné; si aucun auoit esté occis par ses esclaves; que les affran-
chis

chis par son testament, fils se trouuoient dans le logis à l'heure du meurdre, seroient semblablement puniz comme les autres esclaués. Lufius Varius Consulaire, au parauant condamné pour cōcussion & deniers mal pris, fut aussi remis au degré qu'il souloit tenir: & Pōponie Grecine femme honorable, marice avec Plautius (qui retournant de la *grand* Bretagne auoit faict vne ioyeuse entree à Rome appelée Ouation) estant accusée de croire aux superstitions estrangeres, fut renuoyee à son mary, pour en iuger comme il entēdroit. Lequel suiuant les loix anciennes, fit le procez criminel à sa femme, en la presence de ses parens: & la declara innocente. Ceste Pomponie velquit longuement, & en continuelle tristesse: car depuis que Iulie fille de Drusus, eut esté occise par la malice de Messaline: on ne la vit iamais (quarante ans durant) que vestue en dueil: que tousiours avec triste contenance. Ce que ayant faict sans danger durant l'Empire de Claude: luy tourna depuis à honneur. La mesme année il y eut plusieurs criminels: à l'vn desquels nommé P. Celer, accusé par ceux de la prouince d'Asie, & qui ne pouuoit estre absous; Cesar fit trainer * le procez; iusques à ce qu'il mourut de vieillesse. Car Celer ayant faict mourir le Proconsul Sillan (comme nous auons dict) couuroit toutes les autres fautes, par la grandeur de telle meschanceté. Les Ciliciens auoient denoncé Cossutian Capiton, entaché de mauuais vices: & qui pensoit luy estre permis d'vser en la prouince, de pareille audace qu'il auoit faict en la ville. Mais après s'estre combattu & tourmenté contre des accusateurs opiniastrés,

XIII. LIVRE DES ANNALES

finalement il abandonna ses deffences: & fut condamné pour concussion. La brigade se trouua si forte pour Eprius Marcel (auquel les Ciliciens redemandoient des deniers mal pris) qu'aucunes de ses parties aduerses furent bannis: comme si à tort ils l'eussent tra-uailié.

Consulat troisieme de Neron avec Valere Messala. Liberalité de Neron à l'endroiect d'aucuns pauvres seigneurs de noble maison. Renouuellement de la guerre d'Armenie. Tiridates est contrainct vuidier le Royaume d'Armenie, par la bonne conduite de Corbulon.

CHAPITRE VIII.



NERON estant pour la troisieme fois Consul, Valere Messala entra en charge quant & luy: le bisayeul duquel nommé Coruin qui fut Orateur, quelque peu de vieilles gens viuans encorés, se souuenoient auoir au mesme Magistrat veu compaignon du deuin Auguste, pere du bisayeul de Neron. Mais ceste noble famille fut honoree d'auantage, par ce qu'on offrit à Messala tous les ans cinq cens Sestercium, * à fin de soulager sa pauureté innocente & sans reproche. Le Prince ordonna pareillement à Aurele Cota & Atherius Antoine, certaine pension d'argent par chacun an: combien qu'ils eussent dissipé les richesses de leurs predecesseurs par folle despence. A l'entree de cest an la guerre qui par commencement assez lente & mols, festoit

festoit iusques là differee & trainee entre les Parthes & Romains, pour la iouyssance d'Armenie; s'eschauffa bien asprement: par ce que Vologeses ne pouuoit endurer que son frere fut chassé du Royaume qu'il luy auoit donné: ne qu'il le tint par bien faict d'autre seigneur. Et Corbulon pensoit faire chose digne de la grandeur du peuple Romain, sil recouuroit ce que iadis fut conquis par Lucullus & Pompee. Encores outre cela l'incertaine foy des Armeniens, inuitoit à la guerre les vns & les autres: estans par l'assiette de leur pays & façon de viure, plus approchans des Parthes. Et puis ayans pris alliance par mariages faits ensemble, & ne sçachans que c'estoit de liberté ils estoient plus enclins à l'assubiettir de ce costé. Quant à Corbulon il fut plus empesché apres la lascheté de ses soldats que contre l'infidelité & tromperie des ennemis. D'autant que les legions ritees de Syrie; apesanties par vne longue paix, portoient malaisément les couruees accoustumees par les soldats Romains. Il est trescertain qu'il se trouua en ceste armee de vieils soldats qui n'auoient iamais faict gardes ny escoutes. Et qui regardoient vne pallissade, rampart, & fossé; comme vne merueille non iamais veüe: sans armets, sans cuirasses, mignards & subiets à leur profit *: pour ce qu'ils auoient passé le temps de leur militie en des villes. Parquoy Corbulon ayant donné congé à ceux qui estoient cassez de vieillesse ou maladie; demanda rafraichissement de gens. Et à ceste fin furent faictes des leuees par Gallatie & Cappadoce. Et outre luy fut enuoyee de renfort vne legion venant de Germanie:

XIII. LIVRE DES ANNALES

des gens de cheual: & cohortes de pied. Et fit loger toute l'armee sous les tentes faictes de peaux: iacoit que l'hyuer fut si rigoureux & la terre si couuverte de glace, qu'il n'y auoit lieu ou tendre les pavillons sans la fouiller. Plusieurs eurent les membres transis de froid: & aucuns moururent faisans la garde. Et fut remarqué qu'un soldat portant un fagot de bois, ses mains luy gelerent de telle sorte, qu'elles tomberent de ses bras attachees au fardeau. Mais Corbulon vestu à la legere, la teste descouuerte; se trouuoit ordinairement par tout: quant l'armee marchoit, quant l'on traualloit. Et louant ceux qui faisoient bien, reconfortant & soulageant les foibles, il monstroient bon exemple à chacun. Parquoy voyant depuis que beaucoup l'abandonnoient ayans en horreur & la fascheuse saison, & une si rude discipline: il y remedia par seuerité & rigueur. Car il ne pardonnoit point à la premiere ou seconde faute, comme aux autres armées; ains qui auoit delaisné son enseigne, estoit puny de la teste. Ce qui se trouua profitable par experience: & seruit plus que la misericorde: d'autant que moins de gens abandonnerent ce camp, que celui où l'on pardonnoit. Ce pendant Corbulon ayant tenu les legions dans le parc de son camp; iusques à ce que le printemps fut avancé; & assis en lieux propres les cohortes du secours: il les aduertit de ne commencer les premiers le combat. La charge des garnisons fut donnée à Paëtius Orphit, qui auoit autresfois tenu le degré de Primipile: lequel nonobstant qu'il aduertit Corbulon que les ennemis ne se

ne se tenoient sus leurs gardes, & qu'il se presentoit occasion de faire quelque belle entreprise: n'eut autre responce, sinon demourer en sa garnison, & attendre plus grandes forces. Mais luy ne tenant conte de ce commandement, voyant que quelques petites troupes de gens de cheual arriuez des chasteaux prochains, comme peu experimentez demandoient la bataille: ayant attaqué les ennemis il fut mis en route. De sorte que ceux qui le deuoient secourir, estonnez de sa perte: fuyans à vau de route retournerent en leurs forts. Ce qui despleut grandement à Corbulon. Lequel apres auoir tancé Pactius, les Prefects & soldats; enioignit à tous dresser leurs tentes hors la pallissade. Leur faisant endurer ceste honte, iusques à ce qu'ils en fussent deliurez à la priere de toute l'armee. Or Tiridates outre ses propres partisans & vassaux, se voyant aidé des forces de son frere Vologese, ne couroit plus à la desrobee comme deuant, ains tout ouuertement traualloit l'Armenie: pillant ceux qu'il pensoit nous estre fidelles. Et quant on luy faisoit teste avec de grosses troupes, il les abusoit: & voltigeant çà & là tiroit plus la guerre en longueur par sa reputation, que par ses armes *. A ceste cause Corbulon ayant cherché plusieurs fois occasion de donner la bataille, voyant qu'il n'y gaignoit rien fut aussi luy mesme à son exemple contrainct de faire la guerre çà & là en plusieurs endroits: diuisant ses forces à fin que ses Lieutenans & Prefects, peussent tout à vn coup enuahir diuers lieux. Quant & quant il admonnest le Roy Antioch, de se ietter sus les gouuernemens voisins de son Royaume. Car

XIII. LIVRE DES ANNALES

Pharasmanes apres auoir tué Radamiste son fils : comme luy estant traistre; pour monstrier sa fidelité enuers nous, se vengeoit par grande affection des Arméniens; qu'il haïssoit de longue main . Lors furent premiere-
ment attirez les Isiches : nation qui n'auoit encores esté cy deuant alliee des Romains: lesquels coururent le
pays d'Armenie malaisé . Et par ce moyen il aduint à Tiridates , tout le rebours de ses desseins. Ce qui fut
cause de luy faire enuoyer des Ambassadeurs: se plaindre tant en son nom que celuy des Parthes; pourquoy
ayant n'aguieres baillé ostages, & renouuclée l'alliance (laquelle aussi donne occasion à nouveaux biens-
faicts) on le chassoit de l'ancienne possession, qu'il auoit d'Armenie . Que Vologeses mesmes ne s'estoit
encores remué: pour ce qu'il aimoit mieux debattre sa
cause par raison que par force . Mais si l'on continuoit
la guerre: les Artacides ne se trouueront auoir faute de
vertu & bonne fortune: ainsi que les Romains auoient
à leur grande perte & dommage souuent experimen-
té. Là dessus Corbulon bien aduertý que Vologeses estoit
empesché à cause de la rebellion des Hircaniens: persuade à Tiridates adresser ses prieres à Cesar: disant
qu'il pourroit asseurement obtenir le Royaume d'Armenie, & venir à chef de ses affaires sans espandre du
sang: si quittant vne esperance loingtaine & tardieue; il
suiuoit la presente meilleure & plus certaine. Depuis
ils aduisèrent d'autant que par les allees & venues
des messagers d'une part & d'autre , ils n'ad-
uancoient rien pour l'acheuement & faict principal
de la paix : qu'un iour & lieu propre seroit
choisi

choisi pour parlementer eux mesmes en personne. Tiridates disoit que pour sa seurte, il ameneroit mil cheuaux : & ne se soucioit combien Corbulon eut de gens de guerre de toutes sortes ; pourueu qu'ils vinssent sans cuirasses & habillemens de teste ; comme ils sont vestuz en temps de paix. Tout homme viuant & encores vn vieil & prudent capitaine ; eust descouuert la tromperie des Barbares. Et qu'un petit nombre estoit expres limité de leur costé ; & de l'autre proposé vn plus grand, à fin d'executer plus aisément leur trahison. Car qui eut voulu contre si bons & adroits archers à cheual, apposer des hommes desarmez ce grand nombre n'eut de rien profité. Toutesfois Corbulon faisant semblant de ne s'en estre apperceu respondit que le parlement des choses qui se deuoient aduiser pour la commune vilté ; se feroit mieux à la veüe des deux armées entieres. Et pource il choisit vn lieu partie duquel festeuoit doucement en coutaux, propres à renger des compagnies de pied : & l'autre festédoit en vne plaine bonne pour mettre au large vne cheualerie. Le iour arresté Corbulon festât le premier trouué sus le lieu, mit aux deux aïles & pointes les alliez & le secours des rois. & au milieu la sixième legion ; parmy laquelle il auoit meslé 3000. hommes de la tierce, venus la nuit des autres garnisons voisines sous vne seule aigle, cōme si ce n'eust esté qu'une mesme légion. Tiridates vint sus le declin du iour : & se tint si loing qu'on le pouuoit mieux veoir qu'entendre. Parquoy le chef des Romains sans auoir parlementé, commanda à ses gens se retirer chacun.

XIII. LIVRE DES ANNALES

en son logis. Or soit que le Roy se doutast de surprise, voyant les Romains s'estendre tout à vn coup en plusieurs endroicts : ou qu'il eut volôté de destrousser noz viures, & munitions venans de la Mer Maieur, & de la ville de Trebizonde; partit bien vistement. Toutes-fois non seulement il n'empescha la conduicte (pour ce qu'ils venoient par des montaignes que noz garnisons tenoient) mais encores Corbulon ne voulant que la guerre tirast en longueur, sans aucun effect & execution, s'appresta pour razer les chasteaux : à fin de contraindre les Armeniens à deffendre leurs biens.

Corbulon ayant pris les chasteaux forts d'Armenie, destruit Artaxate principale ville du pays.

CHAPITRE IX.



Q VANT à luy il choisit le plus fort du pays nommé Volandum, pour l'assieger. Laisant les autres à Cornile Flaccus son lieutenant; & Ateius Capiton Prefect du camp. Puis ayant recognu la forteresse & faict prouision des choses necessaires à la batterie, il admonnesta les soldats pour suiure cest ennemy vagabond: lequel n'estant bon pour la paix ne pour la guerre, confessoit par sa fuitte sa desloyauté & couardise. Et qu'en le chassant de ses forts, tout d'un coup ils aduississent à leur honneur & profit. Apres cela, ayant party son armee en quatre, il mene les vns amassez en façon de voute ou tortuë, sap-
per

per la pallissade & rampart. Les autres pour dresser les eschelles contre la muraille: & à plusieurs il commanda lancer avec les engins, dards & torches ardentes. Les viseurs & maistres des bricolles & autres engins eurent leur place pour lascher de loin les dondaines & boulets: à fin qu'il n'y eut endroiçt de la ville qui peut aider à l'autre; estans les assiegez en pareille crainte de tous costez. L'ardeur de l'armee assaillante fut si grande; que dans la tierce partie du iour, les murailles se trouuerent denuees de gens pour les deffendre. Les barrieres des portes renuersees: les remparts gaignez par escalade: & tous ceux de la ville estans au dessus de l'aage de douze à quatorze ans occis: sans perdre vn seul homme de guerre: Et n'y en eut que bien fort peu de blesez. Le foible peuple fut vendu à l'enquan; & le reste du butin demoura aux victorieux. Le lieutenant & Prefect de camp eurent pareille auanture. Ainsi trois chasteaux ayans esté pris en vn iour, le reste se venoit rendre tant par crainte que volonté des habitans: ce qui donna courage & assurance d'assailir Artaxate ville capitale du pays. Toutesfois les legions ne furent conduictes par le plus court chemin: d'autant que passans sur vn pont de la riuierre Araxes, qui coule au long des murailles; les soldats eussent esté à la portee du traict. Mais ils passerent plus loing & par de plus larges gueuz. Or Tiridates de honte & de crainte que souffrant assieger ceste ville; il semblast n'auoir aucun moyen de la secourir: & d'autre costé considerant que fil l'empeschoit; il embarassoit en lieux malaisez soy-mesme & son armee, composee de gens de

XIII. LIVRE DES ANNALES

cheual: se resolut en fin monstrier ses gens en ordonnance. Et à certain iour nommé commencer la bataille: ou faisant semblant de fuir, apprestier occasion de surprise. Ainsi donc suiuant ceste deliberation, il vint tout à coup enuironner les Romains comme ils marchoient. Non toutesfois sans le sceu de nostre chef, qui auoit ordonné son armee tellement, qu'elle pouuoit cheminer & combattre. La troisième legion marchoit sus le costé droict: & la sixiesme au fenestre: ayans au milieu vne troupe choisie parmy ceux de la dixième. Le bagage fut mis entre les rangs & cōpagnies des soldats: l'arriere-garde estoit deffenduë par mille cheuaux ausquels il auoit commandé faire teste, & soustenir l'effort des ennemis quand ils les chargeroient de pres: mais ne les suiure point s'ils se retiroient. Les archers à pied & le reste des gens de cheual, estoient sus les aisles: mais celle du costé fenestre, s'estendoit vn peu plus vers le bas des coutaux: à fin que si l'ennemy vouloit entrer sus eux, il fut receu de front & par le milieu *en arc*. Tiridates d'autre costé harceloit les Romains: faisant bondir sa cheualerie à l'entour d'eux: toutesfois hors la portee du traict, tantost comme fil eut voulu donner dedans, & tantost faisant contenance d'auoir peur il se retiroit: essayant de les desbander, & attendant qu'ils ouurissent leurs rangs à fin de les attrapper separez. Quant le Roy vit qu'ils ne se desbandaient point temerairement: & que seulement vn dizainier de gens de cheual sortit trop hardiment de sa troupe, ayant esté percé à coups de fleches, auoit par son exemple appris aux autres de se tenir en ordonnance: il se re-
tira

tira comme la nuit approchoit. Et Corbulon ayant planté son camp au lieu mesme, fut en doute, si la nuit il deuoit passer outre vers Artaxate: & l'investir habillement avecques ses legions deschargees de bagage: pensant que Tiridates sy fut retiré. Puis quant les coureurs eurent rapporté que le Roy prenoit vn chemin bien esloigné; & qu'il estoit incertain sil alloit en Mede ou Albanie; il attendit le iour: enuoyant deuant les soldats legerement armez, enuironner la ville & commencer le siege de loing. Mais les habitans ouurans les portes de leur gré, se rendirent eux & leurs biens à la mercy des Romains: ce qui fut cause de les sauuer. Toutesfois le feu fut mis en Artaxate, & la ville abbatuë rez pied rez terre: pour ce qu'elle ne se pouuoit tenir sans grosse puissance, à cause de l'estenduë de ses murailles: & nous n'auions point tant de forces, pour y mettre garnison suffisante; & quant & quant tenir la campagne.

Aussi que la laissant entiere & sans garde, il n'y eut point eu de profit: ny d'honneur à l'auoir prise.

Encores adiouste l'on vn miracle comme aduenü par le vouloir des dieux: car estans iusques alors toutes choses loing des maisons esclairees du Soleil, l'espace ceint des murailles, se trouua tout à coup si couuert d'espaissë & noire nuee, separee de foudres par endroicts qu'il sembloit qu'elle fut destruite par ire & indignation des dieux. Pour toutes ces choses Neron fut salué Empereur; & des processions faictes par arrest du Senat: des statues &

XIII. LIVRE DES ANNALES

arcs de triomphe dressez & l'estat de Consul continué à ce Prince, & aussi ordonné que les iours de la victoire gaignee; des nouvelles receuës; & que l'on en auoit parlé au Senat, fussent festez: avec autres choses semblables, si desmesurément: que C. Cassius apres auoir esté de cest aduis pour le regard des autres honneurs; ne se peut tenir de remonstrer: que si l'on vouloit remercier les dieux de tant de bonnes aduantures, qu'à peine suffiroit toute l'annee, pour faire les processions. A ceste cause il falloit separer les iours ouurables d'avec ceux des festes: ausquels le seruice des dieux peut estre faict sans empeschemens des affaires humaines.

*Suillius emputeur est confiné. Son arrogance. Octa-
nie Tribun du peuple par vn despit tue s'amie.*

CHAPITRE X.



PREs cela vn criminel qui auoit receu maintes trauerfes, & s'estoit faict hayr de beaucoup de gens, fut condamné: non toutesfois sans le blafme de Senecque. Il s'appelloit P. Suillius: terrible & faisant tout pour argent, durant l'Empire de Claude: mais qui depuis le changement, n'estoit pas tant abbaisfé que ses ennemis eussent bien desiré: car il aimoit mieux estre estimé coupable, que suppliant. Et croyoit on que l'arrest du Senat, & la peine portee par la loy Cincia, contre ceux qui plaident les causes pour argent; auoit esté refraichie

fraichie tout expres pour l'accabler. Suillius mesme ne se pouuoit contenir d'vser de plainte & grosses parolles: estant outre son fier naturel, plus libre à cause de son extreme vieillesse. Reprochant à Senecque qu'il haïssoit les amis de Claude, sous le regne duquel il auoit esté tresiustement banny. Aussi qu'ayant esté accoustumé à vne estude morte, & à enseigner de ieunes enfans ignorans & sans experience, il portoit enuie, à ceux qui monstroient leur viue & entiere eloquence, en deffendant les citoyens. Qu'il auoit esté Questeur de Germanic; & Senecque l'adultere de sa maison: deuoit on trouuer plus mauuais, receuoir pour le salaire de sa peine honorable, ce qu'un plaideur donne volontairement: que honnir les chambres des dames de grande maison. Par quelle science, par quels enseignemens de philosophie, auoit il peu en quatre ans (que le Prince luy portoit faueur) mettre en ses bouges trois mil Sestertium*. Qu'à Rome les legs testamentaires: & ceux qui n'auoient point d'enfans, estoient par luy pris comme fil les eut enclos dans ses toiles. L'Italie & les prouinces espuisées par ses excessiues vsures. Mais quāt à luy qu'il n'auoit qu'un petit de bien; & encores aquis avec grād peine & labeur, & si encor'il estoit plus prest d'édurer l'accusatiō, le dāger, & tout ce qui luy en pouuoit aduenir; qu'abbaisser l'honneur & dignité par luy acquise de si longue main, deuant la soudaine grādeur d'un champignon de cour. Il n'y auoit faute de gens qui r'apportassent à Senecque les choses en mesmes parolles, ou encores changees en pis: & se trouuoient des accusateurs qui mirent sus à Suillius, que durant son

XIII. LIVRE DES ANNALES

gouuernement de la prouince d'Asie, il auoit pillé les alliez, & desrobé le public. Toutesfois depuis pour ce qu'il auoit obtenu que l'enqueste en seroit faicte dans vn an; il sembla que ce seroit le plus court, commencer par les fautes commises és enuiron de la ville: & desquelles se presentoiẽt assez de tesmoins. Ils luy reprochoient, que la rigueur de son accusation auoit contrainct P. Pomponẽ, entreprendre la guerre ciuile: Iulie fille de Drusus, & Sabine Popee aussi de se faire mourir. Qu'il auoit faussement accusé Valere Asiatic, Lusius Saturnin, Cornile Lupus: & faict condamner vne longue suite de Cheualiers Romains: reietans outre sus luy toute la cruauté de Claude. Mais en se deffendant il respondoit, n'auoir rien entrepris de soy-mesme; ains seulement pour obeyr au Prince. Lors Cesar le fit taire, disant estre asseuré par les memoires de son pere, que iamais il ne contraignit aucun, d'accuser personne. Quoy voyant Suillius, il se voulut couurir des commandemens de Messaline: & deslors ses deffences eommencerent à estre foibles. Car pourquoy l'auoit on choisi sur tous les autres, pour prester sa langue à ceste cruelle putain. Qu'il falloit punir les ministres des choses horribles quand apres auoir receu le salaire de leurs meschancez, ils s'en deschargeoient sus autrui. Ainsi doncques Suillius desnue de partie de ses biens (car l'autre fut laissée à son fils & à sa petite fille, & si on excepta tout ce qui leur auoit esté donné par le testament de leur mere & de leur ayeul) fut confi-

né aux isles de Maiorque & Minorque: sans que
 iamais il perdit le cueur; soit durant le danger, soit
 apres sa condamnation. Et disoit on qu'il porta
 patiemment ceste retraicte; viuant delicatement
 & abondamment. Nerulin son fils, que les ac-
 cusateurs en haine du pere, & pour les concussions
 de luy mesme assailloient; fut tiré de la presse par
 Neron qui sy opposa. Disant qu'ils deuoient es-
 stre contans de la vengeance qu'on en auoit prise.
 Au mesme temps Oëtaue Sagitta Tribun du peu-
 ple, estant forcené de l'amour de Pontia femme
 marice, achetta premierement par grands dons &
 presens la iouissance de son corps: & par mesme
 moyen qu'elle abandonneroit incontinent son ma-
 ry, luy promettant mariage: & la faisant iurer pa-
 reille promesse de l'espouser. Mais quand ceste fem-
 me se vit en liberté, elle chercha plusieurs remises:
 s'excuse que son pere ne trouuoit bon ce mariage,
 & ayant esperance de trouuer vn plus riche party,
 en fin elle se desdit de sa promesse. Oëtaue au
 contraire tantost se complaignoit, tantost la me-
 nassoit: appellant les Dieux à tesmoing, comme
 pour elle il auoit perdu son honneur & despensé son
 bien. Finalement puis qu'il ne luy restoit que la
 vie il la mettoit entre ses mains. Mais quant il vit qu'elle
 n'en tenoit conte il la pria luy donner le plaisir d'une
 nuit: à fin qu'appaisant son mal il se peut contenir à
 l'aduenir. La nuit arrestee, Pontia donne charge à vne
 seruante qui sçauoit leur secret, de veiller en sa cham-
 bre: Et Oëtaue accompagné d'un seul affranchy

KIIL. LIVRE DES ANNALES

ne faillit de si trouuer garny d'un glaiue caché sous sa robe. Alors comme il aduient en amourettes, ou il y a du courroux, ils commencerent à tancer, prier, user de reproches; & s'appaiser: & l'autre partie de la nuit se passa au deduit d'amours. *Mais* Octauius eschauffé de courroux & de plainctes, passe l'espee au trauers du corps de ceste femme, qui ne se doutoit de rien. Et ayant d'un coup estourdy la seruante qui estoit accouruë, sur le champ il se iette hors la chambre. Le iour d'apres quand le meurdre fut descouuert, on ne douta point qui estoit le meurdrer, estant certain & prouué, qu'ils auoient demouré ensemble. *Toutesfois* l'affranchy de Sagitta auoüoit ce faict comme sien; *disant* que c'estoit pour venger l'iniure de son maistre. De faict l'exemple de si grãde loyauté, auoit esmeu aucuns: iusques à ce que la seruante guarie de sa playe, descouurit la verité: & Sagitta à l'ysuë de son Magistrat estant accusé par le pere de la deffuncte, fut condamné par arrest du Senat: suiuant la loy de Cornile cõtre les meurdrers.

Qualitez de Sabine Popee, femme d'Othon: qui par ses mignardises gaigna le cœur de Neron: tellement qu'il l'osta à son mary. Confinement de Silla. CHAP. XI.



EST E meisme année, vne impudicité non moins remarquable, donna commencement aux plus grands maux que souffrit la Republicque. Il y auoit en la ville de Rome

me vne femme nommee Sabine Popee, fille de Titus Ollius: mais elle auoit pris le nom de son ayeul mater-
nel, pour ce que le renom de Popeus Sabin estoit fort
grand & illustre: ayant eu l'honneur de Consul, & de
triomphe: qui le faisoit fort estimer. Car l'amitié de
Seian ruina Lollius son pere, auant qu'il eut loisir de
paruenir aux charges & dignitez. Ceste femme estoit
douce de toutes autres choses fors que d'un cuer bon
& honneste: pour autant que sa mere, la plus belle da-
me de son temps, luy auoit laissé la reputation & la
beauté tout ensemble. Ses richesses estoient suffisantes
pour entretenir la noblesse & grandeur de sa maison.
Elle auoit la parolle gracieuse, & l'esprit qui n'estoit
point lourd; pour se monstrier modeste en apparence,
& follaistre quand il luy plaisoit. Elle ne sortoit guie-
res hors sa maison: & encores c'estoit le visage en par-
tie couuert de son voile; pour n'assouuir l'œil de ceux
qui la regardoient: ou peut estre par ce que cela luy
seoit mieux. Elle n'espargna iamais son honneur: ne
faisant aucune distinction entre ses maris ou ses adul-
teres: & ne s'asubietissant à son affection n'y à celle
d'autrui, elle tournoit son appetit à l'endroict où elle
cognoissoit estre son aduantage. Ainsi donc estant ce-
ste femme mariee avec Ruffus Crespin Cheualier Ro-
main (duquel elle auoit eu vn fils) Othon gaigna son
amour, tant par sa gaillardise, ieunesse, & grande des-
pence; que pour la singuliere faueur qu'il auoit aupres
de Neron. Ils ne mirent guieres depuis à ioindre le
mariage avec l'adultere: mais soit qu'Othon fut aucu-
glé d'amour: il ne se pouuoit garder de louer (deuant

XIII. LIVRE DES ANNALES

le Prince) la beauté, gentillesse & bonne grace de sa femme: possible pour l'enflammer. Esperant que s'ils iouyssoient d'une mesme femme, ce lien deust encores seruir pour augmenter son autorité. Souuent en sortant de banquetter avec Cesar, on luy oyoit dire, ie la vay voir: & repetant plusieurs fois que c'estoit luy seul qui iouyssoit de celle, en qui gisoit toute noblesse & beauté, le souhaiçt de chacun, la ioye & contentement des bien-heureux: la deliberation ne fut pas longue apres tels ou semblables aiguillons. Et quant Neron eut trouué moyen de l'aborder; Pöpee par caresses & artifices commença de le gaigner: faignant qu'elle ne pouuoit plus endurer la force d'amour: & qu'elle estoit esprise de sa beauté. Puis cognoissant l'ardente affection du Prince, elle deuint plus fiere: de sorte que si la vouloit retenir plus d'une nuit ou deux, elle disoit qu'elle estoit mariee, & ne vouloit rompre son mariage: l'ayant Othon renduë sienne par vne maniere de viure telle, qu'homme viuant n'en approchoit. Que c'estoit luy qui auoit le cueur & la suite magnifiques: & autour duquel on ne voyoit que toutes choses sentant son Prince. Mais que Neron ayant vne seruante pour concubine; & empestre en la frequentation d'Acte, n'emportoit de l'acointance de ceste esclauë, rien qui ne sentist son cueur bas & le souillon. Incontinent Othon est deboutté de la priuauté accoustumee de Neron; & puis de sa compagnie & suite: Finalement de crainte que demourant en la ville il ne luy seruit de riuäl, on l'enuoya gouverner le pays de Lusitanie: lä où il demoura iulques aux guerres ciuiles; viuant non pas

pas des-honnestement comme deuant, ains en homme iuste & droicturier: monstrant qu'il estoit desbauché n'ayant point d'occupation, & plus attrempé en Magistrat. Iusques icy Neron chercha des couuertures à ses vices & meschancetez. Il soupçonnoit grandement Sulla, l'esprit lourd & nonchalant duquel il interpretoit tout au contraire pour fin & couuert. Laquelle crainte Graptus affranchy de Cesar, qui pour son vieil aage & longue experiëce cognoissoit les maisons des Princes (esquelles il auoit esté nourry dès le temps de Tybere) augmenta par vne telle mensonge. Le pont Mole estoit en ce temps là, renommé & fréquenté pour plusieurs gentilleses attrayantes, qui sy faisoient de nuict: & Neron y venoit souuët, à fin qu'il peut hors la ville follastrer plus librement. Ainsi donc ce Graptus feint qu'en reuenant du pont par la chaussée Flaminienne; des embusches luy auoient esté dressées: lesquelles il auoit eschappées par sa destinee, d'autât qu'il retourna par autre chemin, aux iardins de Saluste: & que Sulla auoit dressé telle partie. Car d'auanture ainsi que les officiers du Prince reuenoient, aucuns par gail-lardise de ieunesse (comme lors il se faisoit ordinairement) donnerent vne vaine frayeur à la troupe. Toutesfois il n'y fut recogneu aucun des seruiteurs, ny des gens de la suite de Sulla: le naturel duquel trop bas & incapable d'oser faire quelque hardie entreprise, estoit esloigné du soupçon de tel crime. Ce neantmoins comme s'il en eut esté conuaincu, on luy commanda vuidier du lieu de sa naissance. Et fut confiné en l'enclos des murailles de la ville de Marseille. Soubs les mesmes

XIII. LIVRE DES ANNALES

Consuls furent ouys les deputez des habitans de Pou-
sol: lesquels la compagnie des Senateurs & le peuple
de la mesme ville, enuoioient au Senat de Rome; pour
se plaindre les vns des autres. Ceux du Senat de Pusol,
chargeoient le peuple de violence: & le peuple accu-
soit l'auarice des Magistrats; & de tous les principaux
de leur ville. Mais pour ce que la sedition estant par-
uenue iusques aux pierres & menasses de brusler, sem-
bloit vouloir attirer le massacre & les armes; C. Cassius
esleu pour y donner remede, voyant qu'ils ne pour-
roient endurer sa seuerité, la charge fut (à sa mesme re-
queste) donnee aux Scriboniens freres; ausquels l'on
bailla vne cohorte de la garde de l'Empereur: par la
crainte de laquelle, & punition d'un petit nombre, les
habitans de ceste ville, retournerēt en paix & concor-
de. Je ne reciterois l'arrest du Senat assez commun; qui
permettoit aux Siracusains de passer au ieu des Gla-
diateurs le nombre ordonné; si Petrus Trasca, ne l'eut
contredict; & en ce faisant donné occasion à ses mal-
veillans de blasmer son opinion. Car s'il pensoit (di-
soient ils) que la Republicque eut besoing de faire co-
gnoistre la liberté d'un Sénateur, pourquoy s'amusoit-
il à de tant legeres choses? que ne parloit il de la guerre
ou de la paix? des impositions? des loix & autres affai-
res, esquelles consiste l'estat Romain? Qu'il estoit loi-
sible aux Senateurs toutesfois & quantes ils auoient
permission d'opiner, mettre en auant ce qu'ils vou-
droient; & demander qu'on en delibérast. N'y auoit
il autre chose à corriger, sinon que d'ores en auant les
ieux ne seront à Syracuse si amples que de coustume;

&

& le reste des affaires de toutes les provinces de l'Empire alloit il aussi bien; comme si non pas Neron ains Trafea, en auoit le gouuernement? mais puis qu'on les souffroit passer avec vne tresgrande dissimulation, combien plustost se falloit il garder de toucher à choses legeres. Au contraire Trafea quant ses amis luy en demandoient la raison; respondoit qu'il ne contredisoit pas à tels arrests par ignorance de l'estat present: ains le faisoit pour maintenir l'honneur des Senateurs: & monstrier euidentement qu'ils ne se faindroient en plus grandes choses, puis qu'ils prenoient garde a de si petites.

Neron voulant leuer tous les subsides, est empesché de ce faire par le Senat. Reiglement contre les fermiers publics & autres ordonnances de police. Le lieutenant Ælius Gracilis empesche de faire vn canal pour nauiger de la riuere de Saone, en celle de Mosselle; & les Frisons voulans habiter le pays de Hollande sont chasséz par les Romains. Feux merueilleux sortans de terre, estains à coups de pierre & de bastons, & par des habillemēs sales.

CHAPITRE XII.



A mesme annee le peuple s'estant plaint souuent du desordre des fermiers publics, Neron fut en doute s'il deuoit commander de ne plus leuer aucuns peages, & faire vn si beau present à tout le monde: mais les Senateurs (apres auoir loué la grandeur de son courage) ar-
resterent ceste boutce. Luy remonstrant que ce seroit

XIII. LIVRE DES ANNALES

le desmembrement & perte del'Empire; si les fruicts qui seruoient à l'entretienement de la Republicque estoient diminuez: d'autant que les peages ostez, incontinent apres l'on demanderoit l'abolition des tributs. Que plusieurs compagnies & associations pour le faict des impôts, auoient esté establiz par les Consuls & Tribuns, durant mesme que la liberté du peuple Romain estoit en sa grande force & vigueur. Et auoit esté pourueu tellement au reste, que le profit des impositions & la despence necessaire, se rapportoient l'un à l'autre. Qu'à la verité il falloit moderer l'auarice des fermiers publics: à ce que les choses iusques icy endurees sans aucunes plaintes, ne fussent par nouuelles aigreurs blasmees & trouuees mauuaises. Pour ceste cause le Prince fit vn edict; par lequel il ordonna, que les taxes de chacun peage (iusques à l'heure tenuës secretes) seroient mises en euidence. Et que les fermiers ne pourroient apres l'an, faire aucune poursuite de tels deniers par eux oubliez à demander. Qu'à Rome le Preteur, & par les prouinces ceux qui estoient Propreteurs & Proconsuls, peussent cognoistre extraordinairement des plaintes faictes contre les fermiers. Que les gens de guerre demeurassent exempts, sinon en ce qu'ils feroient trafic de marchandise. Et autres choses tresrequitables, lesquelles ayās esté gardees vn peu de temps, depuis vindrent à neant. Toutesfois l'abolition du quarantième & cinquantième, dure encores: avec autres noms de malles toltes; que les fermiers auoient inuentez. La traicte des bleds en pays d'outre-mer, fut moderee: & ordonné que les nauires ne seroient point

contees

contees pour vaillant, en l'estimatiō generale du bien du marchand; & que d'icelles il ne payeroit aucun tribut. Cesar declara Sulpice Camerin & Pomponē Siluan iadis Proconsuls d'Afrique, absous des crimes à eux imposez. Camerin estoit chargé de cruauté, commise à l'endroi& de quelque petit nombre de particuliers, plustost que de larcin. Mais Sillan estoit environné d'un fort grand nombre d'accusateurs, qui demandoient delay pour faire venir leurs tesmoings: & l'accusé vouloit deffendre sus le champ. Ce qu'il obtint, estant riche; & sans enfans: & à cause de sa vieillesse: laquelle il prolongea iusques apres la mort de ceux, par la brigue desquels il eschappa. Les choses auoient esté paisibles iusques là en Germanie, par l'industrie des lieutenans generaux: lesquels voyans les marques & enseignes de triomphe estre communes; pensoient auoir plus d'honneur d'entretenir la paix.

Paulin Pompee & L. Vetus auoient en ce temps là la charge de la garnison*. Toutesfois à fin qu'ils ne tinssent le soldat en oisieté, cestuy-là acheua la leuee qui (soixante & trois ans deuant) auoit esté commencee par Drusus, pour contenir le cours du Rhin: & Vetus s'apprestoit de ioindre la Moselle & la Sarne, faisant vne tranchee entre deux: à fin que les armées, viures & attirail de guerre chargez sur la mer voisine de Rome, puis de là sur le Rhosne & Saone, passant de ceste fosse en la Moselle & apres dans le Rhin entrassent finalement en l'Ocean: & qu'ostant les difficultez d'un si long chemin, les mers de Leuant & de Septentrion vinsent à estre nauigables de l'une & l'autre. *Ælius*

XIII. LIVRE DES ANNALES

Gracilis lieutenant de Belges porta enuie à cest ouurage, destournant par crainte Petus d'amener ses legions en vne prouince, qui n'estoit pas de sa charge: & ne vouloit (en ce faisant) essayer de gagner le cuer des Gaulois. Disant maintesfois, que cela donneroit occasion à l'Empereur d'entrer en deffiance: qui est vn moyen souuent practiqué pour empeschier plusieurs honnestes entreprises. Au reste ce continuel repos des garnisons fut cause de faire courir vn bruit, qu'il estoit deffendu aux lieutenans de faire guerre à l'ennemy. Pour ceste raison les Frisons enuoyerent leur ieunesse dans les bois & marescages: & par les lacs approchans du riuage; ceux d'entr'eux qui pour l'aage ne pouuoient porter les armes: se logeans dans les terres vuides, laissez pour les vsages des soldats Romains. Estans de ce faire autorisez par Verrit & Malorig gouuerneurs de ceste nation, pour lors subiette des Germains. Ia ils auoient plantees leurs maisons, ensemeencees les terres, & labourees comme le pays de leur naissance, quand Dubius Auitus (entre les mains duquel Paulin s'estoit deschargé du gouuernement de la Prouince) les menassant de leur courir sus avec les forces Romaines (s'ils ne retournoient en leur contree ancienne, ou n'obtenoient de Cesar nouvelle habitation) contraignit Verrit & Malorig de venir aux requestes. Lesquels estans allez à Rome pour cest effect; pendant qu'ils attendent la commodité de parler à Neron empesché à d'autres affaires, entre les choses dont l'on faisoit feste aux Barbares, ils entrent dans le theatre

theatre de Pompee, pour veoir le grand nombre du peuple de Rome. * Estans là oisifs (car ne sçachans que c'estoit de tels ieux ils n'y prenoient plaisir) en regardant les gens assis tout autour de ceste cage, * & fonds du theatre; ou s'informer de la difference des ordres & qualitez; demandans qui estoient les Cheualiers, qui les Senateurs: ils apperceurent entre les sieges des Senateurs, des gens habillez comme estrangers. A ceste cause demandans qui ils estoient: apres auoir entédu qu'on faisoit cest honneur aux ambassadeurs, des nations estimees plus que les autres, pour leur vertu & l'amitié qu'elles portoient au peuple Romain; ils fescrierent qu'au monde n'y auoit gens, qui passassent les Germains en faiçts d'armes ou loyauté: & se leuans de leurs places se vont seoir entre les Senateurs. Ce qui fut pris en bonne part, de ceux qui les veirent faire: comme vne boutee sentant le bon temps passé, & vne honnesteste ialouzie. *Aussi* Neron donna à tous deux le droict de bourgeoisie de Rome: & mada aux Frisons vider des terres par eux occupees. Mais pour ce qu'ils n'e tenoiét conte; les gēs de cheual alliez qu'o enuoya leur courrefus à l'improuiste, les cōtraignirent d'obeir: ayās pris ou tué ceux qui opiniastrémēt resistēt. Les mesmes terres furent occupees par les Ansibariens nation plus forte; non seulement pour leur nombre: mais encores pour la pitié qu'auoient d'eux les voisins. Car estans chassez par les Cauciens & n'ayans aucune habitation, ils le demandoient pour vn lieu de bannissement asseuré: estans supportez en cela d'un personnage fort renommé entre ces gens:

XIII. LIVRE DES ANNALES

& qui aussi nous estoit fidelle nommé Boiocale, lequel remonstroit auoir esté prisonnier par le commandement d'Arminie quand les Cherulces se reuolterent, & depuis sous Tybere & Germanic auoir eu solde: & faict seruice l'espace de cinquante ans. Il adioustoit encores qu'en ce faisant il mettroit son peuple en nostre obeissance. Et quelle portion de terres vagues, & delaissees, estoit celle ou quelquesfois les bestes Armaillies & cheualines * des gens de guerre fussent enuoyees paistre: bien qu'ils gardassent celles qu'on auoit reseruees pour leurs troupeaux (encores que des hommes mourussent de faim) pourueu qu'ils ne monstraissent faire plus de compte d'un desert & pays vague, que d'un peuple leur allié. Que ces terres iadis appartindrent aux Chamanes: puis aux Tubantes, & apres aux Vsiapiens. Que tout ainsi que le ciel estoit l'habitation des dieux; aussi la terre auoit esté donnee aux hommes: & celles qui se trouuoient vuides & vagues, deuoient estre communes & publicques. Puis regardant le soleil & appellant les astres & flâmbeaux du ciel; il leur demandoit, comme s'ils eussent esté là presens, s'ils vouloient voir vne campagne vaine. Que plustost ils la couurissent d'eaux, en despit de ceux qui les vouloient priuer de la terre. Auitus ne s'estant esmeus de ces parolles, luy respondit qu'il falloit obeyr aux commandemens des plus puissans. Que c'estoit le vouloir des dieux (qu'eux mesmes appelloient à leur secours) de donner l'autorité & iugement de toutes choses aux Romains. Lesquels de ce qu'ils donneroient ou osterroient, n'auoient delibéré souffrir autres iuges

juges qu'eux mesmes. Telle fut la responce qu'il fit en public aux Ansibariens : mais pour le regard de Boio-calc qu'en faueur de l'amitié qu'il portoit aux Romains, on luy donneroît des terres pour luy. Ce que ayant refusé comme si c'eust esté le pris & recôpence d'une trahison, il adiousta encore ce mot : Nous pouuons bien auoir faute de terre pour y viure : mais non pas pour y mourir. Et là dessus ils se departirent fort aigris les vns contre les autres. Les Ansibariens appellent les Bruçteres, Tançteres & autres nations plus esloignées, pour les fauoriser & secourir en ceste guerre. Et Auitus ayant escrit à Curtilius Mantia lieutenant de la garnison d'en haut, à ce que passant le Rhin il fit contenance de les vouloir assaillir par derriere, quant à luy il mena les legions au pays des Tançteres, menassant de les ruiner & destruire entierement, s'ils ne quittoient l'alliance des Ansibariens. Ainsi donc ceux-cy se mettans hors de la presse : & les Bruçteres aussi espouuentez de semblable frayeur ; & le reste ne tenant non plus conte du danger d'autrui, les Ansibariés demourrez seuls se retirerent deuers les Vsipiens & Tubantes : des terres desquels estans chassez, comme ils eussent tiré premierement aux pays des Cathes, & de là en celuy des Cherusces ; apres auoir longuement erré ainsi qu'estrangers, pauures & ennemis en pays d'autrui ; à le fin ce qu'ils auoient de ieunesse fut tué : & le reste qui ne pouuoit porter les armes, party comme butin. L'Esté mesme il y eut vne grande bataille donnee entre les Hermundures & Cathes : voulant chacun d'eux par force se faire maistre d'une riuere, qui pro-

XIII. LIVRE DES ANNALES

duict le sel en abondance, & borde leurs pays. Ayans encores (outre le plaisir qu'ils prennent de conduire toutes choses par les armes) vne vaine creance que ces lieux approchoient du ciel plus que tous autres: & n'y auoit endroiect duquel les dieux ouyssent plustost les prieres des hommes. Qui estoit la cause pourquoy par vne grace diuine, le sel venoit dans celle riuere & en cès forests: non pas comme aux autres pays, quant l'eau de la mer s'espandant sus les marests * *Salans*, viét à seicher: ains par la force de deux Elemens contraires; qui font geler l'eau ietee sus vn tas de bois allumé.

Or l'yssuë de la guerre fut à l'aduantage des Hermundures & ruine des Cathes: d'autant que les victorieux dedierent à Mars & Mercure le bataillon ennemy. Par lequel vœu les cheuaux, les hommes, & tout ce qui est vaincu; est mis au fil de l'espee. Et par ainsi les menasses des ennemis tournerent sus eux mesmes: mais la cité des Inhoues, qui estoit de nostre alliance fut affligee d'un mal impourueu. Car des feux sortans de terre se prenoient aux fermes, champs & villages: & s'auançoient iusques aux murailles de la colonie nouuellement bastie: sans qu'on les peut estaindre ne pour pluye qui tombast, ny pour eauë de riuere ou quelque autre humeur que les habitans s'efforçassent d'y employer. Iusques à ce que par faute de remede aucuns payfans courroucez du grand degast, ietterent de loing, des pierres dessus, puis voyans que les flammes abbaissoient s'approchans de plus pres avec coups de bastons & autres chastimens ils eussent estonnez ces feux, comme des bestes sauuages. Finalement s'estans despouillez

despouillez ils iettent leurs habillemens dessus. Lesquels sales & vsez, tant plustost estaindoient le feu. Ceste mesme annee l'arbre ruminal estant au lieu appellé Comice (qui outre l'aage de huit cens quarante ans qu'il auoit, couurit Remus & Romulus en leur enfance) ayant perdu ses rameaux, & venant à seicher par le tronc; fut estimé comme vn presage: iusques à ce que reiettant de nouueaux scions, il retourna en sa premiere vigueur.

FIN DV TREZIESME LIVRE
DES ANNALES DE P. CORNILE TA-
CITE CHEVALIER ROMAIN.



QVATORZIESME LIVRE DES ANNALES DE P.

CORNILE TACITE

CHEVALIER ROMAIN.

Neron abuzé par Popée, conclud de faire mourir Agripine sa mere : & l'impudicité de ladicte Agripine, pour maintenir sa grandeur.

CHAPITRE PREMIER.



. VIPSAN & Fonteius estans Cōsuls Nerō ne dilaya plus auāt la meschanceté par luy de lōgue-main pourpēsee: estant son audace creuë, au moyē du lōg-temps qu'il tenoit l'Empire, & de ce qu'il s'enflāmoit de iour en iour, de l'amour de Popée. Laquelle n'esperāt par uenir à son mariage, ny à la separation de luy & d'Octaue, tāt qu'Agripine seroit en pieds: vsant souuēt de parolles picquātes, & quelq̄sfois par raillerie blasmoit le Prince, & l'appelloit Pupille: puis qu'estāt subiet aux cōmandemēs d'autruy, tāt s'en faut

faut qu'il iouyſt de l'Empire, qu'il n'eſtoit pas ſeulement en liberté. Car qui pourroit eſtre cauſe de differ ſon mariage? Sa beauté (volontiers) n'eſtoit pas agreable, ny la grandeur de ſes ayeuls, qui tant de fois auoient triomphé. Craignoit on ſa ſecondité*, ou ſon trop franc courage: de peur qu'eſtant ſa femme, du moins elle ne deſcouurit les outrages faiçts au Senat, & le courroux que le peuple auoit pour l'orgueil, & auarice de ſa mere. Que ſi Agripine ne pouuoit endurer vne bru, ſinon en mauuais meſnage avec ſon fils: qu'on la rédeà Othon ſon mary: car elle iroit en quel que part que ce fut de la terre; ouyr les hontes & vilenies faiçtes à l'Empereur: pluſtoſt que de les veoir, eſtant meſlee parmy ſes dangers. Telles & ſemblables parolles, que les larmes & ruſe de ceſte adultere, rendoient plus poignantes; n'eſtoient empeſchees de perſonne: pour ce que tous deſiroient r'abatre la puisſance de la mere: & aucun ne pouuoit croire que la haine du fils, cōtinuaſt iuſques à la vouloir faire meurdriſ. Cluui⁹ a eſcrit: que pour l'extreme enuie qu'Agripine eut de retenir ſon autorité; elle envint iuſques là que pluſieurs fois ſus le midy (lors que Nerō ſ'eſchauffoit de vin, & de viandes) elle ſe preſenta à luy (qui eſtoit yure) iolie & attiffée; preſte de commettre l'inceſte. Et que ceux qui eſtoient plus pres d'eux, remarquans ja des baiſers laſcifs; & des mignardifes meſſageres de la meſchanceté qui ſe preparoit: Senecque eut recours à vne autre femme, contre les attraiçts de ceſte-cy: enuoyant ſoubs main Acte affranchie: laquelle comme eſtant en peine du

XIIII. LIVRE DES ANNALES

danger, qu'elle estoit preste d'encourir ensemble de l'infamie de Neron: le deuoit aduertir que l'inceste estoit descouuert, par sa mere mesme qui s'en glorifioit: & que les gens de guerre n'endureroient, d'estre commandez par vn Prince, qui ne fait conscience de rien* Fabius Rustic dict: qu'Agripine n'eut oncques telle enuie; ains Neron: & qu'il en fut destourné par la mesme affranchie. Mais les autres historiens ont escrit de mesme. Cluius, & le commun bruiet s'y accorde. Soit qu'Agripine conceut en son esprit, vn acte si ord, & vilain: ou (qu'il semble plus croyable) que vne nouuelle enuie de paillarder (comme deuant) l'eut reprise: pour ce que dès le temps de son fillage, elle s'abandonna à Lepidus sous esperance de commander *se laissant* par mesme conuoitise, aller à la volonté de Pallas: avec ce qu'elle s'estoit accoustumee à toutes meschancetez, ayant vne fois espousé son oncle. Parquoy Neron mettoit peine de n'estre point seul avec elle: & quant elle se retiroit en ses iardins, ou ses terres de Tusculum, & Antium: il la loüoit de ce qu'elle cherchoit le repos. Finalement, l'estimant ennuyeuse quelque part qu'il la tint; il resolut de la faire mourir: prenant seulement conseil, si ce deuoit estre par poison, par cousteau, ou quelque autre violence. Il fut premierement aduisé que ce seroit par poison. Mais si l'estoit donné en mangeant avec le Prince; on ne s'en pouoit descharger sur vn cas d'aduanture: ayant ja Britannic esté emporté de mesme mort. Et sembloit bien dangereux, essayer de gagner les officiers de ceste femme, qui par vne accoustumance de mal faire auoit

auoit l'esprit tendu contre toutes embusches: ioint qu'elle s'estoit fortiffiee, prenant des contrepoisons.

Auicet general des galleres de Misene, trouue l'inuention de faire periller Agripine dans la mer.

CHAPITRE II.

PERSONNE aussi ne pouuoit trouuer moyen de cacher le meurdre, s'il estoit fait par couteau. Et puis Neron, craignoit que celuy qu'il auroit choisi, pour executer vn si grãd forfaict ne refusast d'obeyr à tel commandement. Auicet affranchy, Prefect des galleres du port de Misene; & gouuerneur de Neron en son enfance, qu'Agripine ne voyoit pas volontiers (pour ce qu'ils se haysoient l'vn l'autre) en offrit l'inuention. Cestuy-cy donc remonstre: qu'une galere pouuoit estre bastie de telle façon, que partie d'icelle se desioignant par artifice sus la mer mesme, la couleroit en fonds, sans qu'elle s'en doutast. Qu'il n'y auoit rien tant subiect aux aduentures que la mer: & aduenant qu'elle fut surprinse par vn bris de nauire: qui seroit celuy tant desraisonnable, qui voulut appeller meschanceré, vne faute commise par les vents, & les vagues. Aussi que l'Empereur outre cela feroit edifier à la deffuncte, vn temple, dresser des autels, & toutes autres choses montrans vne reuerence & pieté enuers elle. Ceste subtilité fut plus agreable, d'autant que elle se trouua aussi aidee d'un temps propre pour ce

XIIII. LIVRE DES ANNALES

que Neron faisoit volontiers à Baye la feste nommee Quinquatrus*. Il attira donc là sa mere: disant souuent
 tesfois, qu'il falloit endurer la cholere de pere & mere: & aussi appaiser leur courroux: ce qu'il faisoit pour
 semer le bruiet de sa reconciliation: & receuoir Agripine: laquelle suiuant le naturel des femmes (qui
 croyoient legerement*) y venoit bien volontiers se
 resiouir. Lors estant allé au deuant, iusques sus le bord
 de la mer (pour ce qu'elle venoit d'Antium) il la receut
 au sortir du vaisseau: luy tendit la main, l'embrassa, &
 la mena à Baulos: ainsi s'appelle vne maison champes-
 tre, assise entre le Cap de Misene, & le lac de Baye, bai-
 gnee par la mer qui se courbe en cest'endroit. Là estoit
 arrestee vne gallere, mieux parée que nulle autre: com-
 me si encores cela eut esté fait pour d'auantage hono-
 rer sa mere: car elle auoit accoustumé, de se faire con-
 duire en gallere, & se seruir de la chorme des gens de
 marine: & outre elle estoit lors prie de devenir soupper,
 à fin que la nuit aydast à cacher la meschanceté. Il est
 bien certain, qu'un traistre descouurit l'entreprise: Et
 qu'Agripine ayant ouy dire qu'on luy preparoit des
 embusches; doutant aucunement si elle le deuoit croi-
 re, se fit porter à Baulos, dans vne littere à bras. Là sa
 crainte fut appaisée par les caresses de son fils; ayât esté
 courtoisemēt receuë, & assise au dessus de luy. Carnerō
 l'entretenāt de propos gaillards de ieunesse; (come s'il
 en eut meslé de graues parmy & aune fois se mōstrant
 pl^o reserré, fit durer le bâquet le pl^o qu'il peut: & quāt el-
 le se voulut retirer la recōuoia: la regardāt pl^o entētiue-
 mēt, & l'embrassant pl^o estroictemēt q̄ de coustume,
 soit

soit que ce fut pour mieux accomplir toute la sainte: ou que la derniere veüe de sa mere presté à mourir, luy attendrist le cueur; quelque fier ou cruel qu'il fut. Les dieux voulurent, que la nuit fut fort claire, & bien coye; à cause de la mer qui se trouua paisible: comme fils l'eussent faiët pour conuaincre la meschanceté. Et la gallere ne s'estoit pas beaucoup aduancee, n'ayant Agripine pour * compagnie des siens que deux personnes; à sçauoir Greper Gallus, estant debout pres le gouuernal; & Accronie renuersee sus les pieds d'Agripine couchee * qui avec grande ioye luy ramenteuoit la repentance de son fils, & comme elle auoit recourré la faueur appartenant à vne mere: * quant à vn signal, la couuerture du lieu où elles estoient, chargée de force plomb: vint à fondre tour à coup: de maniere que Greper accablé, rendit l'ame à l'instant. Mais Agripine & Accronie furent garenties, au moyen des cloisons soustenans la couuerture; plus hautes (de fortune) & trop fortes pour rompre sous le faix. Encores apres cela la gallere ne se desioignit pas, estant chacun troublé: & aussi pour ce que plusieurs non cōsentans du faiët, empeschoient ceux qui le sçauoient. Il sembla depuis à la chorme, qu'il falloit faire pancher la gallere d'un costé: & par ce moyen enfoncer le vaisseau. Toutesfois ils ne se peurent accorder promptement, en ce cas si soudain: & les autres qui l'efforçoient au contraire, furēt cause de couler en mer plus doucement. Mais Accronie ne se doutāt de rien; criant qu'elle estoit Agripine, & que l'on secourut la mere du Prince, fut tuee de perches, rames, & autres armes

XIIII. LIVRE DES ANNALES

de marine, que la fortune presenta. Agripine se taisant (& pour ce moins congneuë) receut neantmoins vn coup sur l'espaule: & depuis nageant, fut recueillie en de petits esquifs, & portee par le lac Lucrin en sa maison de plaifance. Là repensant tout à loisir, comme elle auoit esté appelée par lettres plaines de tromperies: & honoree tout ce qu'elle pouuoit estre: que tout pres le riuage, la gallere sans estre poussee des vents, sans estre ietee contre les rochers, commençant par le haut, estoit fonduë comme vn engin planté sus terre. Puis considerant le meurdre d'Acronie, & aussi regardant sa playe: elle iugea que le seul remede contre vne telle trahison, estoit feindre de ne s'en douter point. Parquoy elle enuoye Agerin son affranchy dire à son fils: que par la grace des dieux, & la bonne fortune de l'Empereur, * elle estoit eschappée d'une griesue aduerture. Le priant, quelque desplaisir & eltonnemēt qu'il eut du peril de sa mere, differer de la venir veoir. Car pour le present elle auoit besoin de repos: & cepēdāt feignāt d'estre en seurté: elle fit pēser sa playe & se traicter: cōmandāt neātmoins de chercher le testamēt d'Acronie & sceller ses biens: qui fut la seule chose, qu'elle fit sans dissimulation. Or Neron attendant les nouuelles de l'execution de sa meschanceté, fut aduertie que sa mere estoit eschappée avec vne legere blessure: ayant iusques là couru telle fortune & danger; que personne ne doutoit de l'autheur. Alors plus mort (de frayeur) que viif: il s'escrie, qu'elle viēdroit tout à l'heure, pour s'en venger sus le champ: soit qu'elle armaist les esclaves, ou esmeut les gens de guerre, ou qu'elle se

retirast

retiraſt au Senat, & deuant le peuple: pour luy reprocher le bris de la gallere, & ſa bleſſeure, avec le meurdre de ſes amis Et quel ſecours auoit il au contra ire, ſi Burrus & Senecque (incontinent par luy mandez) ne reueilloient leurs eſprits? jaçoit qu'il ſoit incertain ſils ſçauoient le fai& au precedent. Ils furent donc tous deux longuement ſans dire mot: craignans de le vouloir en vain, deſtourner de ſa deliberation: Toutesfois ils recognoiſſoient bien en eſtre venus là, que ſi Agripine n'eſtoit preuenue, il falloit que Neron mourut. Depuis Senecque (qui iuſques à l'heure ſ'eſtoit moſtré le plus prompt) regarda Burrus, cōme voulant ſçauoir de luy, ſil trouuoit bon commander aux gens de guerre, de faire le meurdre. Mais il fit reſponce, que les ſoldats de la garde Imperiale, eſtoient ſi affectionnez à la maiſon des Ceſars, & portoient ſi grande reuerēce à la memoire de Germanic, qu'ils ne voudroiēt entreprendre vne cruauté contre ſes enfans: & qu'Anicet accomplit ſa promeſſe. Lequel ſans y penſer d'auantage, demanda toute la charge & execution de ce fait. A ce mot Nerō dit frāchemēt q̄ c'eſtoit ce iour là qu'ō luy dōnoit l'Empire: & qu'il ne le recognoiſſoit tenir q̄ de ſon affrāchy. Qu'il marchaſt dōc viſtemēt, menāt avec ſoy les pl⁹ affectionnez à luy obeir. Quāt à luy: ayāt entēdu qu'Agerin eſtoit venu de la part d'Agripine, il appreſte luy meſme le ieu du crime qu'il entēdoit luy impoſer. Car pēdāt que ce meſſager dit ſa creāce, il laiſſa tomber vn poignard à ſes pieds: & le fait arreſter priſonnier cōme ſurpris: à fin d'auoir moyē, de faindre que ſa mere ſ'eſtant efforcee de faire tuer le Prince,

se fut elle mesme occise de honte; voyant sa meschanceté descouuerte.

Anicet faict tuer Agripine. CHAP. III.



E PENDANT le bruiet du danger d'Agripine, espandu par la contree, comme si ce fut par cas d'aduanture; chacun si tost qu'il l'entendit, courut au riuage de la mer. Les vns mōtoient sur les moles bordans la mer: les autres se iettoient dās les premieres barques, aucuns se mettoient en l'eau tant qu'ils pouuoient aller: & y en aubit qui tendoiēt les mains. Toute la coste estoit remplie de plainctes, de vœux, & de cris de ceux qui demandoient choses diuerſes, ou faisoient des responces incertaines. Il y accourut en foule, tresgrande multitude de gens avec flābeaux, & lumieres. Mais apres auoir entēdu qu'elle estoit sauuee: chacū desia s'apprestoit pour l'aller voir, & se resiouir avec elle iusqu'à ce qu'ils fussent escartez, voyās venir vne suite de gēs armez, & menassans. Anicet enuironne la maison d'vn corps de garde, & ayant enfoncé la porte, empoigne les esclauē qu'il rencōtra tāt qu'il vint à l'huis de la chābre; où il en trouua peu: d'autāt q̄ les autres seffrayerēt quād ils veirēt ceux qui entroiēt par force. Il y auoit peu de lumiere en la chābre: & vne seruāte seulemēt. Agripine estoit de plus en plus en soucy, de ce qu'il ne venoit personne de la part de son fils, ne mesme Agerin: & que l'apparence du riuage, estoit presque tout autre que n'agueres.

Mainte-

• Maintenant il n'y auoit personne; & tout soudain elle ouyt vn grand bruit: finalement elle congneut les marques de son dernier malheur. Puis voyant sortir sa seruante: luy ayant dit. Tu me laisse donc, aussi bien que les autres? elle apperceut Anicet, accompagné d'un Capitaine de gallere nommé Hercules: & Oloaritus centenier de marine: auquel elle dit, S'il estoit venu pour la voir, qu'il allast dire qu'elle se portoit mieux: mais si c'estoit pour cōmettre aucun mal, qu'elle n'e soupçonnoit son fils: & ne croioyt qu'il eut commandé de faire vn parricide. En disant cela, les meurdriers enuironnerent son lit. Le capitaine de gallere le premier, la frappa d'un baston sur la teste: car voyant le centenier mettre la main à l'espee pour la tuer: en aduançant le corps, elle s'escria frappe mon ventre: * Et puis apres elle fut acheuée de tuer, par plusieurs coups: voila ce qui à esté escrit par tous d'un commun consentement. Il s'en trouue aucuns qui disent: que Neron vint voir sa mere morte: & loüa la beauté de son corps: & aussi d'autres le nient. Elle fut la mesme nuit bruslée dans vn lit de table, avec pauvres obseques. Mesmes tāt que Neron tint l'Empire, elle ne fut couuerte, ny enfouye en terre. Et depuis à la sollicitation de ses domestiques, on luy fit vn léger tombeau: le long du chemin de Misenum, & la maison de plaissance, qui fut au Dictateur Cesar: laquelle estant la plus esleuee du quartier, descouure tout ce Golphe de mer, qui est au dessoubz. Mnesther son affranchy, voyāt le bucher allumé, se passa lespee au trauers du corps: estāt incertain s'il le fit par amour

XIIII. LIVRE DES ANNALES

qu'il portoit à sa maistresse: ou de crainte qu'on le fit aussi bien mourir. Plusieurs années auparavant, Agripine s'estoit asseuree de finir ses iours en telle sorte: & n'en auoit tenu conte. Car demandant à des Chaldees, ce qui aduiendroit à Neron: ils luy respondirent, qu'il seroit Empereur, & tueroit sa mere. Qu'il la tuë donc dict elle, pourueu qu'il soit Empereur.

Estonnement & crainte de Neron, apres la mort de sa mere. Ses excuses au Senat: avec la flatterie des Seigneurs, & du peuple: & son retour à Rome.

CHAPITRE IIII.



MAIS la meschanceté parfaite, ce fut lors que Cesar en cogneut la grandeur. Car il demoura le reste de la nuit quelquesfois pensif, & arresté sans mot dire: le plus souuent se leuant d'effray: & hors du sens, il attendoit le iour: comme s'il luy eust deu apporter la mort. Les caresses, & flatteries que les Centeniers & Tribuns luy firent, par le commandement de Burrus, le meirent premierement en esperance: pour ce que luy prenans & baisans la main, ils se resiouissoient de ce qu'il auoit eschappé le danger non preueu, & la meschanceté de sa mere. Apres cela, ses fauoris allerent aux temples: comme aussi feirent à leur exemple, les villes du pays de Campanie prochaines de là: tesmoignans

tesmoignans leur resiouissance par vi×, & les deputez qu'elles enuoyerent. Luy au contraire faisoit le fasché : & comme regrettant sa vie, il ploroit la mort de sa mere. Toutesfois pour ce que la face, & l'aspect des lieux, ne se changent pas comme le visage, & contenance des hommes : la veuë desplaisante & ennuyeuse, de ceste mer & riuages, se representoient à tous coups en sa fantasie. Et se trouuoient des gens, qui croyoient qu'on oyoit vn son de trompette, partant des hautes collines prochaines, & des plaintes & lamentations du tombeau de sa mere. Parquoy il se retira à Naples: enuoyant cependant au Senat des lettres, contenant en sommaire : qu'Agerin l'vn des principaux affranchiz d'Agripine, auoit esté surpris saisi d'vn poignard. Et que par vn remors de conscience, elle auoit souffert la peine de la meschance-té pourchassée à autrui*. Il adioustoit encores plusieurs autres fautes, & crimes pris de plus loin: comme d'auoir essayé d'estre declaree compagne de l'Empire: & que les cohortes Pretoriennes, prestassent le serment à elle, qui n'estoit qu'une femme: se promettant faire pareille honte au Senat, & au peuple*. Mais voyant qu'en vain elle s'efforçoit d'y paruenir: courroucée contre les soldats, les Senateurs & le peuple, elle empescha de faire vn don aux soldats, & vne largesse au peuple: ayant aussi mis en bien grand danger plusieurs Seigneurs de marque. Combien auoit il eu de peine, pour la garder d'entrer de force

XIIII. LIVRE DES ANNALES

au Senat ? & donner audience aux ambassadeurs des nations estranges ? puis venant à blasmer obliquemēt les choses passées du temps de Claude: il reietta sus sa mere toutes les meschancetez, & cruautez commises durant telle seigneurie: disant qu'elle estoit morte au grand bien de la Republicque. Car il racontoit aussi son naufrage: mais qui eust on sceu trouuer si lourdaut, de croire que ce fut par cas d'aduanture: ou que vne femme eschappee d'une nauire brisee en mer, eut enuoyé vn seul homme garny d'un poignard, pour forcer les cohortes *des gardes*, & l'armee de mer d'un Empereur ? A ceste cause on ne blasmoit pas Neron (la cruauté duquel passoit toutes les plainctes, qu'on en eut sceu faire) ains Senecque: comme si par tel discours, il eut luy mesme escript vne confession du meurtre. Toutesfois les plus grands seigneurs, avec vne merueilleuse instance, firent ordonner des processions par tous les coussinets, & reposoirs des dieux: & que les festes de Quinquatrus, auxquelles la trahison auoit esté descouuerte, seroient celebrees tous les ans, avec des ieux publics. Qu'un image d'or de Minerue, fut mise en la cour, & tout contre vn autre ressemblant au Prince. Que le iour de la natiuité d'Agripine, fut remarqué entre les malencontreux. Trafea Petus qui en se taisant, ou avec peu de paroles, souloit passer par dessus les autres flatteries: sortit alors de la cour: ce qui fut cause du mal qui luy aduint depuis: & neantmoins il ne monstra pas aux autres le chemin de liberté. Plusieurs prodiges & signes aduindrent aussi: toutesfois sans effect. Vne femme accoucha d'une cou-
leure

leure: & vne autre mourut d'un coup de tonnerre, estant couchee avec son mary. D'auantage le Soleil s'obscurcit tout soudain: & les quatorze quartiers de la ville, furent touchez de foudre. Lesquelles choses aduenoient, avec si peu de soucy des dieux: que Neron ne laissa pas de tenir son Empire, & continuer ses meschâcetez plusieurs annees ensuiuant. Au demeurant, pour tousiours accroistre le blasme de sa mere: & môstrer que depuis qu'elle auoit esté chassée*, sa douleur estoit augmentee: il rappella de ban deux grandes dames: l'une nommee Iunie: & l'autre Calpurnie. Et fit retourner en leur patrie, deux qui auoient esté Prefects. A sçauoir Valere Capiton; & Licin Gabol, dès long temps chassés par Agripine. Encores il permit de rapporter les cendres du corps de Lolie Pauline, & luy esleuer vn sepulchre: remettant aussi la peine à Iulius & Caluissius, n'aguieres par luy mesme confinez. Car Sillane estoit trespassee de sa mort naturelle: estant d'un loingtain bannissement, reuenue à Tarente: comme ja Agripine (l'inimitié de laquelle l'auoit destruite) commençoit à perdre son credit ou estoit appaisée. Neron seiournant par les villes de Campanie, se trouuoit en grande peine, songeant avec quelle cōtenance il entreroit dans la ville: & si il deuoit recercher l'obeissance accoustumee du Senat: & si la faueur du menu peuple: quand au contraire, les meschâs qui estoient pres de luy (car iamais cour de Prince, ne s'en trouua si plaine que la sienne) remonstrent que le nom d'Agripine estoit hay dās Rome: & que sa mort auoit renforcé la faueur de l'Empereur. Partant qu'il y

XIIII. LIVRE DES ANNALES

vint hardiment: & fit experience en personne de l'amour, & du respect qu'on luy portoit. Quant & quâr, ils le prierent de sy acheminer: & de fait ils trouuerent tout, plus à leur deuotion qu'ils n'auoient promis. A sçauoir les Tribus * de la ville, venans au deuant de luy: les Senateurs vestus de leurs robbes des festes: les troupes de femmes & enfans, ordonnez selon les aages & sexes: & par tout où il passoit, des eschaffauts faits en degrez: ainsi que l'onvoid les triomphes. A ceste cause tout glorieux, & comme vainqueur de la seruitude publique: il monta au Capitole, & remercia les dieux: se laissant aller à toutes pailardises, & volonteiz extraordinaires: lesquelles peu retenues auparauant, la telle quelle reuerence de sa mere, auoit iulques là retardees.

Plaisirs & exercices de Neron. Desbauche de la ieunesse Romaine: qu'il fit batteler & farcer. Luy mesme iouë sus l'eschaffaut en plain theatre. La compagnie des Augustans. CHAP. V.



Il y auoit ja long temps, qu'il ne bougeoit de la lice ou courêt les coches: & qu'il festudioit à vne autre chose non gueres plus honeste: à sçauoir de toucher la cistre en souppâr, à la façõ des menestriers: disant souuent, que cela auoit esté praticqué par les Rois & capitaines anciens. Aussi auoit il esté fort estimé, & loué par les Poètes: & on s'en aidoit pour

pour faire honneur aux dieux. De vray, que la musique estoit dediee & sacree à Apollon: & ceste excellente deité (qui preuoit; & predict les choses aduenir) se voyoit representee en tel habit, non seulement par les villes de Grece: mais dans les temples mesmes de Rome. On ne le pouuoit desia plus tenir: quand Senecque & Burrus, aduiferent de luy permettre vn de ces deux appetis: de crainte qu'il ne les emportast tous deux. A ceste cause vn lieu fut clos en la vallee de Vatican, pour mener ses cheuaux, non pas à la veüe de chacun indifferemment. Incontinent le peuple Romain y est appellé de son gré: qui le loüa grandement, & prist plaisir de le voir: comme le populace est tousiours conuoiteux de nouueaux passe-temps, & sy plaist d'auantage, si le Prince l'y attire luy mesme. Au reste son honneur mis au vent par ce moyen, ne l'assouit pas comme ils pensoient: ains luy seruit d'aiguillon. Et pensant destourner sa honte, si l'en gastoit plusieurs autres: il amena sus la scene, * des hommes yssus d'anciennes maisons: qui à cause de leur pauureté, eussent tout faict pour argent: lesquels estans trespassez, si ie ne nomme par leurs noms; ie le fay pour l'honneur de leurs ancestres. Aussi est-ce la faute de celuy, qui leur donna argent, plustost pour mal faire que pour les garder de faillir. Encores à force de presens il contraignit des notables Cheualiers Romains, promettre seruir de passe-temps sur le sable *de l'Amphiteatre*: si vous ne dictes que le salaire que donne celuy qui peut commander, emporte necessité d'obeyr. Mais à fin de n'estre si tost diffamé, iouant dans le

XIIII. LIVRE DES ANNALES

theatre public: il establit des ieux de ieunesse, aufquels indifferemment plusieurs voulurent estre entoollez. Ny la noblesse, ny l'aage, ou les estats que l'on auoit tenus; empeschoient aucun d'apprendre l'art & science d'un hiltrion Grec ou Latin: voire iusques à des gestes & cadences, qui tenoient peu de l'homme: & mesmes les dames de grande maison, recordoient & s'exerçoient à des choses mal-seantes. L'on bastit aussi dans le bois, qu'Auguste fit planter à l'entour de l'estang aux nauires, des loges, & cabarets: esquels l'on vendoit toutes choses qui esmeuent à plaisirs desordonnez. Et fut distribué de l'argent, * que les gens de bien estoient contrains de prendre, & vser par necessité du temps: & les desbauchez en faisoient gloire. Cela estoit cause d'augmenter peu à peu les melchancez & infamies: aussi iamais (quelque corruption de mœurs qui fut cy deuant) l'on ne vit tant de desbordemens, que ceste vilaine assemblee en apporta. A peine peust on garder son honneur par moyens honnestes, tant s'en faut que parmy la bataille & combat de tant de vices, la chasteté, ou modestie, ou autre bonne façon de faire se puissent conseruer. Finalement Neron monta sur l'eschaffaut de la Scene: soigneusement accordant son cistre, & pensant à ce qu'il deuoit reciter: estant assisté de ses plus familiers, & outre ceux là il y auoit aussi vne cohorte de gens de guerre, les Centeniers & Tribuns: & Burrus mesme, fasché de le veoir en tel estat, & qui neantmoins le louoit. Ce fut lors, que premierement l'on entoola les Cheualiers Romains appelez Augustans: remarquables pour l'aage,

&

& force de leurs corps: partie desquels estoient ieunes esuentez; mais il y en auoit parmy, qui auoient esperance de s'aggrandir. Ces compagnons faisoient tout retentir, claquans iour & nuict, des mains l'une contre l'autre, en signe de ioye. Et donnoient des noms de dieux, à la beauté, & à la voix du Prince: estans honorez & respectez, comme gens de bien, & vertueux.

Toutesfois à celle fin que les arts, & sciences de passe-temps de l'Empereur; ne fussent seules cogneues & publiques: il desira grandement auoir l'honneur de faire des vers: amassant pres de soy, ceux qui les sçauoiēt cōposer, & dresser. Ces Poëtes estans assis avec luy, es-faioient de lier les vers apportez, ou rencontrez sur le champ: aidans à ses parolles, en quelque façon qu'il les eut proferees. Ce que montre la composition de ses vers, qui ne coulent point d'une bouttee, & inspiration: ny d'une mesme veine, & façon d'escrire. Il employoit aussi quelque temps apres auoir mangé, à ouyr disputer les Philosophes: pour tirer du passetēps, des querelles qui s'esmouuoient, soustenans les points debatus entr'eux. Et n'y auoit faute de tels, qui avec la voix & contenance graue, desirassent (neantmoins) d'estre veu plaïsanter avec l'Empereur*.

Sedition des habitans de Nocerre & de Pompeies.

La plainte des Cyreniens contre Strabon com-

missaire. Le trespas de Domice Affri-

cain, & M. Seruil.

CHAPITRE VI.

Z iij

XIIII. LIVRE DES ANNALES



LN VIRON ce temps, vne bien petite noise, fut cause d'un grand carnage, entre les habitans des villes de Nocerre, & Pompeies; vn ieu de Gladiateurs, que faisoit faire Liui-neius Regulus, chassé du Senat comme i'ay dict. Car festans les vns les autres agassez, par follies coustumieres de se faire entre gens de ville: ils commencerent à siniurier; puis à ietter des pierres, & finalement ils prirent les armes: estant le peuple des Pompeians le plus fort; pour ce que l'assemblée se faisoit chez eux. Ainsi donc plusieurs Noceriens furent apportez en la ville de Rome ayās perdu bras, ou iam-bes, des coups par eux receus: sans beaucoup d'autres, qui pleuroient la mort de leurs enfans, ou peres. La cognoissance duquel faict le Prince attribua au Senat: & le Senat aux Consuls: Puis ayant de rechef le tout esté renuoyé aux Senateurs: il fut deffendu aux Pompeiens, de faire pareilles assembles publiques de dix ans: & les compagnies faictes entr'eux contre les loix, rompuës & cassées: Liui-neius & les autres qui auoient esmeuë la sedition, chastiez par bannissement, Pedius Blese fut aussi chassé du Senat, ayant esté accusé par les Cirenenses, d'auoir pillé le thresor du dieu Esculape: & gasté la leuee des gens de guerre, choisissant les hommes par argent, ou faueur. Les mesmes Cirenenses, poursuiuirent criminellement Acilius Strabon, en uoyé par Claude avec autorité de Preteur, pour iuger les differens, à cause des terres qui furent au Roy Apion, & lesquelles ayant par son testament donnees,

avec

avec son Royaume au peuple Romain, les voisins auoient occupees en partie: f'aidans d'vne longue possession & vsurpation, comme d'un bon & iuste tiltre. Ayans donc esté condamnez par sentence de rendre ces terres, ils prirent le iuge en hayne: mais le Senat respondit, qu'il ne luy apparoiſſoit de la volonté de Claude, pour le regard de telle commission: & qu'il en falloit parler au Prince. Neron apres auoir confirmé le iugement de Strabon: fit responce par escrit; que voulant subuenir aux alliez, il leur faisoit don des choses vsurpees. Tost apres, deux illustres personnages moururent; à ſçauoir Domice Afer, & M. Seruilius: qui auoient eu la vogue, au moyen des grands estats par eux tenus, & pour leur grande eloquence. Laquelle cestuy-là monſtra en ſes plaidoyers; quant à Seruilius ayant esté longuement eſtimé au Barreau, & depuis pour auoir eſcrit l'histoire de Rome; il mena vne vie plaisante, & delicate, qui augmenta ſon renom. Mais tout ainſi qu'il eut l'eſprit auſſi bon que l'autre, auſſi eſtoit il bien different en mœurs & façons de viure.

*Jeux Grecs Quinquennaux eſtabliz. En quel
temps furent baſtiz à Rome les thea-
tres pour demourer. Et ſi eſt bon de
faire ordinairement des ioux
pour entretenir le peuple, le pris
deſdicts ioux Grecs donné à
Neron. CHAP. VII.*

XIIII. LIVRE DES ANNALES



ERON pour la quatriesme fois, & Cornile Cossus estans Consuls : les ieux appelez Quinquennaux *, furent establiz à Rome: à la maniere des combats de Grece, dont l'on parla diuersement ainsi que de toutes choses nouuelles. Pour ce qu'il s'en trouuoit, qui disoient que Gn. Pompee, fut blefmé par les anciens, d'auoir le premier edifié vn theatre à demourer. Car au precedent on ne faisoit les ieux, qu'avec degrez leuez à la haste: accōpagnez d'vne Scene, qui ne duroit que le réps du ieu. Et si vous recherchez plus loin; vous trouuerez que le peuple, ne regardoit les ieux que debout; de peur qu'estant assis, il ne demourast tout le iour à badiner sans rien faire*. Que l'ancienne façon des ieux fut gardee; & neantmoins toutes les fois que le peuple Romain seroit assis au theatre, aucun ne fut contrainct d'y combattre*. Au reste, que les coustumes du pays abolies peu à peu, s'en alloient destruire du tout; par les desbordemens amenez de dehors. Afin que tout ce qui est ailleurs en quelque part corrompu, ou pouuant corrompre, soit veu dedans la ville: Et que la ieunesse s'abatardisse, aprenant les façons estranges, en s'exercitant aux Gimnases, à choses oy siues & sales amours: par autorité du Prince & du Senat: qui non seulement donnoient toute licence aux vices, mais encores les renforçoient. Et que les seigneurs Romains, sous ombre de reciter des harangues, & des vers; soient diffamez montans sus l'eschaffaut de la Scene pour iouër comme histrions. Que restoit il, sinon de

se despoüiller nuds: prendre des Cestes*; s'apprendre, & accoustumer à ces combats, au lieu des armes, & autres exercices de guerre? Les *deuins* Augurs, entendront il mieux leur droict, & science*: & les dixaines des Cheualiers, feront elles mieux leur charge de iudicature tant honorable, entendans bien & selon l'art, les faintes des tons; & la douceur des voix? Encores estoient les nuiets adioustees à ceste honte: à fin de ne laisser aucun temps pour l'honnesteré: & qu'en ces assemblees pesse-meslees; les plus meschans ayent la hardiessse, d'accomplir durant les tenebres, tout ce que de iour ils auront souhaitté. Il y en auoit d'auantage, à qui telle licence & bandon plaisoient: & toutesfois ils les couuroient de noms honorables. Disans que les anciens n'auoient iamais eu en horreur l'esbattement des ieux, selon les moyens qu'ils auoient lors. Et qu'à ceste cause, ils firent venir des histrions de Toscane, & de Turie des cheuaux pour courre le pris: mais depuis la conqueste d'Achaye, & d'Asie, les ieux auoient esté plus curieusement faiçts. Et neantmoins depuis deux cens ans que fut veu le triomphe de L. Mummius (lequel premier donna ce plaisir) il ne se-
 stoit trouué homme sorty d'honneste maison, qui eut tant degeneré, que vouloir apprendre le mestier d'histrion. Encores auoit on regardé à l'espargne, en dressant vn theatre à demourer: car c'estoit vne trop grande despence, d'en esleuer & bastir vn, tous les ans. Aussi que les Magistrats, ne cōsommeroient plus leurs biens tant qu'ils souloient; & le peuple n'auroit occasion, de leur demander des combats à la Grecque; puis

XIIII. LIVRE DES ANNALES

que ceste despence se faisoit par la Republique. Que les victoires des Orateurs, & Poëtes *recitans en ces ieux*, seruiroient d'aiguillons aux gentils esprits: & aucun des iuges, ne deuoit trouuer mauuais, de prester quelquesfois l'oreille, à exercices honnestes, & passetemps permis. Qu'en tout le temps de cinq ans, quelque peu de nuits estoient donnees, pour les passer plustost en ioye, & liesse, qu'en desbauche. Durant lesquelles rien d'illicite, ne pouuoit estre caché, parmy la clarté de tant de feus. A la verité, ces ieux passerent sans aucune vilenie remarquable: & mesme le peuple ne s'en eschauffa guieres. Car iasoit que les Pantomines, eussent permission de iouer (comme deuant) sus l'*eschafaut* de la Scene. Il leur estoit deffendu se trouuer aux ieux, qui se faisoient pour honorer vne feste des dieux. Personne ne gaigna le pris d'eloquence: mais il fut prononcé: que Cesar estoit victorieux: & les habillemens à la Grecque, dont plusieurs s'estoient vestuz pendant ces iours, cessèrent d'estre en vsage.

Bannissement de Plaute, & maladie de Neron estimee punition diuine.

CHAPITRE VIII.



VRANT ces choses, il apparut vne Comette que le menu peuple a opinion, signifier changement de Roy. A ceste cause, comme si Neron fut desia chassé, ils s'enqueroient qui deuoit succeder: & chacun parloit de Rubel

Rubel Plaute, qui de par sa mere tiroit sa noblesse, de la maison des Cefars: Quant à luy, il suiuiot la façon de faire des anciens, avec vne contenance graue: viuât chastement, & se tenant clos & couuert dans sa maison: mais d'autant qu'il craignoit estre estimé quelque chose, il auoit gaigné plus de faueur & reputation.

Le bruiet en augmenta d'auantage, par vne aussi vaine interpretation d'un coup de foudre. Car pour ce que Neron estant assis à table, aux estangs sous Imbrui-nes, en vn lieu nommé Sublac, sa viande fut touchée de tonnerre, & la table renuersée, d'autant que cela estoit aduenü au quartier de Tiuali, d'où Plaute tiroit son origine de par son pere: ils pensoient n'y auoir autre que luy destiné par les dieux: & de faict il estoit supporté de plusieurs, qui parvne desmesuree conuoi-tille, & ambition bien souuent trompeuse prisent les choses nouuelles & incertaines. Parquoy Neron, esmeu aussi de ce bruiet: escriuit à Plaute, aduiser à soy, & se desuelopper de la commune mutine: en se retirât d'aupres ceux, qui meschâmēt le diffamoïēt. Qu'il auoit en Asie, des heritages à luy appartenans d'ancien neté: où il pouuoit passer sa ieunesse seurement & sans trouble. Ainsi Plaute se retira là: avec Antistie sa femme: & quelque peu de ses plus priuez amis. Les mesmes iours, vne enuie, & plaisir desordonné, de faire à son appetit toutes choses, engendra tresmauuais bruit à Neron, & vne dangereuse maladie: pour ce qu'il auoit nagé dans la fontaine Martiane, qui est conduite en la ville. Car il sembloit qu'en ce faisant, il eut souillé de tout son corps, la boisson sacree; la reue-

XIIII. LIVRE DES ANNALES

rence, & saincteté du lieu. Aussi la griefue maladie en laquelle tost apres il encourut, confirma l'opinion que c'estoit vn courroux des dieux.

Corbulon lieutenant general de Neron: conquit Arménie: en laquelle Neron enuoye Tigranes pour en estre Roy.

CHAPITRE IX.



R CORBVLON, apres auoir faict razer Artaxate, pensant qu'il se faloit seruir de la nouuelle frayeur des ennemis, pour saisir Tigrannocerte (destruisant laquelle il réforçoit leur crainte, ou la gardât entiere, il acquerit bruit de clemence & douceur) s'y achemina: nō pas uēc son armee mal faisante, à fin de n'oster l'esperance de pardon; & toutesfois n'oubliant de se tenir sus ses gardes: cognoissant bien le naturel muable de ceste nation, aussi tardiue à se mettre au hazard, qu'infidelle quand l'occasion se presente. Les Barbares selon que ils estoient affectionnez, s'offrirent humblement à luy ou abandonnerent les villages, se retirans en lieux inaccessibles: & s'en trouua aucuns qui se cachèrent dans des cauernes, avec ce qu'ils auoient de plus cher. Ainsi donc le chef des Romains, vsant d'artifices diuers contre tels ennemis: à sçauoir de misericorde à l'endroit de ceux qui l'en requirēt, de vistesse cōtre les fuyards: se montrant rigoureux, contre ceux qui firent resistançe dans les cachettes; il fait boucher les gueulles, & ysluēs des cauernes, avec seruant & fagots de menu bois:

bois: & y mettre le feu. En costoyant la frontiere des Mardiens; les habitans de ce pays (coustumiers de brigander) luy coururent sus: & puis quand il les vint chercher, ils se deffendirent au moyen de leurs montagnes. Parquoy il enuoya l'armee des Hiberiens, faire le gast en leur terre; chastiant la bratade des ennemis, aux despens du sang des estrangers. Mais tout ainsi que luy ne son armee ne receurent en combattant aucune perte: aussi le cueur leur failloit, tant pour la necessité qu'ils auoient de toutes choses, que le trop grand travail: estans encores contrains de viure seulement de chair de brebis. Tout cela, & la faure d'eau, l'Esté brulant, & le chemin bien long; s'adoucissoient par la seule patience de leur chef: qui enduroit autant ou plus que le simple soldat. Apres on vint en pays hanté & labouré, ou des bleds furent coupez. Et de deux chasteaux, esquels s'estoient retirez aucuns Armeniës, l'un fut pris du premier assaut, & l'autre qui auoit resisté à la premiere force, assiegé. De là Corbulon passant au pays des Taurentes, eschappa vn danger, duquel on ne se fut iamais douté. Car vn Barbare (assez cognu & renommé entre les siens) fut trouué pres sa tante, avec des armes: lequel mis à la question, declara l'ordre de la trahison, dont il estoit le chef: nommant aussi ses complices. Et furent conuaincus, & punis ceux qui estoient venus pour couvrir l'entreprise, sous ombre d'amitié. Peu apres les deputez de Tigrannocerte, vindrēt declarer que la ville estoit ouuerte aux Romains, & les habitans prests d'obeyr à ce qui leur seroit commandé. Quant & quant, ils luy firent present d'une

XIIII. LIVRE DES ANNALES

couronne d'or, en signe d'hospitalité. Il les receut honorablement, & ne changea aucune chose en la ville, à fin que les habitans n'ayans rien perdu gardassent mieux leur obeissance & fidelité. Toutesfois la fortresse du Roy, où la plus braue ieunesse s'estoit enfermee, ne peut estre forcee sans combattre. Car ceux de dedans, oserent bien sortir à l'escarmouche, à la faueur des murailles. Mais ayans esté rembarrez dans leurs trenchees; ils ne sceurent en fin resister à la force des assaillans. Toutes lesquelles choses, aduenoient aux Romains plus à leur aise; d'autant que les Parthes estoient detenuz, & arrestez à la guerre contre les Hircans. Et de faict les Hircans auoient enuoyé deuers le Prince Romain, requerir son alliance: se vantans que pour gaigne de ceste amitié, ils empeschoient Vologeses de leur costé. Corbulon craignant que les Ambassadeurs retournez de Rome ayans repassé la riuere d'Euphrate, ne fussent surpris par le guet des ennemis: les fit conduire avec escorte, iusques à la mer rouge. Et par ce moyen ayans euité les limites des Parthes, ils retournerent en leur pays. Encores quand Tiridates voulut entrer par le pays de Mede, en la frontiere d'Armenie, enuoyant deuant soy Verulanius son lieutenant avec les gens de secours (& luy mesme le suiuant avec les plus gaillardes legions), il contraignit le Roy se retirer bien loing, ayant perdu la bonne esperance qu'il auoit conceuë de ceste guerre. Et apres auoir mis à feu & sang tous ceux qu'il pensoit nous estre contraires, & fauoriser le Roy: il se mettoit en possession d'Armenie, quand voicy arriuer Tigrannes, choisi par Ne-

ron

ron pour tenir le Royaume : pource qu'il estoit de la maison de Cappadoce, & petit fils du Roy Archelaüs: mais qui au moyen du long temps qu'il fut ostage à Rome, auoit le cuer si bas, qu'il enduroit patiemment toutes choses comme vn esclau. Aussi ne fut il receu du consentement de tous demourant encores au cuer de quelques vns, la faueur qu'ils portoiēt aux Arsacides: Toutesfois la plus part qui hayssioient l'orgueil des Parthes: aimoient mieux le Roy que les Romains leur auoient donné. Tigrannes, amena vn renfort de mil legionnaires; trois cohortes d'alliez: & deux ailles de gens de cheual. Mesmes à fin de pouuoir deffendre plus aisément son Royaume nouueau: il fut commandé à vne partie d'Armenie, selon qu'elle se trouua voisine d'Eupolis, Aristobul, & Antioch, de leur obeyr. Corbulon s'approcha aussi de Syrie, de nuee de chef par la mort du lieutenant d'icelle, nommé Vinidius: & en laquelle il luy estoit permis d'aller, & la gouuerner.

Tremblement de terre en la Ville de Laodicee. Comme les colonies se peuploient au temps passé. Et le reiglement pour les appellations des iugemens du Senat. Vibius Crespus condamné pour concussion.

CHAPITRE X.



EST E mesme annee, Laodicee vne des principales villes d'Asie, ruinee par tremblement de terre, se releua de sa perte, par les richesses de ses propres citoyens, & sans

XIIII. LIVRE DES ANNALES

estre aucunement secouruë de nous. Mais vne ancienne ville d'Italie nommee Pufol, obtint le droit de colonie, & vn surnom qui luy fut donné par Neron. Les vieux soldats enrrollez pour habiter Tarente, & Antium, ne peurent toutesfois repeupler ces places: d'autant que plusieurs d'eux, festoient escoulez aux provinces, esquelles ils auoient touché leurs payes, & acheué leur seruice: avec ce que n'ayans accoustumé d'espouzer femmes & nourrir enfans, ils laissoiēt leurs maisons sans hoirs de leurs corps. Aussi on ne menoit pas (ainſi qu'anciennement) toute vne legion entiere, avec les Tribuns, Centeniers, & soldats de meſme bande: à fin qu'une volonte, & affection les ioignit en vn corps de Republique: mais pour l'heure, ayans eſté pris de diuers manipules ſans chef, ou conducteur, & ſans qu'ils ſe portaſſent affection les vns aux autres, comme ſi ce fuſſent gens appelez d'un autre monde, ils eſtoiēt ſoudain accueillis enſemble, pour faire pluſtoſt vn nombre de peuple ramassé, qu'une colonie & peuplade. Pour ce que les comices * des Preteurs, qui ſouloēt eſtre eſleus par la voix du Senat, ſ'eſchaufferēt avec pl⁹ forte brigade que de coultume: le Prince appaiſa ce deſordre, faiſant chacun des trois competeurs, (qui ſeſtoient preſentez outre le nôbre ordinaire) colonels * d'une legion. Il augmēta l'autorité des Senateurs, ordonnant que ceux qui des iuges particuliers appelleroient par deuant eux, encouruſſent pareille amande, que les appellans deuant le Prince. Car au precedent, il n'y auoit aucune peine ordonnee pour cela. Sur la fin de l'annee, Vibius ſecond Cheualier

Romain;

Romain; que les Mores accusoient, fut condamné pour deniers mal pris, & chassé d'Italie, il faida du support & faueur de Vibius Crespu son frere, pour e- uiter plus grande peine.

Guerre en la grand' Bretagne. Suetone Paulin conquist l'Isle Mone voisine dudict pays. L'auarice & cruauté des Romains cause de faire rebeller les Bretons: avec les outrages faicts à la Royne Bondicee. Les presages qui aduindrent auant la destruction de Camalodun: & la deffaicte d'une legion Romaine.

CHAPITRE XI.



ESONIVS Petus, & Petronius Turpilian estans Consuls: la Re- publique receut vne griefue perte en la grand' Bretagne, où le lieutenant Auitus (comme i'ay dict cy dessus) n'auoit sceu faire autre cho-

se, que garder ce qui estoit ja conquis. Et Veran son successeur ayant par quelques petites courtes rauagé le pays des Silures; fut empesché de faire la guerre plus outre, par la mort qui le surprit: ayant durant sa vie eu fort grand bruiet d'estre homme roide, & entier: mais en fin par son testament, il descouurit son ambition. Car apres plusieurs flatteries, à l'endroiect de Neron: il adiousta, qu'il eut mis en son obeissance aucunes prouinces, s'il eut vescu les deux ans prochains. Or en ce temps Suetone Paulin gouernoit les Bretons: lequel en l'art & science de guerre, & par

XIIII. LIVRE DES ANNALES

estimation du peuple (qui ne laisse personne sans concurrent) estoit le parangon de Corbulon : & aussi il desiroit esgaller l'honneur du recouuremēt d'Arménie, par l'entiere deffaicte, & subiection des ennemis. A ceste cause il delibere d'assaillir l'Isle de Mone, puisfante d'habitās, & seruāt de retraicte à ceux qui abandonnoient le party des Romains : faisant bastir des vaisseaux plats, pour remedier aux bancs de la mer, qui est basse, & n'a les guez asseurez en cest endroiēt. Les gens de pied passez en ceste façon, ceux de cheual les suiurent par les guez. Et quelquesfois où la mer estoit plus haute, ils trauerferent à nage. L'armee des ennemis, arrestee sur le riuage opposite; se voyoit bien garnie d'hommes armez : parmy lesquels des femmes habillees de draps mortuaires, les cheueux espars, & portans des torches ardantes couroient ain si que des Furies. Encores les Druides qui estoient à l'entour, ayans les mains leuees au ciel, & disans des maudissons contre leurs ennemis, estoimerent par ceste nouuelle façon de faire les soldats Romains ; de maniere qu'ils se presentoient aux coups sans se remuer, comme s'ils eussent les membres engourdis. Depuis encouragez par leur chef, & sestans eschauffez l'un l'autre, pour n'auoir pœur d'une troupe de femmes, & encore incensees: ils bouttent auant leurs enseignes, renuersent ceux qu'ils rencōtrèrent, & les enueloppent dans leurs feus mesmes. Apres cela on mit garnison dans les villages; & les bois espais estimez sacrez, par cruelles superstitions des habitans furent tous coupez: car ils pensoient

soient bien faire d'eschauffer & baigner les autels du sang des prisonniers de guerre: & demander auids, & conseil à leurs dieux, par la veüe des petites veines qui sont autour du cueur des hommes. Comme Suetone faisoit ces choses, il est aduertty d'une soudaine rebellion de la prouince. Prasutag Roy des Icenien, renommé pour ses richesses amassées de longue-main: fit par testament heritier de ses biens Cesar, avec ses deux filles: pensant au moyen de telle reconnaissance, que sa maison, & son Royaume seroiēt assurez & deffendus d'outrage: ce qui leur tourna tout au contraire. De sorte que les Centeniers gastèrent le Royaume, & les esclaves sa maison, ainsi que choses de conqueste. En premier lieu, Bodicee sa femme fut battuë, & ses filles violees. Et comme si le Royaume eut esté donné en proye. Les principaux Icenien furent chassés de leurs heritages paternels: & les parens du feu Roy, estoient estimez & tenus pour esclaves. Ces outrages, & la crainte d'auoir encore pis (à cause qu'ils estoient gouuernez, en forme prouince) les firent courir aux armes: s'estans aussi rebelles les Trinobantes, & autres peuples: lesquels nō encores accoustumez au seruage, auoient par secrettes coniurations & intelligences, faict pactiō pour se remettre en liberté; au moyen de la haine vehemēte, qu'ils portoiēt aux vieux gens d'armes. Car ceux qui auoient esté nouuellement conduits en la colonie de Camalodun, chassoient les anciens habitans de leurs maisons: leurs ostoient leurs terres: les appelans prisonniers de guerre & esclaves: estant la fierté

XIIII. LIVRE DES ANNALES

insupportable des vieils soldats, entretenuë par les nouveaux: tant pour ce qu'ils menoient pareille vie, que pour l'esperance d'vser quelque iour de mesme licence & desbordement. Outre cela, le temple dressé au deuin Claude; estoit par eux regardé comme l'autel, & marque d'une eternelle domination. * Et mesme les prestres, choisis pour y faire le seruice; souz couleur de religion, y employoient sans discretion tous les biens *des pauvres habitans*. Ioint qu'il ne sembloit mal aisé aux Bretons, de destruire ceste colonie, qui n'estoit enuironnée d'aucune fortification & defence: à quoy noz capitaines auoient peu regardé: songeans plustost à la beaulté & plaisance, qu'à la seureté, & besoing. En ces entrefaictes, vne image de victoire estans dans Camalodun, cheut sans apparente occasion: & se tourna à l'enuers, comme si elle eust voulu faire place à l'ennemy: Et les femmes troublees de fureur, *predisoient* que la ruine de la ville approchoit. L'on disoit aussi que des fremissemens estranges auoient esté ouys en leur cour: que le theatre auoit retenty de hurlemens, & que le fantosme veu dans le bras, & sus la greue de mer, estoit vne marque de la destruction de la colonie. Qui plus est: l'Océan sanglant en apparence; & les effigies de corps humains laissées apres le flot passé, donnoient aussi grande esperance aux Bretons, que frayeur aux viels soldats: lesquels pour ce que Suerone estoit bien loing, demanderent secours à Catus Decian Procurateur. * Il ne leur enuoya pas plus de deux cens hommes, encores mal armez: bië est vray qu'il y auoit vne petite troupe

pe de gens de guerre, dans la colonie: qui s'asseuroiēt en la sauuegarde du temple. Encores ayans esté empeschés par aucuns (particippans de la secrette rebellion, & qui troubloient leurs deliberations;) ils n'aduancerent ne le fossé, ne la pallissade: ny enuoyans les femmes & vicillards dehors: la ieunesse demoura seule, mais se tenans aussi peu sus leur garde, qu'en plaine paix: ils furent surpris par vn nombre infiny de Barbares. Quant au reste de la ville, il fut pris & brullé tout de plaine arriuee: le temple auquel les soldats s'estoiēt retirez, ayāt esté assiégé deux iours, fut depuis emporté de force. D'auantage les Bretons victorieux, estans allez au deuant de Petus Cerialis, lieutenant de la neuuesme legion qui venoit au secours, mirent en routte ceste legion, de laquelle ils tuerent tous les gens de pied. Quant à Cerialis, il eschappa avec ceux de cheual, gaignant le fort de la garnison: les rempars & deffences duquel le garantirent. Ceste deffaicte, & le mal talent de la province (que l'auarice des Romains auoit poussee à prendre les armes) estonnerent tellement Catus Procurateur; qu'il passa en Gaule. Toutesfois Suetone avec vne admirable assurance, passant au trauers des ennemis s'achemina vers la ville de Londres: qui n'est pas remarquee, pour auoir le nom de colonie, ains pour estre bien marchande, & de grand abord. Là doutant fil y deuoit demourer, pour en faire la retraicte de la guerre: consideré le peu de gens qui estoient à l'entour de luy: & comme la temerité de Petilie, auoit esté chasticee par suffisans tesmoignages: en perdāt vne

XIIII. LIVRE DES ANNALES

ville, il resolut sauuer tout le reste. Ne les pleurs, ne les larmes de ceux qui luy demandoient secours, ne l'esmeurent, ou empescherent de donner le signe de partir, & qu'il ne receut parmy ses troupes, ceux qui le voulurent accompagner. *De maniere* que si aucuns pour l'aage, l'impuissance de leurs personnes, & amour de leurs maisons voulurent demourer: ils furent saccagez par les ennemis. La ville de Verulanie, receut pareil dommage: car les Barbares, laissant les chasteaux & forts, ou y auoit des gens d'armes: ravierent ce qu'ils trouuerent de beau, & de bon par les autres villes: & le portoient en lieu seur, ioyeux de si beau butin*. Il est certain qu'il mourut es places que i'ay nommees cy deuant, iusques à soixante & dix mil hommes citoyens de Rome ou alliez. Car ils ne prirent ou vendirent personne, n'y firent trafic de guerre. Ains seulement tuer, pendre, bruller & mettre en croix, comme s'ils eussent voulu rendre le mal qu'on leur auoit fait: & ce pendant tout à la haste se venger premierement*.

Les Bretons que conduisoit la Royne Bodicee.

*Vaincus en bataille par Suetone. Le grand
cœur de ladicte Royne, & sa mort.*

Penius Posthume se tuë de despit.

*Et le credit que Policlet af-
franchy auoit aupres
de Neron.*

CHAPITRE XII.



A Suetone auoit assemblée pres de
 soy, la quatorzième legion, avec
 la cheualerie de la vingtième, &
 des gens du prochain secours, ius-
 ques au nombre de dix mil hom-
 mes: quand il delibera ne differer
 plus, & s'appresta pour donner la
 bataille. Pour ce faire, il choisit vn lieu estroit d'en-
 tree, & par derriere clos d'un bois: estant bien assen-
 ré, qu'il n'y auoit ennemis que par deuant: & que la
 campagne raze, ne luy donnoit occasion, de craindre
 des embusches. Ainsi donc les legionnaires amassez
 en vn gros bataillon ferré, furent couuers de ceux qui
 estoient armez à la legere: & les gens d'armes mis sus
 les ailles. Quant à l'armee des Bretons, il n'y auoit
 compagnie, ne troupe qui ne se resiouist, & bra-
 uast, à cause qu'ils estoient en plus grand nombre
 que iamais: ayas le cueur si fier, que pour tesmoigner
 de leur victoire, ils auoient amenees leurs femmes
 sus des chariots, regez à l'entour des extremités, &
 bords de la plaine. Boudicee, menant en vn coche ses
 filles deuant soy: remōstroit à chacune nation (quād
 elle se trouuoit aupres) que les Bretōs auoient accou-
 tumé faire la guerre sous la conduicte des femmes.
 Mais qu'à ceste heure, elle qui estoit descendue de si
 grands seigneurs, ne songeoit pas à Royaumes, ny à
 richesses: ains comme la moindre d'entr'eux, recou-
 urer sa franchise, & se venger des coups dont elle a-
 uoit le corps moulu: & aussi du honnissement de ses
 filles. Que les desbordemens * des Romains, estoier

XIIII. LIVRE DES ANNALES

venus iusques là, que sans auoir esgard à vieillesse, ou à la virginité, ils n'espargnoient corps *+ d'hommes*, que ils ne deshonorassent. Mais que les dieux fauorisoier les iustes vengeancees. Aussi la legion qui auoit voulu entreprendre de les combattre, auoit esté deffaiète: & les autres Romains se cachotent dans les forts de leurs garnisons, où regardoient de toutes parts les moyens de se sauuer. Que tant s'en faut qu'ils endurassent l'effort & les coups, qu'à grand peine pourroient il souffrir le bruiet, & le cry de tant d'hommes armez. Car s'ils venoient à bien peser, & considerer le nombre de leurs gens, & si la cause de la guerre, c'estoit en ceste bataille qu'il falloit vaincre, ou mourir. Que c'estoit la deliberation, d'elle qui n'estoit qu'une femme, quant aux hommes qu'ils vesquissent & seruissent. Suetone mesme, ne se faisoit pas en tel danger, & combien qu'il eut grande fiance en la vaillance de ses gens: toutesfois il mesloit des prieres parmy ses exhortations. *Disant* qu'ils mesprisassent les bruyantes & vaines menasses des Barbares. Qu'on voyoit en leur troupe, plus de femmes, que de ieunesse *bonne pour la guerre*. Qu'estans mal aguerris, ils reculloient incontinent: si tost qu'ils recognoistroient les armes, & la force des victorieux; qui les auoient si souuent mis en routte. Que mesme entre beaucoup de legions, peu d'hommes estoient cause (le plus souuent, de gagner la bataille: & leur gloire seroit plus grande, si avec petite compagnie; ils acquerioient l'honneur de toute l'armee entiere. Qu'ils se tinssent seulement ferrez, & apres auoir dardé leurs iavelots; poussans

poussans de leurs escuts, ils ne cessassent de les renuer-
ser & tuer à coups d'espees, sans penser au pillage qui
seroit tout à eux apres la victoire. L'ardeur des gens
de guerre, fut si grande apres les paroles de leur chef:
& les vieils soldats esprouuez en plusieurs batailles,
festoient tellement disposez pour lancer leurs dards,
que Suetone certain de l'ysuë, donna le signe de la
bataille. Tout premierement, la legion sans bouger
de la place; & se seruant du lieu estroict, comme d'un
fort (apres que l'ennemy s'approchant de plus pres,
eut esté percé du traiçt sans faillir) faillit lors du de-
stroict, comme en façon de pointes. Les gens de se-
cours donnerent de mesme impetuosité, & les hom-
mes d'armes baissans les lances, renuerfent tout ce
qu'ils rencontrerent, & qui faisoit resistance. Le reste
tourna le dos, combien que leur fuite fut malaisée,
à cause que les chariots mis à l'entour d'eux, auoient
bouchez les endroicts, par lesquels ils pouuoient es-
chapper. Les Romains n'espargnoient les femmes
mesmes: & les bestes tuées parmy, augmentèrent le
tas des corps morts. L'honneur & loüange acquise
en ceste iournee fut grande, & pareille aux anciennes
victoires. Car aucuns ont escrit, qu'il y mourut peu
moins, de quatre vingts mil Bretons, & des Romains
environ quatre cens, avec quelque peu d'auantage
de blesez. Quant à Boudicee, elle se fit mourir par
poison: & Penius Posthume Prefect du camp de la
seconde legion, ayant entendu la bonne fortune des
quatorzième, & vingtième, pour ce qu'il auoit esté
cause de frustrer la sienne, de pareille honneur: & re-

XIIII. LIVRE DES ANNALES

fusé d'obeyr au commandement du lieutenant general (contre la coustume & deuoir de la guerre) se passa l'espee au trauers le corps. Apres cela l'armee r'amassee ensemble, fut retenuë soubs les tentes, pour acheuer ce qui restoit de la guerre. Et Cesar augmenta ses forces: enuoyant deux mil legionnaires, huit cohortes, & mil cheuaux: à la venue desquels, les places vacquantes de la neufiesme legion, furent remplies de legionnaires, des gens de pied & de cheual mis * en nouuelles garnisons d'Hyuer: & toutes les nations, desquelles on se doutoit, ou qui s'estoient declarees ennemies, furent mises à feu & à sang. Mais rien plus que la faim n'affligeoit, & tourmentoit ces gens mal soigneux de semer des bleds: ioint que chacun de quelque aage qu'il fut, ayant pris les armes, estoit promis viure de noz prouisions: Et que ces peuples farouchez, ne pouuoient entendre si tost à la paix. Car Iule Classician enuoyé pour succeder à Carus; ne s'accordant pas bien avec Suetone, empeschoit le bien public, soubs ombre de leurs inimitiez priuees. Et auoit semé le bruit, qu'il falloit attendre le nouveau lieutenant general. Lequel sans haine mortelle d'ennemy, n'y outrecuidance de victorieux, traiteroit doucement ceux qui se rendroient en nostre obeissance. Avec cela il mandoit à Rome, qu'ils n'esperassent iamais la fin des batailles *, iusques à ce que l'on eut enuoyé quelqu'un, pour tenir la place de Suetone. Les mauuaises aduantures duquel, il attribuoit à sa mauuaitié; & les bones, à l'heur de la Republique. Parquoy Policlet affranchy fut enuoyé pour voir l'estat

stat de la prouince de Bretagne: ayant Neron grande esperance, que son autorité, pourroit non seulement engendrer amitié & concorde, entre le lieutenant & le Procureur; mais aussi par vne paix moderer les cueurs rebelles des Barbares. Et de faiët il ne tint pas à Policlet qu'il n'espouuentast noz soldats mesmes, (quand il eust trauersé la mer) avec vne tresgrande fuite: laquelle foulla beaucoup l'Italie, & la Gaule. Mais les ennemis se moquerēt de luy; pour ce que iouissans lors encor de plaine liberté, ils ne congnissoient pas la puissance des affranchiz; & s'esmerueilloient, de ce qu'un tel capitaine, & l'armee qui auoit mise fin à vne guerre si grande, pouuoient obeyr à des vallets. Toutesfois les choses furent r'apportees à l'Empereur au plus doux. Et Suetone ayant esté continué en sa charge accoustumee: pour ce que depuis il auoit perdu sur le bord de la mer quelques galeres avec la chorme: eut commandement (comme si la guerre eut encores duré), de mettre ses soldats entre les mains de Petronius Turpilian, qui ja estoit sorty du Consulat; lequel sans irriter l'ennemy, n'y estre de luy harfelé, appella d'un honneste nom de paix, sa vie oisue & fetarde.

Domice Balbe Sénateur, puny pour fausseté avec autres ses complices. Et pourquoy quatre cens esclauues de Pedanius Ruffus, Prefect de Rome furent tous executez. Tarquin Prisc condamné pour concussion. La description du Cens faicte en Gaule. Et la mort de Regulus hōme trefestimé.

CHAPITRE XIII.

XIIII. LIVRE DES ANNALES



EST E meſme annee, il ſe commit
à Rome, deux notables meſchance-
tez. L'une par vn Sénateur, & l'autre
par vn eſclaué audacieux. Domice
Balbe autresfois Preteur; à cauſe de
ſa grande vieilleſſe, de ſes richelſſes, & auſſi qu'il n'a-
uoit point d'enfans, eſtoit ſubiectionné à piperie. Vn ſien
parent nommé Valere Fabian, mis au nombre de
ceux qui deuoient paruenir aux honneurs, & magi-
ſtrats, ſuppoſa vn teſtament comme ſi Balbe l'eult
fait: ayant appellé pour le contrefaire, Vicius Ruf-
fin, & Terence Lentin, Cheualiers Romains: qui af-
ſocierent Antoine Premier, & Afinius Marcel.
Quant à Antoine, il eſtoit cogneu pour vn homme
hazardeux, & ſubtil. Mais Marcel renommé pour e-
ſtre arriere fils d'Afinius Polion, n'auoit point des
mœurs, & complexions qui fuſſent à meſpriſer: ſinon
qu'il eſtimoit la pauureté, eſtre le plus grand de tous
les maux. Ainſi donc Fabian, ſe ſeruit de ceux que j'ay
nommez, pour clorre & ſceller le teſtament comme
teſmoins; avec autres de moindre eſtoffe: Ce que
ayant eſté veriſié deuant le Senat: Fabian, & auſſi An-
toine avec Ruffin, & Terence, furent condamnez
ſuiuant la loy de Cornile Sulla, contre les fauſſaires.
La memoire des anceſtres de Marcel, & les prieres de
Cesar, le deliurerent pluſtoſt de la peine, que de l'in-
fame. Ceste meſme iournee, tuina ſemblablement
Pompee Helian, ieune homme qui auoit eſté Que-
ſteur: comme conſentant des meſchancetez de Fa-
bian: & luy fut deſſendu ſe trouuer en Italie, & en Eſ-
pagne,

pagne, dont il estoit natif. Valere Pontic, receut pareille ignominie, pour ce qu'en ne voulant que les criminels fussent poursuiuis par deuant le Prefect de la ville * il les auoit denoncez deuant le Preteur: * à fin que ce pèdant sous couleur des formalitez des loix, & puis par collusion, il peut faire le tout esuanouyr. Dont s'ensuiuit arrest du Senat, par lequel, tous marchans, acheteurs, & vendeurs de telles denrees, estoient declarez suiets à semblables peines, que ceux qui par iugement public, estoient condamnez pour fausse accusation. Peu apres Pedanie Second Prefect de la ville fut meurdry par vn sien esclau: soit qu'il ne le voulut affranchir, suiuant le pris conuenu entr'eux: ou qu'il le haïst, par ialouzie d'un bredache: & ne peut endurer son maistre pour compagnon d'amours. Au reste pour ce que suiuant l'ancienne coustume, il faillait que tous les seruiteurs, qui demeuroient soubz la mesme couuerture de maison *que le deffunct, à l'heure de sa mort* fussent executez: il ne s'en fallut gueres, que il n'y eut sedition; au moyen de l'assemblée du peuple, qui accourut pour deffendre tant d'esclaves innocens du faict. Et dans le Senat mesme il y auoit de la partialité, entre ceux qui mesprisoient ceste outrageuse seuerité, & d'autres (en plus grand nombre) qui ne vouloient rien changer. L'un desquels nommé C. Cassius, pour son opinion discourut en telle sorte. Je me suis (Peres conscripts) souuentefois trouué en ceste assemblée, quand l'on a demandé que les ordonnances, & loix de nos predecesseurs, fussent reformees par nouueaux.

XIIII. LIVRE DES ANNALES

- arreſts du Senat, & ſi ie ne l'ay empeſché: non pas
 - que ie fiſſe doute, que iadis l'on n'eult donné meil-
 - leur reiglement à toutes affaires, & que les choſes
 - qui eſtoient renuerſees, ne fuſſent changées en pis.
 - Mais de crainte, que par trop grand amour des fa-
 - çons de faire anciennes; ie ne fuſſe veu bien-hault
 - louer ce à quoy ie ſuis affectionné. Et auſſi que ce
 - n'eſtoit mon aduis, de perdre par frequētes con-
 - tradictions, ce peu qu'auons d'autorité: A fin de la
 - garder entiere, ſ'il aduenoit que la Republique euſt
 - beſoin d'eſtre conſeillée; comme il eſt aujourd'huy
 - aduenu, ayant vn Conſulaire aſté meurdry dans ſa
 - maiſon, par vne trahiſon d'eſclaves: que perſonne
 - n'a empeſchée, ne decelee, iāçoit que l'arreſt du
 - Sénat (qui menaſſoit tous les ſerfs de punition) n'ait
 - encores eſté eſbranlé *par execution plus douce*. Or-
 - donnez donc (de par Hercules) impunité: mais qui
 - ſera deſſendu par ſon office, & dignité: puis que cel-
 - le de Prefect de la ville n'a de rien ſeruy à ceſtui-cy?
 - Qui pourra eſtre deſſendu par nombre d'eſclaves,
 - ſi quatre cens n'ont ſceu garantir Pedanie Second?
 - & qui ſera aidé de ſes domeſtiques, puis que noz
 - ſeruiteurs eſtans eux meſmes en crainte de puni-
 - tion, ne ſ'eſtudient à preuoir noz dāgers? Le meur-
 - drier (ainſi qu'aucuns n'ont point eſté honteux de
 - dire) ſ'eſt il voulu venger du tort qu'on luy faiſoit?
 - & de ce qu'il auoit cheuy de l'argent de ſon pere;
 - ou qu'on vendoit vn ancien eſclauue venu au mai-
 - ſtre de pere en fils? Et bien iugeons de nous meſ-
 - mes, que le maiſtre nous ſemble auoir eſté occis
 iuſtement.

iustement. Je veux maintenant disputer, & cher-
cher les argumens & raisons, qui ont meu les sages,
faiseurs des loix, deliberans sus ce faict: & encores,
comme si maintenant nous auions a en dresser vne,
ordonnance nouuelle. Pensez vous qu'un esclaue,
eust eu le courage de tuer son maistre; qu'il ne luy,
fust eschappé quelque mot de menasses? & que de-
uant il n'eust dict quelque folle parole. Et bien il,
a celé son entreprise. Il s'est garny de baston sans,
que pas vn s'en doutast: quoy pourroit il passer,
les gardes donuiet*, ouurir les huis de la cham-
bre; y porter de la lumiere; & faire le meurdreau,
desceu de tous les autres? Les esclaues peuuent des-
couvrir plusieurs soupçons, & marques de telles,
meschancetez: desquelles si vné fois ils nous aduer-
tissent; nous pouuons demourer seuls, entre plu-
sieurs: estre asseurez entre gens effrayez: & fina-
lement fil conuient mourir, demourer & viure,
entre des meschans avec esperance d'estre vengez.
Noz peres ont tousiours redouté la nature des es-
claues; voire du temps mesme que nous n'en a-
uions point d'autres, que ceux qui naissoient en,
noz maisons des champs, ou de la ville: & les-
quels avec le laiët, & la nourriture, receuoient,
quant & quant l'amitié de leurs maistres. Or puis,
que nous auons receu en noz maisons; pour nostre,
seruice, des nations entieres: qui ont des façons,
contraires; vn dieu, & creance estrange, ou possi-
ble point du tout: vous ne sçauriez refraindre ce-
ste racaille, que par vne crainte & frayeur. Mais,

XIIII LIVRE DES ANNALES

- aucuns innocens mourront: & pourquoy non? puis
 - que d'une armee mise en route, quand le dixiesme
 - soldat est assommé d'un baston, les vertueux tirent au
 - sort, ne plus ne moins que les autres. Tous actes e-
 - xemplaires ont ie ne sçay quoy d'inique en soy, qui
 - portant preiudice à quelques particuliers, est recom-
 - pensé par vne publicque vtilité. Or tout ainsi que pas
 - vn seul n'osa contredire l'opinion de Cassius, aussi
 - oyot on des voix confuses: qui respondoient qu'on
 - eut compassion du nombre, de l'aage, du sexe, & de
 - la pluspart, qui sans doute estoient innocens. Tou-
 - tesfois la partie qui concludoit à la punition l'empor-
 - ta. Mais ils ne pouuoient estre obeys, à cause du grand
 - peuple assemblé pour l'empescher: menassant de
 - pierres & de feu. Alors Cesar tança le peuple, par un
 - cry public, & fit garnir de soldats, le chemin par le-
 - quel les condamnez estoient menez au lieu de la pu-
 - nition. Cingonius Varron, auoit aussi esté d'aduis,
 - que les affranchiz trouuez sous la mesme couuerture
 - de maison que le maistre occis, fussent semblable-
 - ment chassés d'Italie: ce que le Prince empescha, de
 - peur que l'ancienne ordonnance, qui n'auoit point
 - esté moderee par misericorde, ne fust trouuee plus ai-
 - gre par telle cruauté. Sous les mesmes Consuls, Tar-
 - quin Prisc accusé par les Bithiniens, fut condamné
 - pour deniers mal pris: avec grand ioye des Senateurs,
 - se souuenans que Statil Taur son Proconsul, auoit es-
 - té par luy accusé. La description du Cens fut faicte en
 - Gaule, par Q. Volusius, Sex. Africain, & Trebel Ma-
 - xime. Mais pendant que Volusius, & Africain, debatés
 de

de leurs noblesses desdaignent Trebel, ils l'endurerēt passer deuāt eux. Ceste annee mourut Mēmius Regul, autant renommé pour son autorité, vertu, & bonne reputation, qu'il est possible de souhaiter: hors mis la grandeur Imperiale. De sorte que Neron estant vne fois malade, & voyant que ceux qui estoient à l'entour de luy, disoient (pour le flatter) que l'Empire sen alloit perdre & finir; s'il aduenoit fortune de sa personne; il leur respondit que la Republicque auoit vn recours & support. Et demandans qui estoit cestuy-là sur tous les autres: il nōma Mēmius Regul. Toutesfois Regul vesquit depuis, deffendu par sa vie paisible, & pour ce qu'il estoit descendu de nouuelle noblesse: & n'auoit pas des biens trop enuiez. Le Gimnase fut dedié ceste annee par Neron: & de l'huile donnee aux Cheualiers & Senateurs, aussi courtoisement qu'en Grece.

La liberte de Trafea; & punition d'aucuns qui auoient compose des libelles diffamatoires. Et de Veienton qui vendoit les graces & faueurs de Neron.

CHAPITRE XIIIIL.



. MARIVS, & L. Asinius estans Consuls, Antistie Preteur lequel (comme i'ay dict) se porta trop hardiment en son estat de Tribun du peuple; fit des vers mesdisans du Prince: & les publia mangeant en vn grand festin, qui se faisoit chez Ostorius Scapu-

XIIII. LIVRE DES ANNALES

la incontinent apres il fut accusé de leze Maiefté, par
 Cossutian Capiton, n'aguieres rentré en son degré de
 Sénateur, à la requeste de Tigellin son beau pere.
 On pense que lors premierement fut ramenee en v-
 sage ceste loy, qui ne fut pastât cause de la ruine d'An-
 tistie, que de l'honneur & gloire, qu'en rapporta l'Em-
 pereur: endurent que l'accusé condamné par le Se-
 nat, fut guaranty de mort par le moyē de l'opposition
 des Tribuns. Mais combien qu'Ostorius appellé en
 tesmoignage, eut dict n'auoir rien entendu. L'on eut
 toutesfois esgard, aux autres tesmoins qui le char-
 geoient. Et Iunie Marul nommé Consul, fut d'aduis:
 que le criminel deuoit estre priué de la Preture, & e-
 xecuté à mort, en la maniere accoustumee par les an-
 ciens. Le reste ayant esté de mesme aduis: Petus Tra-
 sca, apres auoir parlé de Cesar, fort honorablement,
 & repris bien aigrement Antistie discourut. Qu'il ne
 falloit pas durant le gouuernement des bōs Princes,
 & sans que pour autre occasion & necessité, le Senat
 y fut contrainct; ordonner toutes les punitions, que
 les criminels coupables, auoient meritees *. Que des
 long temps, on ne parloit plus de bourreau, ne de
 licol; & y auoit des peines establies par les loix, avec
 lesquelles la punition des malfaiçteurs estoit ordon-
 nee; sans que les iuges & le temps fussent diffamez de
 cruauté. Et ne valloit il pas mieux que ses biens fus-
 sent confisquees, & luy confiné en vne isle: là où tant
 plus il allongeroit sa meschante vie, plus il seroit mi-
 serable pour son regard, & seruiroit d'un grand exem-
 ple, pour tesmoigner de la clemence publicque? *La
 liberté

liberté de Trafea, rompit le silence * des autres. Et apres que le Consul, eut permis à ceux qui estoient de mesme aduis, de se retirer ensemble, presque tous s'allerent renger de son costé, fors bien peu; entre lesquels fut A. Vitel grand flatteur: agassant d'iniures, & querelles tous les plus gens de bien; & qui n'auoit point de replique, quand on luy respondoit: comme il aduient à tous cueurs lasches. Mais les Consuls n'osans conclurre l'arrest, escriuirent à Cesar l'aduis commun du Senat: lequel ayant esté quelque temps retenu de honte, & de cholere; finalement r'escriuit: qu'Antistie sans estre assailly d'aucune iniure, auoit de paroles grandement laidangé le Prince: dont le chastiment auoit esté demandé aux Senateurs. Et que c'estoit bien la raison, d'en faire telle punition que la grandeur du cas le meritoit. Au demeurant tout ainsi qu'il eut empesché la feuerité du leur conclusion: aussi ne vouloit-il leur deffendre, la moderation de la peine; & pour ce qu'ils en ordonnassent à leur volonté: leur donnant mesme puissance de l'absoudre: jaçoit que par le recit des lettres, telles ou semblables que dessus; l'on cogneut manifestement qu'il se tenoit offensé. Si est ce que les Consuls ne changerent la deliberation: & Trafea ne se departit point de son aduis, ne les autres reuocquerent l'opinion par eux approuuee. Vne partie de peur qu'ils ne semblassent, auoir exposé l'Empereur à malvueillance; & plusieurs se tenoient assurez, pour leur grand nombre: mais Trafea le faisoit par vne accoustumee grandeur, & fermeté de courage; & aussi, à fin de ne perdre & a-

XIIII. LIVRE DES ANNALES

moindrir sa reputation. Fabrice Veienton fut trauail-
lé d'un crime non guieres dissemblable: pour auoir
amassé beaucoup de vilénies, dites contre aucuns
Senateurs & prestres: contenues dans les liures, par
luy nommez codicilles. Talias Geminus, son accu-
sateur, allegoit d'auantage; qu'il auoit souuentefois
vendu les graces, & faueurs du Prince: & le droict de
paruenir aux honneurs: qui fut la cause pourquoy
Neron prist cognoissance de la matiere. Lequel trou-
uant Veienton conuaincu du crime, le chassa d'Ita-
lie, & fit brusler ses liures qui furent cherchez & leus
volontiers, durant qu'on les recouuroit avec danger:
mais depuis le facilité d'en auoir, les fit aussi tost ou-
blier.

*La mort de Burrus Capitaine des gardes, & quelles gens
furent Ruffus, & Tigellin ses successeurs en l'estar.
L'affoiblissement du credit de Seneeque. Et la haran-
gue qu'il fit à Neron pour estre deschargé de ses
biens, avec la responce de l'Empereur.*

CHAPITRE XV.

MAIS venans les maux publics à se
rengreger de iour à autre; les reme-
des au contraire diminuoient: Et
Burrus mourut: estant incertain si
ce fut par maladie: pour ce que le
gosier luy estant peu à peu enflé par
dedans, il rendoit l'ame, ayant le conduict du vent
empesché. D'autres en plus grand nombre, asseuroiét
que

que par le cōmandemēt de Neron, en faisant semblāt de luy dōner quelque remede, le palais luy fut frotré de poison: & que Burrus s'estant apperceu de la meschanceté, quand le Prince le vint visiter ne le daigna regarder, se tournant de l'autre costé. Et quād il luy demanda cōme il se portoit, il respōdit seulemēt, ie me porte bié. Il laissa à la ville vn grād regret de soy, pour la souuenāce de sa vertu, & la fetarde innocēce de l'vn de ses successeurs, trefardātes meschācetez, & adulteres de l'autre. Car Cesar auoit fait deux Prefects du Palais, l'vn nōmé Feni^o Ruffus, y fut mis en faueur du peuple: par ce qu'il gouuernoit sans auarice la police des bleds: & l'autre nōmé Offonie Tigellin, fut pris & appellé par Neron: pour ce qu'il le cognoissoit pour vn vieil ribaud, infame, & plain de tous vices, qui luy estoiet tourne en mœurs & cōplexiōs ordinaires. Tigellin eut plus de credit aupres de l'Empereur: à cause qu'il auoit esté choisi, cōme l'vn de ceux qui sçauoit les secrettes affectiōs & voluptez. Ruffus auoit bōne reputation aupres du peuple & gens de guerre: ce qui le faisoit hayr de Neron. La mort de Burrus diminua le pouuoir & autorité de Senecque: d'autant que & les moyens vertueux, n'auoient plus tant de vigueur, ayans perdu comme vn de leur chef: & que Neron enclinoit plus du costé des meschans. Lesquels par faux rapports, & amputations assaillent Senecque: l'accusant faussement, de ce qu'ayant de tref-grands biens, & plus que il n'appartenoit à vn homme priué, il les augmentoit neantmoins: gaignoit aussi & tiroit trop à

XIIII. LIVRE DES ANNALES

foy, la faueur des citoyens. Qu'il surmontoit presque le Prince, en beauté de iardis, & magnificēce de maisons de plaifance. Ils luy reprochoient encores, qu'il f'attribuoit à luy seul l'honneur d'eloquence, & composoit des vers plus souuent que de coustume; depuis qu'il festoit apperceu que Neron prenoit plaisir d'en faire. Car trouuant tout ouuertement mauuais les esbats, & passetemps du Prince, il desprisoit sa force, à picquer & mener les cheuaux: se mocquant aussi de sa voix, toutes les fois qu'il chantoit. A quelle intention, sinon à fin que l'on creut, qu'il n'y auroit rien de bien faict en la Republicque, que ce qui sortiroit de son inuention? Qu'il ne falloist douter, que Neron ne fut hors d'enfance; & desia en sa force de ieunesse. Partant qu'il laissast là son magister; puis que ses ancestres luy seruoient assez de grands & bons Precepteurs. Or Senecque, bien aduertie par le r'apport de ceux qui auoient encores, quelque peu le bien & l'honneur en recommandation; comme des boute-feux le chargeoient: voyant aussi que Cesar, de plus en plus s'esloingnoit, de la priuauté qu'il luy auoit monstree par le passé: le pria de luy donner audience. Ce qu'ayant obtenu: il commença en telle sorte.

- Il y a ja quatorze ans (Cesar) que ie fu premierement
 - appellé, pour accompagner le grand espoir que l'on
 - auoit de vostre enfance: & le huietiesme, depuis que
 - vous tenez l'Empire. Durant ce temps, vous m'auiez
 - comblé de tant de biens & d'honneurs, qu'il ne man-
 - que rien à ma felicité, fors la sçauoir bien manier.
 - I'vseray en cest endroit d'exemples remarquables; &
- pratiquez

pratiquez par gens non de ma qualité, ains de la -
vostre. Auguste grand pere de vostre bisayeul, per-
mit à M. Agrippe se retirer à part à Metelin: & à
C. Mecenas; viure à son aise dedans la ville de Ro-
me mesme, comme en quelque plaisant seiour es-
loigné. L'un desquels l'ayant accompagné en ses
guerres; & l'autre, ayant esté dedans Rome battu,
& tourmenté de maints trauaux; auoient (à la veri-
té) receu de larges recompences: conuenables tou-
tesfois à leurs grands seruices. Quant à moy, qu'ay-
ie apporté pour meriter vostre magnifique libera-
lité; sinon mes estudes; nourries (s'il faut que ie di-
se ainsi) à l'ombre & à couuert: desquelles neant-
moins, toute ma reputation est venue; d'autât que
il semble que i'ay assisté à voz premiers apprentis-
sages: qui m'est (certes) vn bien grand loyer & re-
compense. Mais vous m'auiez outre cela, desme-
surément fauorisé; & donné des biens sans nom-
bre. De sorte que ie discours bien souuent à par-
moy: est-il possible, que moy qui ne suis que d'un
ne simple maison de Cheualiers (encores habitans
hors de Rome) tiennle rang des principaux sei-
gneurs de la cité? Et entre les plus nobles, & ceux
qui portent des marques d'ancienneté si grande;
vn nouueau venu comme moy, a il peu reluire &
paroistre? Où est cest esprit, qui se contentoit
de mediocrité? comment il dresse & accoustre de
si beaux iardins? il se promeine par telles maisons
de plaissance, pres de la ville? Ses terres, & posses-
sions sont de si grande estenduë, & ses deniers luy

XIIII. LIVRE DES ANNALES

« profitent en tant d'endroits, qu'il en regorge. Il
 « ne se presente à tout cela, qu'une seule dessee pour
 « moy: c'est que ie n'ay deu refuser voz presens. Or
 « auons nous l'un & l'autre satisfait à nostre deuoir:
 « vous donnant autant qu'un Prince pourroit don-
 « ner, à celuy qu'il aimeroit: & moy, receuant tout
 « ce qu'un homme grandement fauorisé, peut auoir
 « & prendre de son Prince. Le pardessus ne sert que
 « d'augmenter l'enuie: laquelle (comme toutes
 « choses mortelles) est souf-mise à vostre grandeur.
 « Mais elle retombe sus moy: c'est pourquoy, il est
 « besoing de me secourir. Et tout ainsi qu'en guerre,
 « ou allant par pays; si i'estois las ie demanderois cō-
 « fort, & un appuy: Aussi me trouuant par le chemin
 « de ceste vie ja vieil; & insuffisant; voire aux plus le-
 « geres charges: puis que ie ne scaurois plus auant,
 « soustenir le faix de mes richesses; ie requiers secours
 « & un support. Commandez donc quelles soient
 « deormais maniees parvoz Procurateurs: & cōtees
 « entre voz finances. Pour cela ie ne tomberay pas
 « en pauureté. Mais quand i'auray quitté les choses,
 « qui m'esblouissent par leur splendeur: le temps, que
 « ie referue au soing de mes iardins, & possessions; se-
 « ra par moy repris; comme un reuenu annuel. Et
 « puis vous n'auetz que trop de vigueur: & la grâdeur
 « de vostre Empire, est ja asseuree par le gouuernemēt
 « de tant d'annees. Mais quant à nous, voz plus vieux
 « & anciens seruiteurs, nous deuons demander le re-
 « pos. Et cela mesme retournera en vostre loüange,
 « d'auoir esleué aux plus hauts degrez; ceux qui peu-
 uent

uēt se contēter de mediocrité. A quoy Nerō respō- “
dit, presque en telle sorte. Quant à ce que tout prō- “
temēt ie respōd à vostre harāgue pourpēsee: ie reco- “
gnoy en premier lieu, tenir cela de vous qui m’auez “
enseigné à me desmesler, nō seulemēt de choses pre- “
ueuēs, mais aussi ce qui fus le chāp se presente. Au- “
guste ayeul de mō bisayeul, permit à Agrippe, & à “
Mecenas, iouyr du repos, apres auoir trauaillé: mais “
ce fut en tel aage, que l’authorité pouuoit deffēdre, “
& maintenir cela, & quelque autre chose que ce fut “
qu’il eut oētroyee. Ce neantmoins: il ne despouilla “
l’un ne l’autre des recōpēcesqu’il leur auoit dōnees. “
Ils les auoient biē meritees en la guerre, & dangers: “
car en la ieunesse d’Auguste, fut employee. Et ie “
croy que voz armes, & voz bras, ne m’eussent fail- “
ly, sil eut esté besoing de me trouuer moy-mes- “
me en mes armees. Mais vous accommodant à ce “
que l’estat present de mes affaires requeroit. “
Vous auez auec raison, conseil, & enseignemens “
propres; esleué mon enfance, & depuis ma ieu- “
nesse. Aussi tant que ie viuray, voz biensfaits se- “
ront eternels en mon endroiēt. Quant à ce que “
vous tenez de moy: iardins, deniers de banque, “
maison des champs, tout est subiect aux hazards “
& à la fortune. Et iaçoit qu’il semble que ce “
soit beaucoup: plusieurs n’approchans en rien “
de voz merites, en ont possédé d’auantage. I’ay “
honte de nommer des affranchiz, que l’on void “
plus riches queuo⁹. Et c’est pourquoy ie rougis: que “
vous que j’aime, & tien cher par dessus tous autres “

XIIII. LIVRE DES ANNALES

“ ne les passez encores en richesses, & grandeur de
 “ biens de fortune. Et puis vous auez l'aage assez gail-
 “ lard, & suffisant pour gouverner vostre fonds, & le
 “ reuenu de voz biens. Et nous ne faisons qu'entrer
 “ en la premiere course de nostre Empire. Si ce n'est
 “ que vous vous estimez moins que Vitel par trois
 “ fois Consul; & moy moins que Claude *: & que ie
 “ ne sçauois par ma liberalité, vous remplir de tant
 “ de bien; qu'une longue espargne en a faict amasser
 “ à Volusius. Et puis si nostre glissante, & muable
 “ ieunesse, pâche d'un costé plus qu'elle ne doit; vous
 “ la retenez: gouvernant soigneusement par vostre
 “ conseil le peu de vigueur que nous auons. L'on ne
 “ dira pas que vous contentez de mediocrité, si me
 “ rendez voz richesses: ne que ce soit pour chercher
 “ le repos, si vous abandonnez le Prince: Mais il ne
 “ se parlera que de mon auarice; que de la frayeur de
 “ ma cruauté. Et quand bien vostre continence vien-
 “ droit à estre principalement louée en cela: Si n'est
 “ il pas bien seant (toutesfois) à un homme sage, ac-
 “ querir honneur & louange, par une chose qu'il s'ap-
 “ preste faire tourner à la vergongne de son amy.

Avec cela il adiousta des accolades, & baisers: es-
 tant faict de nature, & par accoustumance duit à
 couvrir son mal talent, sous fausses caresses. Se-
 necque (comme c'est tousiours la fin & conclu-
 sion des propos que l'on tient avec celui qui com-
 mande) le remercie: Et toutesfois, il change la
 façon de faire, dont il vsoit en sa grandeur pre-
 cedente: reboutte ceste troupe de gens, qui
 le

le venoit saluer *tous les matins*, se destourne de ceux qui le vouloient suiure & accompagner. Et pour ceste cause il va peu par la ville: ne bougeant de la maison, comme fil eut esté malade, ou empesché à estudier & philosopher.

Puissance de Tigellin, qui fut cause de faire tuer Plaute & Silla.

CHAPITRE XVI.

SENEQUE ainsi estonné, & battu: il fut bien aise d'amoindrir la faueur de Fenius Ruffus; l'accusant d'auoir esté amy d'Agripine. Mais au contraire, Tigellin augmentoit son credit de iour à autre, lequel ayant opinion que ses meschantes inuentions qui estoient ses seules armes, seroient moins trouuees mauuaises, si en rendoit le Prince participant recherche curieusement, quelle chose le tenoit en crainte: Puis sçachant pour certain, que sur tous, il redoutoit Plaute & Silla. Plaute n'aguieres confiné en Asie, & Silla à Marseille: il luy remonstre leur noblesse: & que cestuy là estoit trop pres de la garnison de Leuant: & cestuy cy de celle de Germanie. Quant à luy, qu'il n'auoit point (comme Burrus) d'autres pensees contraires à celles de l'Empereur, ains regardoit seulement à l'assurance de Neron: lequel par sa presence, pouuoit aucunement empeschier les esmotions, & trahisons de la ville: mais comment

XIIII. LIVRE DES ANNALES

ſçauroit il eſtindre les troubles eſlongez ? Que les Gaules, leuoient incontinent la teſte à ce nom de Dictateur: & les peuples d'Asie, ne deuoient eſtre moins ſuſpectſ, à cauſe de la renommee de Druſus, ayeul de Plaute. Que Silla eſtoit pauvre; ce qui le rendoit plus hazardeux: & faiſoit le ſerart, & nonchalant, pendant qu'il cherche occaſion d'executer ſa temerité . Mais Plaute avec ſes grandes richèſſes, ne faignoit pas ſeulement deſirer la vie paiſible: ains contrefaiſoit la contenance des anciens Romains, ayant encores pris l'arrogance & ſecte des Stoiciens: qui rend les hommes turbulents, & conuoiteux d'eſtre employez. Incontinent, & ſans plus attendre , Silla diſnant à Marſeille, fut occis par gens enuoyez expres : qui arriuerent en quatre iours; & auant qu'il peult auoir crainte ou ouyr le bruit de ſa mort . Neron quand ſa teſte luy fut apportee, ſen mocqua, la trouuant laide à cauſe de ſon poil plus gris; quel'aage ne portoit . Il ne fut tant aiſé, de celer les preparatifs pour tuer Plaute: car plus de gens auoient ſoing de ſa vie : & puis la longueur du chemin, & de la mer: avec l'eſpace du temps coulant entre deux, en auoient eſmeu le bruit, & faignoit on communément, que Plaute auoit ſollicité Corbulon , chef de groſſes garniſons ; luy remonſtrant que ſi l'on tuoit ainſi les hommes d'apparence: & innocens il eſtoit le premier en danger. D'auantage que l'Asie auoit pris les armes en la faueur de ce ieune homme: & que les gens de guerre enuoyez pour telle meſchance-té: n'eſtans en nombre ſuffiſant, n'y aſſez coura-
geux:

305
 geux: voyans qu'ils ne pouuoient executer les choses commandees; festoient rangez de ce party nouveau. Voila les propos, que tenoient ceux qui n'ayans que faire, adioustent foy aux bruits de la ville. Au demeurant, vn affranchy de Plaute ayant bon vent, deuança le Centenier: & luy apporta l'aduis d'Antistie son beau-pere: contenant en somme, qu'il ne se laissast tuer lachement, & ne se fiast à sa vie paisible, à vne retraite, ne semblablement à la pitié qu'on auroit de sa grande noblesse: car il trouueroit des gens de bien, & des hommes hazardeux qui l'accompagneroient. Cependant qu'il ne luy falloir mespriser aucun secours, quel qu'il fut: & s'il auoit vne fois repoussé soixante soldats (car il n'en venoit non plus) pendant que les nouuelles en sont rapportees à Neron; pendant qu'une autre compagnie plus forte, est renuoyee: d'autres choses s'ensuiuroient, qui le pourroient tellement renforcer, qu'elles luy donneroient moyen de faire la guerre ouuerte. Finalement, ou qu'il sauuerait sa vie par tel conseil, ou qu'il ne luy pouuoit aduenir pis se hazardant, que demeurant lasche & couard. Toutesfois ces raisons, n'esmeurent aucunement Plaute: soit qu'il preueut n'auoir point de moyens, estans sans forces, & banny: ou qu'il sennuyast d'attendre l'ysuë d'une esperance douteuse: & possible pour l'amour qu'il portoit à sa femme & à ses enfans: ausquels il pensoit que le Prince seroit plus doux: s'il ne les met-

XIIII. LIVRE DES ANNALES

toit point en fâcherie, & soing de guerre. Il y en a qui disent que d'autres messagers vindrent de la part de son beau-pere; l'aduertir qu'il n'y auoit rien de cruel ordonné contre luy: & que deux Philosophes, Ceraunus Grec; & Musonius Toscan de nation; luy persuaderent de preferer vne mort constante, à la vie incertaine & craintive. A la verité, il fut trouué enuiron le midy tout nud, comme il faisoit exercice: & le Centenier le tua en cest estat, en la presence de Pelagon Eunuque que Neron auoit fait chef du Centenier, & Manipule qui luy seruoient de satellites, comme vn ministre qui va executer vn mandement de Roy sa teste ayant esté apportee apres sa mort. L'é reciteray les mesmes mots, que le Prince dict, quand il la vit. Qui garde donc (dict-il) Neron de laisser sa crainte, & auancer les nopces de Popée, & de luy: remises à autre saison, pour telles frayeurs? & chasser Octauié sa femme; jaçoit qu'elle soit bien sage, & modeste: puis que la memoire de son pere, & la faueur que le peuple luy porte, la rendent enuieuse & insupportable? Ce neantmoins, il enuoya des lettres au Senat, par lesquelles il ne confessoit pas le meurdre de Silla, ou de Plaute: mais qu'ils auoient tous deux l'esprit turbulent. Et quant à luy, qu'il prenoit soigneusement garde, à tenir la Republicque en bon estat. A ceste cause l'on ordonna des processions: & que Silla & Plaute, seroient mis hors du roolle, & nombre des Senateurs. Ce qui toutesfois apportoit plus de honte, que de mal.

Neron

Neron chasse sa femme Octaue: & espouse Popée. La faueur que le peuple portoit à ladicte Octaue. Et les plaintes que fit Popée à Neron, pour luy persuader de faire mourir sa femme Octaue.

CHAPITRE XVII.



INSI donc, Neron, ayant entendu l'arrest du Senat: apres qu'il vit que toutes ses meschancetez, estoient receuës par beaux faicts: il chasse Octaue, disant souuentefois qu'elle estoit brehaigne: & puis il espouse Popée. Ceste-cy ayant longuement esté concubine, & maniant entierement Neron son adultere, & incontinent apres son mary; contrainit vn certain officier d'Octaue, accuser sa maistresse, qu'elle aimoit vn esclau: & fut supposé vn Encer natif d'Alexandrie, qui scauoit iouer de la fluste: là dessus, la question est donnee aux seruantes d'Octaue, aucunes desquelles vaincues par la gehenne, confesserent des choses faulles. Mais il y en eut d'auantage, qui soustindrent l'innocence, & bonne vie de leur maistresse. L'vne desquelles estant pressée par Tigellin, luy respondit que le deuant de sa maistresse, estoit plus chaste & net, que sa bouche. Toutesfois du commencement elle fut mise hors d'auec Neron, sous couleur d'vne separation legitime: & par vn mauuais presage luy furent donnees la maison de Burrus, les possessions & heritages de Plaute. Puis tout soudain, elle est chassée en Campanie, avec des gens de

XIIII. LIVRE DES ANNALES

guerre pour la garder. Cela fut cause d'émouuoir plusieurs plaintes; que le populace qui n'est guieres sage, ou qui par sa pauureté n'est pas subiect à tant de dangers, publioit tout hautement. Dont Neron aduertty * rappella sa femme Octaue, comme par repentance de sa faute. Quoy voyant le peuple, monte tout ioyeux au Capitole, adore & remercie les dieux: iettant à terre les images de Popee: & portant sur ses espaulles celles d'Octaue, qu'il semoit de fleurs; & les met au marché & dans les temples. Il louë aussi le Prince, de ce qu'il auoit reprins sa femme. De faict ces gens remplissoient desia le Palais d'une multitude, & de clameurs: quand des troupes de soldats, furent enuoyees au deuant: qui à coups de baston, & presentans les armes, les escarterent avec grande foule: Et tout ce que le peuple auoit fait par sedition, fut changé, & les images faictes en l'honneur de Popee, sont remises: laquelle outre la hayne mortelle qu'elle portoit tousiours à Octaue, estât lors encore plus cruelle, de crainte ou d'un plus grand effort du populace, ou que Neron ne se changeast, voyant l'inclination & faueur de la commune; s'estant iettée à ses pieds, commença luy dire. Que ses affaires n'estoient pas en tel estat, qu'il luy conuint disputer pour son mariage (combien qu'elle en fit plus d'estime que de sa vie) mais que sa vie propre, estoit mise en danger extreme, par les partilans & esclaués d'Octaue, qui se couuroient du nom du peuple, pour oser faire en paix, ce qu'à peine aduiendroit en guerre. Que ces armes, auoient esté prises contre le Prince; & n'y auoit faute que

que d'un chef: lequel toutesfois, les choses estés plus fort esmeuës se trouueroit bien aisément. Qu'elle sortit seulement de la Campanie, & vint en la ville: puis qu'à vn clin d'œil d'elle qui estoit absente, se faisoient telles esmotions. Car autrement, quel mal Popee auoit elle fait? ou qui auoit elle offensé? le peuple estoit il courroucé pour ce qu'elle fera des enfans, vrais & legitimes heritiers de la maison des Césars: ymant mieux que la race d'un fluteur d'Egypte, tienne le throsne & siege Imperial? Finalement si c'estoit le bien des affaires *publicques*, qu'il l'appellast sa maistresse de son bon gré, plustost que par contrainte: ou que il aduisast à sa seurté par vne iuste punition. Qu'avec bien peu de remede, l'esmotion premiere s'estoit apaisée. Mais s'ils perdoient l'esperance, qu'Octaue peut estre sa femme, ils luy donneroient vn autre mary. Ces parolles diuerfes; & propres pour estonner, ou esmouuoir à cholere: effrayerent Neron, & quand & quand luy mirent le feu aux oreilles. Toutesfois, il n'y auoit pas grande apparance, de soupçonner ce vallet fluteur: & puis la question des seruantes auoit tout purgé. A ceste cause ils trouuerent meilleur, de chercher aucun qui le confessast: & à qui aussi l'on peust mettre sus, de vouloir entreprendre quelque nouueauté contre l'estat.

*Anices à la suscitation de Neron confesse faussement d'auoir
eu la compagnie d'Octaue: & la mort d'elle ensemble celle
dudiect Anices.*

CHAPITRE XVIII.

FF

XIIII. LIVRE DES ANNALES

L sembla qu'il n'y en auoit poit de plus suffisant, qu'Anicet executeur du meurdre de sa mere: Capitaine (cōme i'ay dit) de l'armee de mer, tenāt garnisō à Misene: quelque peu estimé apres la meschāceté cōmise, mais depuis tres-mal voulu: pour ce que les ministres des grādes meschācetez, seblēt les reprocher quādon les voit*. Cesar dōc, l'ayāt fait apeller: luy remōstre le seruice passé: q'il estoit seul q' auoit garēty le Prince de la trahisō de sa mere: qu'il se presētoit occasiō de faire pour luy q'lq chose nō mois agreable: chassāt sa fēme q'luy vouloit mal*. Et q' pour ce faire il ne luy falloit ēployer la māi, ne le cousteau: qu'il cōfessast auoir eu la cōpagnie d'Oētaue. Qu'à la verité, la recōpēce seroit secreete pour l'heure: mais grāde puis apres: luy promettāt vne retraitte, en laq̃lle il pourroit viure plaïsāmēt: & s'il le refusoit, q'il le feroit mourir. Anicet peu aduisē de son naturel, voyāt qu'il auoit cōmis aisēmēt les autres meschācetez, luy accorde de faire ceste cy. Et encore saignāt plus qu'o ne luy en auoit dit: il le cōfesse en presēce des fauoris, q' l'Empereur auoit appelez cōe pour cōseil. Apres cela il est cōfinē en Sardaigne, ou il passa sō van, viuāt nō pas en pauureté: & mourut de sa mort naturelle. Or Neron met sus à Oētaue qu'elle auoit corōpu, & gaignē le Capitaine des galleres, en esperāce d'auoir l'armee de mer à sa deuotiō: & ne se souuenāt pl⁹ de luy auoir n'a gueres reproché qu'elle estoit brehaigne; il l'accuse q' par vn remords de ses paillardises, elle s'estoit vuidee du fruit par elle cōceu *d'autre que de luy*: & qu'il en estoit asseuré par la cōfessiō du gallāt mesme. Parquoi il serre Oētaue dās l'Isle Paudaterie. Iamais autre bānie, ne fit pl⁹ grāde pitié à ceux qui la virēt. Aucūs auoiēt encore

souuenâce d'Agripine, chassée par Tibere: & ils se repre-
sentoient Iulie, q^e n'agueres l'auoit esté par Claude: tou-
tefois celles là, estoient d'aage fort & robuste, elles auoient
veu q^{lq} chose de plaisant: & pouuoient adoucir la cruau-
té dôt alors on vsoit cōtr'elles, par la souuenâce de leur
meilleure fortune passée. Mais quāt à ceste cy: tout pre-
mieremēt le iour de ses nopces luy fut aussi plaisant q^e ce-
luy de la mort: ayāt esté mariee en vne maison, où elle
ne pouuoit trouuer q^e toutes choses tristes: luy estāt son
pere empoisonné: & incōtinēt apres sō frere, & puis elle
mesme cōtraite, de souffrir vne chābriere pl⁹ grāde mai-
stresse q^e elle: & encor Popee expressement espousee pour
la ruiner. Finalement vne accusatiō de chose pl⁹ griefue
q^e la mort. Or iaçoit q^e ceste ieune princesse, aagee seule-
mēt de 20. ans, se trouuāt entre des Cēteniers, & soldats;
iugeast par le presage de son mauuais traitemēt q^e elle
ne la feroit pas lōgue: si ne pouuoit elle se resoudre à la
mort. Peu de iours passez entre deux, on luy cōmāda de
mourir: nōobstāt qu'elle protestast, n'estre pl⁹ fēme, aīs
seulemēt sœur de l'Empereur: & appellast à sō aide Ger-
manic; duq^l ils estoient to⁹ deux yllus. Et finalement Agri-
pine: du viuāt de laq^{lle} elle auoit (certes) enduré vn ma-
riage malheureux: toutefois sās dāger de sa persōne. Ce
nonobstāt elle est liée, & ses veines sōt ouuertes par to⁹ ses
mēbres. Mais pour ce q^e le sāj arresté à cause de sa peur,
sortoit mal aisēmēt: on la fit mourir par la vapeur d'vn
bain treschaud. Encor y fut adioustee vne pl⁹ outrageu-
se cruauté: car Popee veit sa teste trāchee, & portee en la
ville. Pour ces choses il fut ordōné q^e des offrādes seroient
faites aux tēples. Ce q^e no⁹ ramēteuōs expressement à cel-
le fin q^e quicōque soient ceux qui aurot cognoissāce des

XIIII. LIVRE DES ANNALES

faits de ce temps là, escrits par nous ou par d'autres: qu'ils tiennent pour chose dictée: Que toutes les fois, que le Prince a banny, ou fait mourir quelqu'un: que l'on a autant rendu de graces aux dieux: & que ce qui seruoit au temps passé, à remarquer les prosperitez: estoit à ceste heure là, l'enseigne & marque des pertes & dommages publicques. Ce neantmoins, nous ne rairons pas les arrests du Senat: quand il s'en trouuera aucuns sentans leur flatterie nouuelle: ou vne patience, & lascheté extreme & vilaine. Ceste mesme annee on eut ferme opinion, que Neron fit mourir ses principaux affranchiz. A sçauoir Dorifore; comme ayant esté contraire au mariage de Popee: & Pallas, pour ce qu'au moyen de sa longue vieillesse, il retardoit trop à faire venir ens, ses richesses desmesurees. Romain auoit per secrettes calomnies accusé Senecque, comme compagnon de C. Pison: mais il luy renuoya la pierre plus rudement, luy mettant sus le mesme faict. Ce qui fut cause de la crainte, en laquelle entra Pison: & l'origine de ceste grande, mais infortunee entreprise contre Neron.

FIN DV QVATORZIESME LIVRE DES ANNALES DE P. CORNILE
TACITE, CHEVALIER ROMAIN.

QVIN-



QVINZIESME LIVRE
DES ANNALES DE P.
CORNILE TACITE
CHEVALIER ROMAIN.

*Vologeses Roy de Parthe couronne son frere Tiridates
Roy d'Armenie: lequel empesché d'en iouyr
par Corbulon, fut chassé de Tigrannocerte.*

CHAPITRE PREMIER.



E PENDANT Vologeses
Roy des Parthes, aduerty
du succez des affaires de
Corbulon; & comme Ti-
granes Roy estrangier, a-
uoit esté mis en possession
d'Armenie: voulant aussi
venger le mespris, qui en
chassant de ce pays Tirida-
tes son frere, auoit esté fait
à la hauteſſe des Arsacides; entroit d'autre coſté en
diuers penſemens: venât à conſiderer la grande puis-
ſance des Romains; & reſpectant l'alliance longue-
ment continuee avec eux. Car de ſon naturel il tem-

XV. LIVRE DES ANNALES

porisoit: & au moyē de la rébellion des Hircans puissante natiō, il se trouuoit lors embrouillé en plusieurs guerres. Encores sur ce doute, les nouuelles d'une autre iniure le viennent picquer d'auantage. Car Tigra- nes sortant d'Armenie, auoit faict le gast au pays des Adiabenes nation qui borde ce Royaume) plus auāt & par plus lōgue espace de tēps, que n'ont accoustu- mé de durer les courses des ēnemis. Et les principaux seigneurs d'entre ces peuples, portoient fort griefue- ment d'estre tōbez en tel mespris, qu'ils fussent main- tenāt courus, non par vn Capitaine Romain; mais par vn ostage esuenté: nourry & tenu si longuemēt entre des esclauues. Monobase qui auoit le gouuernement d'Adiabene, les eschauffoit encores d'auātage: demā- dant quel moyen de secours, ou & à qui, il l'adresse- roit pour y remedier: Que l'Armenie ayāt ja esté qui- tee le pays voisin s'en alloit apres. De sorte que si les Parthes ne le deffendoiet, c'estoit chose asseuree; que entre les Romains, ceux qui se sont rēdus de leur gré, endurēt vne seruitude beaucoup pl⁹ douce, que ceux qui ont esté pris de force. Auec cela Tiridates chassé de son Royaume, luy pesoit plus que tout: lequel en se taisant, sembloit biē fort se plaindre: & dire que ce n'est par lascheté, que les grans Royaumes & seigneu- ries se maintiennēt; ains falloir en combattant, faire preuue de la vertu & force des hommes & des armes. Qu'entre les grās Rois & Princez, le bon droit se trou- uoit du costé de la force: & c'estoit à faire, à petis mes- nagers de garder le siē: mais quereller & debatre l'au- truy, estoit vne loüange Royale. Vologeses esmeu de

ces raisons; assemble le conseil: & apres auoir fait seoir Tiridates tout pres de soy; il commença de telle sorte. M'ayant cestuy-cy (qui est engendré de mesme pere que moy) ceddé le nom de Roy à cause de mon aïnesse; ie le mis en possession d'Armenie, qui est le tiers degré d'honneur du Royaume de Parthe: car Pacurus auoir ja esté pourueu de celuy des Medes. Et sembloit que remediant aux haines & querelles, qui de toute ancienneté sont aduenues entre freres; i'auois mis bon ordre en nostre maison. Toutesfois les Romains l'empeschent: & iagoit qu'ils n'ayent iamais eu auantage à troubler la paix; ce neantmoins ils la rompent maintenant à leur ruine & destruction. Je ne veux point nier que i'eusse delibéré garder ce que mes predecesseurs ont acquis; & le deffendre par iustice plustost qu'avecques le sang; par raison & bonne cause, que les armes au poing; mais si i'ay failly par trop temporiser, ie l'amenderay par vaillance. Or voz forces & vostre honneur sont en leur entier; outre la reputation qu'auiez acquise de gens paisibles & modestes: qui est vne chose laquelle n'est à mespriser des plus; grands seigneurs du monde: & si est estimee par les dieux mesmes. Cela dict, il lie d'un diademe le chef de Tiridates: & baille à vn seigneur appellé Monefes, vne gaillarde compagnie de gens de cheual, qui d'ordinaire suiuiot le Roy: & d'auantage le secours des Adiabenien. Luy commandant chasser Tirigranes d'Armenie: pēdāt que les troubles d'Hircanie:

XIIII. LIVRE DES ANNALES

ayans esté par luy appaisez; il assemble les forces du
 cueur de son Royaume: & s'appreste de le suiure avec
 l'effort de la guerre, pour se ruer sus les prouinces Ro-
 maines. Cecy ayât esté rapporté à Corbulon par mes-
 sagers certains & fidelles. Il enuoye au secours de Ti-
 granes, deux legions: avec Verulan Seuer & Vectius
 Bolan: ausquels il dône charge en secret, de faire tou-
 tes choses meurement, plustost qu'à la haste. Car il
 aimoit mieux auoir la guerre que la faire *. Et auoit
 escrit à l'Empereur, qu'il estoit besoin d'auoir vn chef
 expres, pour deffendre l'Armenie: d'autant que la Sy-
 rie estoit en tresgrand danger: si Vologeses se iettoit
 dedans. Ce pendant il loge les autres legions sur le ri-
 uage d'Euphrate: arme vne compagnie de gens du
 pays leuez à la haste: saisisant avec de bonnes garni-
 sons, les passages & aduenues des ennemis. Et pour-
 ce qu'en ce pays il y a faute d'eau; il cache & couure
 de sable, les reservoirs & regards bastiz sus le cours
 des fontaines: & aussi quelques ruisseaux. Durât que
 Corbulon fait ces preparatifs pour la deffence de Sy-
 rie; Moneses à fin de preuenir le bruit de sa venuë,
 ayant à grandes traittes & iournees, fait marcher ses
 troupes, ne peut toutesfois prendre Tigranes au des-
 pourueu: lequel s'estoit ja saisi de Tigranocerte ville
 forte & puissante; tant pour la quantité d'hommes de
 deffence, que la grandeur de ses murailles. Outre cela
 la riuierre Nicephorie qui est assez large, enuironne v-
 ne partie des murs: & si encores l'on a tiré vn grand
 fossé, à l'endroit ou la ville n'estoit fortifiée de la ri-
 uierre. Il y auoit aussi des soldats dedans; & bonne pro-
 uision

nison de toutes choses necessaires: pour lesquelles amener aucuns qui estoient sortis trop hardiment, ayans esté surprins par les ennemis, auoient plustost eschauffé que donné crainte au reste. Or le Parthe n'a point la hardiesse d'assiéger de pres vne ville: ains tirant quelque peu de flesches, il ne donne aucune frayeur aux assiegez; & luy mesme perd le temps. Comme les Adiabenes vouloient approcher des eschelles & engins, ils furent aisémēt repoussez: & depuis tuez en vne saillie, que les nostres firent. Mais iagoit que Corbulon veit ses affaires en bon estat, toutesfois iugeant qu'il falloit vser moderément de sa fortune, il enuoye des gens vers Vologeses; pour se plaindre de la force & violence que l'on faisoit à vne prouince Romaine: & de ce qu'un Roy allié & amy, assiegeoit les cohortes Romaines. Partant que pour son meilleur, il leuast incontinent le siege: ou bien qu'il iroit aussi camper en son pays, comme ennemy. Casper Cētenier choisi pour faire ceste ambassade, vint trouuer le Roy à Nisibe: ville distante de trente sept milles de Tigrannocerte, & luy fit entendre sa charge brusquement. Vologeses auoit de long temps cōclud & arresté fermement en son cueur, d'euitier la guerre contre les Romains: & puis il voyoit que ses affaires presentes, n'alloyent point bien. Que le siege estoit inutile & vain: que Tigrannes estoit fort de gens & de toutes choses necessaires: que ceux qui estoient aduancez d'affaillir la ville, auoient esté repoussez, & que l'on auoit enuoyé des legions en Armenie: & d'autres appareillees pour la Syrie, estoient

XV. LIVRE DES ANNALES

prestes de le venir chercher en son pays. Que la cheualerie estoit foible par faute de fourrage: d'autant qu'une grande quantité de sauterelles, (qui s'estoit leuee) auoit broutté toute l'herbe des champs, & les feuilles des arbres. Cachât donc en son cueur la crainte qu'il auoit, & faisant semblant que la paix luy plaisoit d'auantage; il respond, qu'il enuoyeroit ses Ambassadeurs vers l'Empereur Romain, pour demander l'Armenie; & arrester la paix. Ce pendant il commande à Monefes, leuer le siege de Tigrannocerte: & luy mesme retourne arriere. Or ces choses estoient hault loüees de plusieurs, comme excellentes; & aduenues pour la crainte que le Roy auoit eüe, & des menaces à luy faictes par Corbulon, mais d'autres l'interpretoient & le prenoient, comme s'ils eussent conuenu secrettement entr'eux; laisser la guerre d'une part & d'autre: & que Vologeses deslogeant; Tigranes sortiroit aussi d'Armenie. Car pourquoy l'armee Romaine, auoit elle esté retiree de Tigrannocerte? Pourquoy abandonnoit elle durant la paix, ce qu'elle auoit deffendu durant la guerre, auoit elle mieux passé l'huer au bour de Cappadoce, en des cabanes faictes à la haste; que dans la ville capitale du Royaume n'agueres gardée. Sans doute, l'on auoit differé la guerre, à fin que Vologeses eut à combattre contre vn autre que Corbulon: & que cestui-cy apres auoir iustement & par tant d'annees, acquis vne bonne reputation, ne se mit d'oresn'auant en danger de la perdre. Car (comme j'ay dict) il auoit demandé vn chef exprès, pour deffendre l'Armenie. Et le bruit couroit que

que Cefonius Petus saduançoit: & de faict il arriua
incontinent: Ayans leurs forces esté diuisees en telle
sorte; que les quatriesme & douziesme legions; auec
la cinquiesme nouuellement tiree de Mesis, ensemble
les gens de secours des pays de Pont, Galatie & Cap-
padoce; obeyroient à Petus. La troisieme, sixiesme,
dixiesme: & les soldats qui dés long temps estoient
en Syrie, demouroient à Corbulon. Et quant au re-
ste, qu'ils ioignissent ou tinsent en commun, toutes
autres choses: ainsi qu'ils verroient bon estre. Mais
Corbulon ne pouuoit souffrir vn compagnon: &
Petus qui pensoit auoir acquis assez d'honneur, si on
l'estimoit, le second: desprisoit les choses passees. Di-
sant souuent qu'il n'y auoit eu personne occis; ne bu-
tin gaigné: & que des villes auoient esté prises de pa-
roles seulement. Quant à luy, qu'il imposeroit tri-
buts & loix: & au lieu d'un Roy qui ne seruoit que
d'ombre; il les feroit viure sous la loy Romaine, cō-
me gens vaincus. Enuiron ce temps les Ambassadeurs
de Vologeses (que i'ay dit auoir esté enuoyez à l'Em-
pereur) retournerent sans rien faire, & les Parthes cō-
mencerent ouuertement la guerre, laquelle Petus ne
refusa: mais accompagné de deux legions seulement
(dōt la quatriesme estoit pour lors cōduite par Fami-
fulan Veronian & la douziesme par Calane Sabin) il
entra en Armenie avec vn triste presage. Car en tra-
uersant la riuiera d'Euphrate sus vn pont, le cheual
qui portoit les enseignes de Consul, s'estant effrayé
sans apparente occasion, eschappa fuyant en arriere.
Et la beste apprestee pour le sacrifice, estant là atten-

XV. LIVRE DES ANNALES

dant pres le fort d'Hyuer qu'on fortifioit; s'enfuit au trauers l'ouurage demy faict: sautant par dessus les palis: & les iauelots des soldats furent veus ardans. Qui estoit vn presage d'autant plus remarquable, que les Parthes ennemis, combattent avec le traict.

Petus successeur de Corbulon mene son armee au pays d'Armenie: Et les mauuaises qualitez dudit Petus pour vn lieutenant general. Le Roy Vologeses force le pas du mont Taurus. Estonnement de Petus.

CHAPITRE II.



AV demeurant, Petus ne tenant conte de ces presages; & n'ayant encores suffisamment fortifié le fort d'Hyuer; ne fait aucune provision de bleds: commande à son armee vistemement trousser bagage; & la mene outre le mont du Taur pour recouurer (comme il disoit) la ville de Tigrannocerte: & faire le gast aux pays que Corbulon n'auoit encore rauagez. Il prist aucuns chasteaux; & de faict il auoit acquis quelque peu d'honneur & de butin, sil eut gardé ceste gloire & reputation avec moyen: & le butin soigneusement. Mais apres auoir couru bien loing, en pays qui ne se pouuoit garder; voyant que les viures & provisions gaignees estoient gastées; estant pressé

pressé de l'Hyuer, il ramena son armée. Et tout ainsi que si la guerre fut acheuée; il escriuit à Cesar des lettres plaines de paroles braues & magnifiques; mais sans aucun effect. Ce pendant Corbulon qui auoit tousiours eu soing de garder la riuée d'Euphrate; y logea plus grand nombre de garnisons que deuant. Et à fin que les troupes des ennemis ne l'empeschassent de faire vn pont dessus (car ja on les voyoit en grande brauade, voltiger & courir çà & là par la campagne estant au dessous) il fit conduire par la riuée, de bien grands vaisseaux, ioints ensemble avecques des poutres, sur lesquels il auoit dressé des tours: chassant les Barbares avecques Catapultes & Balistes *. Les pierres & traicts desquelles les venoient trouuer si loing, qu'ils ne pouuoient au contraire par le vol de leurs fleches, atteindre & rendre le pareil du mal qu'on leur faisoit. Apres cela le pont fut acheué tout au trauers de la riuée: & les coustaux opposites ayans esté premierement saisis, par les compagnies des alliez; les legions y planterent depuis leur camp: si soudainement, & avecques telle monstre de leurs forces, que les Parthes laissant l'appareil pour enuahir la Syrie, tournerent entierement toute leur esperance contre l'Armenie. Petus (qui ne sçauoit rien de la tempeste venant tomber sus luy) tenoit pour lors bien loing au pays de Pont, la cinquiesme legion: & auoit affoibly les autres par les congez, donnez indiscretement à plusieurs.

XV. LIVRE DES ANNALES

soldats: quand tout soudain on oit dire que Vologes-
 ses venoit avec vne bien grande compagnie: deliberé
 de faire beaucoup de mal. A ceste cause il comman-
 deà la douziesme legion, s'approcher: mais ce qu'il
 pensoit luy deuoir seruir, pour faire courir le bruit du
 renfort de son armee, delcourrit le peu de gens qu'il
 auoit. Avec lesquels (neantmoins) le fort de la gar-
 nison se pouuoit garder: Et les Parthes amuser en ti-
 rant la guerre en longueur; sil se fut trouué en Petus
 assez d'arrest à suiure son conseil mesme, ou celuy que
 d'autres luy auoient donné. Mais quand les hommes
 entenduz à la guerre, l'auoient asséuré donnans re-
 mede aux affaires presentes; incontinent apres pour
 monstrier qu'il n'auoit que faire, de l'aduis & pruden-
 ce d'autrui, il chāgeoit d'opinion: prenant le contrai-
 re & pire conseil. Et de fait laissant la garnison d'hy-
 uer: & criant qu'on ne luy auoit pas donné vn ram-
 part & pallis; ains des hommes & des armes pour
 guerroyer l'ennemy: il fit sortir les legions comme
 sil eut voulu combattre. Puis ayant perdu vn Cente-
 nier, & quelque peu de soldats enuoyez pour reco-
 gnoistre les troupes ennemies, il retourna arriere
 tout estonné. Et pour ce que Vologeses l'auoit pour-
 suiuy plus froidement: ayant pris de rechef vne vai-
 ne assurance, il assit sus le haut du mont du Taur pro-
 chain de là, trois mille soldats choisis: à fin d'empes-
 cher au Roy ce passage. Il fit aussi loger en vne partie
 de la plaine, les cornettes des Pannoniens: qui estoit
 la fleur de sa cheualerie, sa femme & son fils furent re-
 tirez en vn chasteau nommé Arsamosate, avec vne
 cohorte

cohorte pour les garder: ayant séparé ses soldats lesquels assemblez, pouuoient plus aisément soustenir l'ennemy vagant çà & là. Il se dit, qu'à grand peine on peut gagner sus luy, d'escrire à Corbulon que l'ennemy approchoit: lequel aussi de sa part ne se hastoit guieres; à fin que le danger croissant, il eut d'auantage d'honneur venant au secours. Toutesfois Corbulon commanda à mille soldats, de chacune des trois legions: huiët cens des cornettes de gens de cheual: & à pareil nombre des cohortes des alliez se tenir prests pour marcher. Or combien que Vologeses fut aduerty, que Petus tenoit les aduenues garnies; & d'un costé par les gens de pied; & d'autre par ceux de cheual; si ne voulut il changer sa resolution. Car ayant tant de force que de menace, chassé les gens de cheual; il passa sus le ventre des legionnaires: sans qu'il se trouuast qu'un seul Centenier nommé Tarquice Crescen, (tenant garnison en vne tour) qui eut le cueur de se deffendre. Lequel faisant plusieurs saillies tuoit ceux des Barbares qui approchoient trop pres; iusques à ce que les ennemis l'eussent forcé avec ses gens: par le feu qu'ils luy ietterent. Ceux des pietons, qui se trouuerent sains, se sauuerent ou bien loing, ou par les destours des montagnes: & les blesez retournerent au camp; augmentans la vaillance du Roy, la cruauté & multitude des peuples de sa suite, & toutes autres choses; par crainte qu'ils en auoient. Ce qui estoit creu facilement, de ceux qui auoient aussi grand peur qu'eux. Le chef mesme ne s'efforçoit point de remedier aux aduersitez; au contraire il a-

XV. LIVRE DES ANNALES

uoit abandonné tout le deuoir de sa charge: ayant de rechef enuoyé vers Corbulon, le prier se haster de venir sauuer les enseignes, les aigles, & ceste infortunee trouppes, qui n'auoit plus que le nom d'armee: Et quant à luy, que ce pendant il garderoit sa foy entiere, tant qu'il viuroit.

*Corbulon part de Syrie pour secourir Petus assiégué: lequel
ce pendant faict vn traicté honteux, avec le Roy Vo-
logeses.*

CHAPITRE IIL



CORBULON sans s'effrayer, & laissant vne partie de son armee en Syrie, pour la deffence des forts bastiz sur la riuere d'Euphrate, prend son chemin par le pays de Comagene, comme le plus droict & mieux garny de viures: & de là en Cappadoce: puis en Armenie. Outre l'ordinaire cariage & de la guerre; l'armee estoit suiue de grand nombre de chameaux chargez de bleds: à fin de chasser l'ennemy & la faim tout ensemble. Le premier homme estonné qu'il rencontra en son chemin, fut Pactius Centenier du premier rang. Et apres luy plusieurs autres soldats: lesquels allegans diuerses excuses de leur fuite, il admonnesta retourner à leurs enseignes: & esprouuer la clemence de Petus: quant à luy, qu'il n'estoit rude & fascheux qu'aux victorieux. Il se presente aussi à ses legions; & leur r'amentoit les choses qu'elles auoient bien faictes par le passé: & l'occasion d'acquérir nouuelle gloire & honneur à l'aduenir.

uenir. Que ce n'estoit pas pour gagner les villes ou villages des Armeniens, qu'ils prenoient tant de peine & travail; mais ils alloient deliurer vn camp de Romains, avec deux legions assiegees dedans. Et si aduenoit que chacun simple soldat, receut de la main Imperiale, la plus honorable & principale des couronnes, en signe & recompence d'auoir recous vn citoyen Romain; quel & combien grand sera l'honneur qu'ils vont acquerre, si se trouue pareil nombre de ceux qui auroient sauue la vie que de ceux à qui on l'auroit donnee? Ces paroles & autres semblables les rendoient en general plus alaigres: avec ce qu'il y en auoit, qui en particulier estoient esmeuz du danger de leurs freres & parens: ce qui les faisoit sans cesse marcher iour & nuict. Et pour ceste cause, Volageles pressoit d'auantage les assiegez: assaillant maintenant le palis du parc des legions: & tantost le chastelet, ou ceux de l'armee qui n'estoient de deffence, estoient mis à sauueté: s'approchant plus pres que les Parthes n'ont accoustumé: à fin que par ceste temerité, il peut attirer ses ennemis au combat. Mais les soldats Romains, trainez à grand peine hors de leurs tentes & cabanes, ne deffendoient autre chose que les rampars: vne partie par le commandement du capitaine; & l'autre par leur propre couardise; comme attendans Corbulon: deliberez s'ils eussent esté pressez d'auantage, de se sauuer à l'exemple des autres armées deffaictes à Candes & Numance. Et encores plus honnestement (ce pensoient ils) d'autant que les Sarmates peuple d'Italie, & les Carthaginois (quel-

XV. LIVRE DES ANNALES

ques esgaux qu'ils fussent à la grandeur des Romains, n'estoient si puissans, que les Parthes. Que les anciens tant vaillans & louez que l'on voudra dire, toutesfois & quantes que fortune s'estoit monstree contraire, auoient pourueu à leur sauueté. Ce desespoir de l'armée, contraignit Petus enuoyer des lettres à Vologeses, dont les premieres n'estoient pas humbles : ains comme se plaignant qu'il traitast en ennemy les Armeniens, appartenans de tout temps aux Romains, ou subiets d'un Roy, choisi par l'Empereur. Que la paix estoit autant profitable à l'un qu'à l'autre : & ne deuoit regarder seulement à l'estat des choses presentes. Qu'il estoit venu avec toutes les forces de son Royaume, contre deux seules legions : là où les Romains auoient tout le reste du monde à leur commandement, pour soustenir & renforcer la guerre. Vologeses ne luy rescriuit rien à propos ; ains seulement qu'il luy conuenoit attendre Pacorus & Tiridates ses freres : & que ce lieu & ceste saison, auoient esté destinez pour consulter de ce qu'ils resouldroient d'Armenie. Toutesfois qu'outre cela les dieux luy auoient fait ce bien & faueur, digne de la maison des Arsacides ; de pouuoir quant & quant ordonner ce que bon luy sembleroit des legions Romaines. Depuis Petus enuoya des messagers ; & demanda parlement avec le Roy ; lequel commanda à Vafaces Capitaine des gens de cheual, de s'y acheminer. En ceste conference Petus mit en auant, les choses faictes par Lucullus Pompee, & autres Capitaines Romains, employez pour prendre ou donner l'Armenie. Mais Vafaces

facès répondit; qu'en apparence nous l'auions tenuë & donnée: toutesfois que l'effect & la puissance, en estoit demouree aux Parthes. Apres plusieurs disputes des vns & des autres; le lendemain Monobase Adiabienien, est appellé comme tésmoing des choses accordées entr'eux. Et fut conclud; que le siege seroit leué de deuant le fort des legions: que tous les soldats Romains sortiroient des limites d'Armenie: & que les forts & monitions seroiēt liurez aux Parthes: Ce fait il seroit permis à Vologeses, enuoyer des Ambassadeurs vers Neron. Cependant Petus fait vn pôt sus la riuière Arsamete, laquelle couloit au long du camp: comme s'il eut voulu passer par là; mais les Parthes auoient commandé de le faire, pour môstrer vne marque de leur victoire: car ils s'en seruirent, & les nostres allerent par autre chemin contraire. Le bruiet adioustoit, que les legions auoient esté contraintes de passer sous les picques croisees en ioug: & souffert autres ignominies, qui ont accoustumé d'accompagner les deffaites: & de vray les Armeniens leur en firent quelques vnes. Car ils entrerent dans le camp auant que l'armee Romaine en partit: se mirent deçà & delà des chemins: emmenans par force les esclaués ou cheuaux, qu'ils recognoissoient auoir esté autresfois pris sus'eux. Ils osterent aussi des hardes; & retirèrent des armes: que le soldat craintif leur abandonnoit; à fin qu'il n'y eut rien qui fut cause de venir aux mains. Vologeses ayant fait assembler en vn monceau, les corps & armes des occis, pour resmoigner de la deffaitte de noz gës; ne voulut tou-

XV. LIVRE DES ANNALES

tesfois veoir la fuitte des legions : car il desiroit d'acquiescer la reputation de modestie, ayant ja assouuy son arrogance. Il passa la riuere d'Arfamette, monte sus vn Elephant : & les autres qui estoient à l'entour de luy, à cheual. Pour ce que le bruiet couroit que le pont ayant esté malicieusement dressé, fonderoit sous le faix des passans : toutesfois ceux qui osèrent passer dessus, le trouuerent bien ferme & assuré.

Lacheté de Petus & de son armee. La diligence de Corbulon pour deliurer Petus. Le traité que Corbulon fit avec le Roy de Parthe. Ordonnances contre les fainctes adoptions. CHAPITRE IIIII.



V demourant, c'est chose certaine que les assiegez auoient telle abondance de bleds, qu'ils mirent le feu aux greniers. Et au contraire Corbulon descouurit, que les Parthes ayans necessité de toutes choses, & consommé tous leurs fourrages, estoient prests d'abandonner le siege : & quant à luy, qu'il n'estoit esloigné que de trois iournees. Encores il adionstoit : que Petus auoit iuré deuant les enseignes, presens les deputez du Roy enuoyez pour assister à ce serment ; qu'aucun Romain n'entreroit en Arménie iusques à ce que par lettres de Neron, il fust cognue s'il auoit la paix pour agreable. Mais tout ainsi que ces choses ont esté controuuées, pour augmenter l'infamie ;

mie; aussi n'y a il aucune doute, que Petus, fit en
 un iour quarante mil de chemin: laissant par tout les
 bleffez. Et que cest effroy de gens fuyans, ne fut
 moins deshonneſte, que ſils euſſent tourné le dos
 en vne bataille: Corbulon les ayant rencontréz ſus
 le bord de la riuière d'Euphrate, ne voulut aller
 au deuant, en ſi belle ordonnance & parade d'ar-
 mes, & d'enſignes deſployees, qu'il ſemblast deſir-
 er faire apparoiſtre la difference des deux armées:
 Car ſes troupes triſtes & marries de l'aduancure de
 leurs compagnons, ne peurent retenir les larmes. A
 peine firent ils contenance de ſ'entre ſaluër: tant cha-
 cun eſtoit eſploré. Là ne ſe voyoient point les de-
 bats, qui aduiennent entre les hommes vaillans: &
 toute eſpue d'acquie gloire & honneur plus que
 ſon compagnon: qui ſont paſſions de gens à leur
 aiſe. Rien n'eſtoit tant priſé que la miſericorde: mais
 plus entre les petits compagnons. Les chefs ne tin-
 drent pas longs propos enſemble; ſe plaignans de
 cecy: d'auoir pris beaucoup de peine pour neant: &
 que la guerre ſe pouuoit finir, metrans en fuite les
 Parthes. Petus reſpondit, que toutes choſes pour le
 regard de chacun d'eux, eſtoient en leur entier: qu'ils
 ſourhaſſent les enſignes & aſſailiſſent de compa-
 gnie, l'Atmenie aſſoiblie par la retraite de Vologè-
 ſes. Corbulon diſt, n'auoir point chargé de l'Empe-
 reur pour ce faire: Qu'il eſtoit ſorty de ſa prouin-
 ce elmeu du danger des legions: & pour ce que
 l'on ne ſcauoit quelle eſtoit l'entrepriſe des Par-
 thes, il retourneroit en Syrie. Et que pluſtoſt

XV. LIVRE DES ANNALES

il falloit defirer, que la fortune leur fut tant fauorable, que les pietons trauallez de si loin chemin, peussent fuiure & atteindre les Parthes gens de cheual plus dispos: & qui les pouuoient deuanter ayans l'auantage de la campagne. Après cela Petus hyuerna en Cappadoce: & les messagers de Vologeses, sommerent Corbulon qu'il eut à retirer ses garnisons; & desmolir les chasteaux & forts estans oultre l'Euphrates: laissant la riuere comme vne separation & borne de tous leurs differens. Mais Corbulon demandoit que d'autre costé, l'Armenie fut laissée vuide & deschargée de plusieurs garnisons ennemies. Ce qu'à la fin le Roy accorda: & par ainsi furent rompus les forts, que Corbulon auoit bastiz entre la riuere d'Euphrates: & les Armeniens laissez libres. Ce pendant les trophées & les arcs, pour la victoire des Parthes, que le Senat au commencement de la guerre auoit ordonné estre dressés à Rome, se bastissoient & fondoient sus le milieu du mont du Capitole: cōbien que la guerre durast encōres: & lesquels ne furent laissez d'acheuer, ayans plus d'esgard à la beauté & decoration, qu'à ce qu'ils scauoient de la verité des choses passees. Qui plus est, pour faire semblant qu'on se soucioit peu des affaires de dehors: & l'assurance qu'on auoit de l'abondance des viures: Neron fit ietter dans le Tibre, le bled des greniers publics corrompu & gâté: sans que pour cela il en encherit: iagoit que la tempeste de la mer, eut fait perir deux cens nauires dedans le port: & le feu en eut consommé autres cēt qui auoient reboursé le Tibre. Après cela il commit trois personages

Consulai-

Cōsulaires; à sçauoir L. Pison, Dugnie Gemine, Pompee Paulin, pour regarder aux impositions publiques: non sans donner des attaintes aux Princes ses predecesseurs, lesquels par leurs outrageuses despen-
ces, anticipoient sus leur reuenu ordinaire: mais qu'à luy, il quittoit à la Republique six cens Selter-
cium pour chacun an. En ce temps, là par vne mau-
uaise cōstume, quand le iour de la brigue des Ma-
gistrats ou go uernemens des prouinces approchoit,
plusieurs qui n'auoient point d'enfans, faignoient or-
dinairement d'en adopter: & ayans tiré au sort avec
ceux qui estoient *vrayement* peres, pour obtenir les
Preteurs & prouinces, emancipoient tout soudain
ceux qu'ils auoient adoptez. Parquoy ceux qui auoient
des enfans, *engendrez de leurs corps* s'adressent au Senat:
remoustrans avec grande plainte & blasme des au-
tres: que l'on deuoit auoir plus d'esgard au droit de
nature, à la peine de nourrir des enfans, qu'à la frau-
de, ruze & briefueté de ces adoptions. Que ceux qui
n'auoient point d'enfans, deuoient estre contents de
ce que tout à leur aise & sans aucune charge, la faueur,
les honneurs, & toutes autres choses se presentent
à eux. Mais pour leur regard, la longue attente des
choses qui leur estoient promises par les loix, ne ser-
uoit qu'à les faire mocquer: puis que d'aucuns faicts
peres sans soucy, & perdans leurs enfans sans larmes,
esgalloient soudain les tardiues attentes & souhaits,
de ceux qui auoient des enfans. Sur cela fut faict vri-
arrest; par lequel on ordonna, que les faintes ado-
ptions ne seruiroient en aucune maniere, pour par-

XV. LIVRE DES ANNALES

uenir à quelque dignité ne charge publique, non pas mesme, pour receuoir des hereditéz & successions.

Trasea est cause d'ordonner que les Magistrats enuoyez aux Prouinces, ne seroient point remerciez publiquement; Le Gymnase bruslé par le tonnerre: & la ville de Pompeies abbatue par tremblement de terre.

CHAPITRE V.



PRES cela Claude Timarche de Candie, est accusé de tous les cas, desquels sont volontiers chargez les plus riches hommes des prouinces; qui au moyen de leurs grands biens, outragent plus hardiment les petits. Il luy estoit aduenu souuent, dire vne parole poignante grandement l'honneur du Senat. A sçauoir, qu'il estoit en sa puissance, de faire remercier les Proconsuls ayans gouuerné l'Isle de Candie. De laquelle occasion Petus Trasea se seruant pour le bien public: apres qu'il eut esté d'aduis de chasser ce criminel hors la Prouince de Candie: il adiousta ce qui sensuit. L'on cognoist par experience (Peres conscripts) que les belles ordonnances, les honnestes exemples, s'engendrent entre les gens de bien; par la faute des autres. Ainsie desbordement & licence des harangueurs, fit naistre la loy de Cincé: les brigues des pretendans aux estats, les ordonnances des Iules: & l'auarice des Magistrats, l'edict de Calpurnie: car la coulpe va deuant la peine: & l'amendement ensuit la pache.

Pource

Pour ce contre ceste nouuelle outrecuidance des Prouinces, aduifons entre nous quelque moyen, digne de la reputation & vertu Romaine : par lequel nous ne diminuons point la protection & defense que nous auons de noz alliez; & quel l'on perdel'opinion, que pour sçauoir quels nous sommes, il depende du iugement d'autres que de noz citoyens. Iadis l'on enuoyoit non seulement vn Preteur ou Consul, mais des personnes sans estat visiter les Prouinces : pour rapporter ce qui leur sembloit de l'obeissance & fidelité de chacun : de sorte que les peuples trembloient sous le rapport & estime, que faisoit d'eux vn seul homme particulier. Mais à ceste heure nous faisons la cour a des estrangers & les flattons : tellement que tout ainsi le remerciement qui se fait aux gouuerneurs, gist en la volonté de quelqu'vn; aussi l'accusation en est bien plus legerement ordonnee. Arrestons le donc : & par cy apres soit retranchee l'occasion aux Prouinces, de monstrier leur puissance par tel moyen : mais qu'vne fausse loüange, & tiree par brigues & prieres, soit punie ne plus ne moins qu'vne malice, ou qu'vne cruauté. Nous faillons plus souuent voulans estre gracieux qu'en voulant nuire. Voire il y a des vertus haïes : comme vne opiniastre seuerité; vn cueur inuincible contre la faueur & grace. Et de là vient, que les commencemens de noz Magistrats sont presque meilleurs; & qu'à la fin ils se laissent aller : pendant que comme brigueurs de charges & d'offices, nous cherchons les voix & la

XV. LIVRE DES ANNALES

“ faueur du peuple: Ce qu'estant osté, nous gouuer-
 “ nerons les prouinces plus droictement & vertueu-
 “ sement . Car tout, ainsi que l'auarice est rabbatuë
 “ par la crainté d'estre accusé de deniers mal pris: aus-
 “ si en deffendant le remerciement des gouuerneurs;
 “ l'ambition vient par ce moyen à estre pareillement
 “ retenuë. Cest aduis fut loué par vn bien grand con-
 sentement de tous: ce neantmoins il n'en peut estre
 faict vn arrest du Senat, d'autant que les Consuls
 nioient, que ceste matiere eut esté rapportee au Se-
 nat, pour en deliberer. Depuis sous le nom & au-
 thorité du Prince, ils ordonnerent qu'il seroit def-
 fendu, de proposer au conseil des alliez, si falloit
 remercier les Propreteurs & Proconsuls: & qu'au-
 cun n'eut à s'entremettre de telle commission.
 Sous les mesmes Consuls, le Gymnase fut brullé
 d'vn esclat de tonnerre, & l'effigie de Neron estant
 en iceluy tellement fonduë, que le metal reuint en
 masse sans figure. Et vne ville de la campagne de
 Rome appelée Pompeies, assez renommee: fut la
 plus-part renuersee par tremblement de terre . Et
 Lelia vierge Vestale mourut: au lieu de laquelle, fut
 prise Cornelia de la maison des Cosses.

Consulat de Memmius Regul & Virginus Ruffus. Naissance de la fille de Neron & de Poppée. Flatterie du Senat enuers Neron. La mort de ceste fille. Neron renuoye les Ambassadeurs de Parthe, sans rien leur accorder: faisant Corbulon lieutenant general de la guerre: qu'il conuenoit auoir entre eux.

CHAPITRE VI.

Memmius



EMMIUS Regul & Virginus Ruffus estans Consuls: Neron se resiouit outre mesure, pour la naissance d'une fille qu'il eut de Popée, laquelle il appella Auguste: ayant aussi donné le même nom à la mère. Les couches en furent faites en la colonie d'Antium, où Neron avoit semblablement esté engendré. Le Senat avoit ja au paravant, recommandé la portee aux dieux, & fait des vœux publiquement: lesquels furent & multipliez & accompliz. Encores on y adiouta des processions, & un temple à la facondité: & fut ordonné un combat selon la religion Attique: & que des effigies d'or de fortune, fussent mises au throsne de Jupiter Capitolin: & tout ainsi que des jeux du Cirque se faisoient à Bouilles, en l'honneur de la famille des Iules; aussi qu'en pareil l'on en fit à Antium, en l'honneur de celles des Claudes & Domices: ce qui fut de petite duree; estant l'enfant morte dans quatre mois. Cela de rechef donna occasion de nouvelle flatteries, à ceux qui estoient d'avis luy faire honneur comme à une deesse: luy dresser un lit sacré; un temple & un prestre. Quant à Neron, tout ainsi qu'il avoit esté débordé en ioye, aussi se monstra-il desmesuré en tristesse. L'on remarqua qu'estant tout le Senat allé à Antium, incontinent apres la couche de Popée: que l'entree ayant esté refusée à Trafea, il endura (sans aucunement s'estonner) ceste iniure messagere de sa mort prochaine. Et le bruit

XV. LIVRE DES ANNALES

est, que depuis Cesar estant chez Senecque; se vanta qu'il estoit reconcilié avec Trafea: dont Senecque le remercia. Et par ce moyen l'honneur des grans personnages, s'augmentoit peu à peu, quant & quant leurs dangers. Cependant & au commencement du Prin-temps, les Ambassadeurs de Parthe apporterent la declaration & lettres de Vologeses leur Roy: contenans telle substance. Qu'il laissoit là (quant à present) tous les autres droicts & raisons, qui pour le regard de la iouissance d'Armenie, auoient esté si souuent debatues: puis que les dieux iuges & arbitres des peuples (quelques puissans que ils soient) en auoient liuré la possession aux Parthes; non sans la honte & deshonneur des Romains. Que n'aguieres ayant tenu Tigrannes assiégré; & depuis pouuant destruire Petus & les legions, il les auoit laissez aller sauues, sans leur faire aucun mal. Que ayant faict assez grande preuue de sa puissance, il auoit encores monsté par experience sa douceur. Que mesme Tiridates ne refuseroit venir à Rome, pour receuoir le diademe; si vn estat de prestise ne l'eust contrainct demourer. Qu'il iroit deuant les enseignes & effigies de l'Empereur: & là en presence des legions, il commenceroit à entrer en possession de son Royaume. Les lettres de Vologeses estans telles; pour ce que Petus escriuoit autrement, comme si les choses fussent encore entieres: l'on demanda au Centenier venu avec les Ambassadeurs, en quel estat estoit l'Armenie: lequel respondit que tous les Romains en estoient sortiz. Alors Neron cognoissant

cognoissant la mocquerie des Barbares, qui estoient venuz demander ce qu'ils auoient osté de force: consulta avec les principaux de la ville, si estoit bon de hazarder vne guerre douteuse; ou faire paix avecques l'ennemy. Chacun fut d'avis de la guerre. Et Corbulon, qui par tant d'annees cognoissoit les soldats Romains & les ennemis, fut destiné chef & conducteur d'icelle: de crainte de faillir encores vn coup, par l'ignorance de quelque autre: d'autant qu'on se repentoit d'y auoir employé Petus. Ainsi donc ces Ambassadeurs sont renuoyez sans rien accorder; toutesfois avec presens: pour leur donner esperance, que Tiridates ne perdoit ses peines, si venoit en personne faire la mesme requeste. Le gouuernement de Syrie fut donné à Cince: l'armee & appareil de guerre à Corbulon: & d'auantage la quinzième legion, que Marius Celsus amena de Pannonie. Et fut escript aux Tetrarches, Rois, Prefects, Procureurs, & Preteurs gouuernans les Prouinces voisines, qu'ils obeissent aux commandemens de Corbulon: ayant son pouuoir esté augmenté, presque en la mesme maniere que iadis fut celuy que le peuple Romain donna à Pompee, allant faire la guerre aux Corsaires. Et quand Petus (qui craignoit d'estre mal traité) fut de retour; Cesar se contenta seulement de le railler, quasi en semblables paroles. Qu'il luy pardonnait tout à l'heure: de peur qu'estant si aisé à l'estonner, il ne tombast malade qui le tiendrait en plus long esmoy. Or Corbulon ayant enuoyé en Syrie, les quatrième & douzième legions, qui luy sembloient mal propres à la

XV. LIVRE DES ANNALES

guerre; pour auoir perdu les pl⁹ vaillâs de leurs trouppes, & l'effroy de ceux qui restoient : en tira la sixiesme & troisiiesme, pleines de soldats fraiz & accoustumez à plusieurs trauaux & labeurs; desquels ils auoient eu l'honneur: puis les mena en Armenie. Il y adiousta aussi la cinquiesme legion: laquelle se trouuât à l'heure de la bataille au pays de Pont, ne s'estoit sentie de la desconfiture des autres: & quant & quant la quinziiesme; nouuellement arriuee: avec aucunes trouppes de gens de cheual, & enseignes choisies en Illyrie & Ægypte. Toutes les cornettes & cohortes, avec le secours des Rois assemblé en vn à Miletene; ou il deliberoit passer l'Euphrate. Lors ayant faict la reueue de son armee, avec les ceremonies accoustumees: il faict appeller ses soldats pour les prescher. Commençant à haut loüier & magnifier, le bon-heur & gouuernement de l'Empereur; & les beaux faits de soy mesme: se donnant garde de parler de la malheureuse ignorance de Petus. Ce qu'il disoit avec vne grande authorité; laquelle seruoit d'eloquence à ce grand guerrier. Ce faict il prend le chemin que iadis Lucullus trauersa, ouurant & nettoyant les passages qu'un long espace de temps auoit empeschez. Et n'ayant mesprisé les Ambassadeurs, venus de la part de Vologeses & Tiridates pour traiter de la paix; il les renuoya accompagnés de Centeniers, portans des conditions non facheuses ne rigoureuses. Car les choses (disoit il) n'estoient encorés venues à ce point, qu'il fallust vider leur different par vn combat final. Que les Romains auoient eu plusieurs bonnes aduantures; & les Parthes

thes aussi quelques vnes: ce qui deuoit seruir d'en-
 seignement contre les orgueilleux. Partant & c'estoit le
 profit de Tiridates, de recevoir en don le Royaume
 d'Armenie non encores gaste par courses; & Volo-
 geses feroit bien mieux les affaires des Parthes, de-
 mourant amy & allié des Romains, que se mettant
 au danger de perdre aussi tost que gagner. Qu'il sca-
 uoit bien quelles & combien grandes, estoient les
 dissensions du dedans de son Royaume: & comme il
 gouuernoit des nations & peuples farouches & in-
 domptables: Au contraire, que son Empereur auoit
 paix asseuree par tout; sans autre guerre que ceste-cy
 toute seule. Quant & quant il accompagna ce con-
 seil de crainte; chassans de leurs maisons les Megista-
 nes Armeniens, qui les premiers auoient quitté no-
 stre alliance: les chasteaux desquels il rasa; remplissant
 de pareille frayeur la plaine, les monts, les puissans,
 & les foibles. Le nom de Corbulon n'estoit pas hay
 des Barbares; tant s'en faut qu'ils luy voulussent mal
 comme à vn ennemy: & pour ce ils tenoient son con-
 seil pour bon & loyal. Parquoy Vologeses sans se
 monstrier par trop cruel & reuesche au principal; & se
 deffiant d'aucuns*gouuerneurs demanda trefues: &
 Tiridates lieu & iour pour parlementer. Le temps fut
 en brief assigné: & iacoit que les Barbares eussent choi-
 si le lieu, ou n'aguieres ils auoient tenu assiegees les
 legions avec Petus: à cause de la souuenance de la bõ-
 ne aduanture qu'ils y auoient eue; Corbulon ne le re-
 fusa: à fin que la diuersité de la fortune, augmentast
 sa gloire. Car il ne se donnoit peine de l'infamie de

XV. LIVRE DES ANNALES

Petus; comme il apparut euidemment; en ce qu'il cō-
manda à son fils (estant lors Tribun) mener les com-
pagnies enterrer les * corps, de ceux qui estoient de-
mourez en ceste rencontre infortunee.

*Abouchement de Tiridates frere du Roy de Parthe; &
de Corbulon lieutenant general de Neron. Tiridates
vient au camp des Romains, poser le diademe Royal
d'Armenie. Neron donne le droict de bourgeoisie,
aux nations des Alpes voisines de la mer: & separe la
seance des Cheualiers; d'auec celle du peuple, dans le
theatre.*

CHAPITRE VII.



V iour assigné, Tibere Alexandre
tresnoble Cheualier Romain, don-
né à Corbulō pour estre employé
en ceste guerre; & Viuian Annius
gendre du mesme Corbulon (le-
quel n'ayant encore l'aage de pou-
voir estre Senateur, auoit esté faiet comme lieutenant
de la legion cinquiesme) vindrent au camp de Tiri-
dates pour luy faire honneur: & à fin qu'estant asséu-
ré par tels gages, il ne craignit aucunes embusches.
Après cela, vingt hommes de cheual furent pris de
chacun costé. Mais si tost que le Roy vit Corbulon;
il faulta le premier du cheual à terre: & Corbulon ne
tarda guieres apres de faire le semblable. Puis tous
deux estans à pied, ils toucherent en la main l'un de
l'autre. Ce faiet le Romain louë ce ieune Prince, de ce
que laissant les choses mal asséurées & incertaines, il
prenoit

prenoit le meilleur & le plus profitable conseil. Tiridates apres auoir premierement dit, beaucoup de choses de la noblesse de sa maison, poursuuiuit assez modestement le reste de ses propos. Disant qu'il yroit à Rome; & porteroit vne nouuelle gloire à Cesar: lequel pourroit veoir à ses pieds vn de la race des Arsacides, le supplier encores que la puissance des Parthes ne fust affligee d'aucune perte. Lors il fust resolu & arresté ent'reux, que Tiridates poseroit deuant l'image de Cesar, les aornemens Royaux: & qu'il ne les reprendroit que de la main de Neron: finissans leur parlement par vn baiser. Peu de iours apres, il fit beau veoir les deux armées. Car d'un costé estoient les gés de cheual,* rangez par troupes avec les enseignes & marques de leur pays: & d'autre les legions, avec les aigles reluisantes; & les images des dieux, plantees comme dans vn temple. Tout au milieu, vn Tribunal esleué soustenoit vne chaire à chariot: & la chaire l'effigie de Neron. Deuant laquelle Tiridates s'estant approché; apres auoir faict tuer des victimes suiuant la coustume, osta le diademe de sa teste & le mit au dessoubz de l'image: non sans grande esmotion de chacun qui encores se representoit, la desconfiture ou siege des armées Romaines. Mais la fortune estoit maintenant bien changee; car Tiridates deuoit aller seruir de spectacle aux prouinces & nations, ne valant guieres mieux que prisonnier. Corbulon augmenta sa gloire par vne courtoisie; inuitant Tiridates à vn festin: & quand le Roy demandoit les raisons, toutes les fois qu'il aduisoit quelque chose de nou-

XV. LIVRE DES ANNALES

ueau; à ſçauoir le commencement des guets, ſer'apporter par le Centenier: la leuee du banquet ſe faire au ſon de la trompette: & l'amas eſtant deuant l'autel Augural, fallumer avec vne torche. Toutes leſquelles choſes faiſant plus grandes qu'elles n'eſtoient, il remplit *ce Prince eſtranger* d'une admiration, des façons de faire anciennes. Au dernier iour, Tiridates le pria luy donner temps pour aller veoir ſes freres & ſa mere, auant qu'entrer en ſi long voyage. Et ce pendant il baille ſa fille en oſtage, avec de bien humbles lettres eſcrites à Neron. Au partir de là, il trouua Pacuore en Mede, & Vologeſes en Ecbatanes; qui n'eſtoit pas ſans ſoucy de ſon frere. Car il auoit requis Corbulon par meſſagers expres, que Tiridates ne fut contraint endurer aucune choſe ſentant ſon priſonnier. Qu'il ne rendit ſes armes, ou fut empeſché d'embraffer les gouuernemens des Prouinces: ou qu'on ne le fit attēdre à leur porte: & qu'à Rome tel hōneur luy fut porté qu'aux Conſuls. Car il faut entendre que ce Roy accouſtumé à l'orgueil & fanfare * des eſtrangers, ne congnoiſſoit pas bien la maniere de faire de noſtre pays: où l'on faiēt cas de ce qui à la verité maintient l'autorité ſouueraine de l'Empire: & les choſes vaines ſe paſſent legerement. Ceſte meſme année Ceſar accueillit les nations des Alpes maritimes, aux priuileges des Latins: & ordonna que les Cheualiers, auroient place au Cirque auant le peuple: car iuſques à ce iour, ils y ſeioient peſle-melle: & ſans diſtinction: pour ce que la loy Roſcia n'a parlé que des quatorze premiers degrez. L'on fit des combats de Gladiateurs,

auſſi

aussi magnifiques que les precedens: mais il y eut plusieurs yslus de femmes illustres & de Senateurs, des-honorez pour auoir seruy sus l'arene du theatre.

Consulat de C. Lecan. & M. Licin. Neron chante premierement sus l'eschaffaut du theatre de Naples. Cheute d'adiect theatre incontinent apres; sans faire mal à personne. Neron faict accuser Torquat Sillan: & sa mort. Neron faine vouloir faire vn voyage en Egypte: & ses excuses. Bancquet dissolu de Tigellin: & mariage de Neron & Pithagoras.

CHAPITRE VIII.



Lecanius & M. Licin estans Consuls, le desir de iour en iour saugmentoit à Neron, de monter indifferement sus les eschaffaux de toutes Scenes. Car iusques là, il n'auoit chanté qu'en sa maison, ou dans ses iardins aux ieux de ieunesse: lesquels comme peu frequentez, il estimoit trop petits pour ouyr vne telle voix. Toutes fois n'osant commencer son batellage dans Rome, il choisit Naples comme vne ville Grecque. Estimant que ce luy seroit vne entree, pour de là passer en Achaye: ou ayant obtenu les couronnes tant renommes & anciennemēt tenuës pour sacrees, avec telle reputation il seroit enuie à ses citoyens de l'ouyr. Parquoy le commun peuple des villertes fut amassé; ensemble ceux des prochaines colonies & villes, que le bruiet de ces ieux auoit esmeus: & ceux aussi qui suiuent le

XV. LIVRE DES ANNALES

Prince pour luy faire honneur, ou pour autres di-
 vers affaires: mesmes des troupes de gens de guerre
 emplirent le theatre de Naples. En ce lieu il aduint vn
 cas bien triste, ainsi qu'il sembloit à plusieurs; mais
 quant à luy il iugeoit que c'estoit plustost vn aduertif-
 sement, que les dieux fauorables luy enuoyoient. Car
 estant tout le peuple sorty, le theatre vuide de gens,
 cheut sans blesser aucun. A ceste cause remerciant les
 dieux avec chansons composees là dessus, & luy mes-
 me faisant grâd cas & publiât l'aduature de ceste frai-
 che ruine, cōme s'il eut voulu s'acheminier vers le pas-
 sage & destroit de la mer Adriatique, il sarresta cepē-
 dant à Beneuēt: ou Vatini^o dōnoit le plaisir d'vn grâd
 & magnifique cōbat de Gladiateurs. Ce Vatinius fut
 vn des vilains monstres de ceste cour: nourry de ieu-
 nesse en vne boutique de cordonnier: tortu, bossu ser-
 uant de plaisant & bouffon. Qui fut la cause pour-
 quoy au commencement, l'on s'en seruoit pour en ti-
 rer du passetemps: Mais depuis en calomniant tous
 les plus gens de bien, il vint en tel credit, qu'en faueur,
 richesses, ou puissance de mal faire à autrui, il passa
 mesme les plus meschans. Neron se trouuât aux ieux
 que cestuy-cy faisoit faire, on ne laissoit pourtant
 durant ses plaisirs, de commettre des meschancetez.
 Car ces iours là mesmes, Sillan Torquat fut con-
 traint de mourir: pour ce qu'outre la noblesse de la
 maison des Iuniens, il portoit le tiltre de fils d'Au-
 gusto en quatriesme degré. Les accusateurs eurent
 commandement de luy mettre sus, qu'il donnoit
 prodi-

prodiguement le sien : & n'auoit autre esperance. d'y fournir, sinon en remuant l'estat. Aussi qu'il auoit des gentils-hommes, lesquels il appelloit ses secrettaires, maistres de ses requestes, & de ses comptes: qui sont noms d'officiers d'Empereurs, & ou de gens qui n'ont pas de petits desseings. Incontinent les plus priuez affranchiz, furent mis aux fers & enleuez. Mais Torquat se voyant prest à condamner, couppa les veines de ses bras: & Neron tost apres (comme de coustume) remonstra par vne harangue: combien qu'il fut coupable, & eut iuste occasion de ne se fier en ses desseins; toutesfois qu'on l'eut laissé viure, s'il eut attendu la clemence du iuge. Peu apres, ayant quant à present differé le voyage d'Achaye, pour causes incertaines, il reuint en la ville: pensant & repensant à part soy, comme il pourroit aller veoir les prouinces d'Orient; & principalement l'Ægypte. Puis certifiant par edict, que son absence ne seroit longue; & que de là en auant toutes les affaires de la Republicque demouroient en bon estat: Il va au Capitole, prier les dieux luy donner bon voyage. Estant aussi venu, pour mesme occasion au temple de Vesta, & tout soudain vn tremblement l'ayant pris par tous les membres (soit qu'il eut crainte de la diuinité du lieu, ou que la souuenance de ses meschancetez, ne le laissast iamaïs sans frayeur) il quitta son entreprise: disant que toutes ses autres affaires & pées, ne luy estoient rié au pris de l' amour de sa patrie. Qu'il auoit veu les tristes visages,

XV. LIVRE DES ANNALES

des citoyens; & oyoit leurs plaintes secrettes, dequoy il entreprenoit vn si long voyage. Qu'à peine ils pouuoient endurer vn petit esloignement de sa personne, estans accoustumez de se refaire & prendre courage en cas inopinez, par la seule veuë du Prince. A ceste cause, tout ainsi qu'entre les priuees alliances, les plus proches parens sont plus aimez & chers tenuz; ainsi le peuple Romain auoit plus grâde puissance sus luy: & partant il luy falloît obeyr, puis qu'il le retenoit. Telles & semblables paroles, estoient fort agreables au simple populaire; desireux d'auoir ses plaisirs: & (qui est son principal soucy) de crainte qu'en l'absence de l'Empereur, les viures ne fussent plus courts. Quant au Senat & principaux Seigneurs, ils ne scauoient dire s'il seroit plus cruel loing que pres: & puis suiuant le naturel des grandes frayeurs, ils pensoient que ce qui estoit aduenü, fut le pire. Mais luy à fin de faire croire, qu'il n'estoit nulle part plus volontiers qu'en la ville, * il faisoit des banquetts aux lieux publics, & se seruoit de toute la ville comme de sa maison. Or le festin plus renommé pour les excez & bruit qui en couroit, fut celuy de Tigellin: lequel ie veux descrire cōme pour vn patron des autres: à fin qu'il ne me conuienne plusieurs fois redire telles prodigalitez. Ainsi donc il fit ietter dans l'estang d'Agrippe vn radeau, sus lequel le banquet dressé se deuoit mener, estant trainé par d'autres vaisseaux. Les nauires estoient barrees d'or & d'yuoire; la chorme composee de bredaches; assemblez & ordonnez selon l'aage & science de leur vilain mestier. Il auoit
faict

325
 faict apporter des oiseaux & bestes de diuers pays : & des animaux de mer, cherchez mesmes iusques en l'Océan. Sur le bord de l'estang, estoient dressez des cabinets, * remplis de femmes de grande maison : & à l'opposite se voyoient des paillardes publiques toutes nuës. Puis l'on vint aux gestes & mouuemens lascifs : & apres que les ténèbres commencerent à se monstrier, tout le bois voisin & maisons d'alentour, se prirent à ressonner de chants & esclairer de lumieres. Quand est de Neron, ayant esté souillé de paillardises naturelles & contre nature, il n'auoit oublié aucune meschanceté pour se rendre plus corrompu & infame, si peu de iours apres il n'eut receu pour mary vn nommé Pithagore : qui estoit de ceste compagnie de vilains : l'espousant solennellement, suiuant la coustume des autres mariages. Le voile iaune des espousees, couurit la teste de l'Empereur : deux auspices furent enuoyez : le liët de l'espousée appresté : les torches nuptialles allumées : brief l'on veit à descouuert, ce que mesme la nuit cache au mariage d'une femme.

La plus grande partie de la ville de Rome bruslee par fortune, ou malice de Neron. Quels quartiers furent bruslez. CHAPITRE IX.



ELA fut suiuy d'une infortune, laquelle il est incertain si elle aduint par cas d'aduanture ou malice du Prince : par ce qu'il y a des autheurs d'une & d'autre opinion.

XV. LIVRE DES ANNALES

Mais ce fut le plus grief & cruel dommage, de tous ceux que iamais la ville receut par violence de feu. Le commencement apparut en celle partie du Cirque, ioignante aux monts Palatin & Celius: puis quand il s'atacha aux boutiques, ou il y auoit des marchandises lesquelles nourrissent la flamme; le feu n'eut pas si tost commencé, qu'il deuint quant & quant fort puissant; & poussé du vent embrassa toute la lógueur du Cirque. Car il n'y auoit maisons enuironnees de deffences, ou temples clos de murs; ny autre chose quelconque pour l'arrester. Ce feu ayant premiere-ment couru impetueusement par ce qui est plain; puis se leuant à mont; descendant de rechef aual preuint par la soudaineté du mal, les remedes que l'on y eut peu mettre: y estât la ville assez subiecte, au moyé des passages estroits & rues tournees çà & là, sans reigle ne mesure: cōme iadis fut la vieille Rome. Auec cela les plaintes & clameurs des femmes effraies ou des gens imbecilles pour leur grand aage & des petits enfans ignorans: ensemble de ceux qui donnoient ordre à leurs affaires ou à celles d'autrui: pēdant qu'ils traient les foibles & mal aisez de leurs personnes, ou qu'ils les attendent partie arrestez partie se hastans; donnoient empeschement à toutes choses: & souuentesfois en regardant derriere, ils se trouuoient enuironnez & surpris pardeuant & par les costez: ou s'ils s'estoient sauuez en quelques lieux prochains. les voians enflammez ils trouuoient aussi ceux qu'ils croioient plus eloignez, encores empeschez de mesme fortune. A la fin ne sçachans ce qu'ils deuoient

deuoient fuir ne où aller; ils emplissoient les chemins & se couchoient par les champs: aucuns apres la perte de tous leurs biens, encores n'ayans dequoy viure ceste iournee, ou par affection & amour de ceux que ils n'auoient peu recourre, iacoit qu'ils eussent moyen de se sauuer, se perdirent eux mesmes. Et si personne n'osoit empescher ce feu crainte de plusieurs; qui defendoient de l'estaindre: & pour ce aussi qu'il y en auoit d'autres, lesquels tout ouuertement iettoient des torches ardêtes; criâs estre aduoïez de cefaire: soit qu'ils le fissent pour desrobber pl^h hardimēt, ou par cōmâdemēt de quelqu'un. Nerō qui estoit durât ce tēps à Antium, ne vint en la ville iusques à ce q̄ le feu approcha de sa maison, par la q̄lle il auoit ioint & fait tout vn, le palais & les iardīs de Mecenas: ce neâtmoīs le feu ne peut estre arresté que le palais, la maison & tout ce qui estoit à l'entour, ne fussent cōsommez. Toutefois pour donner vn soulagement, au peuple chassé de ses mailōs: il ouurit le chāp de Mars: le sepulchre d'Agrippe: & iusques à ses iardins propres: faisant bastir à la haste des edifices, pour loger le grād nōbre du pauvre peuple. Et furent amenez par eauē, des meubles & vstésilles d'Ostie & des villes voisines: & le pris du bled rauale iusques à trois nummes. Mais nōobstāt q̄ tout cecy se fit en la faueur du peuple, c'estoit pour neāt: car le bruit couroit, q̄ durāt le tēps du feu de la ville, il auoit fait des ieux en sa maison, & representé le sac & de structiō de Troye: comparant les maux presens aux grâdes pertes anciennement aduenues. Finalement le sixiesme iour, le feu s'arresta au bas de la montagne

XV. LIVRE DES ANNALES

des Esquilies: par le moyen d'un tref-grand abbatiss
de maisons que l'on fit au deuant: A fin que la violen-
ce du feu continuel cessast, rencontrant ceste longue
campagne de ruine, & comme vn ciel tout vague. A
peine s'estoit on reuenu de la frayeur, quand le feu re-
commençoit, mais plus foiblement: d'autant qu'il
prist aux plus larges endroits de la ville: & pour ce il
y eut moins de gens perdus: mais plus grand abbatiss
de temples & porches, dressez pour plaisir & beauté.
Le blasme en fut plus grand, d'autant que ce feu sor-
tit des maisons *Æmilianes* appartenans lors à Tigel-
lin: & sembloit que *Nerō* cherchast occasion de vou-
loir bastir vne nouuelle ville, & auoir l'honneur de la
nommer de son nom. Or faut il sçauoir que Rome
est diuisee en quatorze quartiers: dont quatre restoiēt
entiers; trois auoient esté abbatiss iusques à l'aire, &
il estoit demouré aux autres sept, peu de marques d'e-
difices, encores rompuz & demy bruslez. Il ne seroit
pas bien aisé de sçauoir le nombre des maisons sepa-
rees des autres appellees *Isles* *, & des temples qui fu-
rent perdus. Toutesfois les plus renommez pour leur
saincteté ancienne, estoient le temple que *Seruius*
Tullius ediffia en l'honneur de la Lune: le grand autel
& le temple, qu'*Euander* Arcadien dedia à *Hercules*,
quand il le vint veoir en personne: celuy de *Iupiter*
Arresteur, voué par *Romulus*: le Palais Royal de *Numa*:
le temple de *Vesta*, avec les dieux protecteurs du
peuple Romain appelez *Penates* furent bruslez. Et
nonobstant l'excellente beauté de ceste ville qu'on
remettoit sus; les vieillards remarquoient & trou-
moient

uoient à dire, tant de biens acquis par les victoires
anciennes: tant de beaux ouurages Grecs: tant de
chefs d'œuvres des excellens esprits anciens entiers
& parfaits: lesquels ne se pouuoient reparer. Il y
en eut qui noterent, que ce feu auoit pris commen-
cement le dixneuuesme iour de Iuing: qui estoit le
mesme, auquel les Senonois brulerent la ville apres
l'auoir prise. Et les autres furent curieux iusques là, de
conter autant d'annees, mois & iours, entre les deux
feuz*.

*Neron bastit vne tressumptueuse maison dans Rome, &
veut faire cauer vne tranchee, depuis le lac Lucrin,
iusques dans le Tybre. L'ordre qui fut mis, pour le
reestablissement des maisons nouvellement edifiees à
Rome. Neron ayant faict croire, que les Chrestiens
auoient mis le feu en la ville: les fait punir.*

CHAPITRE X.



V surplus Neron se seruit des rui-
nes de sa patrie; & bastit vne mai-
son en laquelle les pierreries &
l'or, ne donnoient pas tant de mer-
ueilles à ceux qui les y voyoient
(estant ja vne chose accoustumee
& vne prodigalité faicte commune) que les champs
& estangs: & comme si c'eut esté en vn pays deshabi-
té, d'un costé des bois & de l'autre vne ouuerture, cō-
me pour vn regard descouurant vn grand pays: ayant
pour ingenieurs & maistres de ses bastimens, Seuer

XV. LIVRE DES ANNALES

& Celer: qui auoient bien l'esprit & l'audace, d'entreprendre par leur art, ce qui sembloit impossible à nature: & se iouer des richesses & moyens du Prince. Car ils auoient promis creuser depuis le lac Auerne, vne tranchee & fosse nauigable iufques dans l'embouchure du Tibre: en la tirant tout le long du riuage plain & desert, ou au trauers des montagnes opposites. Car il n'y a rien d'humide pour engédrer de l'eau, que les marefts Pomprines: le reste sont des falaises, ou lieu secs. Et quand bien ils pourroient estre trauez: c'est vn labeur insupportable & sans occasion suffisante. Ce neâtmoins Neron cōuoiteux de choses incroyables, s'efforça de cauer le sommet des costaux prochains d'Auerne: & y voit on encores au iourd huy, les marques de sa vaine esperance. Quant aux maisons particulieres de la ville, elles ne furent pas dressees çà & là à volonté, comme apres le feu des Gaulois: ains par ordre, selon que les ruës auoient esté alignees par mesure; avec gran de largeur: estant deffendu de leuer les edifices, plus que certaine hauteur. Plus grande estenduë & largeur fut donnee aux aires des maisons: ausquelles aussi on adioustoit des porches, pour couvrir le front de celles qui estoient appellees Isles. Neron promit de faire edifier ces porches à ses despens & rendre les places nettes aux maistres. Outre plus, il donna des recompences selon l'estat & puissance de chacun mesnage: & arresta le temps auquel les maisons & Isles estans basties, ils les deuoient receuoir. Il auoit choisi les palluds d'Ostie, pour receuoir les grauis: ordonnant que les nauires rebourssans le

Tibre pour apporter les bleds à Rome, deualassent en diligence chargees de ces vuidanges: & que les edifices fussent en partie bastis, sans bois: & renforcez de pierre de Gaby ou d'Albe; pour ce que ceste pierre ne peut estre endommagée du feu. Encores à fin que l'eau retenuë & destournée, par l'entreprise d'aucuns particuliers, coulât en plus grande abondance & en plus d'endroits publics; il establit des gardes: & commanda que chacun eut du secours cōmun & à descouuert, pour estaindre le feu: & qu'ils ne fussent enclos de parois, ainsi qu'entre voisins: mais de bastis expressement, pour cela. Ces choses faites pour l'utilité publique, apporterent encore quelque beauté à la nouvelle ville. Toutesfois il y auoit des gens, qui crioient que la vieille forme, auoit esté plus propre pour la santé des habitans. D'autant que les rues & passages estroits, & les hautes maisons ne pouuoient estre si aisément trauesées & eschauffées du Soleil. Que maintenant à cause de ceste largeur tant descouverte, & non deffenduë par aucun ombrage, tout estoit haüy & bruslé d'une plus grande chaleur: & voyla les remedes, dont les hommes s'aduisoient. Apres cela on demanda pardon aux dieux: & furent veus les liures de la Sibille: par l'aduis desquels furēt faites des processions & prieres à Vulcan, Ceres, & Proserpine: & Iunon appaisée par les femmes d'honneur, premieremēt au Capitole; & puis à la prochaine mer. De laquelle ayās puisé de l'eau, le temple & image de ceste deesse furēt arrousez: & les fēmes mariees dresserēt des lits à baqter: & firēt des veilles en l'hōneur des dieux.

XV. LIVRE DES ANNALES

Ce nonobstant il n'y auoit secours humain, ne liberé de Prince ou prieres faictes aux dieux, qui empeschassent le soupçon, que ce feu n'eut esté mis par commandement. A ceste cause Neron voulant ôster du tout ce bruit, en chargea fauement aucunes gens, qu'il fit punir bien griefuement: & lesquels estans hais, la commune appelloit Chrestiens. *L'auteur de ce nom s'appelloit Christ; lequel durant l'Empire de Tibere, fut crucifié par Ponce Pilate Procureur: & combien que lors ceste religion eut esté empeschée de se monstrier; toutesfois elle se renforçoit de rechef: non seulement par la Iudée ou elle auoit pris son origine, mais aussi en la ville de Rome, ou toutes choses arriuent de tous endroits & y sont bien estimees. Ainsi donc ayans premierement esté pris, ceux que confessoient l'estre; & puis à leur denontiation vne grande multitude: ils ne furent pas tant cōuaincus d'auoir mis ce feu, que punis pour la haine que chacun leur portoit. Encores en les executant ou leur faisoit plusieurs mocqueries: les vestans de peaux de bestes, pour les faire mourir déchirez par les chiens: ou ils estoient attachez en croix, ou flambez: & quand le iour failloit, on les brulloit pour seruir de lumiere la nuit. Neron auoit offert ses iardins pour voir ce spectacle: & faisoit faire des ieux du Cirque, estant parmy le peuple vestu en cocher: picquât ou chassant luy mesme les cheuaux qui courroient le pris. Et pour ce iagoit que ces gēs semblaissent meriter punition de mort exemplaire; si auoit on pitié deux: cōme n'estans pas iusticier pour vne publique

que vtilité, ains pour satisfaire à la cruauté d'un seul personnage.

Neron leue des deniers de tous costez, & pille les temples. Perte de plusieurs vaisseaux en mer. Prodiges diuers, & entre autres d'un veau, qui auoit la teste en la cuisse. L'interpretation d'iceluy.

CHAPITRE XI.



E pendant l'Italie fut rauagee d'emprunts & leuee de deniers: les prouinces, peuples, alliez: & villes qu'on appelle franches destruites: & les dieux mesmes ne furent exempts de ce larcin: ayans esté les temples de la ville pilliez, & l'or emporté: que le peuple Romain de tout aage & ancienneté y auoit dédié, en prosperité ou en crainte: par les triomphes & par vœux. Et certes en Asie & Achaye, on ne rauissoit pas seulement les dons & ioyaux des temples, ains aussi les images des dieux: ayans à ceste fin esté enuoyez en ces prouinces Acrat & Second Carinas. L'un affranchy & prest à faire toute telle meschanceté que ce fut: & l'autre instruit en la doctrine Grecque de parole seulement, en effect ne festoit addonné à aucune chose louable. On disoit que Senecque, pour oster le soupçon d'auoir conseillé ce sacrilege, auoit demandé congé d'aller iouer en quelque sienne maison des champs loingtaine. Ce que luy ayant esté refusé, il garda la chambre: faignant d'estre malade de gouttes. Aucuns ont escrit qu'un sien af-

XV. LIVRE DES ANNALES

franchy nommé Cleonic, luy appresta du poison par le commandement de Neron: lequel il euita par l'aduertissement de cest affranchy: ou par crainte que luy mesme en auoit: viuant petitement, mangeant du fruit des champs, & se contentant de l'eau courante, sil estoit pressé de la soif. Environ ce temps des Gladiateurs essayans d'eschapper en la ville de Preneste, furent retenus par les soldats qui les gardoient: comme ja le peuple (qui est desirieux & craintif de choses nouvelles) bruyoit & parloit d'eux, ainsi que de Spartacus: ramenteuans les maux qui anciennement aduindrent. Peu apres furent apportees les nouvelles d'une perte faite sus la mer: non par fortune de guerre (car la paix ne fut onc plus asseuree) mais pour ce que Cesar auoit commandé à l'armee de marine, retourner en Campanie à certain iour, sans excepter les aduantures de la mer. Parquoy les gouuerneurs non obstant qu'elle fust esmeuë de tempeste, partirent de Formies. Et iacoit que le vent d'Affricque leur fut grandement contraire, voulans doubler le cap de Misene, ils sont poussez & heurtez contre les riuages de Cumes; où ils perdirent plusieurs galleres, & presque tous les moindres vaisseaux. Sus la fin de l'annee, il courut vn bruit de prodiges & merueilles, annonçans les maux prests à venir. Les foudres ne furēt onc si violens ne si drus: & apparut vne estoille Comette; que Neron auoit tousiours appaisée, par le sang de quelque personne de marque. Des enfans aussi & autres animaux nouueaux nais ayans deux testes, furent iettez sus le paué en pubie: ou trouuez dans le ventre
des

des bestes, que l'on a de coustume sacrifier estās plaines. Au territoire de plaisance le long du chemin passant, il nasquit vn veau ayant la teste en la cuisse: ce que depuis les Aruspices interpreterent signifier, que il s'apprestoit vn autre chef pour gouverner le monde: toutesfois qu'il ne seroit puissant n'y caché: pour ce que ceste teste estoit comme referree dans le ventre, ou produicte tout contre en telle façon.

Consulat de Sillius Nerua & Atic Vestin. La grande coniuration faicte contre Neron par plusieurs seigneurs de Rome fauorisans L. Pison.

CHAPITRE XII.



PRES cela Sillius Nerua & Atic Vestin entrèrent au Consulat: estant ja commencee & accreuë la coniuration, en laquelle les Senateurs, Cheualiers, soldats, voire les femmes mesmes, s'estoient enrrollez à l'enuy: tant par haine de Neron, que pour la faueur qu'ils portoient à C. Pison. Lequel estant yssu de la maison des Calpurniens, & à cause de la grand noblesse de son pere, alliez de plusieurs & renommes familles; estoit bien fort estimé du peuple: au moyen de sa vertu, ou façons de faire tenans apparence de vertus. Car il employoit son eloquence, à la deffence des citoyens: il estoit liberal à l'endroiçt de ses amis: se monstrant

XV. LIVRE DES ANNALES

aux estrangers & incogneus, de facile accès & doux entretien. Encores d'aduanture, il estoit de belle taille; & de visage agreable: mais il n'auoit la contenance graue, & ne se loucioit de retrancher ses plaisirs: car il se monstroit courtois, magnifique; & mesmes quelquesfois se laissoit emporter au luxe. Ce qui estoit trouué bon de beaucoup de gens, lesquels en vn temps accoustumé à la friandise des vices, ne demandent pas vn Prince tant reserré: ne qui se monstre par trop seuer. Le commencement de la coniuration ne vint point de la conuoitise de Pison: & toutesfois il ne m'est aisé de dire, qui en fut le premier author: ou à l'instance de qui fut remué, ce que tant de gens entreprirent. La braue & constante mort de Subrius Flaue Tribun d'une cohorte Pretoriene: & de Sulpice, Asper Centenier: monstra bien qu'ils estoient des plus affectionnez. Lucain Anneus, & Plautius Lateran nommé Consul, y furent conduits par de bien aspres & viues rancunes. Lucain estoit enflammé pour des causes particulieres: d'autant que Neron empeschoit que ses vers, ne fussent estimez comme ils deuoient; & luy auoit deffendu de les publier: pensant (mais en vain) le pouuoir esgaller. Lateran nommé pour estre Consul, ne le faisoit pour aucune iniure receüe; ains l'amour qu'il portoit à la Republique, le fit compagnon des autres. Quant à Flaue Seuin, & Afranius Quintian (tous deux Senateurs) ils entreprirent de commencer vn si grand fait, contre l'opinion que l'on auoit d'eux. Car Seuin estant perdu en ses dissolutions, menoit pour ceste cause vne vie lache & endor-

endormie. Quintian mal renommé pour auoir abandonné son corps, & diffamé par Neron en des vers mesdisans, cherchoit à venger ses outrages. Ainsi donc, pendant qu'entr'eux ou deuisans avec leurs amis, ils racontent les vices du Prince; que la fin de l'Empire approche, & qu'il falloit eslire quelqu'un pour secourir l'estat qui n'en pouuoit plus, ils tirent de leur party Tullius Seneciô, Seruaire Proculus, Vulcatius Araric, Iules Tigurin, Munatius Gratus, Antoine Natal, Martius Festus Cheualiers Romains. L'un desquels à sçauoir Senecion, ayant esté des plus priuez & familiers de Neron, & retenât encores l'ombre de ceste amitié se trouuoit d'autant plus enuironnée de grand hazard. Quant à Natal il estoit participant de tous les secrets de Pison: les autres esperoient de profiter par la mutation. Outre Subrius & Sulpice (dont j'ay fait mention) & à fin de se renforcer, de gens de guerre furent associez, Granus Siluain, & Stace Proxime Tribuns de cohortes Pretoriennes: & aussi Maxime Scaurus, & Venet Paul Centeniers. Mais il sembloit que la principale force fut en la personne de Fenius Ruffus Prefect: lequel nonobstant sa bonne vie & renommee digne de louange, Tigellin par sa cruauté & impudicité, surmontoit en faueur & amitié aupres du Prince, & le molestoit le chargeant de faux crimes: l'ayant mis souuent en des frayeurs; comme s'il eut esté l'adultere d'Agripine & que la regrettant, il espiait soigneusement les moyes de la venger. Ainsi donc, apres que les coniurez furent asseurez, que le Prefect du Pretoire estoit aussi de

XV. LIVRE DES ANNALES

la partie, pout en auoir plusieurs fois deuifé auecques luy; ils confultoient plus hardiment du temps & lieu du meurdre. On difoit qu'il vint premierement en fantafie à Subrius Flaue, d'affaillir Neron chantant fus l'efchaffaut: ou quand le feu brufant fa maifon, il couroit la nuit çà & là fans garde. D'vn costé l'aduantage de le trouuer feul, & de l'autre la grande afsemblée du peuple qui feroit telmoing de fi braue acte, auoient point le cueur de ce gentil personnage: si le defir de se sauuer, (toufiours contraire à grandes entreprifes) ne l'eut retenu. Ce pendant qu'ils attendent & different leur crainte ou efperance, vne certaine femme nommee Epichare, on ne fçait comment aduertie (car iufques là elle ne s'estoit fouciee de chose qui fut honnefte) enflamme & blasme les coniurez: finalement ennuyee de leur longueur, & se trouuant lors en Campanie, effaya desbaucher les principaux de l'armee de mer eftant à Misene; & les faire consentir à la coniuration: y procedant par vn tel commencement. Il y auoit en ceste armee vn Capitaine de mil hommes nommé Volufius Proculus iadis employé auec d'autres pour meurdrir la mere de Neron: & lequel veu la grandeur de l'acte, ne croyoit pas auoir eſté aduancé comme il f'attendoit. Cestuy cy cognoiffant de longue main ceste femme, ou que possible leur amitié fut nouuelle, en luy decouurant les feruices par luy faits à Neron: comme il en estoit froidement recompensé: & adioustât des plaintes & qu'il auoit delibéré de s'en venger, si le

moyen

moyen se presentoit; donna esperance à Epichare de le pouuoir pousser au party: & par son moyen attirer beaucoup d'autres. Que ce n'estoit peu de support que celuy de l'armée de mer; & ouuriroit plusieurs occasions: d'autant que Neron prenoit grand plaisir, de se trouuer bien souuent sus la mer de Pousol & Misene. A ceste cause Epicare luy en dit encores d'auantage: & raconte toutes les meschancerez du Prince. Qu'il ne falloit s'attendre au Senat denué de force; mais que l'on auoit pourueu comme il pourroit estre chastié, du degast par luy fait en la Republique. Qu'il s'apprestast seulement & mit la main à l'œuvre, essayant de tirer de la partie les plus vaillans d'entre les soldats & se tint assuré d'auoir bon loyer. Mais elle ne luy voulut nommer les coniurez; ce qui fut cause que la denonciation de Proculus ne seruit de rien: iacq̃oit qu'il eut rapporté à Neron tout ce qu'il auoit ouy. Car Epichare appelée & confrontee au denonciateur, le rendit aisément confus; d'autant que il n'auoit aucun tesmoing. Ce nonobstant elle fut retenuë en prison: pour ce que Neron se doutoit que les choses n'estoient point fausses, encores qu'on ne les peut verifier. Toutesfois les coniurez craignans d'estre trahis, resolurent de haster le meurdre & l'exécuter à Baïes, dans la maison de Plaisance que Pison y auoit: la beauté de laquelle estant agreable à Cesar, il y venoit souuent sejourner & banquetter, sans garde, & laissant toutes ses grandeurs. Mais Pison ne le voulut point

XV. LIVRE DES ANNALES

accorder, sous couleur que ce luy seroit trop grand reproche, si la sainteté de la table & les dieux d'hospitalité, estoient ensanglantez du meurdre d'un Prince, quel qu'il peut estre. Qu'ils le feroient mieux en la ville, dans ceste maison haïe & bastie des despouilles des citoyens: ou bien ils executeroient en public, ce qu'ils entreprenoient pour le bien de la Republicque: voila ce qu'il disoit en l'assemblée des coniurateurs. Au reste il craignoit en son cueur, que L. Silan tresnoble homme, instruit en la discipline de C. Cassius qui l'auoit nourry & esleué à toute grandeur, n'enuahist l'Empire: & auquel se fussent ioints bien aisément, ceux qui ne sçauoient rien de la coniuration: ou qui eussent eu pitié de Neron, comme ayant esté meschamment occis. Plusieurs aussi ont creu, que Pison n'auoit peu s'asseurer en l'esprit remuant de Vestin Consul, craignant qu'il ne voulut remettre sus la liberté: ou bien qu'estant par luy choisi quelque autre pour estre Empereur, il ne luy voulut faire un present de la Republicque. * Car il ne sçauoit rien de la coniuration: combien que Neron pour saouler la rancune qu'il luy portoit de longue main, le chargea de ce fait: duquel ce neantmoins il estoit innocent. Finalement ils arresterent, que le iour auquel les ieux du Cirque se font en l'honneur de Ceres. Ils executeroient leur dessein, pour ce que Cesar ne sortât guerres lors, & enfermé en sa maison ou dās ses iardins, venoit volontiers veoir les ieux du Cirque: & il estoit plus aisé de l'aborder, à cause de ces passetemps ioyeux.

Ordre

*Ordre de la coniuration. Comme elle fut descouuerte par
 Millich affranchy de Seuin. La constance de Epi-
 chare, & lascheté d'aucuns seigneurs participans de la
 coniuration.* CHAPITRE XIII.



LS auoient dressé l'ordre de leur em-
 busche en telle façon. Lateran com-
 me voulant presenter vne requeste
 pour subuenir à la necessité de sa
 maison, se iettant aux pieds du Prin-
 ce & l'ayât embrassé par les genoux,
 le deuoit renuerfer à terre sans qu'il
 sen donnast garde: le tenant ferme pour ce qu'il e-
 stoit courageux & grand de corps. Ce fait les Tri-
 buns, Centeniers & autres, selon qu'ils se trouueroiét
 auoir plus de hardiesse, accourans le deuoient tuer
 ainsi ietté par terre & empesché. Seuin en deman-
 doit instamment la principale charge: lequel à ceste
 fin, auoit pris vn poignard dans le temple de Salut qui
 est en Toscanes: ou comme les autres disent, il l'auoit
 destaché du temple de Fortune, en la ville de Ferente:
 & le portoit comme dédié pour faire vn grand chef
 d'œuvre. Cependant Pison attendroit au temple de
 Ceres: duquel lieu ayant esté appellé, Fenius
 Prefect & les autres, le deuoient porter dans la
 garnison, accompagné d'Antonie fille de Claude Ce-
 sar, pour gaigner la faueur du populaire ainsi que dit
 C. Pline. Or cecy ayant esté laissé par escrit en quel-
 que sorte que ce soit, n'a peu estre celé par nous: com-
 bien qu'il semblast bien hors d'apparence, ou qu'An-

XV. LIVRE DES ANNALES

tonie eut voulu prester son nom & se mettre en danger pour l'amour de luy: ou Pison (que chacun cognoissoit aimer bien fort sa femme) s'obliger à vn autre mariage: si ce n'est quel'on vueille dire, que l'affection de regner est plus ardente que toutes autres passions. Mais c'est chose merueilleuse, comme entre tant de gens de diuerses qualitez, estats, aages & sexes; riches ou pauures; tant peut estre tenu secret: iusques à ce qu'ils furent trahis par vn de la maison de Seuin. Lequel le iour de deuant l'embusche, ayant longuement parlé avec Antoine Natal: depuis retournât en sa maison scella son testament. Et ayant tiré du fourreau le poignard dôt i'ay parlé, se plaignant qu'il estoit moulsé de vieillesse, cōmāda de luy faire la pointe plus aiguë, & le rendre plus luisant le fourbissant avec vne pierre. Ceste charge fut par luy donnée à son affranchy nommé Millich: il fait aussi vn festin plus grand & somptueux que de coustume: donnant liberté aux esclaves qu'il aimoit le mieux: & de l'argent aux autres. Quant à luy il estoit triste, & monstrois euidemment qu'il auoit quelque grande pensée en son esprit. Encores que par ses propos mal liez & continuez, il feignit d'estre ioyeux. Finalement il aduertit ce Millich apprestre des bādes & autres choses necessaires pour arrester le sang: soit qu'il sceut la coniuration, & eut iusques là esté fidelle: ou bien que n'en sçachant rien il s'en fut lors apperceu: & iugeast ce qui en estoit par les consequences: ainsi que la plus part ont escrit. Car quand cest esclau vint à considerer diligemment en son esprit, la recompence de sa trahison:

trahison: & qu'il se fut quand & quand représenté devant les yeux, les grands biens, les richesses, & la faveur qu'il auroit: la raison, la vie de son maistre, & la memoire de son affranchissement, furent bien tost mis arriere. Et encores (qui estoit pis) il auoit pris conseil de sa femme: laquelle luy faisoit d'elle mesme plus grande frayeur, disant que plusieurs affranchiz & esclaves auoient esté presens & veu les mesmes choses. Que le silence d'un seul ne seruiroit de rien: mais la recompence en demoureroit à celuy, qui preuenant les autres feroit la denonciation. Ainsi donc Millich dès le point du iour s'en va aux iardins Seruiliens: & ayant esté repoussé de l'entree; pour ce qu'il dict par plusieurs fois qu'il apportoit de grandes & estranges nouuelles, les portiers le menerent à un affranchy de Neron nommé Epafrodit & de là incontinent vers l'Empereur: auquel il declare le peril eminent; les griefues coniurations; & tout le reste qu'il auoit entendu coniecturé & imaginé. Il monstra aussi le glaive preparé pour le tuer: demandant que l'on fit appeller le criminel. Seuin ayant esté enleué par les soldats, & entrant en ses deffences, respondit que ce poignard à luy représenté, ayant dés long temps esté curieusement gardé par son pere dans sa chambre, luy auoit esté malicieusement desrobé par son affranchy. Que bien souuét & sans regarder à quels iours, il auoit scellé son testament: comme aussi donné liberté & de l'argent à ses esclaves: & à ceste heure là plus largement, pour ce que son bien estant amoindry & se trouuant pressé de ses creanciers, il se deffioit n'auoir

XV. LIVRE DES ANNALES

pas assez d'autres moyens pour accomplir son testament. Qu'à la verité il auoit tousiours fait bonne chere & mené ioyeuse vie, plus que des hommes rigoureux n'eussent estimé estre raisonnable, & ne se trouueroit qu'il eut commandé de faire prouision, d'appareils & remedes pour des playes: mais pour ce qu'il apparoissoit que les choses susdites estoient friuoles & vaines, il auoit semblé à Millich d'y adiouster ce crime: & d'en estre luy seul le denonciateur & telmoing. Quand & quand il accompagne les deffences d'une grande assurance. Il reproche hardiment à son affranchy, qu'il estoit indigne d'estre ouy en tesmoignage & vn meschant. Disant cela avec vne telle assurance de visage & de parole, qu'il alloit renuerser ceste denonciation, si la femme de Millich n'eut aduertie son mary, qu'Antonie Natal auoit long temps & en secret, parlé avec Seuin: & que l'un & l'autre, estoient fort amis & familiers de C. Pison. A ceste cause Natal est appellé: & tous deux interrogés à part quels propos & dequoy ils auoient diuisé ensemble. Lors on eut suspicion contr'eux, pour ce qu'ils ne s'accordoient en leurs responce: & furent mis aux fers. Ils ne peurent endurer seulement la presentation & menaces de la question. Toutesfois Natal fut le premier qui parla, comme celuy qui sçauoit mieux toute la coniuration: & pouuoit plus viuement conuaincre les accusez: confessant premierement le faict de Pison, puis il adiousta Anneus Senecque: soit qu'il eut esté porteur des paroles qui alloient entre luy & Pison, ou pour acquerir faueur de Neron: lequel estoit ennemy

ennemy de Seneque, cherchoit tous les moyens de l'aceabler. Lors Seuin cognoissant comme Natal auoit declaré le fait, & possible croyant que tout fut descouuert; ou bien voyât qu'il n'y auoit aucun profit à le taire: nomma par mesme imbecilité que Natal, le reste des autres. Entre lesquels Lucain, Quintian & Senecion, longuement nierent la coniuration: mais depuis ayans esté gaignez par promesse d'impunité, pour excuser leur tardieue confession, Lucain nōma Acilie sa propre mere: & Quintian Gilicius Gallus: Senecion Annius Pollion, leurs principaux amis. Ce pendant Neron se souuenât qu'Epichare estoit en prison, sus la denontiation de Volusius Proculus; estimant que le corps d'une femme ne pourroit resister à vne douleur; commanda la deschirer en la question. Ce neantmoins ne batures, ne feux, ny le despit memes qu'auoient ceux qui la gehennoient plus aigrement (à fin qu'il ne fût dit qu'une femme les eut surmontez) ne peurent tant gaigner sus elle, qu'elle ne perseuerast en ses denegations. Auec telle constance elle mesprisa la question du premier iour: mais celuy d'apres, comme on la remenoit portee dans vne chaire, pour luy faire endurer les mesmes douleurs (car estans ses membres desmis elle ne se pouuoit soustenir) ayant attaché à l'arc ou bras de la chaire, vne bandelette tiree de son sein nouee en las coulant, elle passa le chignon du col dedans: & s'efforçant tant qu'elle peut; auec la pesanteur de son corps, elle fit sortir ce peu de vie qui luy restoit. Qui fut vn exemple d'autant plus remarquable, qu'on voyoit vne femme nec

XV. LIVRE DES ANNALES

d'affranchiz , pressée de si griefues douleurs & necessitez, sauuer & deffendre des estrangers à elle presque incogneuz : en temps que des nobles, voire des hommes, des Cheualiers Romains & des Senateurs sans auoir souffert la gehenne, deceloient & nommoient, les plus chers parens & amis qu'ils eussent. Car Lucain mesme, & Senecion, & Quintian, ne cessoient de nommer indifferemment leurs compagnons. Ce qui de plus en plus effrayoit Neron: iaçoit qu'il eut enuironné sa personne de guets sus guets, & garde sus garde. Encores ayant fait saisir par des Manipules *, les murs de Rome, la mer & la riuere; il mit ceste ville quasi comme en captiuité. Et voyoit on courir par les Fors & maisons, les champs aussi & villes prochaines, des gens de pied & de cheual, meslez parmy des Germains: ausquels le Prince se fioit d'auantage, pource qu'ils estoient estrangers.

Continuation des procedures contre les defferez. Pison ne veut prendre les armes, nonobstant les remonstrances qui luy sont faictes.

La mort dudit Pison, de Latoran nommé Consul: de Senecque: & la constance d'iceluy.

CHAPITRE XIII.

Deslors



ESLORS EN AVANT destroup-
pes d'hommes iointes les vnes aux
autres estoient trainees , & les
voyoit on couchez à l'entree des
iardins. Puis quand ils estoient ap-
pellez pour respondre , l'on se res-
iouyssoit si de fortune les coniuerez auoient Parlé en-
semble , ou festoient rencontrez quelque part.

S'ils auoient banqueté , s'ils auoient regardé les ieux
en mesme compagnie, c'estoit vne charge contr'eux:
veu que par dessus les cruels interrogatoires que fai-
soient Neron & Tigellin, Fenius Ruffus (non en-
cores accusé par les denonciateurs) se môstroit cruel:
pressant violemment ses compagnons , pour faire
croire qu'il ne sçauoit rien du fait. Encores luy mes-
me , comme Subrius Flaue là present , luy feit si-
gne de la teste s'il desgaineroit , & durant ces pro-
cedures il feroit le coup: le mesme Ruffus le retint,
& rompit l'ardeur de cest homme qui portoit des-
ia la main sus son espee. Il s'en trouua qui voyans la
coniuration descouuerte, pendant que l'on attend
la denonciation de Millich, pendant que Seuin est
en bransle de confesser; encouragerent Pison d'aller
au fort des gardes: ou monter au lieu des esperons de
nauires appelez Rostres; & essayer de gagner la fa-
ueur des gens de guerre & du peuple. Dilans que si
pour aider à son entreprise, ceux de sa ligue se met-
toient ensemble; il y en auroit aussi d'autres qui
se viendroient ioindre à eux , encores qu'ils ne fus-
sent de la coniuration: & que le bruit de grands

XV. LIVRE DES ANNALES

remuemens, seruoit beaucoup en nouuelles entre-
prises. Que Neron ne s'estoit pourueu d'aucun reme-
de à l'encontre: & que mesmes les vaillans hommes
f'estonnoient en choses soudaines: tant s'en faut que
ce bateleur *, encores accompagné de Tigëllin avec
ses concubines, eut la hardiesse de prendre les armes
contre luy. Que beaucoup de choses se font en les
hazardant, qui semblent difficiles à des hommes las-
ches: & s'abusioient d'esperer que le silence & la foy,
se peussent conseruer és esprits & corps de si grand
nombre de gens qui sçauoient son fait. Que toutes
choses estoient forcees & descouuertes par tourmens
ou dons: Et viendroient incontinent des gens qui le
mettroient luy mesme aux fers: & finalement luy fe-
roient endurer vne honteuse mort. Combien mour-
roit il plus honorablement, embrassant le fait & la
deffence de la Republique; appellant secours de tou-
tes parts en faueur de la liberté? Encores que le soldat
ne luy assiste pas*; & que le peuple l'habandonne? pē-
dant qu'il monstre à ses predecesseurs, qu'il monstre
à ses successeurs, quand bien il y lairroit la vie, que tel
le mort est à priser? Il ne s'esmeut pour tout cela: mais
s'estant monstre quelque peu dehors en public, de-
puis reserré en sa maison, il se resolut contre la mort.
Iusques à ce qu'il arriua vne troupe de gens de guer-
re, choisis par Neron entre les nouueaux soldats, ou
ceux qui n'auoient encores guieres receu de payes.
Car on se deffioit des vicils gens d'armes comme estās
ia pratiquez. Il mourut s'estant fait ouurir les veines
des bras: & emplit son testament de vilaines flateries
à l'en-

à l'endroit de Neron, ce qu'il fit en faueur & pour l'amour de sa femme: laquelle n'estant pas de maison pareille * & seulement estimee pour sa beauté: il auoit ostee à vn sien amy qui l'auoit espousee au precedent. Elle s'appelloit Arie Galla, & son premier mary Domice Silius: la patience duquel & impudicité de sa femme, furent cause de faire parler beaucoup de gens au deshonneur de Pison. Le premier que Neron fit mourir apres, fut Plaute Lateran nommé Consul: si soudain qu'il n'eut loisir d'embrasser ses enfans, ny mesme vn bref temps pour choisir la mort. Car ayant esté emporté au lieu reserué pour l'exécution des esclaves, il fut tué de la main d'un Capitaine nommé Stace: se monstrant estrangement constant à ne rien dire: & ne reprochant pas au Capitaine, que luy mesme estoit de l'entreprise. Apres s'ensuiuit le meurdre d'Anneus Senecque, tres-aggreable au Prince: non pour ce qu'il l'eust conuaincu manifestement d'estre de la coniuration, ains à fin qu'il eut moyen de s'en despescher avec le glaue, puis qu'il ne l'auoit peu faire avec le poison. Car Natal seul ne dit autre chose de luy; sinon qu'il auoit esté enuoyé vers Senecque malade, le visiter & se plaindre, pourquoy il ne trouuoit bon que Pison l'allast veoir, & qu'il vouloit mieux entretenir leur amitié, hantant familièrement ensemble: mais que Senecque auoit fait responce, que leur deuis & frequentation, n'estoient viles pour l'un ny pour l'autre: au demourant que sa vie dependoit de celle de Pison. Grauius Siluan Tribun d'une cohorte du pretoire, eut charge d'aller vers Senecque, sçauoir

XV. LIVRE DES ANNALES

fil recognoistroit auoir dit les paroles de Natal: & la
 responce qu'il luy fit lors. Senecque par fortune , ou
 tout à escient , estoit retourné celle iournee de Cam-
 panie: & arresté en vne sienne maison champestre, es-
 loignée de la ville quatre mil . Le Tribun arriua là sus
 le vespre : & les soldats environnerent la maison . Ce
 fait, comme Senecque souppoit , avec Pompee Pau-
 line sa femme & deux de ses amis; le Centenier luy
 vint declarer la charge qu'il auoit de l'Empereur.
 Senecque respondit que Natal auoit esté enuoyé vers
 luy : lequel se plaignit au nom de Pison , de ce qu'il
 l'empeschoit de le venir veoir: & quant à luy qu'il se-
 stoit excusé, tant à cause de sa maladie, que pour de-
 mourer en repos. Qu'il n'auoit point d'occasion, d'e-
 stimer d'auantage l'asseurance de la vie d'un homme
 priué, que la sienne propre . Et que de son naturel il
 n'estoit enclin à flaterie: & que personne ne le sçauoit
 mieux que Neron, lequel auoit plus souuent esprou-
 ué la liberté de Senecque, que son obeissance seruile.
 Quand le Tribun eut fait ce rapport à Neron; en pre-
 sence de Popee & Tigellin (qui estoient les secrets
 conseillers du Prince en ses cruautéz) il demanda si Se-
 necque faisoit point contenance de se donner la mort.
 Le Capitaine l'assura qu'il n'auoit apperceu aucun si-
 gne de crainte; ne rien de triste en ses paroles ny en
 son visage. A ceste cause il luy commanda retourner:
 & enioindre à Senecque de mourir. Fabius Rustic a
 escrit, que le Capitaine ne retourna pas le chemin que
 il estoit venu, ains se destourna chez Fenius Prefect:
 auquel apres auoir déclaré le commandement de Ce-
 sar,

DE P. CORNIL. TACIT. 141

Tar, il demanda fil luy obeiroit. Lequel par vne fatale lascheté de tous tant qu'ils estoient; l'admonesta d'executer sa commission: car Siluan estoit aussi l'un des coniurez, & tenoit la main à augmenter les meschancetez, desquelles il auoit consenty la punition. Toutesfois il ne voulut y employer sa voix, ny sa presence: faisant entrer en la maison de Senecque vn des Centeniers, pour luy declarer que par nécessité il luy conuenoit mourir. Senecque s'asfestonner, demanda les tablettes esquelles estoit escrit son testament: ce que luy ayant esté refusé par le Centenier; en se tournant vers ses amis il protesta, puis qu'il estoit gardé de recongnoistre leurs merites, qu'il leur laissoit la seule chose (& toutes-fois la plus belle) qui fut encores sienne: à sçauoir l'image & exemple de sa vie: de laquelle fils auoient souuenance, ils emporteroient vne loüable reputation de gens de bien & vertueux, pour vn digne loyer de si constante amitié. Semblablement il essaya de retenir leurs larmes: tantost par douces paroles, tantost avec plus de vehemence & comme les voulant reprendre, il les encourageoit à se monstrier fermes & constans. Leur demandant où estoient les preceptes de Philosophie; où estoit cette resolution prattiquée par tant d'annees contre les accidens? Car qui ne cognoissoit la cruauté de Neron? & qu'apres auoir occis son frere & sa mere, il ne luy restoit plus qu'adiouter le meurdre de son precepteur? Apres qu'il eut discouru telles ou semblables paroles, deuant tous & comme en general:

XV. LIVRE DES ANNALES

il embrassa sa femme: & l'ayant vn peu asseuree cōtre la presente frayeur, il la pria & supplia de moderer sa douleur; & ne la retenir pour tousiours: ains en contemplant & se souuenant de sa vie passée vertueusement, qu'elle portast patiemment & auec honnestes consolations, le regret qu'elle auoit de son mary. Elle au contraire, luy asseure qu'elle a aussi deliberé de mourir: & demande quelqu'vn pour la frapper. Lors Senecque ne voulant empescher son honneur: & qui touche d'amour, estoit contēt ne laisser à la mercy & danger d'autrui, celle qu'il auoit yniquement aimee; ie vous auois monstre & proposé (dit-il) les douceurs de la vie: mais vous aimez mieux vne mort honorable: quant à moy ie ne seray point marry, que m'en monstriez le chemin *. Soit donc la constance d'vne si vaillante mort que la nostre, pareille entre nous deux: ce neantmoins la fin de vostre vie sera bien plus glorieuse & renommee. Apres cela ils tranchent les veines de leurs bras en mesme temps. Mais Senecque, pour ce que son corps vieil & attenué, pour le peu de viande, ne iettoit le sang que peu à peu; se fit aussi couper les veines des iambes & iarrets. Puis lassé de ce cruel bourrelage, craignant que ses douleurs ne fissent faillir le cueur à sa femme; ou que luy mesme ne tombast en impatience, voyant les tourmens qu'elle enduroit; il luy persuade de se retirer en vne autre chambre. Et encores ayant iusques au dernier mouuement, l'eloquence & parole à commandement; il fit venir des gens auxquels il dicta

dicta beaucoup de choses : lesquelles ayans esté publiques en mesmes paroles que celles qu'il prononça, ie me deporté de tourner en autres termes. Or Néron ne portant aucune haine particuliere à Pauline; & de crainte d'augmenter le blasme de sa cruauté: commanda empêcher sa mort. Parquoy ses esclaves & affranchiz, admonnestez par les soldats mesmes, luy bandent les bras, & arrestent le sang: estant incertain si elle en sçauoit quelque chose. Car comme il s'en trouue tousiours entre le peuple, qui interpretent les choses au pis; il n'y eut faute de gens qui eurent opinion; que tant qu'elle craignit le courroux de Néron, elle desira bien auoir le bruit d'estre compagne de la mort de son mary. Mais que depuis s'estant présentée vne plus douce esperance, elle se laissa vaincre aux flatteries de la vie: à laquelle elle adiousta quelques années, avec loüable memoire; & regret de son mary: ayant le visage & les membres si passés, qu'il apparoissoit bien qu'elle auoit beaucoup vuidé de sa force & vigueur naturelle. Ce pendant Seneque voyant que sa mort trainoit en longueur, pria Stace Anneus qu'il estimoit beaucoup pour sa fidelle amitié, entretenuë de longue main, & son art de medecine; luy apporter du poison pareil à celuy; qu'on garde par ordonnance publique en Athenes, pour faire mourir les criminels: dont il auoit dés long réps faict prouision. Lequel luy ayant esté baillé, il aualla sans effect: estans ja ses membres froids & son corps fermé contre la force du poison. Finalement il entre dans vne cuue d'eau chaude; de laquelle en arreu-

XV. LIVRE DES ANNALES

sant ses esclaves qui se trouuerent aupres, il adiousta qu'il offroit ceste liqueur à Iupiter deliureur.

Depuis estant porté dans vne estuue, & ayant pour la chaleur d'icelle rendu l'esprit: son corps fut brulé sans aucune solennité d'obseques. Il l'auoit ainsi escrit en son codicille, faict dès lors mesmes qu'estant tres riche & fauorisé, il aduisoit à ordonner de sa derniere volonté. Le bruit fut que Subrius Flaue auoit secrettement deliberé avec les Centeniers (non toutes fois sans le sceu de Senecque) qu'apres auoir occis Neron par le moyen de Pison, ils tueroient Pison luy mesme; à fin de donner l'Empire à Senecque: comme à vn homme de bien, seulement esleu & choisi à telle grandeur, pour la renommee de ses vertus. Encores faisoit on courir vne rencontre plaisante de Flaue: à sçauoir que la honte *publicque* n'amoindrissoit, si vn toucheur de cistre estoit chassé, pour faire entrer apres luy vn ioüeur de Tragedie. Car tout ainsi que Neron chantoit avec le cistre, aussi faisoit Pison en habit Tragic.

Punition des gens de guerre qui se trouuerent de la coniuuration. Mort de Feniùs Ruffus Prefect du Pretoire. Constance de Flaue Subrius, & Sulpice Affer: & la sage responce qu'ils firent à Neron. Mort de Vestin Consul, encores qu'il ne fut de l'entreprise.



V DEMEVRANT, la conspiration des gens de guerre ne sceut estre d'auantage tenue secrette, l'estans eschauffez ceux qui auoient decouuert la trahison, pour accuser Fenius Ruffus: lequel ils ne pouuoient endurer estre luy mesme coupable, & neantmoins faire le proces aux autres. Ainsi donc comme il les pressoit & menassoit; Sceuin en souzriant * luy dit, qu'il n'y auoit aucun qui en sceut tant que luy: & l'admonnesta hardiment, de ne se monstrer ingrat à l'endroit d'un si bon Prince. Fenius ne sceut à cela ne respondre ne se taire; mais entreuefchant ses paroles, & monstrant manifestement la crainte qu'il auoit; avec ce que tous les autres & principalement Seruaire Proculus Cheualier, s'efforçoient de le conuaincre; il fut du commandement de l'Empeur, empoigné & lié par un soldat nommé Cassius: là present, à cause qu'il estoit tresfort & robuste de corps. Incontinent apres Flaue Subrius Tribun, est accusé & accablé par eux. Lequel du commencement allegoit pour ses defences, sa vie dissemblable: & n'y auoir apparence que luy maniant les armes, eut voulu faire ses compagnons en vne si haute entreprise, des gens desarmez & effeminez. Mais quant il fut pressé; voulant auoir l'honneur de cōfesser la verité: & interrogé par Neró pour quelle cause il auoit oublié le sermēt qu'il luy deuoit: ie te haïssoy, (dit-il) & neantmoins tu n'eus iamais vn

XV. LIVRE DES ANNALES

• plus fidelle gendarme que moy, tant que tu meri-
 • tas d'estre aymé. Je cōmécé à te haïr, depuis q̄ tu de-
 • uins parricide, de ta mere & de ta fēme, cocher, ba-
 • tellieur, * & brusleur de maisōs. I'ay voulu rapporter
 les mesmes paroles; pource qu'elles n'estoienr cō-
 munes comme celles de Seneque: & qu'il n'estoit
 moins beau, de cognoistre ce que cest homme de
 guerre auoit dit lourdement: mais avec vn tref-
 grand iugement & sens naturel. Il est certain qu'en
 toute la coniuration, il ne fut dit chose qui offen-
 sast tant les oreilles de Neron. Lequel tout ainsi
 qu'il estoit prompt à commettre des meschance-
 tez, n'auoit aussi accoustumé de se les ouyr repro-
 cher. La charge de punir Flaue fut donnee à Veian
 Niger. Cestuy-cy commanda creuser vne fosse, au
 champ le plus prochain: laquelle Flaue ayant blas-
 mee pour n'estre assez longue ne large: se tournant
 deuers les soldats qui estoient pres de luy, cela (dit-
 • il) n'est pas fait selon l'vsage & discipline de la guer-
 • re. Encore estant admonesté d'estendre le col har-
 diment: ie voudrois (dit-il) que tu frappasses aussi
 asseurement. Mais l'autre tremblant bien fort, &
 luy ayant à grand peine, en deux coups tranchee la
 teste; se vanta de telle cruauté deuant Neron: disant
 qu'il l'auoit tué d'un coup & demy. Celuy qui se
 monstra le plus constant apres, fut Sulpice Affer
 Centenier. Lequel interrogé par Neron, Pourquoy
 il auoit conspiré à sa mort; respondit en peu de pa-
 • roles: qu'il n'y auoit autre moyen, de pouruoir à
 • tant de meschancetez que les siennes: lors il se pre-
 senta

fenta à la peine à laquelle il auoit esté condamné. Le reste des Centeniers ne se monstra lasche en souffrant la mort. Mais Fenius Ruffus n'eut pas le courage pareil: car il mit ses plaintes dans son testament mesme. Neron attendoit que Vestin Consul fut aussi accusé, l'estimant violent; & son ennemy. Toutefois les coniuerez n'auoient communiqué leur entreprise à Vestin: aucuns pour estre ses ennemis anciens: & la pluspart pour ce qu'ils le pensoient estourdy & mal compaignable. Au reste l'inimitié que Neron portoit à Vestin, procedoit à cause de la familiarité priuée, qu'ils auoient l'un de l'autre. Au moyen de laquelle, Vestin ayant cogneu iusques au fonds la lascheté du Prince, le vint à mespriser: & Neron à craindre le selon courage de son amy; qui maintesfois l'auoit gabbé par de bien aspres & piequantes railleries: lesquelles poignent plus viuement, & laissent vne aigre souuenance de soy, quand elles tiennent beaucoup de la verité. Outre cela il y auoit vne cause nouuelle, pour ce que Vestin auoit espousé Statilie Messaline: n'ignorant point que Cesar estoit vn de ses adulteres. Ainsi donc ne trouuant ne crime ny accusateur; pource que il ne pouuoit mettre auant quelque forme de denonciation; ayant recours à sa puissance souueraine, il enuoye contre luy Gerelan Tribun avec vne cohorte de soldats: & luy commande de preuenir les desseins du Consul: se saisir de son hostel qui estoit quasi comme vn fort: & surprendre ceste ieunesse esleuë: car Vestin auoit sa maison regardant sus le For; & se seruoit de beaux esclaués & tous d'vnaage. Il auoit ce

XV. LIVRE DES ANNALES

iour, fait tout le deuoir & charge appartenant à l'estat de Consul: & s'estoit lors assis à soupper en grande cōpaigñie, sans aucune crainte, ou possible la voulant dissimuler: quand voicy entrer des soldatz, qui luy dirent, que le tribun l'appelloit pour parler à luy. Il se leua incontinent sans targer, quant & quant toutes choses sont haltees: car il est enfermé dans vne chambre, le cirurgien se presente qui luy coupe les veines, estant encores fort il est porté dans l'estuue & plongé en l'eau chaude, sans dire aucune parole par laquelle on cogneut qu'il eust pitié de soimesme. Cependant ceux qui estoient à table avec luy, enuironnez de gens qui les tenoient en arrest, ne furēt laissez aller que la nuit ne fut bien auācee: & encores apres que Neron imaginant & se mocquant de la fraieur qu'ilz auoient eue (s'attendans d'estre tout à l'heure despechez) eut dict qu'ilz estoient assez punis, pour s'estre trouuez à vn banquet Consulaire.

Mort de Lucain, Senecion, Quinctian, & de plusieurs autres Seigneurs. Liberalité faicte par Neron aux soldatz. Qui fut Nimphidius, flateries du Senat enuers Neron.

CHAPITRE XVI.



PRE s cela il cōmande de tuer M. Anneus Lucain: lequel sentāt froidir ses piedz & mains, durant que son sang couloit & que peu à peu l'esprit partoit des extremittez de son corps, aiant encores le cœur vif & l'enten-

& l'entendement bon; se souuenant auoir composé des carmes, par lesquels il representoit vn soldat blessé, mourant de semblable mort; il recita les mesmes vers: qui furent ses dernieres paroles. Apres moururent Senecion, Quintian, & Seuin, non pas si laschement qu'ils auoient vescu au parauant. Et puis le reste des autres coniuérateurs: sans faire ou dire chose qui soit digne de memoire. Mais ce pendant la ville estoit remplie de mortuaires: le Capitole de viâtes. Et combien que l'un eut perdu son fils, l'autre son frere, parent ou amy, ils rendoient grace aux dieux: paroiét leurs maisons * de laurier, se iettoient aux genoux de Neron: & sans cesse luy baisoient la main dextre. Parquoy estimant qu'ils le fissent de bon cueur, il recompensa d'impunité Antoine Natal, & Seruaire Procul, pour auoir bien tost descouuert la conspiration. Millich enrichy de bienfaits, prist vn nom qui en langue Grecque signifie Sauueur. Pour le regard des Tribuns Granius Siluan setua de sa main iacoit qu'il eut esté absous: & Stace Proximes rendit inutile le pardon de l'Empereur; se tuant mal à propos. Depuis cela Pōpee, Cornile Martial, Flaue Nepos, Stace Domice furent deposez de leurs estats de Tribun: non pour ce qu'ils haïssoient le Prince; mais à cause qu'ils en auoiét la reputation. Nonius Prisc pour ce qu'il estoit amy de Senecq: Glitius Gallus & Annius Pollion diffamez (plustost que cōuaincus) de la cōspiratiō, furēt bānis. Antonie Flacille suiuit Prisc son mary, Egnarie Maximille Gallus, leur ayant au commencement laissé toutes leurs richesses bien grandes, & qui depuis leurs

XV. LIVRE DES ANNALES

furent ostées, lesquelles deux choses augmentèrent leur gloire & honneur. Ruffus Crespin fut aussi chassé, sous ombre de la coniuration: mais il estoit hay de Neron, pour ce qu'autresfois il auoit eu Popee en mariage. La grande reputation de Virginius Ruffus le fit chasser. Car Virginius enseignoit l'eloquence à la ieunesse studieuse: & Musonius la philosophie. Et puis toute en vne troupe, on confina à Clunidien Quiet, Iulles Agrippe, Blitius Catulin, Petroni⁹ Prisc, & Iulie Alcin; aux Isles de la mer Ægée. Mais Cadirie femme de Seuin & Cesonius Maximus furent bannis d'Italie, ne s'estans apperceus d'estre criminels sinon par la condamnation. Attilie mere de Lucain; n'ayant obtenu aucune absolution demoura là, sans faire semblant de la vouloir punir. Ces choses acheuees; & Neron ayant assemblé les soldats pour les prescher, apres sa harangue il leur donna deux mil nummes pour teste de chacun Manipulaire*; & outre cela du bled sans rien payer: lequel au precedent ils prenoient pour leur vslage, au prix & selon le taux du marché. Puis comme s'il eut voulu faire entendre quelque exploit de guerre, il fait appeller le Senat. Et là il donne les enseignes de triomphe à Petroni⁹ Turpilian Consulaire, à Cosselius Nerua nommé Preteur, & Tigellinus Prefect du Pretoire: magnifiant tellement Tigellin & Nerua, qu'outre leurs statues triomphales, mises au For, il fit semblablement dresser leurs effgies dans le Palais. Il donna aussi les enseignes de Consul à Ninfidius; la vie passée duquel ie reprendray de plus haut en peu de paroles: puis que c'est icy l'endroit,

droit, qui premierement s'est présenté pour parler de luy: car il sera vne piece des ruines Romaines. Ainsi donc ce Ninfidius estant fils d'une fille d'affranchy; laquelle estant belle auoit abandonnee sa beauté aux esclaves & affranchiz des Princes: il disoit auoir esté engendré en elle par C. Cesar. Pour ce que d'avanture il se trouvoit de grande stature, & auoit le regard affreux: & possible que Cesar desirant d'avoir la compagnie des putains, s'estoit ioué à sa mere. Or Neron ayant appelé le Senat & fait vne harangue en presence des Senateurs, publia par vn edict & fit coucher par cahiers, les denonciateurs y adioustant les confessions des condamnez. Car bien souuent il estoit vilainement diffamé entre le peuple, comme fil eut fait mourir des gens innocens par enuie ou par crainte. Au demourant, ceux qui dés l'heure mesme furent curieux de sçauoir la verité, ne firent aucune doute que la coniuration auoit esté entreprise, bien aduancee, & manifestement descouverte: aussi le confessent ceux qui depuis la mort de Neron sont retournez en la ville. Mais comme au Senat tous ceux qui estoient les plus marris & dolens, s'abbaislassent en toute flatterie: & Iunius Galion estonné de la mort de Senèque son frere, suppliait l'Empereur de luy donner la vie, Alien Clemens l'assaillit de grosses paroles, l'appellant traistre & parricide. Iusques à ce que les Senateurs, d'un commun consentement le destournerent par menasses: luy remonstrant qu'il ne deuoit abuser & se

XV. LIVRE DES ANNALES

seruir des aduersitez publiques, pour venger sa querelle priuee : ou pousser à nouuelle cruauté, le Prince qui auoit ja tout appaisé & effacé par sa douceur. Lors il fut ordonné qu'on feroit des offrandes, & que graces seroient rendues aux dieux : & particulièrement fait honneur au Soleil, duquel il y a vn vieil temple au Cirque ; où se deuoit executer la meschanceté : pour ce que par sa diuinité, il auoit decouvert le secret de la coniuration. Et que les ieux qui se faisoient au Cirque en l'honneur de Ceres; fussent celebrez avec plus de courses de cheuaux que de coustume : & que le mois d'Auril portast le nom de Neron. Qu'un temple en l'honneur de salut, fut basti au lieu où Seuin auoit prins le glaiue. Neron luy mesme, dedia ce poignard : & le mit entre les choses sacrees du Capitole, avecques telle inscription. **A I V P I T E R VENGEVR.** A quoy pour l'heure on prist garde : mais depuis quand Iules Vindex prist les armes, telle inscription fut estimee vn presage de la vengeance à venir. Je trouue aux registres du Senat, que Cerialis Anitius nommé Consul, fut d'aduis que le plustost qu'on pourroit, il falloît des deniers publiques bastir vn temple au diuin Neron. Ce qu'il disoit, comme si l'Empereur surpassant le degré des mortels, eut mérité d'estre ja adoré par les hommes. Mais il se deuoit

deuoit prendre pour presage de sa mort prochaine : d'autant quë l'on n'a pas accoustumé d'honorer les princes comme dieux , iusques à ce que ils ne soient plus viuans *entre les hommes.*

FIN DV QVINZIESME
LIVRE DES ANNALES DE
P. CORNILE TACITE CHE-
VALIER ROMAIN.

PP iij



LE SEIZIESME LIVRE DES ANNALES DE P.

CORNILE TACITE

CHEVALIER ROMAIN.

Neron croyant aux paroles de Cefel Bassus qui auoit songé d'auoir veu vn thresor caché: despendit follement ce qu'il auoit. La mort dudit Bassus. Et comme Neron entra sur la Scene du theatre pour gagner le pris du ieu de cistre, contraignant chacun d'assister aux ieux.

CHAPITRE PREMIER.



ELA EN AVANT fortune se mocqua de Neron, à cause de sa vaine & legere creance: prenant occasion sus vne promesse, que luy feit Cefel Bassus Punique de nation: lequel n'ayant l'esprit bien rassis, forma vne trop certaine esperance sus vne vision qu'il auoit eüe la nuit en reposant. Cestui-cy estant passé à Rome, & ayant eu moyen par presens d'auoir l'entree pour

pour parler au Prince; luy declare qu'en vne sienne terre se trouuoit vne cauerne de profondeur desmesuree, en laquelle y auoit tres-grande quantité d'or, non en forme de monnoye, ains sans œuvre & en masse à l'antrique. Car là gisoient des tuilles trespesantes, & d'autre costé estoient debout des colonnes: le tout tenu secret par tant d'annees, pour augmenter les biens du temps present. Au demourant il y auoit apparence, que Didon Phœnicienne fuitifue de Sur; cacha ses richesses, apres auoir basti Carthage: craignant que ce nouueau peuple ne deuint insolent; au moyen de si grand auoir: ou que les Rois de Numidie (qui iadis leur vouloient mal d'ailleurs) ne fussent eschauffez à la guerre par conuoitise de cest or. Ainsi donc Neron ne s'estant bien asseuré de la fidelité de l'autheur; ne de la verité du faict: n'y enuoyé gens sus le lieu pour luy rapporter au vray, si l'aduertissement qu'on luy donnoit estoit veritable: luy mesme en augmente le bruit, & depesche gens pour l'apporter, comme si c'eust esté vn butin conquis sus les ennemis. Il fit aussi incontinent liurer des galleres & vaisseaux choisis, pour tant plustost s'aduancer: & le peuple qui estoit aussi credule que ce donneur d'aduertissement, ne parloit tous ces iours là d'autre chose: mais avec diuerses opinions. D'auanture on faisoit pour la seconde fois, les ieux qui escheent de cinq, en cinq ans; tellement que les Orateurs prirent de là, leur principal subiet pour louer le Prince; disans que non seulement les fruits & biens ordinaires, ou l'or meslé avec les metaux naissoient: mais que les terres aussi,

XVI. LIVRE DES ANNALES

rendoient vne nouuelle abondance, & les dieux nous venoient presenter des biens & richesses; Auec autres tels propos, sentans leurs esclaués; que par vn beau parler & non moindre flatterie, ils controuuoient: fasseurans qu'on le croiroit facilement. Cependant la despence s'augmentoit peu à peu, sous ombre de ceste vaine esperance: & les richesses amassees de longue main estoient consommées, comme si d'autres se presentaient, pour despandre prodigalement par beaucoup d'annees. Qui plus est, il assignoit ja des dons là dessus: de façon que l'attente de richesse, estoit l'vne des causes de la pauureté publique. Or Bassus ayant fouillé son heritage, & vn grand pays des terres voisines: affermant qu'vn tel lieu, & puis en vn autre, estoit l'endroit de la cauerne promise: suiuy non seulement des gens de guerre, mais aussi du peuple des champs assemblé pour besongner: en fin laissant la bestise, (& s'esmerueillant comme iusques là ses songes n'ayans esté faux, il s'estoit lors premierement abusé) se deliura de honte & de crainte, par vne mort volontaire. Aucuns ont escrit qu'il fut mis en prison, & lasché incontinent apres luy auoir osté ses biens, au lieu de la cheuance Royale. Cependant le Senat, voyant que le temps des ieux qui se font de cinq en cinq ans approchoit: pour couvrir la honte offrit à l'Empereur, l'honneur d'auoir le mieux chanté: y adioustant la couronne d'eloquence, à fin d'eiter le deshonneur qu'il eut peu receuoir entrant aux ieux. Mais Neró disât souuēt, n'estre besoin d'employer en cela la faueur & puissance du Senat; & qu'il ne demandoit

doit aduantage sur ses competeurs, l'asseurant que les iuges en droicte conscience, luy donneroient l'honneur & louange par luy meritee: chanta premierement des vers sus l'eschaffaut de la Scene. Puis estant requis importunément par la commune de publier tous ses trauaux (car ils vserent de ces mots) il entre dans le theatre, obeissant à toutes les ordonnances que les ioüeurs de cistre gardent: comme de ne s'asseoir encores qu'il fut las: ou ne s'essüyer d'autre chose que de la robbe qu'il auoit vestuë: & que l'on ne vit aucuns excremens sortir de sa bouche, ou de son nez. Finalement le genouil flechy, & ayant avec la main, monstté qu'il portoit tout humble respect à l'assemblee, il attendoit le iugement, comme avec vne craintiue. contenance. De vray le menu peuple de la ville, qui a accoustumé aider mesmes aux gestes deshistrions, luy respondoit à certaines cadances; & avec applaudissement mesuré. Vous eussiez pensé qu'ils en estoient bien ioyeux; & possible prenoient ils plaisir, pour le deshonneur qu'en receuoit la Republicque. Mais ceux des villes plus esloignees, qui retenoient encores la feuerité & anciennes mœurs d'Italie: ensemble ceux des loingtaines prouinces venus comme deputez, ou pour leurs affaires particulieres, non encores accoustumez aux dissolutions ou folastries; n'auoient le cœur de regarder vn tel spectacle: ne fournir à vn si deshonneste travail. Avec ce que laissant aller de lasseré leurs mains, non accoustumees à ces gestes: & troublans ceux qui les entendoient; ils estoient souuent battus, par les soldats

XVI. LIVRE DES ANNALES

disposez par troupes, à fin qu'aucun moment de temps, ne passast avec clameur inegale ou trop morte-silence. Il se trouua pour certain, que plusieurs Cheualiers s'efforçans passer par des entrees estroites, ou au trauers de la multitude & presse; furent es-cachez: Et d'autres se tenans iour & nuit en leurs places au theatre; y gaignerent de mortelles maladies: pour ce que la crainte de faillir à ces ieux estoit plus griesue: y ayant beaucoup de gens qui ouuertement, & d'auantage qui en secret, espioient les noms & cōtenances: l'allegresse & tristesse de ceux qui s'y trouuoient. Dont l'ensuiuit, que les petis furent incontinent punis: & les plus apparens ayans esté dissimulez, sentirēt puis apres le despit qu'on leur en portoit: & disoient aucuns, que Vespasian auoit esté rancé par Phœbus l'affranchy: de ce que parfois il sommeilloit. Et qu'ayant à grand peine esté deffendu par les prieres des gens de bien; il eschappa par vne plus grande destinee, le malheur prest à tomber sus sa teste.

*Neron tue Popée sa femme, d'un coup de pied
qu'il luy donna par cholere. Cassius Sil-
lan, & Lepide sont bannis: & de-
puis Silla occis. Mort de L. Ve-
tus, de sa mere, & de sa
fille venue de Plaute.*

CHAPITRE II.

Après



PRES la fin de ces ieux, Popee mourut par vne soudaine cholere de son mary; qui la blessa d'un coup de pied estant grosse d'enfant: car ie ne puis penser, qu'il y eut du poison; iagoit qu'aucuns l'ayent escrit: plustost par haine, que suiuant la verité: d'autant que Neron desirant auoir des enfans, estoit aussi coiffé de l'amour de sa femme. Son corps ne fut consommé au feu, suiuant la façon Romaine: car apres auoir esté embasme selon la coustume des Rois estrangers: il fut mis en terre, & porté dans le tombeau des Iules. Toutesfois on ne laissa de faire publicquement la pompe du mortuaire: & luy mesme prononça l'oraison funebre, en la place des esperons de nauires appelez Rostres: la louant de sa beauté, & de ce qu'elle auoit esté mere d'une fille diuine: ensemble de tous les autres dons de fortune, dont elle estoit douee au lieu de vertus. A ceste mort de Popee, triste en apparence; & neantmoins plaisante & agreable (à ceux qui auoient souuenance de son impudicité & cruauté) Neron adiousta pour le comble vn nouuel outrage; empeschant Cassius de se trouuer à ces obseques: qui fut la premiere marque du mal qui luy deuoit aduenir: & lequel on ne luy garda guieres. Sillan encores l'augmenta non pour aucun crime, si ce n'est pour ce que Cassius à cause de ses richesses anciennes & grauité de ses mœurs, Sillan par l'excellence de sa race, sage & modeste ieunesse, apparoissoient sus tous autres. Ainsi donc ayant enuoyé

XVI. LIVRE DES ANNALES

au Senat vne harangue: il remonstra par icelle, qu'il les falloit tous deux oster de la Republicque: reprochant à Cassius qu'entre les images de ses ancestres; il auoit aussi honoree celle de C. Cassius laquelle auoit vne inscription: **A V C H E F D E P A R T:** Car par là vne semence de guerre ciuile estoit cherchee: & vne rebellion contre la maison des Césars. Et pour en telle querelle s'aider seulement de la souuenance d'un nom ennemy, il auoit associé L. Sillan ieune homme de noble race & hazardeux: à fin de luy seruir de couuerture en ceste nouuelle entreprise. Apres cela il accusa Sillan des mesmes choses que Torquat son oncle paternel: comme si ja il distribuoit les charges de l'Empire; & commist des affranchiz pour ouyr ses comptes, les requestes à luy presentees, & dresser les lettres missiues: choses esquelles n'y auoit aucune apparence, & qui estoient quand & quand fausses. Car Sillan par crainte, regardoit de plus pres à ses actions: & la mort de son oncle paternel, l'auoit assez estonné pour se tenir sus ses gardes. Il attitra aussi depuis des gens, qui sous le nom de denonciateurs chargeoient faulsemēt Lepide femme de Cassius, tante de Sillan du costé paternel, de commettre inceste avec son neveu: & faire d'horribles & meschās sacrifices. Vulcatius Tulin, & Marcel Cornile Senateurs, Calpurnius Fabat Cheualier Romain, estoient tirez en iustice comme cōplices: lesquels appellans deuant le Prince, destournerent la sentēce de condamnation prestē à dōner contr'eux: & depuis pour ce que Neron estoit entētif à de bien plus grādes & hautes meschācetez, eschapperēt cōme gēs de qui l'ō faisoit peu d'estat.

État. Alors Cassius & Sillanus furent bannis, par arrest du Senat. Lepide renuoyee à Cesar pour en ordonner: & Cassius confiné en l'Isle de Sardaigne: où l'on s'attendoit qu'il mourust de vieillesse. Sillan cōduit à Hostie, cōme pour estre porté en l'Isle de Nixie, fut depuis enfermē dās vne ville de Pouille, nōmee Bari: là où portant sagemēt la grāde indignité dōt l'on vloit en son endroit; il fut saisi par vn Centenier enuoyé pour le tuer: lequel luy voulāt persuader de se faire ouvrir les veines, n'eut autre respōce de luy, sinō auoir resolu en son cuer de mourir: toutes fois qu'il ne souffriroit qu'un meurdrier eust l'hōneur de luy auoir aidé. Parquoy le Centenier nonobstant que Sillan fut sans armes, le voyāt toutes fois trespuiſsāt de corps & ayāt cōtenāce d'hōme plus cholereq̃ craintif, cōmanda aux soldats de l'approcher. Mais il ne laissa de se forcer cōtr'eux, & les frapper tāt qu'il pouuoit de ses mains nuēs: iusqu'à ce que le Cētenier l'eust occis, de coups receus par deuāt ainsi qu'en vn cōbat. L. Verus, Sextia sa belle mere, & Polutia fille dudit Verus; ne moururēt pas moins courageusemēt: lesquels le Prince voyoit à regret, cōme si viuans ils luy reprochassēt le meordre, de Rubel Plaire gēdre de L. Ver⁹. Mais l'occasiō premiere de decouurir telle cruauté, proceda de Fortunat affrāchy: leq̃l ayāt desrobbé son maistre, & craignāt vne recherche, s'aduisa de l'accuser; associant auec soy Claude Demian: lequel ayant pour ses fautes esté mis en prison, par L. Verus lors Procōsul d'Asie Neron deliura en recompence de ceste accusation: Dōt le criminel aduerty; & que sans respect de sa qualité, luy & son affranchy, estoiet l'un à l'autre appariez

XVI. LIVRE DES ANNALES

& confrontez il se retire en la contree de Formie: où des soldats secrettement l'environnerent. Avec luy estoit sa fille laquelle outre le danger present, par vne longue douleur estoit toute hideuse, & felonnie; depuis qu'elle veit les meurdriers de Plaute son mary. Duquel ayant embrassé la teste sanglante, elle gardoit le sang, & les habillemens qui en estoient tachez. Demourant veufue, enuolopee de deuil continuuel: & n'usant d'autres viandes, que pour seulement euitter la mort. Lors par le conseil de son pere, elle va à Naples: & pour ce qu'on la gardoit d'approcher de .. Neron: le guettant quand il sortoit, elle crioit. Qu'il .. donnaist audience à vn innocent, & ne voulut abandonner à vn affranchy, celuy qui autresfois auoit esté .. son compagnon au Consulat. Ce qu'elle disoit tantost avec larmes & pleurs de femmes, & aucunesfois plus hardiment que son sexe ne portoit, avec paroles aigres & picquantes: continuant iusques à ce que le Prince monstraist, qu'il s'esmouuoit aussi peu de ses prieres que du blasme qu'il en pouuoit encourir. Et pour ce, elle vint dire à son pere, qu'il eust à quitter toute esperance & vser de la necessité. Quand & quād il est aduertý, qu'on s'apprestoit pour faire son proces au Senat, & donner contre luy vne cruelle sentence. Il n'y eut faute de gens, qui luy conseillassent de nommer Cesar, pour estre heritier d'une grande partie de ses biens; & par ce moyen asseurer le reste pour ses petits fils. Dont n'ayant tenu conte, à fin que sa vie passée presque en liberté, ne fut souillée par ceste derniere flatterie, sentant son varlet: Il donne ce qu'il

qu'il auoit d'argent contant à ses esclaués, & tout ce qu'ils pourroient chacun emporter: commandant de retenir seulement trois liëts, pour leurs obseques & dernier seruice. Alors dans vne mesme chambre, & d'un mesme glaiue, ils se font couper les veines, & tout à la haste porter en des estuues, enuoloppez d'un simple habillement; seulement pour n'estre veus tous nuds. Le pere regardant sa fille: l'ayeullè la fille de son fils; & ceste-cy l'un & l'autre: prians chacun d'eux les dieux de tresgrande affection pouuoir vistemét mourir: à ce qu'ils laissassent encores en vie les autres, qui toutesfois les deuoient incontinent suiure. Et de fait, la fortune garda l'ordre: car le plus ancien trespassa le premier, & puis celuy d'apres, chacun selon leur aage. Ayans esté accusez apres leur sepulture, on ordonna qu'ils seroient punis à la maniere ancienne: à quoy Neron s'opposa, leur permettant de se faire mourir comme ils vouldroient *: car apres l'execution des meurdres, l'on vsoit encores de telle moquerie. P. Gallus Cheualier Romain, fut banny pour ce qu'il auoit esté amy intime de Fenius Ruffus: & auoit quelque familiarité avec L. Vetus. L'affranchy, & accusateur *: pour recompence de sa peine, eut place au theatre entre les bedaux des Tribuns. Le mois d'apres Auril (autrement dit Neronne) changeant son nom de May, fut appellé Claude: & celuy de Iuillet Germanic. Apres que Cornile Orphit qui auoit proposé cela, eut affermé auoir passé par dess^{us} le mois de Iuing: pour ce que deux Torquats occis pour leurs forfaits, auoient rendu le nom de Iunius malencon-

XVI. LIVRE DES ANNALES

tr'eux. Ceste annee souillee de tât de meschans actes, fut aussi des dieux mesmes, rendue plus remarquable par tempestes & maladies. Car la Campanie fut gaste de tourbillons de vents, qui abbatoient par tout çà & là, les maisons champestres, arbrisseaux, grâins, & fruits: & paruint ceste violence iusques bien pres de la ville, en laquelle la force de la pestilence, saccegeoit toute sorte de gens: sans que l'on s'apperceut d'aucune mauuaise disposition d'air. Et toutesfois les maisons, estoient remplies de corps morts, & les chemins de conuois mortuaires. Ne sexe ny aage, estoient exempts de ce danger. Les esclaves aussi tost que le peuple de franche condition, estoient soudainement troussiez, & morts entre les cris & lamentatiōs de leurs femmes ou enfans: lesquels pendant qu'ils se tiennent pres d'eux, ou les pleurent: mourans eux mesmes, estoient bien souuent bruslez en mesme buscher. La mort de tant de Cheualiers & Senateurs trespassez peste-mesle, estoit moins pleuree: comme si par ceste commune mortalité, ils preuinssent la cruauté du Prince. Ceste mesme annee, fut faite vne leuee de gens de guerre au pays de Gaule Narbonnoise, Affricque, & Asie: pour remplir les places vacantes des legions d'Illirie: les soldats desquelles anciens ou maladiſs, estoient congediez. Et le domniage que ceux de Lion auoient souffert, fut soulagé par le Prince, qui leur donna quarante mil Sesterces, pour les releuer de leurs pertes: & remettre en la ville, les choses perduës. Laquelle somme les Lionnois auoient offerte auparauant, durant les troubles surue-

nuz

*Mort d'Anteius, d'Ostorius Scapula, & de plusieurs
autres Seigneurs que Neron contraignit de se tuer
par soupçon qu'il auoit d'eux, ou pour auoir leur bien.*

CHAPITRE III.



. Suetone & L. Telesin estans Con-
suls: Antistius Sosian, qui pour des
vers mesdisans, composez contre Ne-
ron auoit (comme iay dit) esté ban-
ny entendant que les denonciateurs
estoyent honorez de telle façon; & le Prince si prompt
à faire des meurdres; luy qui auoit l'esprit remuant,
& n'estoit nonchalant à sçauoir bien prendre les oc-
casions; sous ombre de pareille fortune, trouue
moyen de faire son amy Pammenez, aussi banny en
mesme lieu, & renommé à cause de la cognoissance
qu'il auoit de la science des Chaldees: & pour ce ap-
puyé de l'amitié de beaucoup de gens. Or Sosian
pensant que sans cause il ne venoit si souuent par de-
uers Pammènes, des messagers & consolations *: des-
couure quand & quand, que L. Anteius luy don-
noit tous les ans pension d'argent: & si il n'igno-
roit par qu'Anteius estoit mal voulu de Neron,
pour l'amitié d'Agripine: & que ses tresgrâdes richesses
pourroient faire enuie de le destruire; comme plu-
sieurs autres l'estoiēt pour mesme occasiō. Ainsi donc
ayāt surpris des lettres d'Anteius, & desrobbe aussi les
memoires dās lesq̄ls sa natiuité, & les choses q̄ luy de-

R R

XVI. LIVRE DES ANNALES

uoient aduenir, estoient tenues cachees par Pannenes: & ayant semblablement trouué ce qui auoit esté composé de la naissance & vie d'Ostorius Scapula: il escriuit au Prince, que s'il luy plaisoit donner vne briefue relasche de son exil: il luy apporteroit de grandes choses, & qui touchoient à sa propre personne: car Anteius & Ostorius estoient prests d'enuahir l'Empire, & cherchoient quelle estoit leur aduantage & celle de Cesar. Apres cela furent enuoyez de legers nauires à deux rames pour banc, appelez Luburniques: sur lesquels Sosian est amené. La denonciation duquel ayant esté esuente: Anteius & Ostorius furent tenuz pour condamnez, plustost qu'entre les criminels. Tellement qu'il ne se fut trouué, aucun qui eut voulu cacheter le testament d'Anteius, si Tigellin ne les eut aduouez de ce faire. Encores au precedent Anteius fut admonnesté ne demourer viif, long temps apres son testament. Parquoy ayant beu du poison, & fasché de sa tardiue operation: il hastia sa mort, en se faisant coupper les veines. Ostorius estoit pour lors allé en vn sien heritage loingtain, sur les marches de la riuere de Genes: là où fut enuoyé vn Centenier pour incontinct le tuer. L'occasion de telle haste, procedoit de ce qu'Ostorius ayant acquis grande reputation d'homme de guerre, & merité d'estre couronné pour auoir en Bretaigne sauué la vie à vn citoyen de Rome; estant trespuissant de corps, & ayant bien les armes en main, il auoit donné crainte à Neron, qu'il ne le vint assaillir: luy qui estoit tousiours en doûte, & encores plus estonné pour l'heure
à cause

à cause de ceste coniuration descouuerte. Ainsi donc le Centenier apres auoir mis gardes à toutes les yssues de la metairie, declare à Ostorius le commandement del'Empereur. Lequel se seruit contre soy-mesme, de la vaillance maintesfois esprouee sus les ennemis: & pour ce que ses veines (combié qu'elles fussent couppees,) ne rendoient assez de sang: faidant de la main de son esclae pour seulement tenir le poignard ferme, il le pressa & vint heurter son gosier contre. Or quand bien ie recitasse des guerres faites contre les estrangers: & des morts, souffertes pour la Republicque, avec tant d'accidens & cas semblables: si est-ce que i'en eusse moy-mesme esté assouuy; & m'attendrois bien, que les autres s'ennuyroient, refusans de ouyr les piteux & continuels trespas de leurs citoyés, quelques honorables qu'ils fussent. Mais à ceste heure, telle patience sentant si fort son esclae: & tant de sang inutilement respandu dans la ville; fachent l'esprit & serrent le cueur de tristesse & d'ennuy. Quant à moy, ie ne demande à ceux qui aurôt cognoissance de cecy autre excuse, sinon qu'ils ne hayssent ceux qui mouroient si laschement. Ce fut certes vn courroux des dieux, contre l'estat Romain: lequel ayant esté vne fois escrit, comme vne deffaicte d'armee, ou prise de ville: il n'est loisible d'oublier à escrire. Soit donné cest aduantage, à la race & successeurs de tant de grâs personages: à ce que tout ainsi qu'ils ne sont meslez en leurs conuois & sepultures parmy le commun peuple; ils trouuent aussi en l'histoire, vn endroit faisant particuliere mention de leurs trespas. Car aussi peu de

XVI. LIVRE DES ANNALES

iours apres Anneus Mella, Cerial Anitius, Ruffus Crespin, & C. Petronius, furent tout d'un train despeschez. Mella, & Crespin, estoient Cheualiers Romains: mais en dignité de Senateurs. Car cestuy-cy ayant autresfois esté Prefect du Pretoire: & recompensé des enseignes de Consul: estant n'aguieres confiné en l'Isle de Sardaigne pour crime de coniuration; ayant receu le commandement de mourir se tua soy-mesme. Mella encores qu'il fust nay de mesme pere, & mere, que Gallion & Senecque, n'auoit voulu pourchasser des estats, par vne desraisonnable ambition: à fin d'auoir cest honneur, qu'un Cheualier se trouuaست esgal en puissance & credit aux Consulaires. Quand & quand il pensoit, que le plus court chemin pour acquerir des biens & richesses, fut de manier les affaires & negoces des Princes comme leur Procureur. Le mesme Mella, estoit pere d'Anneus Lucain: ce qui luy auoit donné grande reputation. Apres la mort duquel, voulant rechercher trop asprement, ce qui estoit de son bien: il esmeut contre soy vn accusateur, nommé Fabius Roman, l'un des principaux amis de Lucain. Car se trouuant des lettres de Lucain contrefaittes, par lesquelles apparoiست faussement q le pere & le fils, scauoient la coniuration aussi bien l'un q l'autre; Neron les ayant veues commanda les porter à Mella, beant apres ses richesses. Or Mella, pour ce que lors, c'estoit le plus court chemin de mourir: se fit ouurer les veines: Apres auoir fait vn codicile, par lequel il donoit de grans deniers à Tigellin & Cossutian Capiton son gendre, à fin d'asseurer le demourant. On
adiousta

adiousta au mesme codicile (cōme si se plaignant de l'iniquité * de sa mort, il eut escrit) qu'il mouroit sans auoir meritē punitiō: & au cōtraire, que Ruffus Crespin, & Anteius Cerial, estoient plains de vie, encores qu'ils fussent ennemis du Prince. Lesquelles paroles estoient estimees fausses; & controuuees contre Crespin par ce qu'il auoit esté ja occis: & contre Cerial, à fin de le faire tuer. Car peu apres, il se tua soy-mesme: sans qu'on eut telle pitié de luy que des autres: pour la souuenance qu'on auoit d'une coniuration par luy descouuerte à Caius Cesar.

Constante mort de C. Petronius, & quelle vie il menoit.

CHAPITRE IIII.



AY parlé cy dessus de C. Petronius: maintenant reprēdray quelque peu des choses q' i'en ay dites. Il dormoit tout le iour, & passoit la nuit à l'expeditiō de ses affaires; ou à prendre ses esbats: car tout aīsi que les autres par leur industrie & habileté, cestuy par sa nōchalance, auoit acquis reputation. Et neantmoins, on ne le tenoit pas pour vn bordelier & despencier (comme plusieurs qui mangent indiscrettement leurs biens) mais pour celuy qui sçauoit faire, vne despence mignarde, & sentant son homme d'esprit. Tellement que tant plus ses faits & dits estoient naifs, & monstroient sortir d'un homme qui se soucioit peu de soy: ils estoient trouuez d'autāt plus agreables, qu'ils sembloiēt tenir de la simplicité.

XVI. LIVRE DES ANNALES

Toutesfois estant Proconsul de Bithinie, & apres cela Consul; il se monstra de bon esprit: suffisant & capable d'affaires. Depuis retournant à ses vices ou apparence d'iceux, il fut receu par Neron entre ses plus priuez familiers: comme pour estre iuge des gentillesses. Car quelque affluence qu'il eut de toutes choses, il n'estimoit rien plaissant ou delicat; fors ce que Petronius luy eut fait trouuer bon. Et de là venoit l'enuie, que Tigellin luy portoit; comme tendant à mesme fin & plus inuentif de voluptez. Pour ce, sçachant bien que la cruauté auoit plus de puissance sus le Prince, que pas vn de ses autres plaisirs; il l'assaut de ce costé: mettant sus à Petronius, qu'il auoit esté amy de Seuin: subornant vn esclau pour l'emputer: luy ostant tout moyen de se deffendre, & ayant fait mettre la plus grande partie de ses domesticques en prison. D'auanture Cesar estoit allé ces iours là en Campanie; & Petronius ayant passé iusques à Cumes estoit là arresté *. Il ne sceut porter plus outre, la longueur d'vne crainte ou d'vne esperance: & toutesfois il ne se fit hastiuement mourir: mais s'estât fait couper, & puis bander les veines à son plaisir; il les faisoit ouurir de rechef: parlant à ses amis, non de choses grandes, par lesquelles il voulut acquerir l'honneur d'estre constant. Car il oyoit ceux qui diuisoient non pas de l'immortalité de l'ame, ou des points & articles de Philosophie: ains qui recitoient des chansons gentilles, des vers plaisans & non difficiles d'entendre. Il fit aussi donner de l'argent à aucuns de ses esclauues: & battre des autres. Il chemina par pays, il dormir

dormit à son aise: à fin que ceste mort quelque contrainte qu'elle fut, semblast estre aduenue par cas d'auanture. Qui plus est par son codicille: il ne flata pas. (comme plusieurs qui mouroient) Neron ne Tigellin, ou quelques autres des fauoris. Mais il escriuit les meschancetez du Prince, soubz noms de bredaches ou de femmes: particularisant ses paillardises selon qu'elles estoient estâges & nouuelles qu'il enuoyacloses & seelées à Neron: rompant son anneau de cachet, de crainte qu'on ne s'en seruit apres, pour faire tort à autrui. Neron estant en doute, comme les plaisirs inuentez pour le deduit de ses nuits, auoient peu estre descouverts: s'aduisa d'une Sillia assez cogneue pour auoir esté femme d'un Sénateur: de laquelle il se seruoit, pour paillarder en toutes façons: & qui estoit fort familiere de Petronius. Parquoy elle fut chassée, comme n'ayant sceu taire, ce qu'elle auoit veu, & enduré en son corps: & par haine particuliere que luy portoit l'Empereur. Il abandonna aussi Numicie Terme (qui auoit esté Preteur) à Tigellin son ennemy: pour ce qu'un affrâchy de Terme, auoit accusé Tigellin de quelques crimes, lesquels par martyres endurez à la gehenne, cest affranchy deuoit reparer; & son maistre par vne mort non meritee.

La haine de Neron à l'encontre de Trajes Petus.

CHAPITRE V.

XVI. LIVRE DES ANNALES



YANS doncques tant de braues personnages esté cruellement occis, finalement il prist enuie à Neron, de destruire la vertu mesme: en tuant Barea Soran, & Trasea Petus, tous deux par luy hays de longue-main. Auec ce qu'il y auoit quelque cause & occasion recente pour le regard de Trasea: d'autant qu'il sortit du Senat, quand l'on parla de la mort d'Agripine ainsi que i'ay dit. Et encores aux ieux de ieunesse, il ne semploya pas assez agreablement: ce qui auoit poind d'auantage le cueur de Neron; * par ce que le mesme Trasea en la ville de Padouë (dont il estoit natif) en accoustrement Tragic, auoit chanté en des ieux de Ceste, ordonnez par Anthenor Troyen. Auec ce que le iour qu'Antistius Preteur s'en alloit condamné à mourir pour auoir mesdit du Prince; il fut de la plus douce opinion: & l'emporta y faisant passer les autres Senateurs. Mesmes quand l'on ordonnoit des honneurs diuins à Poppee, s'estant tout expres absenté, il ne se trouua pas seulement à son conuoy. Toutes lesquelles choses, Capiton Cossutian, empeschoit d'estre oubliées: d'autant qu'outre son naturel enclin à meschanceté; il estoit ennemy de Trasea: pour ce que par son autorité, il auoit perdu sa cause à l'encontre des deputez de Celicie que Trasea supportoit, durant qu'ils poursuiuoient Capiton pour deniers mal pris. Encores luy reprochoit il cecy. Que Trasea cuitoit à faire le serment accoustumé à l'entree de l'an: qu'il ne se trouuoit, quand l'on faisoit les vœux.

Et com-

Et combien qu'il fut l'un des quinze hommes prestres, il n'auoit iamais immolé hostie, pour la santé du Prince ou pour sa voix celeste. Et luy qui auparavant estoit assidu & continuellement venoit au Senat, qui ouuertement fauorisoit ou contredisoit les plus cōmunes deliberations des Senateurs; n'estoit entré en la cour depuis trois ans. Et n'aguieres que chacun y accouroit à l'enuy, pour chastier Sillan, & Vetus; il auoit mieux aimé vacquer aux affaires priuees de ses cliēs. Que cela estoit ja vne retraitte mutine & partialité; ou vne guerre si beaucoup en oisoiet faire autāt. Que tout ainsi (*disoit-il*) que iadis on faisoit des contes de C. Cesar, & de M. Catō; aussi maintenant la ville conuoiteuse de querelles, ne parle d'autre chose que de vous Nerō, & de Trafea. Mesme il a des partisās, voire plustost satellites: qui n'vsent pas encores de l'orgueil & brauerie de ses opiniōs; mais cōtrefont sa cōtenance & visage. Et qui estās entiers & rebarbatifs, vous blasment cōme insolent & desbauché. C'est luy seul qui ne se soucie de vostre santé: qui ne fait honneur à voz arts, & sciences. Il mesprise les prosperitez, & bōnes aduētures du Prince. Quoy? n'est-il point encores assouuy de vostre ducil, & de voz douleurs? Cela procede d'un mesme courage; & ne croire point que Popee soit deesse, & ne vouloir faire le serment de tenir les ordōnāces du deuin Auguste, & du deuin Iules. Il mesprise les religiōs & choses saintes: il casse les loix: les iournaux du peuple Romain; ne se lisent curieusement par les Prouinces & par les armees, sinon à fin

XVI. LIVRE DES ANNALES

- que l'on cognoisse ce que Trasca n'a point fait. Re-
 - ceuons donc ses ordonnâces, si elles sont meil-
 - leures : ou bien ostez à ceux qui desirerent vn chäge-
 - ment, leur chef, & autheur. Ceste secte a engendré
 - les Tuberons & Fauoniens, gés peu agreables mes-
 - me durant l'ancienne Republique. Ils se couurent
 - de liberté pour abbatre l'Empire: lequel mis fê des-
 - sus dessous, ils l'enuahirent elle mesme. Vous auez
 - pour neant osté Cassius : si vous estes pour endurer
 - croistre peu à peu, & florir les imitateurs des Bru-
 - tes. Au reste, n'escriuez rien de Trasca: & nous lais-
 - sez le Senat pour desmester noz differens. Neron
 louë grandement le courage de Cossutian, prompt
 & ardent de collere: & luy dône pour adioint Mar-
 cel Eprius, qui auoit vne eloquence aspre & vifue.
 D'autre costé, Ostorius Sabin Cheualier Romain,
 auoit ia demandé, luy estre permis accuser Barea
 Soran, sus l'administration qu'il auoit eüe com-
 me Proconsul, en la Prouince d'Asie: maniant la-
 quelle il augmêta l'inimitié que le Prince luy por-
 toit, pour sa iustice & diligence: & encores, pour-
 ce qu'il festoit employé à l'ouuerture du port des
 Ephesiens: & auoit laissé sans chastimêt, la violen-
 ce & force que les habitans de Pergame, feirent à
 Acrat affrâchy de Cesar, voulât malgré eux empor-
 ter des peintures & statuës de leur ville. Mais on
 luy mettoit sus pour crime, qu'il estoit amy de Plau-
 te: & auoit tâché de gaigner la faueur de la Pro-
 uince, pour sen seruir à nouuelles entreprises. Le
 temps auquel Tiridates deuoit arriuer, pour rece-
 uoir

noir le Royaume d'Armenie; fut choisi pour les condamner. A fin que ne courât autre bruit, que de la venue de ces estrangers; il estouffast & obscurcit ceste meschanceté domestique: ou bien qu'il eut desir, en faisant mourir ces hommes notables, monstrier la grâdeur & puissance Imperiale, comme par quelque acte Royal. Ainsi dōc, estant toute la ville sortie, & respanduë pour receuoir le Prince, & veoir le Roy: Trasea empesché d'aller au deuant, ne perdit point courage: Ains adressa vne requeste à Nerō par laquelle il requeroit estre aduertty, de ce qu'on luy mertoit sus: l'asleurāt qu'il se purgeroit sil cognoissoit les crimes, & luy estoit donné moyē de s'en purger. Neron receut bien vistement ceste requeste, en esperāce que Trasea espouuenté, auoit pris quelque aduis & resolution, par laquelle il pourroit magnifier d'auantage l'excellence du Prince, & deshonnorer la reputation de soymesme. Ce que n'estant aduenū, & au contraire le visage, le courage & la liberté de cest hōme innocent l'ayant effrayé luy mesme: il commanda d'assembler le Senat. Lors Trasea mit en deliberatiō entre ses plus priuez parens & amis, sil deuoit entrer en defenses ou les mespriser. On luy donoit diuers cōseils: ceux qui trouuoierēt bō d'ētrer en la Cour, disoierēt estre tous asseurez de sa constance; & qu'il ne diroit chose, qui n'augmētast sa gloire & son honneur. Que les laches & craintifs, se cachoient & retiroient en lieux secrets, quand il leur conuenoit mourir. Mais qu'il falloit que le peuple vir, vn homme se presentāt à la mort: que le Senat oït vne voix plus humaine, sortant comme de la bouche de quelque Dieu.

XVI. LIVRE DES ANNALES

Que Neron pourroit estre esmeu de telle merucille. Et s'il demouroit ferme en sa cruauté; q̄ certainement ceux qui viendroient apres eux, auroient autre opinion de ceux qui mouroient vaillamment, & hōnestement: & des autres qui par lacheté de courage se laissoient tuer sans mot dire. Au contraire, ceux qui estoient d'aduis d'attendre la fortune, sans bouger de la maison: disoiēt les mesmes choses de Trafea. Mais puis qu'on saprestoit de luy faire des mocqueries & indignitez, qu'il se destournast à fin de n'oüir point les iniures & outrages, qui luy seroiēt dites. Que Cossutian & Eprius, n'estoient pas seuls prompts & ardās à mal faire: car il n'y en auoit que trop d'autres, lesquels possible auferoient bien mettre la main sur luy & le frapper, cognoissāns la cruauté de l'Empereur: voire que les gens de bien mesmes, les suiuent maintesfois par crainte. Qu'il ostast au Senat, par luy tant honoré de sa personne; le deshōneur d'un si grand forfait. Et laissast à iuger ce que les Senateurs eussent ordonné de Trafea; l'ayant veu criminel. Qu'en vain, ils esperoient que Neron d'eust auoir honte de ses meschâcetez: & faillloit biē plus craindre, qu'il n'vlast de cruauté cōtre sa femme, cōtre sa maison, & cōtre ses autres plus chers parēs & amis. Et pource, pendāt qu'il n'auoit encōre esté diffamé, qu'on ne l'auoit outragé en sa persōne; suiuāt la trace & doctrine de ceux qui luy auoient enseigné à viure, qu'il cherchast vne mort aussi honorable, qu'ils auoient esté glorieux & renommez. A ce conseil estoit present Rustic Arulen ardant ieune homme: lequel desirant acquerir honneur,

neur, offroit de supposer à l'arrest: car il estoit Tribun de peuple. Mais Trafea modera ce courage, empeschant qu'il n'entreprist vne chose vaine: qui ne profiteroit de rien au Criminel, & seroit cause de la ruine de cest opposant. Qu'il auoit fait son tēps, & ne failloit abandonner l'ordre, & maniere de viure continuez par tāt d'anties. Quāt à luy, qu'il ne faisoit que commencer d'entrer aux Magistrats; & se pourroit gouuerner à sa volonte, pour le regard des choses aduenir. Qu'il pesast & considerast longuement à par soy, quel chemin il deuoit prēdre, pour entrer en ce temps cy, aux charges de la Republicque. Au desmeurant il se reserua à luy mesme, de resoudre s'il luy estoit bien seant d'aller au Senat.

Accusation dudit Trafea, & sa mort.

CHAPITRE VI.



R LE IOVR d'après, deux cohortes de la garde Pretorienne, se vindrent planter en armes au temple de la mere Venus: & vne trouppes de gens vestus de togues (qui ne cachoiēt pas leurs espees) auoit saisi les entrees de la Cour: & des scadrons de soldats estoient espars par les places, & Palais: à la veuē & menacēs desquels passerent les Senateurs, pour aller à la Cour. Et fut ouie la harangue du Prince, prononcee par la bouche de son Questeur: en laquelle sans nommer personne, il blasmoit les Senateurs, de ce qu'ils

XVI. LIVRE DES ANNALES

abandonnoient les charges publicques. Et qu'à leur exemple, les Cheualiers Romains se rendoient paresseux. Et quelle merueille estoit ce, si ceux qui demouroient aux Prouinces esloignées, ne venoient point? veu que plusieurs qui auoient tenu l'estat de Cōsul, & des prestises; s'asubiettoient totalement aux plaisirs de leurs iardis: cela fut incōtinēt empoigné par les accusateurs, pour leur seruir d'armes. Et Cossutian ayant fait l'entree, Marcel crioit avec plus grāde vehemēce, qu'il y alloit des plus grandes affaires de la Republicque. Que par la fiere desobeissance des subiets, la douleur de celuy qui commandoit s'amoindrissoit. Que les Senateurs iusques à ce iour s'estoient mōstrez trop debonnaires, se laissans abuser par Trafea, qui auoit abandonné leur party: par Heluidius Prisc son gendre, qui suiuoit la mesme folie. Et en pareil, par Paconius Agrippin heritier de la haine que sō pere souloit porter aux Princes: & Curce Mōtan faiseur de vers & chansons meschātes & detestables. Quāt à luy, il cherchoit, & trouuoit à dire au Senat, vn Consulaire: vn prestre quand on faisoit les vœux & prieres publiques: vn citoyen, pour prester le sermēt: si ce n'estoit que Trafea contre les statuts & ceremonies des anciēs, se voulut ouuertement declarer traistre, & ennemy de la Patrie. Finalement, qu'il fit son estat de Senateur: & puis qu'il estoit coustumier de supporter les mesdisans cōtre le Prince: qu'il vint à proposer * ce qu'il vouloit estre corrigé ou changé. Qu'ils le souffriroient plustost, blasmāt en persōne les choses par le menu; q̄ par son silēce cōdānerēt toutes choses en general. Luy desplaisoit il, q̄ la

paix

paix fut estenduë par toute la rondeur de la terre ; ou que l'on eut obtenu des victoires sans le dōmage des armées ? Qu'ils ne souffrissent iouyr de sa meschante ambition, & mauuais desir; cet hōme marry du biē de la Republicque. Qui n'estimoit les fors, les theatres, les temples, non plus que des deserts: & qui menassoit de se bannir soymesme. Et puis qu'il luy estoit aduis, que leurs iugemēs n'estoient arrestz; ne les iuges Magistrats; ne que ce lieu fut la ville de Rome: qu'il se separast donc, & allast viure hors la cité; l'amour & charité de laquelle, il auoit dés long temps renoncee, & maintenant il en fuyoit la veuë. Pendant que Marcel vsoit de telles ou semblables inuectiues; menassant & regardant de trauers, avec les yeux & visage enflābez, ceste tristesse accoustumee (qui par le danger de tant de gens, se renouuelloit si souuent) n'apparut pas lors au Senat: mais bien vne nouuelle & poignāte frayeur les saisit; regardans les mains & armes des soldats là presens: avec ce que l'image, & semblance venerable du mesme Trasea, se representoit en leur fantasie: & s'en trouuoit qui auoiēt pitié d'Heluidius; lequel sans en pouuoir mais, seroit puny pour auoir pris vne bonne alliance. Qu'auoit on mis sus à Agrippin, sinon la miserable fortune de son pere: lequel innocent (comme luy) auoit esté occis par la cruauté de Tibere. Quāt à Montan, qui estoit si bon & honnestre ieune homme; & que l'on n'auoit conuaincu de composer des vers mal difans, le falloit il bannir pour auoir fait connoistre son gentil esprit?

XVI. LIVRE DES ANNALES

*Accusation de Barea Soran. La miserable harangue
de sa fille au Senat. Mort dudit Soran.*

CHAPITRE VII.



AIs ce pendant Ostorius Sabin, accusateur de Soran entra & commença son accusation, par l'amitié qu'il auoit avec Plaute: & que Soran estant Proconsul d'Asie, auoit plustost cherché d'acquérir reputation, que fait l'vtilité publique: entretenant les seditions des villes. Tout cecy estoit vieil: mais pour vn cas nouveau, il entremesloit la fille parmy le danger de son pere: disant qu'elle auoit donné del'argent aux Magiciens. A la verité, cela estoit aduenü par la deuotion & pieté de Seruilie (ainsi s'appelloit la damoiselle) laquelle tant par amour qu'elle portoit à son pere, que simplicité de ieunesse; n'auoit toutesfois enquis autre chose, sinon si sa maison demeurroit en bon estat; & si Neron se pourroit appaiser: si l'yssüe du procez que le Senat faisoit, ne seroit point dangereuse pour son pere. Ayant donc Seruilie esté appelée pour comparoir au Senat; ils se tindrēt debout separez deuant le Tribunal des Consuls: le pere ja bien aagé d'vn costé, & de l'autre la fille n'ayāt attainit l'age de vingt ans; veufue, & desolee (pour ce que n'agueres son mary Annius Polliön, auoit esté banny) & qui n'osoit regarder son pere: duquel il sembloit qu'elle eut augmenté les charges & le danger. Lors ayant esté interrogée par l'accusateur; si elle n'auoit pas vendu ses ioyaux

aux de mariage, & osté de son chef vne bague, pour auoir argent à fin de faire vn sort & sacrifice de Magie: s'estant premierement ietee à terre, pleurant longuement sans sonner mot: & puis embrassant l'autel: 359
 Le n'ay (dit-elle) inuocé aucuns dieux malins; ie n'ay fait aucuns enchantemens ou maudissons, & n'ay par mes prieres miserables demandé autre chose, sinon qu'il pleust à vous Cesar, & à vous Senateurs sauuer la vie à mon bon pere. Je leuray baillé mes pierreries, robbes, & ioyaux, que les femmes de ma qualité portent; d'aussi bon cueur que mon sang, & ma vie, s'ils me l'eussent demandée. Je m'en rapporte à ces gens là, que iamais ie n'auois cogneus au precedent, comme ils nomment ces sacrifices: de quelle science & art ils se messent. Je n'ay parlé, ne fait aucune mention du Prince, sinó en l'appellât avec les autres dieux. Et toutesfois mon pere miserable, n'en sçait rien: & si c'est crime, c'est moy seule qui a failly. Comme elle parloit encores, Soran respond & s'escrie; qu'elle n'auoit point esté avec luy en la Prouince. Et Plaute ne pouoit auoir cognoissance d'elle, à cause de son basaage: & n'auoit point esté nyllee parmy les fautes de son mary: ains estoit seulement accusée de trop grande pieté. Et pour ce qu'ils desioignissent sa cause d'avec celle de sa fille, quoy qu'il en deurt aduenir. Quant & quant, il se iettoit entre les bras de sa fille, qui luy venoit à l'encontre, si les Liçteurs estans entre deux, ne l'eussent empesché. Apres cela, on fit venir les tefmoins. Mais autant de pitié & compassion, que la

XVI. LIVRE DES ANNALES

cruauté de ceste accusation auoit esmeuë au cueur des assistans; tout autant de courroux & d'ire, en fit sortir P. Egnace tesmoing. Cestuy cy estant cliët de Soran & lors corrompu par argent, pour accabler & destruire son amy; contrefaisoit la grauité d'un Stoique representant de contenance & visage, vn homme nourry & accoustumé à tout bien & honneur. Au demourant sous vn esprit traistre & malin, il cachoit son auarice & meschante volonté. Lesquelles mauuaises complexions, ayans esté descloses & euentees par l'argent: il seruit d'exemple, pour se donner garde de telles gens: lesquels tout ainsi qu'il sont enuelopez, de tromperie, ou tachez de meschancez: couurent aussi sous vmbre de bonnes sciences, leurs faux semblant, & faine amitié. Toutesfois le mesme iour, descouurit vn acte honnestes; digne de seruir d'exemple; fait par Cassius Asclepiodot: lequel (à cause de ses richesses) estant le premier homme du pays de Bithinie, n'abandonna non plus Soran en sa ruine & danger, qu'il festoit monstre son amy en sa vogue. Parquoy il fut denué de tous ses biens; & enuoyé en exil. * Enquoy se peut cognoistre l'équité & iustice des dieux, par ces bons & mauuais exemples. Liberté fut donnée à Trasea, Soran, & Seruilie, de choisir telle mort qu'ils voudroient. Heluidius, & Paconius furent chassés d'Italie. Montan rendu à son pere: apres luy auoit dit qu'il ne sentremettoit aucunement de charges publiques. * Et furent donnez à Eprius & Cossutian accusateurs, à chacu

cinquante

cinquante mil Sestertium: à Ostorius douze mil, avec les marques de Questeur. Lors comme le iour tournoit sus le vespere, le Questeur du Consul fut enuoyé vers Traſea, qui estoit en ses Iardins. Il auoit esté visité de grandes compagnies d'hommes & femmes nobles: & lors escoutoit fort ententiement Demetrius docteur de l'opinion Cinique: auquel ainsi que l'on pouuoit deuiner par son visage, & quelques mors (si aduenoit qu'ils parlasseſſent plus hautement, & clairement) il ſ'enqueroit de la nature de l'Amē, & separation de l'esprit & du corps: iusques à ce que Domice Cecilian, l'un de ses plus prieuz amis arriua, qui luy declara ce que le Senat auoit ordonné. Parquoy Traſea voyant ceux qui estoient là presexplorer & ſecrier, il les admonesta de vuidier incontinent, & ne vouloir se mesler au danger d'un condamné. Persuadant Arrie sa femme (qui essaieoit de mourir comme son mary, & suiure l'exemple de sa mere) demourer en vie: & ne vouloir oster à leur fille le seul recours qui luy restoit. Apres cela il sort en un Portique, ou le Questeur le trouua ayant contenance plus d'homme ioyeux, que triste: pource qu'il auoit esté aduertty, qu'Heluide son gendre, estoit seulement banny d'Italie. Depuis ayant ouy l'arrest du Senat il fait entrer en sa chābre Heluides, & Demetrius: & tendant les veines de ses deux bras; apres qu'il vit le sang sortir & qu'il eut fait aprocher le Questeur: en respendant un peu de son sang sus la terre:

XVI. LIVRE DES ANNALES

- Offrons (dit-il) cecy à Iupiter Deliureur. Regar-
- dez ieune homme, & toutesfois Dieu vous gard
- de tel malheur: ce neantmoins vous estes nay en tel-
- le faison, qu'il est besoing d'asseurer son courage, par
- exemples de cōstance. Puis voyant que la longueur,
- luy faisoit endurer de griefs martires se tournant
- vers Demetrie.

Le reste du Latin est perdu.

FIN DV SEIZIESME LIVRE
DES ANNALES DE P. CORNIE
TACITE CHEVALIER ROMAIN.

ANNO-



ANNOTATIONS.

LECTEUR i'ay esté contraint de faire vn commentaire, tant pour declarer beaucoup de faits de l'histoire de cet auther, que pour rendre raison de plusieurs mots, que i'ay tournez autrement qu'il ne semblent deuoir estre de prime face. Comme pour exemple: ie me suis dispensé de mettre aucuns noms propres, en Son François laissant les autres, iusques à ce que ie m'apperçoie que les oreilles y soient accoustumées. T'aduertissant neantmoins, qu'il y en a qui sans vice ne peuuent estre changez: ainsi que *Marius Petus* & autres qui sonneroient trop mal en nostre langue.

LIVRE VNZIESME.

Fueillet 1. b. lig. 10. Car son opinion estoit: ie pouuois dire il, ou elle creut, mais l'auther laisse incertain, si se fut Claude ou Messaline. Iasoit que Dion semble monstrier, que Messaline fut la principale cause de la mort d'*Asiatic*. Et pour ce ie conseille à ceux qui voudront bien entendre Tacite, lire Dion, Suetone, & Xiphilin.

Mesme lig. 12. beant est le plus propre mot pour *Inhians*: & lequel i'ay ramené en vsage, pour ce qu'aucunes prouinces de ce Royaume, s'en seruent en mesme signification que Tacite.

Mesme lig. 13. *achepta* & 14. elleuoit: aucuns lisent en

ANNOTATIONS.

Latin ceptos, excollebat: pour emptos extollebat: & lors il faudroit dire commencez par Lucullus, lesquels il entretenoit.

Mesme lig. 17. estoit aussi de la partie. Iunogitur qui est Impersonel, ma contraint user de ce mot partie car il faudroit deuier, si Sosibius se ioignit de son vouloir, ou à la sucitation de Messaline.

Lig. 19. hōmes riches ennemis des Princes: aucuns lisent auri vim atq; opes & ainsi il faudroit dire. que les grādes richesses & moyēs, deuoiet estre suspects: on estoient contraires aux Princes. Or cet Asiatic estoit si riche, qu'il voulut tenir l'estat de Cōsul (ce dit Dion) un an durant. Pource qu'il pouuoit porter la despence des iēux & frais, qu'il conuenoit faire en tel estat. Ce qui possible luy fit d'auātage enuier ses biēs.

Lig. 20. qu'Asiatic principal auteur. J'ay adiousté Caius: qui n'est pas Iules premier des Cēsars; ains celuy qui fut surnōmé Calligule, lequel Tacite nōme presque tousiours seulēmēt Cesar. Et Dion au 59. liure dit que cet Asiatic voyāt les soldats Pretoriēs murmurer, demādans qui auoit occis Caius; monta en un lieu duquel il pouuoit estre veu: & cria, pleinst à Dieu que ie l'eusse occis: quoy oyans les soldats cefferent leur tumulte.

Lig. 23. forfait. Il y a au Latin facinoris: que ie n'ay voulu tourner fait ou acte: d'autant que ce sont courtisāns qui parlēt, lesquels voulās faire trouuer plus mauuaises les actiōs d'Asiatic, vsent de paroles les plus odieuses qu'ils peuuent trouuer.

Lig. 24. ville, par tout ou le Latin dit vrbs il entēd Rome: & pource quand vous rencontrerez ville, entendez de Rome par excellence.

Lig. 25. Prouinces, les Romains apelloient Prouinces les cōtrees subietes de l'Empire. Comme Gaule, Hespagne, Affrique. Ils y enuoioient des Magistrats Romains, pour faire la iustice &

ANNOTATIONS.

fice & autres charges du gouvernement.

Lig. 26. garnisons, le Latin dit exercitus ie sçay bié que le mot signifie armee: mais aussi il faut cōsiderer le point du tēps duquel l'auteur parle. icy les soldats n'estoiēt en cāpagne, guerroyās l'ennemy: ains tenus en des forts appelez castra: depuis si longuemēt habitez par les soldats, qu'ils deuindrēt bōnes villes. Telles que sont Constāce, Basle, Spire, Vormes, Maiēce, Bonne; Cologne: villes assizes sus le Rhin. Et ce qui m'a fait dire garnison, est à l'imitation des nostres. Car nous appellons garnison de Mets, Calets, & Piemont; les forces de gens de guerre, que le Roy tient en ces lieux.

Mesme, de Germanie. Le pays assis deçà sus le rinage du Rhin, s'appelloit prima & secunda Germanica Prouincia: en la partition de l'Empire..

Lig. 27. Vienne. Ie croy qu'il entend de la nostre de Daulphinē; surnōmee aussi Pretoria. Et qu'Asiatic pouuoit esmon- uoir le pays de Gaule, pour les aliances qu'il y auoit.

Fu. 2. a. Crespī, ie me suis aydē de to^les mots anciē q'ay trou- uez ia tournez. Cōme Crispin^o Cresspin: Antoni^o Antoine.

Mesme, Capitaine des gardes de son palais. Quelque- fois i'ay aussi dit Prefect du Pretoire. Et ne me suis pas curieuse- mēt souciē, d'user tousiours d'un mesme mot, pour ceste premiere impressiō: à fin de sçauoir ce que l'on en dira. Qui voudroit tour- ner mot à mot Præfectus Pretorio: il sembleroit que ce fut le Preuost de l'hostel, ou plustost le Maire du palais. Car ce Præ- fectus eut à la fin iurisdicō. Mais son vray estat estoit, de cō- māder à la gardē de gēs de pied & de cheual, que les Empereurs tenoiēt en vn fort, basti hors la ville de Rome. Ou ceux qui n'e- stoiet de seruice, se reposoiēt pendāt que les autres faisoiet la gar- de, à l'etour du Pretoire ou palais de l'Empereur. Lig. 2. Vistes & disposē foldats le Latin dit citis qui signifie aussi legers.

ANNOTATIONS.

Ligne 6. de l'Empereur. Ce que trouuerez en lettre Italique est adionsté au texte, pour esclarcir l'auteur.

Lig. 8. par argent & vilaines paillardises. I'ay pensé que stupro se pouuoit ainsi doucement interpreter: sans autrement ou plus ouuertement decouurir telles ordures. I'en ay autant fait de mollitiem corporis ou ie n'ay voulu dire que impudicité de sa personne. Je ne me fusse arresté à cecy, n'eut esté que ie sçay bien que quelqu'un ma blasmé, cōme n'ayāt pas entendu ce que vouloit dire l'auteur.

Lig. 14. entrant en ses deffences. Dion esclarcit cecy au 60. liure.

Lig. 27. suite d'Antonie le Latin obseruassent. Auoient fait la Cour: sonne mal en François.

Lig. derniere la grand Bretaigne. Je n'ay voulu dire Angleterre.

Lig. 3. tas de bois sus lequel, i'ay adionsté au texte les mots de lettre Italienne, pour esclarcir cette façon ancienne de brusler les corps, de tous trespasssez.

Feuillet 3. lig. 10. quinze Sestertium. I'eusse mis au texte la somme selon le conte de Budé: si les sçauans estoient d'accord que son calcul fut bon. C'est pourquoy i'ay laissé toutes les sommes en leurs mots Latins. Le Sestertium vaut au calcul dudit Sieur Budé 25. escus couronne au pris de 35. sols pour escu, ce que ie dis à fin que si tel conte plait à aucun, il se reigle dessus, il y auoit le petit Sesterce ou Sestertius, estimé par le mesme à x. deniers obole.

En la mesme ligne avec les marques de Preteur. Estant l'ambüion accrue, pource que les Senateurs & magistrats, alloient vestus de robes declarans leur qualité; d'autres qui n'auoient pas exercé les dignitez, obtenoient du Prince tels priuileges

ANNOTATIONS.

leges. *Lig. 28.* nummes, mil nummes valloient un Sester-tium: c'est à dire 2 s. escus comme dessus.

Page b. lig. loy Cincia d'icelle parle Tite-Live au 34. livre qui a (dit Caton le vieil) esté cause de faire la loy Cincia touchât les dons & presens, sinon pource que le peuple estoit ia comme taillable du Senat.

Lig. 22. peste des plaids al. du barreau. Car il entend la du For, ou l'on faisoit iustice.

Lig. penultieme deniers mal pris. Iay par tout ainsi tourné Repetundarum laquelle loy touchoit principalement les gouverneurs des Prouinces & officiers; qui durant leurs charges auoient pris plus que la loy ne permettoit. Toutesfois on l'estendit: & en peut ou veoir les particularitez au 48. livre des Digestes, sous le tiltre ad legem Iuliam repetundarum.

Fueil. 4. lig. penultieme châger de robbe, le Latin dit, qua toga enitelceret, qui se pouuoit aussi interpreter par un mot commun, changer de cotte. Et ie vous ay dit cy dessus, que les Magistrats & gens honorables, estoient distinguez par enseignes & marques certaines.

Lig. 3. & esté présenté le Latin dit vectum ie ne sçay si par force ou de son gré: car le mot Latin le signifie aussi. Et Dio recite que Mithridates inuité par Caius de le venir veoir: fut par luy retenu.

Lig. 9. & la couronne estoit en bransle, le Latin dit summa imperij ambigua. que Tacite a tousiours pris pour l'estat: ainsi que tost apres parlant de Silius, ne Silius summa adeptus sperneret adulteram.

Lig. 16. trois mil stades. Il contenoit 12 s. pas qui font la 8. partie d'un mil Romain.

Lig. 5. en amitié le Latin inter se concedere: qui si-

ANNOTATIONS.

gnifie se respecter & defferer l'un à l'autre.

Fueil. 5. b. lig. 7. bien auant le Latin dit penitus qui aussi peut estre pris pour pour iamaïs: tousiours.

Lig. 13. gouuerneur le Latin dit legato.: qui est lieutenant general.

Lig. 26. basti des marques & enseignes. le ly monimentis & non pas munimentis.

Lig. 28. Arsacides. Les Parthes porterent tant d'honneur à Arsaces fondateur de leur Royaume, que de son nom ils appellerent tous les Roys ses successeurs. Ainsi qu'à Rome Césars les Empereurs & en Egypte Pharaös & Ptolemées leurs Roys.

Lig. 1. ieux seculaires estoient ainsi appelez, pour ce que de cent en cent ans (qui est le temps d'un siecle) ils se faisoient. A ceste cause (dit Herodian) les heraux que les publioient; disoient qu'on vint voir des ieux non iamaïs veuz: & que iamaïs on ne voyroit.

Fueil. 6. b. lig. 2. quinze hōmes prestres. Il ne se faut scandalizer si i'ay ainsi tourné Sacerdos: non plus q̃ Piacula, supplicationes, par dōs & processōs. Car ayās tels mots esté pris des Payens, nous ne paianisons point, ṽsans de tels noms: puis que noz pierres ne s'adressent aux Idoles, mais au vray Dieu.

Lig. 7. Cirque estoit un long espace, comme une lice: environné de sieges ainsi qu'un theatre. Vitruue décrit le theatre au liure 5. chap. 3. vous trouueriez une partie des esbats qui se donnoient au Cirque, escrits par Cassiodore en son 5. liure intitulé Variarum.

Lig. 9. meslee appellee Troye: ce tournoy est décrit par Virgile au 5. liure.

Lig. 17. merueilles estrangeres: comme d'Hercules & d'Alexandre.

Fueil.

Fueil. 7. lig. 14. la fortune c. d. d. c. e. i. transportee : il me semble auoir esgard à la fortune d'or, qui estoit posée dans la chambre de l'Empereur : & laquelle apres sa mort, l'on transportoit chez son successeur. Voyez Herodian.

Lig. 19. vlsnt de la dignité de Censeur: le Latin disant vsurpans : semble le prendre comme les iuriscsultes ; pource qu'il ne faisoit pas son deuoir de senquerir aussi bien des fautes de sa maison, comme de celles de dehors: comme s'il vouloit dire que pour le moins en cela, faisoit il quelque chose de la charge de Censeur. Quant à l'estat de Censeur, voyez Plutarque en la vie de Caton Censeur.

Lig. 21. theatre voyez sa composition dans Vitruue.

Lig. 22. Seruoit de fatiste aux ieux, le Latin carmina Scene dabat : nous appellions iadis fatistes, ceux qui cõposoient les farces & moralitez. Que ie pense venir de Poëta.

Lig. 25. de prester aux fils de famille. Car ils sembloient donner occasion aux enfans de souhaiter la mort de leurs peres, pour se deliurer de l'importunité de leurs creanciers : de sorte q̃ depuis Vespasien ordõna, que mesmes apres la mort des peres ils ne peussent demãder tels prests, lequel arrest du Senat s'appelle Macedonian: du non du creancier qui donna occasion de le faire.

Pag. b. lig. 3. figures d'animaux. Cestoiẽt lettres Hieroglyphiques ou sacrees, lesquelles Orus Apolon a interpretees.

Pag. lig. 25. fors: l'ay ainsi translaté forum, quand ie n'ay sceu deuiner si c'estoit le marché public, au lieu du plaidoyer. Cõbien que ie croye que le lieu du plaidoyé, fut tout contre la place publique, ou se vendoiẽt les viures & choses communes : ainsi que nous voyõs les Castelletts de Paris & Orleans, estre pres le marché. Tãt y a qu'à Paris no⁹ appellõs encor le for l'Euesque le lieu ou son iuge lay red iustice aux suiets episcopaux, q̃ sõt laics.

ANNOTATIONS.

Lig. 28. Aruspices c'estoient gens qui deuinoient par l'inspection des petites veines, qui sont dedans le corps des bestes. Ceste science vint d'un certain Tages, que les anciens pensoient estre sorty en forme d'enfant d'un sillon de terre qu'on labouroit, comme disent Ciceron de diuinatione liure 2. & Ammian liure 21.

Cheruscien. Altamer sçauant Allemand, pense que ce soient ceux de Misnie, & Tiringe.

Cathes, le mesme dit que ce sont ceux de Catzenelbogen.

Lig. 24. le fils mesme duquel esleué & nourry: car il a dit cy deuant que la femme d'Arminius grosse fut prise par Germanic. voyez le 1. liure des Annales.

Lig. 14. forlignans Latin degeneres. degenerans de la vertu de leurs maieurs.

Fueil. 9. Lombards cela monstre l'antiquité de ceste nation qui n'est pas sortie de Scandinauie si tard que l'on pense.

Cauciens, sont les Ostfrizons, Vestphales, Holsates tirans vers Saxe, & la riuere d'Elbe desquels sont venus partie de noz François.

Caninfate: Ceste nation tenoit partie de l'Isle Batauiene qui est Holande.

Lig. 13. mal aguerris. Je sçay bien que imbelles signifie autre chose, mais aussi on ne peut nier, que les Gaulois ne fussent belliqueux: & que lors la longue paix, leur auoit seulement fait oublier l'usage des armes.

Lig. 22. faire ouurages car en ce tēps là, les soldats faisoient aussi estat de pionniers & mesmes durant la paix, on les occupoit à faire les chaussées, Theatres, & autres ouurages publics.

Lig. 29. Pallisade le Latin vallam ce n'estoit pas seulement la leuee,

la leuee, ou iettee de la terre du fossé, mais aussi vn palis de bois: que le soldat portoit pour clorre le parc du camp, le plantans sus la tranchee.

Fueil. 10. lig. 19. contre vn traistr. Il ne se trouue point que les Romains ayent vsé de trahison, contre leurs vrais ennemis: ains seulement contre Viriat, Sertoire, & autres semblables. Au contraire la courtoisie qu'ils firent à Pirrhe, est notoire. Mais les derniers Empereurs, prattiquerent des trahisons contre les François & Allemans, ainsi que dit Amian..

Page 8. lig. 3. Comme ia il commēçoit à remuer terre le Latin castra molienti. Possible qu'il entend aussi, comme ia il commençoit vn fort. Toutesfois ce qui m'a faict dire remuer terre, est que les Romains iamais ne couchoient en camp, qu'il ne fut clos de tranches & palis, avec portes & tours faites à la haste: des pieux qu'ils portoient.

Lig. 5. Auentures incertaines, le Latin, Incerta Oceani. Dion esclarcissant cela dit: que la chaussee fut faite de peur que le flux de la mer, ne contraignit les rinieres regorger sus les terres.

Lig. 11. au pays Matiac. Il entend d'Affricque, car nonobstant l'opinion d'Altamer, la Zelande est trop basse, pour auoir des minieres d'argent. Aussi que l'on ne trouue point, que Rufus eut esté enuoyé en ce pays.

Fueil. 11. lig. 12. ayant suiuy. Il y a de la diuersité au Latin & pour ce, aucuns veulent dire qu'il faut, ayant esté encheuillieur de biens, ou laquai. Mais c'est trop se hazarder.

Lig. 15. porches. Je l'ay voulu dire, pour ce que c'est vn mot François qui signifie Portique. Car l'on appelle encores à Paris Porches, les saillies de la Tonnellerie & de Greue.

Lig. 20. Questeur. Ce mot comprend beaucoup d'estats &

ANNOTATIONS,

*charges. Car Questor ærarij, estoit Thresorier de l'es-
pargne publique. Questor Pretoris, Enquesteur
ou Commissaire. Questor militaris, payeur de com-
pagnie ou Thresorier des guerres. Questor prouincie,
Reccueur general. De sorte qu'il a fallu laisser le mot an-
cien pour euiter confusion.*

*Lig. 25. de soy nay, la grace du Latin ne se peut represen-
ter autrement. Car il est croyable que Tibere dit videtur ex se
natu, mangeant s'dè ex se natus comme souloient iadis faire
les Romains: ainsi que veyez dans Plaute & Lucrece. L'adiou-
steray que i'ay appris de quelqu'un, que ie ne puis à ceste heure
nommer, que ce Ruffus fut Q. Curce authœur de l'histoire Lati-
ne d'Alexandre.*

*b. Lig. 8. suiuant l'aduis. Le Latin dit censuit. l'eusse v'se
d'autre mot, si i'eusse trouué quel estat tenoit Dolabella.*

*Lig. 17. Dictatures c'estoit le seul Magistrat souverain,
qui se fit durant la liberté des Romains: & fut ainsi appellé pour
ce que la nuit, il estoit dit & nommé par le Consul. L'estat du-
roit six mois, & n'y auoit point d'appel de ses ordonnances.
Mais aussi il n'estoit créé qu'en grande necessité: comme Magi-
strat extraordinaire.*

*Lig. 20. des Curies cela se faisoit quand l'on appelloit le pe-
uple de la ville seule, au For & place publique. Le mot vient de
Curia qui faisoit la dixiesme partie de la Tribu: cōme la Tri-
bu au commencement de Rome, estoit la troisieme partie de
tout le peuple.*

*Lig. 4. Gaule Cheueluë. Puis que les Authunois furent
compris en ceste requeste, cela monstre que la Gaule Cheueluë ne
comprenoit Languedoc seulement: mais qu'elle s'estendoit en la
Celtique.*

Fueil.

ANNOTATIONS.

Fueil. 12. b. lig. 18. autel de Rome, les Romains firent une deesse de leur Rome, & luy bastirent un magnifique temple. Saint Augustin en la cité de Dieu. Prudence Poëte Chrestien s'en moque disant.

Nomenque loci pro numine habetur.

Et le nom de la ville est pour un Dieu tenu.

La harangue de Claude sera mieux entendue, par ceux qui auront leu le premier liure de Tite-Live. Les vies de Romulus & Numa, escrites par Plutarque.

Fueil. 13. Basilicate, ce mot m'est eschappé le Latin dit Lucaenia, ie n'auois pas deliberé mettre les nös modernes dans le texte.

Lig. 22. Atheniens, les conditions auxquelles les Atheniens receuoient les estrangers, sont escrites par Plutarque en la vie de Solon.

b. Lig. 2. Senonois, se furent les Gaulois, qui auoient passé en Italie avec Belouese.

Lig. 14. Peres conscripts; ie n'ay seu trouuer autre mot: car ensemble enroollez estoit trop rude. Tant y a qu'il entend tousiours pour le corps du Senat.

Lig. 16. Les Magistrats, autres veulent que ceste clause se doit ainsi interpreter. Et les Magistrats de la noblesse seule tenoit, furent apres communiquez au peuple, puis aux Latins: & finalement à tous les autres peuples d'Italie.

Lig. 27. Le nō de freres, Lucain en dit autāt des auuergnats. *Fueil. 14.* Censeur, l'ay adiousté qui estoit l'Empereur: à fin de donner mieux à entendre le fait. *Lig. 12.* Renoncer à son estat de Senateur, car pour le tenir il falloit auoir vaillant 12000. Sestercium, c'est à dire 30000. escus couronnes.

Lig. 26. cinq miliōs i'ay suivy Lipsi^{us}. Quāt au lustrū voyez.

ANNOTATIONS.

Paillardises estranges. Iuuenal en la sixiesme satyre en dit d'incrôyables, & Dion aussi.

Fueillet 15. ligne premiere pour se mettre hors de danger & peine le Latin inter anticipitia probatum car il a dit deuant, que la refusant il se voyoit mort.

Lig. 4. c'est le dernier plaisir le Latin disant cuius apud prodigos nouissima voluptas est, laisse incertain s'il entend du mariage ou infamie.

Lig. 15. Auspices c'estoient les principaux qui s'entremettoient d'un mariage.

b. Lign. 6. bestise de Claude. Elle est plaisamment representee en vn dialogue attribué à Senecque: intitule la deification de Claude.

Fueil 16. ligne derniere que fussiez separé. Je sçay bien que disidium signifie discord, dissention: mais il entend icy disidium pour diuorce: puis que ja Messaline estoit mariee: d'autant que ce n'estoit aux femmes, à enuoyer le libelle de diuorce.

b. Lig. 21. Baches voyez leurs folies en Ouide, au 9. liure de la Metamorphoses.

Fueil. 17. lign. 19. Vestalles, estoient filles de grande maison, fort honorees pour ce qu'elles voïoient virginité, d'elles parle Plutarque en la vie de Numa.

Lign. 20. Grand Pontife, les Empereurs prirent cest estat, à fin d'estre plus honorez: & estimez comme sacrez.

Lign. 27. misericorde, compassion, est meilleur.

b. Lig. 9. mesme chariot, il y a gestamine, qui sembleroit signifier litiere à bras. Mais il n'y a pas grande apparence, que plusieurs allassent dans ces litières, portees par six ou huit esclaves au plus.

Lig. 7.

Lig. 7. piquantes Latin maxima cum inuidia est difficile à tourner en cest endroit, car on ne peut pas deuiner si le blasme estoit sus elle, l'Empereur, ou Narcisse: cest pourquoy i'ay dit paroles piquantes.

*Fueil. 18 b. lig. 4. garde, le Latin dit custodé. Je n'ay au-
sè dire Chambellan: & encor moins Cheualier. d'hô-
neur.*

Lig. 15. obeir à ses commandemens. Le conte qu'en fait Dion est plaisant.

*Fueil. 19. pag. b. lig. 6. poussent les huis dedans: est aus-
si bon que heurtent à la porte, que signifie aussi pulse fo-
res.*

*Ligne dernière chastices ceste clause est corrompue au La-
tin.*

LIVRE XII.

*Fueil. 20. lig. 7. criant haut le Latin cœlibi vitæ into-
nanti: Cœlebs signifie aussi bien celuy qui est sans femme,
que celuy qui est veufue Aucuns veulent dire qu'il falloit trās-
later, criant qu'on le laissoit veufue.*

*Lig. 9. & subiet: obnoxio: &: se laisser maistriser
par ses femmes espousees.*

*Lig. dernière Petine auoit esté femme de Clande, qui auoit
eu d'elle vne fille nommée Antonie, de laquelle sera parlé cy a-
pres.*

*B. lig. 20. qui ioindroit sa race: cela est commun à Tacite,
de faire discourir en remonstrances les choses auenir.*

*Fueil. 21. lig. première Domice, estoit le nom propre de Ne-
ron auant qu'il fut adopté par Claude.*

Lig. 16. se mesloit de ses affaires, autres veulent: desli-

ANNOTATIONS.

ra estre de son conseil.

Lig. 22. indiscrettement ils saymoient. *Lipsius* a bien à mon gré esclaircy ce passage par un autre de *Senèque*: qui dit que *Sillan* appelloit sa sœur sa *Iunon*: & chacun sçait que *Iunō* fut sœur & femme de *Iupiter*. Partant *Vitel* pouuoit rendre leurs priuantez suspectes.

Lign. 29. chassé du rang des *Senateurs*. Leurs noms estoient escripts en un roolle comme i'ai dit. Et les *Censeurs* pouuoient les rayer. Voyez *Valere Maxime*, qui en a fait un chap. particulier au 2. liure chap. 4.

B. lig. 2. renoncer au serment. *eiurare*, est ce que les François souloient dire, reprendre sa foy.

Fueil. 22. lign. 26. qui n'auoit iamais essayé: *sua tantum matrimonia experto*: a deu estre ainsi interpreté: car il auoit des concubines. Et il le dit pour *Auguste*, qui auoit ostee *Liui*a à *Tibere Neron* pour l'espouser.

B. lign. derni. condamné par iustice: *addictum quasi & virille &c.* Il a fallu ainsi paraphraser ce passage: à cause du mot *addico*: qui est de Iustice.

Fueil. 23. lign. 17. purgations d'inceste: aussi estoit ce moquerie, de condamner *Sillan* non conuaincu: & veoir l'Empereur espouser sa niep. ce

Fueil. 26. pa. b. lign. 7. armez à nostre façon. *Ie ly nostris in armis.*

Fueil. 27. lign. 8. royaume paternel. *Patrio*: aucuns m'ont voulu faire croire, qu'il entend royaume auquel il estoit nay.

Fueil. 28. lign. 20. les triomphes s'acquierent. Voyez *Val. Max. liur. 2. chap. 3.*

Lign. 23. *Procurateur*. I'eusse volontiers dit *Thresorier*, ou *Receueur general*: mais ces *procurateurs Romains*, auoyent diuerses

uerfes charges : les vns manians le bien du Prince comme receueurs du Domaine, les autres auoient charge, de leuer les deniers des aides des prouinces: rendoient iustice, & seruoient de ce que iadis les Contes en France, & Vicontes en Normandie. Et se trouue que ces Procurateurs, ont eu charge de gens d'armes.

Fueil. 28. b. lign. 3. Aquille. Icy doit estre le commencement d'un chapitre. Le sommaire duquel est Agrippine fait mourir Lolie Pauline par ialousie : chassie d'Italie Calpulnie. Les Itureans & Iuifs sont ioints à la prouince de Sirie. L'enceinte de Rome chap. 6. la faute est venue pource que le translateur n'ayant diuise le liure par chapitres dans sa copie: la fueille ou les sommaires furent escrits ne s'est trouuee nette

Lign. 15. mariage avec C. Cesar. C'est l'Empereur successeur de Tibere: elle estoit si riche, qu'un iour elle se trouua en un banquet, parée de ioyaux estimez un million d'escus.

Lign. 25. du pis qu'elle peut. Citra vltima stetit : ne la fit mourir: ne luy osta la vie.

Fueil. 29. lign. 5. Soheme & Agrippe. Voyez Iosephe.

Lign. 8. Pomerium, Confus, Larres, Curies: Voyez Plutarq. en Romul. en Numa.

Fueil. 30. lign. 10. accorder vne loy. Cela s'appelloit Rogatio: & l'ordonance qui s'ensuiuoit, plebiscitum: qui estoit la plus seure façon des loix durant la Republique.

Lign. 16. officiers serfs. le Latin. seruilibus officiis &c. Le passage semble corrompu, & se trouuent aucuns qui l'interpretent. Il prenoit à moquerie, les caresses que mal à propos sa mere luy faisoit, cognoissant son faux semblant.

ANNOTATIONS.

Pag. b. lig. 1. des courſes, latrocinia agitantium *i'ay* toujours ainſi tourné latrocinium: quant il a eſté queſtion de guerre.

Fueil. 32. b. 25. detourne la guerre. *Je n'ay point trouué de mot, pour transfert bellum: car les hommes de guerre a qui i'en ay demandé conſeil, diſent que transporter la guerre, n'eſt pas un terme pratiqué entre eux.*

Fueil. 33. lig. de ſes meilleurs ſoldats, le lieu eſt corrompu: *Et ie croy qu'il ne ſeroit mauvais lire, Armatorum ou meliorum.*

Lig. 17. outragez en leurs perſonnes: c'eſt batus & faits priſonniers.

B. lig. 6. voute de leurs eſcus. *Cela ſ'appelloit teſtudo pource que ces eſcus ioints enſemble, repreſentoient l'eſcaille d'une tortue, la façon en eſt repreſentee en Tacite meſme au 19. liure ou 3. de l'hiſtoire.*

Fueil. 34. b. lig. 29. Manipules ſe prent quelque fois pour toute la compagnie, contenant ſoixante hommes: ou pour le chef de ceſte bande. Manipularis eſt le ſimple ſoldat.

Lign. 3. deſchargees de bagage. *Aucuns interpretent expeditas cohortes des Cohortes de cheuaux legers: comme auſſi, citi milites.*

Fueil. 35. lign. 9. bandouliers: *i'ay tranſlaté ainſi preſque par tout latrocinium.*

Lign. 16. de l'Empereur. *Il eſt incertain ſ'il entend de Oſtorius, qui eſtoit chef de l'armee: qu'on appelloit auſſi Imperator: ou de Claude ſouuerain Empereur.*

Lign. 18. Sicambriens. *Se ſont les vrais peres des François. Et ce paſſage en Gaule, me fait ſoubſonner que noz François, ont eſté toujours depuis ſoudoiers des Romains.*

Lign.

ANNOTATIONS.

Lign. 5. robbe d'homme. C'est adire Fogue. Car celle d'enfant s'appelloit Pretexte. Qui estoit conuerte de broderie cramoisie.

Lig. 10. Puissance de Proconsul. C'est qu'il fut comme Consul hors la ville.

Lign. 13. Congiarium. Il se trouue des reuers de Medailles, de Titus portant inscription de Con. Ter. R. R. I M P. Dat. Ou l'on voit un eschauffaut, portât un hōme assis : & d'autres qui tiennent comme des palettes marquées: ie croy de la tessere ou somme qu'il faillloit que chacun receut.

Fueil. 37. lig. 19. car c'estoit. l'ay leu voluerat: aucuns lisent haecten us valuerat: entendans que Vitel auoit iusque là seulement esté fauorise.

B. lign. 1. L'audience de la iustice. C'estoit chose toute coustuniere aux Empereurs de Rome. Et nos sages Rōis l'ont fait, tesmoin Fredegair: qui dit que Dagobert en perdoit au commencement de son regne, le boire & le manger, pour y vaquer. Eginard a laissé escrit, que Charlemagne y vaquoit mesmes en s'abillant. Le sire de Ioinuille, que S. Louis la rendoit estant assis au pied d'un chesne. Et Philippes de Comines en louë Charles huietieme. Aussi est ce l'estat des Rois: Et le vray moyen de se faire craindre & aymer.

Lig. 8. La douceur de l'hyuer. le li modestia hiemis & si i ay adiousté, qui ne ferma point la mer, pour esclairsir le texte.

Fueil. 40. lig. dern. Lasche vie qu'il menoit. l'ay ainsi tourné ce passage qui semble corrompu.

Fueil. 41. b lign. 13. Mathematiciens. Il entend les deuineurs: & non pas ceux qui faisoient profession de l'Arithmetique, Geometrie, Musique, & Astrologie qui sont les vrayes

ANNOTATIONS.

sciences Mathematiques.

Lign. 4. Il fut ordonné. *Ce lieu est corrompu au Latin.*

Fueil. 42. lign. 17. Attacha en public. *Les Senatusconsultes remarquables grauez en cuyure, estoient attachez par les temples, fors, & autres lieux publics.*

Fueil. 42. lign. 19. Mais son frere Fœlix. *Voyez Iosephe, le deffaut qui se trouue, doit parler des causes de l'emotion des Iuifs: laquelle est escrete par Philon Iuif.*

Fueil. 43. lign. 26. Bricoles . pour Catapulle Baliste: ce sont mots anciens François.

Page b. lis malfaicteurs. *Le Latin inter fontes, semble dire que ce fussent gens condamnez à combattre: & non pas Gladiateurs acheptez.*

Lig. 4. Chargé de la cause des Iliens. *Tous conquerans ont volontiers esté bien disans. Et non sans cause les Romains, ont fait cas de l'eloquence. Car elle émeut les courages, & fait trouuer faciles, mainte choses qui ne le sont.*

Fueil. 44. Bologne. *l'ay adiousté la grasse, pour oster l'ambiguité: à fin que nos François ne pensassent que ce fust celle qui est sus la mer.*

Pag. b. lign. brigue d'Agripine. *le mot ambitû, m'a semblé deuoir estre ainsi interpreté.*

Lig. 27. requestes Sempronienues, loix Seruiliennes, *les mots Latins ne se peuuent declarer en François.*

Fueil. 45. Ceus, *le Latin est corrompu: & ce que j'auois mis pour memoire, est entré au texte par oubliance.*

Fol. 47. pag. b. comme femme de seruice: *cela interprete l'obscurité, qui se fut trouuee en ce lieu.*

LIVRE XIII.

Fueil. 49. lig. 11. rudes Emperceurs. *Tacite n'vse gueres du mot*

mot *dominatio*, qu'il n'entende violence: & *rigueur*.

Pag. b. lign. 9. bien particulier, le *Latin rei familiaris*: car les Empeurs auoyent plusieurs sortes de reuenu: soit de domaine ou autrement.

Fueil. 50. Liſteurs, c'estoient comme bedeaux ou sergens, portans des faisseaux de verges deuant les magistrats: pour executer leurs commandemens.

Lig. 10. Flaminie. Flamen estoit vn Prestre de quelque Dieu, ou deesse Romains.

Pag. b. lig. 7. peser les mots. I'ay autrefois pense qu'il faisoit lire au *Latin expandendi*, pour estendre: car l'eloquence consiste à bien & gentiment scauoir estendre vn subiet. Et celuy là n'est pas eloquent, qui ne dit que trente ou quarante mots; ains celuy qui le ſait bien deduire: Et icy il est questio d'une cōtinuelle oraison.

Fueil. 51. lign. 17. ordonnances de Claude. Car il a dit au 11. liure que les Questeurs estoient contrains de ce faire.

Lign. 23. separee d'un rideau. Le *Latin* est corrompu & au lieu de *aditum*, semble qu'il faille *auditum*.

Lig. 30. deshonneur qui s'apprestoic. Car il a dit au 12. liure que les Romains ne trouuoient pas bon, que les femmes presidassent aux actes publics.

Fueil. 52. Ouation. La difference qu'il y a du triomphe, & Ouation: est escripte par Plutarq. en la vie de Marcel.

Fueil. 54. pag. b. les plis de la robbe. Je n'ay pas voulu dire son sin: car autre chose est *sinus* en *Latin*, que *sin* François.

Lign. 21. aprocher du reste. On peut aussi dire que ce n'estoit pour augmenter ses bagues, ornemens ou ioyaux, ou qu'elle n'en seroit pas mieux parée. Car il semble que *Cultus*, s'entende ainsi en ce lieu.

ANNOTATIONS.

Fueil. 55. lign. 20. aduançoit les mains. *Intendere manus, signifie aussi presenter le poing.*

Lign. dern. festes de Saturne, Voyez Plutarque en Numa.

Fueil. 57. lign. 4. franchise de la table. *sacra mense, les Payens benissoient aussi la table: prians les dieux.*

Pag. b. lign. penultime. chacun abandonna la porte: car c'estoit la coustume, d'aller les matins trouuer les grands seigneurs Romains: & les accompagner au sortir de leurs maisons, marchant deuant eux, comme encores l'on fait deuant les Cardinaux à Rome. C'est ce que dit *Marzial. Tumidi ante ambulo regis.*

Fueil. 58. lign. 24. enuahir de rechef l'Empire. *Coniugioque eius etiam Imperio.* Il y a quelque omission, ou transposition de mots au Latin, & aucuns veulent dire. Et l'espousant & faisant Empereur, enuahir de rechef la Republique

Fueil. 59. pag. b. lign. 7. de iuger il y a de la faute: *Et* pense *Lipsius* qu'il faut lire *vindicaturus.*

Fueil. 60. lign. 28. sainte reueuë, ceste procession s'appelloit *Lustratio.* Voyez le 2. liure de *Tite Liue.*

Fueil. 61. lign. 15. se trouuassent, le Latin assideret, repeté deux fois, me fait soubçonner que les soldats fussent assis.

Lign. 16. fraude des affranchis: le Latin est fort corrompu: & se peut diuersement corriger & entendre.

Pag. b. lign. 1. coudoyer. Ce lieu est corrompu. Et pource chacun y pourra mettre ce qui luy semblera meilleur.

Fueil. 62. lign. 25. ester à droit. Je pense que c'est le meilleur

Pag. b. lign. 26. plus que de coustume. Le Latin est obscur

ANNOTATIONS.

ſcur, & ſe peut entendre, les honora extraordinairement.

Fueil. 63. lig. 13. ſciēce des loix. Elle eſtoit ſecrete: & lors il y auoit peu de gens qui les ſeuſſent, car il failloit auoir permiſſion du prince.

Pag. b. lign. Annales. Ceci monſtre la difference des Annales & iournaux. Meſmes aucuns veulent que l'on appelle Annales les choſes digerees par annees, & qui ont eſté faictes long temps deuant l'aage de celuy qui eſcrit. Et quel'hiſtoire eſt proprement, ce que l'auteur à veu, ou ouy dire à ceux qui ſe ſont trouuez à l'affaire.

Lign. 15. à l'aquit de ſes debtes. le Latin ad retinendā populi fidē: ſe peut auſſi entendre, pour entretenir le peuple en ſa fidelité. Car Tibere mit auſſi de l'argent au theſor public, pour aider le peuple contre les uſuriers.

Fueil. 64. lign. 9. ſuperſtitious eſtrangeres: aucuns penſent que ce fut le Chriſtianisme. Ces procéZ domeſtiques eſtoient introduits à fin de n'euenter les ſecrets des maiſons. Choſe tres-honneſte, & que les eccleſiaſtiques deuoyent ſuiure, en aucuns points, touchant les ſeparations pour les mariages: r'enuoiant la cognoiſſance aux proches parens des parties.

Fueil. 65. lign. 24. ſubiets à leur profit. Nitidi & quaſtuoſi. Aucuns diſent eſpagnans, bragards, mignards.

Pag. b. lign. 29. Primipile: aucuns veulent dire, Centenier du premier rang.

Fueil. 64. lign. 21. fit trainer le proces: traxit: durer, euſt eſté auſſi bon, mais ie ne puis dire, difera de faire le proces iuſques à la fin de ſa vie.

Pag. b. penult. richelles de leurs predeceſſeurs. Aucuns liſent habitas opes: & lors il faudroit qu'ils ſouloient auoir.

ANNOTATIONS.

Fueil. 66. lig. 23. que par armes. Je pouuois aussi dire qu'en combatant.

Fueil. 67. lign. 12. archers. Il entend les hommes de cheual Parthes: qui estoient bons archers.

Fueil. 68. lign. 4. bricoles: liberatoribus funditoribusque. l'ay vſe de Dondaines & Bricoles, pour autant que ſe ſont vels mots François, qui ſignifient Catapulta, funda ballista Quas au mot boulets: ie ſoutien qu'il eſt bon pour glâdes: car à la verité c'eſtoient boulets de plomb, que laſchoiët des fundes, & les bricoles: les dondaines, iettoient des groſſes boules de pierre, d'un *Et* deux pieds de Diametre

Fueil 69. lign. 6. coureurs. le Latin, exploratores: ſe peut aussi prendre pour eſpies.

Lign. 29. ſalué Empereur. les chefs d'Armées durant la Republique, ne prenoient ce nom qu'il ne leur fut donné par l'armée: apres auoir fait quelque bel acte.

Fueil. 71. lign. 29. veiller en ſa chambre. les ſeigneurs qui auoient beaucoup d'eſclaues, auoient guet de nuit: ainſi que voirrez par la harenge de Caſſius cy apres, au 14. liure.

Fueil. 74. lig. 7. contredifoit: m'a ſemble plus propre que corrigeoit: ſi vous ne voulez amendoit.

Lign. 28. à tout le monde. Encores que le Latin diſe generi mortalium: Il n'entēd que des ſubiets de ſon Empire: qui à la verité contenoit la meilleure partie de la terre habitable.

Pag. b. lign. 17. en euidence. Je croy en tableaux penduz en public.

Fueil. 75. lig. 2. tribut. Car quand il eſtoit queſtion, de faire la cotte du cens de chacun: tous biens eſtoient eſtimez.

Fueil. 76. lig. 4. cage. le latin dit conſeſſum Cauec! Cauea. proprement ſe prend pour un lieu enuironé de tous coſtez:

Et

ANNO TATIONS.

Et falloit dire, le rond & fond du Theatre. Caue est aussi bon que Cage, puis que l'un est tiré de l'autre.

Pag. b. lign. 9. armailles & cheualines. Ce qui suit est corrompu: Et m'a semblé le pouuoir ainsi rendre intelligible.

Fueil. 77. pag. b. mares salans: tas de bois allumé: i ai ainsi dit: pour ce que ie pense qu'ils faisoient le sel comme en Lorraïne: Et non pas comme à la Rochelle: car à prendre le Latin crument, il sembleroit à un homme qui iamais n'en auroit veu faire, qu'il fallust ietter l'eau seulement sus le feu, Et non pas la mettre en chaudrons.

Fueil. 78. lig. 3. Ruminal. voyez Plutarq. en Romulus.

LIVRE XIII.

Fueil. 79. lig. 6. trop franc courage. un homme de sçauoir lit, vterum annum: Et ainsi il faudroit dire qu'elle portast des enfans tous les ans. Pag. b. lig. 5. ne fit conscience de rien. Ou qui n'eust point de Dieu: à cause de profani.

Lign. 15. volonté de Palas. Car Narcisse au 12. liure met sus à Agripine, l'adultere de Palas.

Fueil. 80. pag. b. lig. 2. Quinquatrus, estoit une feste qui se celebroit le quinzième de tous les mois.

Lig. croient legerement: ad gaudia venientium: se pent aussi interpreter, qui venoit volôtiers se resiouir.

Pag. b. lign. 29. la regardant &c. arctius oculis & pectori herens. Aucuns disent, luy baissant les yeux.

Fueil 81. li. 8. pour cōpagnie. la structure Latine est difficile.

Lign. 19. trop fortes pour rompre soubz le fais. Car ie lis quam vt oneri cederent.

Pag. b. Empereur. I'ay pensé que le Latin fortuna eius, se deuoit ainsi interpreter.

Fueil 83. lign. 16. frappe mon ventre. I'ay suyui Lipsius, qui

ANNOTATIONS.

à mon aduis, a iustement retranchée cette glose de Seneque.

Lign. 21. lit de table. Les anciens mangeoint couchez & appuyez sus le coulede, & à ceste fin leurs bancs estoient couuers de tapisseries & draps, avec oreillers.

Fueil. 84. lign. 18. pourchassée à autrui. Le Latin semble à aucuns, deuoir estre interpret. & que par la propre cōscience, elle festoit chastiee.

Fueil. 85. lign. 9. chassée: demota, semble vouloir aussi dire ostee, deplacee.

Pag. 5. lign. 6. Menestriers. Latin, ludicrum in modū. N'eust sceu estre interpr. plus deshonestement.

Cistre. I'ay ainsi tourné Citara. I'açoit qu'il semble par les statues d'Apolon, qui se voyent à Rome: Et les images des medailles, que l'instrument tint de la Harpe.

Pratiqué par les Rois & Capitaines. Il entend Grecs. Voyez Plut.

Fueil. 86. lign. 3. excellente Deité. Il entend Apolon, fort renommee pour ses oracles: principalement de Delphes. L'histoire Etiopique en est toute plaine: & Iustin en parle. I'alegue volontiers les liures tournez en François, plustost que les autres.

Lign. 19. sus la Scene. C'estoit comme à nous l'eschafaut, sus lequel se monstrent les personnages du ieu.

Lign. 47. sable de l'Amphiteatre. Ce fut chose deshoneste, iusques à ce que les loix permissent aux hommes de franche condition, combattre pour monstrier leur vertu.

Fueil. 86. pag. b. lign. 12. de l'argent: stipes, se pouuoit tourner: liurees: car encores chez le Roy, appelle l'on ainsi la distribution d'argent, ou d'habillemens aux nopces & festins de parade.

Fueil.

ANNOTATIONS.

Lign. 5. & donnoient des noms. C'est à dire, disoient qu'il estoit beau comme tel ou tel Dieu: & que sa voix ressembloit &c.

Fueil. 87. lign. 12. Poetes: ce lieu est corrompu.

Lign. 26. plaifanter: oblectamēta, signifie aussi les esbatemens royaux: mais celui du texte est le plus vilain.

Fueil. 88. lign. 3. Quinquennaux. C'estoit à l'imitation de ceux de Grece, appelez Olympiques.

Lign. 18. badiner: ignauia, est autre chose: mais il faut estimer que Tacite quand il blasme, use tousiours des plus cruels mots qu'il peut.

Lign. 21. combattre. l'ay suivi Lipsius.

*Fueil 89. lign. 1. Cestes, estoient gantelets & brassals, faits de courroyes, avec des anneaux de plomb. Virgile au 5. liure de-
scrit ce combat.*

Lign. 4. science. Ciceron de Senectute: quę scientia iuris augurij: de sorte qu'il semble, qu'il faille lire. An ius augurum.

Fueil. 90. lign. dern. boisson sacree. Les fontaines & riuieres, estoient estimees sacrees. Je croy à fin que ce qui seruoit au public ne fust gasté.

Fueil. 92. pag. b. lign. 3. surnom. Car elles estoient surnommees, comme Colonia Agripina, Vienna Pretoria.

Lign. 20. Comices. C'estoit vn lieu ou s'assembloit le peuple, pour donner sa voix aux pretendans les magistrats.

Fueil. 93. Silures. Je ne ly pas siluas.

Fueil. 95. pag. b. lign. 13. le lieu est corrompu au Latin.

Fueil. 96. lign. 3. cheualerie. l'ay ainsi tourné Vexillarij, suivant ce que dit Vegere.

Pag. b. lign. 2. corps d'hommes. Le mot homme com-

ANNOTATIONS.

prend les femmes.

Fueil. 97. lig. 11. sans faillir. J'ay pensé qu'il sentëdit des Romains, plus tost que Bretons.

Lig. 20. pareille aux anciennes victoires, les Césars n'eurent ennemis puissans que les Parthes. Et pour ce on ne peut guieres remarquer de sanglantes victoires, comme durant les Consuls: qui en gaignoient de vint, trente, & quarante mil hommes morts sus le champ. C'est pourquoy Tacite se plaint qu'il est réduit au petit pied, ne pouuant parler de prises de grandes villes, deffaites de puissantes nations: ains de choses de ville.

Pag. b. lig. 26. batailles: ie l'ay mieux aymé que guerre.

Fueil. 99. Prefect de la ville. Je croy inge criminel: & le Preteur comme inge ciuil.

Fueil. 101. lig. 16. de l'huile. c'estoit pour froter le corps des luteurs: à fin d'empescher la prise.

Ligne. 4. On pense, ceste clause n'est entiere au Latin.

Pag. b. lig. 14. à la maniere des anciens. Ils estoient battus de houssines (car ie ne pèse pas, que ce fussent d'autres verges, que celles que nous voyons pourtraies aux faisceaux des luteurs) & puis on leur coupoit la teste.

Lig. 19. sans que pour autre occasion, nulla necessitate Senatus, aucuns veulent principalement au Senat, qui n'estoit obligé ne contraint à suiure la rigueur des loix.

Fuillet 102. lign. 1. silence: Il faut lire, rompit la crainte seruite des autres puis que Rhenan dit qu'il y auoit seruitium au liure du Roy Mathias: & Lypsius en celuy de Freneſe

Fueil. 103. lig. 16. complexions ordinaires Latin cognatis moribus, naturelles.

Lig. 21.

Lign. 21. hair de Neron. *Latin* apud Neronem aduersum experiebatur.

Pag. b. lig. 29. bien manier. *al.* sinon la moderer.

Lig. 17. outre cela *al.* de vostre part.

Fol. 104. lig. 24. reuenu annuel, ie ly in annuum reuocabo: comme m'a appris vn sçauant personnage: si in animū plaiſt d'auantage, il faut lire ie le reſerueré pour mon eſtude, ou ie l'emploieray en contemplation.

Fueil. 105. pag. b. lign. 24. duit. *le ly* factus natura. si i'eusse voulu ſuiure vne trāſlatiō d'une piece de ceste harēgue, qui eſt au bout d'un abrégé de *Aſſe* de mōſieur Bude: Dieu ſçait cōme i'eusse eſté acouſtré. Voyla que c'eſt de ſe meſſer de trāſlater: car il eſt certain que les translations ne durēt guieres plus d'un aage.

Fueil. 106. pag. b. lig. 3. Dictateur. Sulla de pere & de mere, venoit des dictateurs, Sulla & Cesar.

Fueil. 107. lign. 12. l'accompagneroient, aucuns veulent dire. Que la pitié qu'on auroit de ſa vie paisible, de ſa retraitte, de ſa grande nobleſſe, luy feroit trouuer des gens de bien, & des hazardeux:

Fueil. 108. pag. b. lign. 11. reprint ſa femme. Il y a faute au *Latin* & i'ay ſuyui ceux qui liſent, repetitum coniugium.

Lign. 11. vouloit mal: inſenſam, eſt meilleur que courroucée.

Fueil 110. lign. 17. feroit pas longue. Iam à vita exēpta, elle fut ia cōme morte: ou par les preſages de ſes malheurs, ne iouit des commoditez de la vie: n'auoit encores celles de là mort. Tout cela n'eſt pas ſi cler; que ce qui eſt au texte.

Pag. b. lign. 5. ce qui ſeruoit au temps paſſé: c'eſt à dire les proceſſions, remerciemens des dieux.

ANNOTATIONS.

LIVRE XV.

Fueil. 112. lig. 25. lié d'un diadème. Ce diadème n'estoit pas une couronne, ains un bandeau blanc, ou de couleur rouge. Et le portoient sus la teste, à la façon que nous voyons aux testes de Maure en armoiries.

Lign. 9. que la faire: bellum habere, quam gerere malebat, se tenir sus la deffensive.

Pag. b. lign. 29. ou la ville n'estoit fortifiée de la riuere: qua fluuius diffiditur. Quelqu'un m'a voulu faire croire, qu'il faillloit dire, ou la ville est diuisée & fendue par la riuere.

Fueil. 115. lign. 15. Catapultes & Balistes. C'est ce que j'ay dit cy dessus Dondaines & Ribaudequins. Il a fallu obeir à l'ignorance: toutes fois ie soutien que noz viels mots François, doiuent estre pratiquez: quand il ne s'en trouue point de meilleurs. Les Ribaudequins estoient grosses arbalestes, couchees sus les murailles: lesquelles se bandoient avec des manuelles, qui estoient des deux costez de la queue: & portoient bien loing un traict, qui auoit un carreau de fer au bout: lasché de telle roideur, que bien souuent deux hommes estoient percez d'un seul coup.

Lign. congez donnez. Commeatibus, se peut aussi interpreter, pour allees & venües: à le prendre de Comeo.

Fueil. 117. lign. 6. la plus honorable. Ce passage est un peu malaisé, mais il entend de la couronne Ciuique. Laquelle ne se donnoit au soldat, que par la main de l'Empereur. Iusques à ce q̃ Tibere permit au chef d'une armee en Afrique, de la donner ainsi que ce mesme auteur recite. Il veut donc dire: cōpagnons nous allös sauuer la vie, à autät ou plus de nos bourgeois que nous sommes: si donc suiuant la coustume, chacun de nous est couronne de la main de l'Empereur: se trouua il iamais, que tant de

de gens ayent tout à la fois este honorez. Ceste couronne encores qu'elle fust la plus honorable, n'estoit que de chesne.

Fueil. 118. lign. 11. ce pendant. L'ay adiouste Petus : car il m'a semblé que ce fut luy, qui fit le pont. Encores que le Latin parlant en impersonnel, laisse en doute si se firent les Romains ou Parthes qui le firent.

Lign. 16. piques croisees. Tite Liu. au 3. liure, parle de ceste ignominie.

Pag. b. lign. les autres qui estoient à l'entour. Latin, proximus quisque, semble signifier les princes ses parens.

Fueil. 119. lign. 18. Les petis compagnons. Latin Inter minores semble de prime face, qu'il fallut dire ceux qui estoient les plus affligez, comme estoient les soldats de Petus.

Fueil. 120. lign. 28. des Iules, pource que Caius & Auguste les firent.

Fueil. 122. lign. 14. religion Atique. aucuns pensent que ce lieu soit corrompu.

Pag. b. lig. 3. quant & leurs dangers. le Latin est obscur.

Lign. 4. paix avecques, il faut au Latin, pacem inhonestam, & dire faire vne paix deshonneste.

Fueil. 123. lign. 19. ignorance. C'est le Latin, on eust peu dire le peu d'experience, &c.

Pag. b. lign. 13. reueuë de son armee. Voyez Plutarq. en la vie de Marcel. La ou son opinion du chapeau, que portoient les soldats, est confirmee par Tertulian de corona militis.

Lign. 23. guerre aux Corsaires. Voyez Plutar. en sa vie.

Fueil. 124. lign. 14. Megistanes Armeniens, ces Megistanes n'estoient pas vne nation, ains des grands seigneurs: ainsi que porte le mot. Voyez ce que dit Suetone en la vie de Caligule.

ANNOTATIONS.

Regum etiam regem & exercitatione venandi & cō-
uictu Megistanum abstinuisse.

Lig. 23. gouverneurs, ce lieu est corrompu.

Fueil. 124. pag. b. lig. 3. les corps, reliquias, les os.

*Fueil. 125. lig. 14. de cheual. Il entend parthes : comme
par le mot de legions, les Romains.*

*Pag. b. lig. 20. fanfare. Encores que ce ne soit pas un mot,
signifiant autre chose que le son des trompettes: i'en ay vsé pour
ce qu'il est icy question de Vanité.*

*Fueil. 127. lig. 5. Empereurs, summe cure: autres pen-
sent qu'il faut dire autrement: mais ie me tien à ce sens.*

*Lig. 21. bon estat, Latin cuncta immota & prospe-
ra, ny auroit rien de changé.*

*Pag. b. lig. 19. qu'en la ville, Latin, nil vsquam perin-
de letum.*

*Fueil. 128. lig. 4. cabinet, lupanania, c'eust esté trop de di-
re bordeaux.*

*Lig. 11. naturelles & contre nature: est le plus signifiant
delicita & illicita.*

*Lig. 17. deux Auspices, il faut restablir ce passage par
Sulp. Seuer. qui dit missi auspices, dos & genialis torus.
des Auspices furent enuoyez le dot fut constitué, le
lit de l'espousée appresté. l'eusse nommé ceux de qui i'ay a-
pris ces corrections, & qui m'ont ayde à reuoir partie de ceste
translation: mais i'ay craint qu'on leur attribue aussi mes fau-
tes: de sorte qu'il sera assez temps de ce faire, quand ce liure por-
tera mon nom.*

*Fueil. 129. page b. lig. 20. appellees Isles. Cestoient des
maisons separees des autres: que nous pourrions appeller mai-
sons à quatre coings.*

Lig. 25.

Lign. 25. voir en personne. *Virgil.* 8. liure.

Fueil. 130. l. 9. deux feux. *Il y a de la faute au Latin.*

Pag. b. lig. maisons particulieres, *Lyppius* pense qu'il y a faute au Latin. C'est pourquoy ie me suis dispense de suiure la commune opinion.

Fu. 131. li. 4. Gaby ou d'Albe, voyez *Vitruue* liure 2. ch. 7.

Lig. derniere lits à banqueter. *Le&isternia.*

Pag. b. lign. 7. Ie croy que l'on me pardonnera, d'auoir ainsi alteré le François. *Le Christianisme* n'a que trop d'ennemis. On pense que ce fut lors que *S. Pierre* fut crucifié.

Fu. 132. pa. b. lig. 10. *Spartac°*, voyez *Plu.* en la vie de *Craffus*

Lig. 20. Affrique c'est vent d'auul, lebeche, ponant, sud est.

Fueil. 133. pag. b. lig. 9. Prince i'ay ainsi entendu imperiú.

Fueil. 135. lig. 21. vn present de la Republique, *Monfieur Budé* a dit quelque part. Qu'il n'en voulut tout seul auoir la charge & gouuernement, qui me plaist aussi.

Fueil. 136. pag. b. lig. 15. plus luisant, mucronem ardescere.

Fueil. 139. *Lig.* 19. portoit ia la main il faut mettoit ia la main à son spee.

Lig. derniere que le bruit de al. que le bruit de ceste coniuration seroit grand: ce qui peut beaucoup en nouuelles entreprises.

Pag. b. lig. 19. assiste pas ceste clause veut aussi estre interpretée par aucun, en ceste sorte. Pendât que le soldat qui estoit la principale force de *Nerô* n'y estoit pas: & q le peuple l'abandonnoit: pendât que luy à l'imitation de ces ancestres, pèdât q pour l'honneur de sa posterité il expose tellemēt sa vie; qu'il mōstre qu'une telle mort est à souhaitter.

ANNOTATIONS.

Fueilles 140. lig. 3. de maison pareille, Latin degenerem semble signifier derogeant à la noblesse.

Fu. il. 41. pag. b. lig. premiere vn peu asscuree, molitus se peut aussi tost entendre de Senèque qu'il fut vn peu atendri.

Lign. 15. que m'en monstriez le chemin. latin non inui debo exemplo: se peut aussi dire, ie ne seray marri de tel exemple. Mais cela est bien cru, & aussi incertain que le Latin.

Fucil 42. pag. b. lig. 14. homme de bien. le Latin disant insoniti, pourroit aussi entendre: qui ne sçauoit rien de la partie.

Fucil. 143. lign. 8. soubfrian. aucuns lisent renitès: & moy renidens.

Pag. b. lig. 3. bastleur. I'ay tousiours dit Histrion. Mais icy i'ay usé du mot François qui luy pouuoit faire plus de honte.

Lign. creuser vne fosse. ceste coustume est encores pratquee en Allemagne, cõtre ceux à qui l'on veut coupper la teste. le croy à fin que les patiens estans debout dedans la fosse, le Bourreau soit plus haut qu'eux, pour mieux adresser son coup.

Fueil. 144. lign. 23. forme de denontiation. il faut lire au Latin iudiciij non pas indicij: de sorte qu'il faut dire, forme d' iugement.

Fueil. 145. lig. 12. maisons, car ie ly domos, & non pas dona.

Pag. b. lig. 2. chassé. c'est à dire banni.

Lig. 18. Manipulaire. c'est à dire soldat du Manipule il y en auoit 60. à chacun.

LIVRE XVI.

Fucil. 148. pag. b. lig. 5. s'asseurans qu'on le croiroit facilement. securi de facilitate credentis: se peut prendre

pour la creance qu'en auoit Neron.

Fueil. 151. lig. 4. mourut de vieillesse. *Caricilis* au Latin: & *senecta eius expectabatur*, autrement le texte commun est difficile & malaisé (à mon iugement) de pouuoir entendre.

Fueil. 152. li. 9. prians chacun d'eux &c suos superstitios & morituros. Il veut dire en somme que le plus viel prioit les dieux de mourir le premier, encores qu'il fust assure que ceux qu'il ne vouloit voir mourir deuant soy, ne la deuoient pas faire longue apres luy.

Lig. 22. affranchi & accusateur. Il semble entendre qu'une seule personne fust recompensee, & que l'affranchi fut quant & quant accusateur.

Fueil. 153. consolations. al. consultations.

Fueil. 154. lig. 18. dans la ville. Il entend ainsi domi.

Fueil. 155, lig. 2. l'iniquité. aucuns lisent au Latin *exilij*, & lors il faudroit de son ban.

P. b. lig. 19. l'a arresté. le Latin *atinebatur*, est ambigu, & l'aïsse incertain si c'estoit par force: ou s'il luy plaisoit y demorer.

Fueil. 156. p. b. li. 14. accoustrement *Tragic: habitu Tragico*. Je sçay bien que *habitus* signifie aussi contenâce, mais ie soutien qu'en cest endroit, il signifie accoustrement, & que nostre mot habit & habillement en viennent.

Fueil. 157. li. insolent & desbauché. Il m'a semblé qu'il falloit ainsi tourner *lasciuia* exprobrent.

Fueil. 158. li. acte Royal. non pas que ce soit acte de Roy, faire mourir les gens de bien: mais il entend ainsi les mots, *regio facinore*, pource que ordinairement les Rois le souloient faire.

Fueil. 159. Palais. l'ay tourné ainsi *Basilicas*, de ces *Basiliques* ou Palais, parle Vitruue.

ANNOTATIONS.

Pag. b. lig. 27. proposer. le Latin censeret, signifie aussi ordonnast, le vray sens du mot Latin est difficile à représenter en François: pour la diuersité qu'il y a de nostre maniere de faire en opinant aux conseils: & celle des anciens Romains.

Lig. 29. par son silence condamner toutes choses.

Fol. 161. pag. b. lig. 22. en quoy, ce passage est corrompu.

Lig. 28. charges publiques, c'est, ne in republica haberetur.

FIN DES ANNOTIONS.

FAUTES D'OMISSION OV D'IMPRESSION.

6 Fol. 6 page b. ligne 17. estrangeres fol. 7 p. b. 25. Fori. fol. 9 lig. 4. remonstroient. fol. 10 legiens de cauer. fol. 12. p. b. l. 18 m'admonestent fol. 13. l. 7. A ce que. fol. 14 p. b. li. 11 s'y precipiter. 11. de-mourroit. fol. 17. li. 27. toute compasison fol. 19 l. 12. Euid. p. b. l. 18 il ne l. 23 images fol. 14 p. b. l. 4 d'autant que. fol. 27. l. 5. vspences. fol. 28 b. l. 3 foubi les mesmes. doit estre le commencement du 6 chapitre L. 10 Sesterces fol. 19 li. 7. juu E/ conti. fo. 31. l. 24 autres li. 27. de l'honneur. p. 4 b. li. 7. cheru grandement. fo. 32. l. 16 tint cui fol. 33 l. 6 tournoioient fo. 34 l. 10 commandant. p. b. l. 16. monstrent f. 31. l. 7. pour ce que p. b. l. 19 de Venutius fol. 36. p. 8 l. 12. cassé fo. 38. li. b. corps. Il estoit avec cela faconné p. b. l. 9 & Casper Cent. l. 15 redantoient l. 24 Vindius fo. 39 li. 9. résoudre p. b. l. 4 dextres fo. 40 l. 24 lules fo. 44 p. b. l. 25. Mais. fo. 47. l. 21 robute 16 Sinuesse fo. 49 p. b. l. 7. mort. Les. fo. 50. l. 3. par le consl. l. 14. ducil de Claude. fo. 113. l. 10. se plaignoit qu'on luy l. 11. Mais Corbulan pros. fo. 54 l. 2. Qui 6. graues p. b. 27. donnee fol. 56 p. b. l. 28. par les fo. 58. li. 3. Sillane fol. 59. l. 9. Man Agrip. l. 25. & 26. vniuers. l. der. pour me connu. p. b. accus. lesquels fol. 63 l. 11 poi-zeomp p. b. 27. passe-temps fol. 68 p. b. l. 28. fori fol. 72 p. b. l. 16. la reuenoit plus. fo. 73 p. b. l. 9. attirer fo. 75 l. 13. Sone p. b. l. der. feste à ces Bar fo. 77. p. b. l. 18. Inhomies. fo. 80. p. b. l. 2. Baie arrousee par fo. 81. Ateruue fol. 82. l. 10 mourust. l. 16. qu'il vouloit luy p. b. l. 17. Aussi Agrip. fo. 83 p. b. l. der. ceux des villes fol. 88 p. b. l. 23 des facons estrangeres fo. 97 p. b. l. 22. general. loquel fo. 99. p. b. li. 12. Consulaire est fo. 103 l. 13. Soffanie p. b. l. 26. & huit depuis fo. 107 l. der. le mettois fo. 113 p. b. l. 11 guerre. Auoit fo. 114. l. 4. Mefie l. 25. Calane p. b. l. 26. fort d'huer. fo. 120. l. 23. Prem res fo. 123. l. 13. perdoit p. b. Alclutens fo. 124. l. 12. chassant l. 17. les fori E/ les. fo. 133. l. 2. Plai-sance l. 15. allie fo. 136. l. 11. renuerser par terre. l. 10. fortune qui est en la. p. b. l. 8. tout pent. l. 11. re-tourne fol. 137. l. 10. demourroit l. 21. Que ce fo. 139 p. b. l. 22. efmeat l. 19. ia prat fo. 145. l. 19. est leiffet pag. b. l. 8. confina Clu. fol. 159. pag. b. l. 9. condamner routes.

APX. ANNOTATIONS.

Fol. 5. pag. b. lig. 4. i'wuzim. li. b. deuiner. fol. 4. p. b. l. 10. Caminefate. fol. 9. l. 7. Ter. P. R. fol. 10. l. 14. qui seut bien deduire un propos. fo. 11. p. b. l. 10. foudes: les Bricoles & les Dem.





FINE



R. SALVAREZZA
REDAZIONE
VIA ... 52
TEL. ...

1969

